

新磨曲

宋 歐陽修 宋 祁 撰

中 華 書 局

卷二〇六至卷二一七下(傳)第 一 九 册

唐書卷二百六

列傳第一百三十一

外戚

王仁皎 獨 孤懷 恩 守一 武士彟 楊國忠 士稜 李翛 士逸 鄭光 承嗣 三思 攸暨 韋温

誅,噍類不遺,蓋數十年之寵,不償一日之慘,甲第厚貲,無救同坎之悲,寧不哀哉!代、德 而降,閹尹參嬖,後宮雖多,無赫赫顯門,亦無刀鋸大戮。 貞觀時,內里無敗家。 玄宗初年,法行近親,裏表脩敕。 凡 外戚成敗,視主德何如。 高、中二宗,柄移豔私,產亂朝廷,武、虛諸族,耄嬰頸血,一日同汙鉄 主賢則共其榮,主否則先受其禍。故太宗檢貴倖,裁賞賜, 天寶奪明,委政妃宗,階召反虜,遂喪天下。 故用福甚者得禍酷,取名少者蒙 楊氏之

列

傳

第

百

Ξ

+

外戚

五八三三

實輕,理所固然。 若乃長孫无忌之功,武平一之識,吳潋之忠,弗緣內寵者,自見別傳云。

以姪 養宮中。 獨 孤 懷恩,元貞皇后弟之子也(1)。父整,仕隋爲涿郡太守。懷恩之幼,隋文帝獻皇后 逮長,稍學記書,而居財不訾,喜交豪猾博徒。爲哪令,以疾免。

恩稍怨望。帝嘗與戲曰:「弟姑子悉有天下,次當爾邪?」 懷恩內喜,以爲天命。旣而居忽 節擊堯君素於蒲州,不克,帝遣懷恩代將。性貪,寡算略,數戰無功,士喪沮,詔書切責,而懷 高 祖 平京師,拜長安令,頗嚴明,如職而辨。 帝受禪,擢工部尙書。初, 處州刺史章義

忽,咤曰:「我家渠獨女子富貴也?」因謀亂。

賊。 周。 絕秦王餉 懷恩與麾下元君寶、解令榮靜謀引王行本軍與武周連和,割河東以陷之,引羣賊取永豐倉 帝敕懷恩與永安王孝基、陝州總管于筠、內史侍郎唐儉擊夏,爲金剛所掩,諸將皆沒于 君寶與開府劉讓私侮懷恩曰:「不早舉大事,以及斯辱也。」故謀寖露。 是時,虞鄉南山多宿盜,而劉武周使宋金剛略澮州,帝發關中軍屬秦王,屯柏壓。 道,長驅三輔。 會君素死,而行本得其兵,部畫已定,而夏人呂崇茂殺縣令應武 及秦王敗武周 繇是

於美良川,懷恩逃歸,帝命率師攻蒲州。

君寶聞日:「王者不死,果其然!」唐儉知狀。

市,籍入其家。 至,具得反狀。 周還劉讓求罷兵,因白發懷恩等姦。于時行本舉蒲州降,懷恩勒兵入城,帝方濟河而讓 帝召之,懷恩不知也,單舟以來,卽縛之,窮案黨與,縊死于獄,以首徇華陰

列功臣上。 后監朝,尊爲忠孝太皇,建崇先府,置官屬,追王五世。 后革命, 故崇贈抖州都督、司徒、周國公。咸亭中,加贈太尉兼太子太師、太原郡王,配享高祖廟廷, 封應國公,歷利、荆二州都督。卒,贈禮部尙書,諡曰定。高宗永徽中,以土襲仲女爲皇后, 能罷繫劉弘基等,其意可錄,且嘗禮我,故酬汝以官。今胡迂妄媚我邪?」累遷工部尙書,進 參軍從平京師,爲光祿大夫、義原郡公。 自言嘗夢帝騎而上天,帝笑曰:「爾故王威黨也,以 公,威、君雅無與,徒寄坐耳,何能爲?」[德平亦止。 兵起,| 土護不與謀也。 以大將軍府鎧曹 等皆背征三衞,罪當死,奈何授之兵?吾且劾繫之。」||土護曰:「此皆唐公客,若爾,必大 爲行軍司鎧參軍。 武士虁字信,世殖貲,喜交結。 募兵旣集,以劉弘基、長孫順德統之。 王威、高君雅私謂士護曰:「弘基 高祖嘗領屯汾、晉,休其家,因被顧接。後留守太原,引 更於東都立

列

武氏七廟 追册爲帝, 諸妣皆隨帝號日皇后。 先天中,有韶削土護偽號,仍爲太原王, 廟

姓「蝮氏」,絕屬籍。 即導帝幸其母所,惟良等上食,后寘堇焉,賀蘭食之,暴死。 惟良及弟淄州刺史懷運與岳牧集泰山下,於是韓國有女在宮中,帝尤愛幸。 等于外,以示退讓。由是元慶斥龍州,元爽濠州,惟良始州。 國夫人。 妻郭氏,不顯。 士虁娶相里氏, 生子元慶、元爽。 又娶楊氏, 生三女。 於時元慶已官宗正少卿,元爽少府少監,兄子惟良 |土虁卒後,諸子事楊不盡禮,銜之。 后立,封楊代國夫人,進爲榮國,后姊韓 元爽緣坐死,家屬投嶺外。 衞尉少卿。 后歸罪惟良等,誅之,諷有司改 元慶死, 元爽流振州。 乾封時, 元女妻賀蘭氏,早寡。 楊諷后上疏出元慶 后欲并殺之, 季女

惡,流雷州 畢,褫衰粗,奏音樂; 敏之乾匿 與刊撰。 后取賀蘭敏之爲士養後,賜氏武,襲封,擢累左侍極、蘭臺太史令,與名儒李嗣眞等多 1自用; 敏之韶秀自喜,烝於榮國,挾所愛,佻橫多過失; ,表復故姓,道中自經死。 司衞 太平公主往來外家,宮人從者,敏之悉逼亂之。后疊數怒, 少卿楊思儉女選爲太子妃,告婚期矣,敏之聞其美,彊 乃還元爽之子承嗣奉士養後,宗屬悉原。 榮國卒,后出珍幣建佛廬徼福, 私焉; 至此暴其 楊喪未

士稜字彥威,少柔愿,力于田。 官司農少卿,宜城縣公,常主苑囿農稼事 卒,贈潭州

都督,陪葬獻陵。

間人陳破賊計。賊平,擢授益州行臺左丞,數言當世得失,高祖嘉納之。終韶州刺史。 <u></u>士逸字逖,有戰功,爲齊王府戶曹參軍,六安縣公。從王守太原,爲劉武周所執,嘗遣

輕忍禍,聞左司郎中喬知之婢窈娘美,且善歌,奪取之,知之作綠珠篇以諷,婢得詩恨死。承 未幾辭位。 承嗣旣還,擢尙輦奉御,襲周國公,遷祕書監、禮部尙書。俄以太常卿同中書門下三品, 垂拱初,以春官尚書同鳳閣鸞臺平章事,改納言,代蘇良嗣爲文昌左相。 性暴

嗣怒,告酷吏殺之,殘其家。

圧,士讓之孫攸寧爲建昌王、攸歸九江王、攸望會稽王,士逸孫懿宗河內王、嗣宗臨川王、仁 誅 |讓楚王,謚僖;||土逸蜀王,諡節。 大臣不附者,倡議追王先世,立宗廟。又王元慶曰梁王,諡憲,元爽魏王,諡德,后從父 初,后擅政,中宗幽逐,承嗣自謂傳國及己,武氏當有天下,卽諷后革命,去唐家子孫, 又贈兄子承業陳王。而承嗣爲魏王,元慶子三思爲梁

列傳

王,承業子

延暉嗣陳王、

延祚

咸安王。

承嗣實

封千戶,

監脩國史。 <u>他止恆安王、重規高平王,承嗣子延基南陽王、延秀准陽王,三思子崇訓高陽王、崇烈新安</u> 範河間王, 仁範子載德潁川王, 士稜孫攸暨千乘王, 惟良子攸宜建安王、攸緒安平王、從子 太子矣。久之,遷太子太保,不得志,鞅鞅憤死,贈太尉、丼州牧,諡曰宣 承嗣爲左相,而攸寧爲納言,故皆罷。 已,奏請責論嘉福等,不罪也。怨長倩等,皆以罪誅。以特進罷。未幾,復同鳳閣鸞臺三品。 |福,使洛州人上書請立已爲皇太子,以觀后意。 后問岑長倩、格輔元,皆執不宜。 又與三思同三品,不及月俱免,復拜特進。 密諭后黨鳳閣舍人張嘉 承嗣 后决意還

事,後忿爭,語聞,后怒,令自殺,以延義代王 延基襲爵,后嫌斥其名,更日繼魏王。 長安初,與妻永泰郡主及邵王私語張易之兄弟

規鄶國,延義魏國, 級:三思王德靜郡,攸暨壽春,懿宗爲耿國公,攸寧江國,攸望葉國,嗣宗管國,攸宜息國,重 柔昏不斷,又素畏太后, 中宗復位,侍中敬暉等言諸武不當王,與羣臣白奏:「事不兩大,武家諸王宜皆免。」帝 攸緒巢國,崇訓酆國,延祿爲咸安郡公。 ,且欲悅安之,更言攸暨、三思皆與去二張功,以折暉等, 直臣宋務光、蘇安恆上書言: 纔降封

載德終湖州刺史,諡武烈。 攸歸歷司屬少卿,至齊州刺史,事母孝,姊亡期,不嘗五辛, 「武諸王饗封,不厭人心。」帝不

·悟。

語 輒流涕。 攸止絳州刺史。 三人死太后時,不及削封。

還,拜左羽林大將軍。 **攸宜歷同州刺史,萬歲通天初,爲淸邊道行軍大總管,討契丹,后親餞白馬寺,** 景龍時,遷右羽林,卒。 總禁兵前後十年。 嗣宗終司衛卿。 師無功

擅營治。 重規爲汴、鄭二州刺史,未至,役人營繕,后怒,貶廬州刺史。自是著令:諸王爲州,不得 突厥之叛,以重規爲天兵中道大總管,與沙吒忠義、張仁亶引衆三十萬討之。 還爲左金吾衞大將軍,終衞尉卿

以太府卿貶死春州。 中郎將。 訓 啜執延秀進寇媽、檀,故延秀不得歸。 天裳』,神孫非公尙誰哉? 延 延秀納之,詔右豹韜大將軍閻知微、右武衞郎將楊鸞莊齎金幣送至突厥所。 羽林大將軍閻敬容爲西道後軍,兵十五萬後援。 秀益自肆。 死,遂私侍主,後因尙焉。以太常卿兼右衞將軍,封恆國公。三思死,韋后復私延秀,故 延秀母本帶方人,坐其家沒入奚官,以姝惠,賜承嗣,生延秀。突厥默啜薦女和親,后令 宗兄崇訓尚安樂公主,數與宴昵,頗通突厥語,做虜謳舞,麥度閑冶,主愛悅。會崇 主府倉曹參軍何鳳說曰:「今天下係心武家,庶幾再興。 諸武屬坐延秀誅徙者略盡, 」因勸服阜衣惑衆。 神龍初,默啜請和,因延秀送款,還,封柏國公,左衞 章后敗, 尚與主居禁中, 同斬肅章門。 獨載德子平一以文章顯,與攸緒常避盛 且讖曰『黑衣神孫被 知微等潛約默 攸望

满,故免,自有傳。

聖曆 官尙書罷。 取民貲產,毀族者凡十七八,呼天自冤。 初,同 攸寧,天授中擢累納言。 鳳閣鸞臺平章事。 神龍初,終岐州刺史,贈尙書右僕射。 自承嗣、三思罷政事,間一年,攸寧、三思復當國,置句使,苛 踰年,以左羽林衞大將軍罷,俄還納言。 久乃罷爲冬官尚書。 築大庫百餘舍聚所得財,一昔火,不遺一錢。以冬

國 大使屯邊。 三思當太后時,累進夏官、春官尙書,監脩國史,饌爲王。 同鳳閣鸞臺三品, 踰月去位。 又檢校內史,罷爲太子少保, 契丹陷營州,以楡關道安撫 遷賓客,

也。 |萬壽山,請太后歲臨幸,已與二張扈侍馳騁,竊威福自私云。 工役鉅萬萬,百姓愁歎 蠱,三思痛屈節,爲懷義御馬,倡言昌宗爲王子晉後身,引公卿歌咏淫汙, 靦然如 后春秋高,厭居宮中,三思欲因此市權,誘脅羣不肖,卽建營三陽宮於嵩山, 思性傾諛,善迎諧主意,鈎探隱微,故后頗信任,數幸其第,賞予尤渥。 薛、二張方烝 興泰宮於 人而 不恥

馬都尉、太常卿、兼左衞將軍。 味道等及沈佺期、宋之問諸有名士,造作文辭,慢泄相矜,无復禮法。一宗復位, 崇訓之尚主也,三思方輔政,中宗居東宮,欲寵耀其下,乃令具親迎禮。 三思進位司空、同中書門下三品,加實戶五百。 宰相李嶠 固辭,進開 擢崇訓駙

府儀同三司。會降封,裁減實戶。俄以太后遺詔還所減,而封崇訓鎬國公。

場,以利其澤,用功不訾,人苦之。 合宮、永昌、登封、告成云。明年春,大旱,帝遣三思、攸暨禱乾陵而雨,帝悅。三思因主請 是時,起毬場苑中,韶文武三品分朋爲都,帝與皇后臨觀。 承業,不可言中興,所下制書皆除之。」於是天下名祠改唐興、龍興云。 復崇恩廟,昊、順二陵,皆置令丞。其黨鄭愔上聖感頌,帝爲刻石。 宮中,反易國政,數日而逐範等皆失柄,所斥去者悉還。 詔羣臣復循太后法。三思建言: 「制韶如貞觀故事。且太后遺訓,母儀也,太宗舊章,祖德也。沿襲當自近者始。」帝褒答。 「大帝封泰山,則天皇后建明堂,封嵩山,二聖之美不可廢。」帝韙其言,遂更名五縣日乾封、 初,桓彥範等已誅二張,薛季昶、劉幽求勸幷誅三思等,不從。翌日,三思因韋后潛入 崇訓與駙馬都尉楊愼交注膏築 補闕張景源建言:「母子 。補闕權若訥又言.

兵圍三思第,幷崇訓斬之,殺其黨十餘人。 三思旣私韋后,又與上官昭容亂,內忌節愍太子,即與主謀廢之。太子懼,故發羽林

謀殺之,爲冉祖雍、宋之愻、李悛所白,皆坐死。因逮染五王,而崔湜遣周利貞就殺之,故祖 者殆是哉。」與宗楚客兄弟、紀處訥、崔湜、甘元柬相驅煽,王同皎、周憬、張仲之等不勝憤, 時疾三思姦亂竊國,比司馬懿。 其忌阻正人特甚,嘗曰:「我不知何等名善人,唯與我

第一百三十一

外戚

六

勳郎 疏,極言三思過惡,有司殺月將,逐軫惡地。 黃門侍郎宋璟執奏,俄見斥。 時政。」以爵賞自相崇樹,凡構大獄,汙點善良,破壞其宗,天下爲蕩然。始章月將、高軫上 雍 與御史姚紹之等五人,號「三思五狗」。司農少卿趙履温、中書舍人鄭愔、長安令馬構、司 中崔 日用、監察御史李愧,託其權,熏炙中外,其尤干政事者,天下語曰:「崔、冉、鄭,亂 其權大抵 如 此。

太子首祭三思柩。睿宗立,以父子皆逆節,斲棺暴尸,夷其墓。 旣死,帝爲舉哀,廢朝五日,贈太尉,復封梁王,諡曰宣。 追封崇訓魯王,諡曰忠。 主以

雖 小陷冀州,殺人無餘種,以懿宗暴忍似之,故號稱「兩何」,相語曰:「唯此兩何,殺人最多。」 自賊中歸者,一切抵死,先剔取膽,乃殺之,血沫前,而舉動自如。始萬榮入寇也,別帥何阿 懼不知所出,欲棄軍走,或勸曰:「賊雖衆,無輜載,以鈔剽爲命,若按兵老之,擊其歸,可成 神兵道大總管討之,而婁師德、沙吒忠義並爲總管,兵凡二十萬,次趙州。懿宗聞賊且至, 大功。」懿宗不暇計,退保相州,賊遂進屠趙州。後萬榮死,懿宗復與婁師德撫循河北,人有 周、來等不能繼也。一神龍初,遷太子詹事,終懷州刺史。 |懿宗以司農卿爵爲郡王、歷懷、洛二州刺史。|神功元年,孫萬榮敗王孝傑兵,詔懿宗爲 初,懿宗|天授間受詔訊大獄,誅大臣王公,皆深排巧引,內刑塹中,無有脫者。 其險酷

忤,專自奉養而已。 復王定,加戶千。 進 封 定王,實封戶六百。 攸暨自右 1衞中鄓將尙太平公主,拜駙馬都尉, 固辭,進開府儀同三司。延秀之誅,降楚國公。攸暨沈謹和厚,於時無 景龍中卒,贈太尉、井州大都督,還定王,諡曰忠簡。坐公主大逆,夷 遷麟臺監司祀卿。 長安中,降王壽春,加特進。 累遷右衞大將軍。 天授中,自千乘郡王 中宗時, 拜司徒,

州,后二女弟逃還京師。帝復政,是日韶贈玄貞上洛郡王、太師、雍州牧、益州大都督,温父 衞 柩,官仁軌左羽林大將軍,汝南郡公。 玄嚴魯國公、特進、幷州大都督。遣使者迎玄貞喪,詔廣州都督周仁軌討甯承,斬其首祭崔 累豫州刺史。帝幽廬陵,玄貞流死欽州,妻崔爲蠻首甯承所殺,四子洵、浩、洞、泚同死容 日褒德,閔日榮先,置令丞,給百戶掃除。 尉卿、淮陽郡,泚太僕卿、上蔡郡,並葬京師。 章温者,中宗廢后庶人從父兄也。后父玄貞,歷普州參軍事,以女爲皇太子妃,故擢 柩至,帝與后登長樂宮望而哭,贈酆王,諡文獻,號廟 贈洵吏部尚書、汝南郡王,浩太常卿、武陵郡,洞

列

五八四四

少保同中書門下三品,遙領揚州大都督。温旣見天下事在手,欲自殖以牢其權,引用友黨 尙 不相一,公卿雖畏伏,然温無能,不如諸武凶而熾也。 軍 成 《安公主,温從弟濯尙定安公主,並拜駙馬都尉,捷爲右羽林將軍。 連 温 拜左羽林大將軍,曹國公。 初試吏,坐贓斥。 神龍初,擢宗正卿,遷禮部尙書,封魯國公。 后大妹嫁陸頌,進國子祭酒。 仲妹嫁嗣魏王邕。 弟猾,自洛州戶曹參 景龍三年,温以太子 **滑子捷**

士,常在北軍,無所造作。 贈 司徒、丼州大都督。湑兄弟頗以文詞進,帝方盛選文章侍從,與賦詩相娛樂,湑雖爲學

|今質從容日:「濯於賊非親,但以貨爲請,濯雖勢重,不如守陛下法,死無恨。」帝釋不責。 有富商抵罪,萬年令李令質按之。 濯馳救,令質不從,毀於帝。帝召令質至,左右爲恐,

右羽林軍。温與宗楚客、武延秀等說后託圖讖,韋氏當受命,謀殺少帝,內憚相王、太平 帝崩,后專政,畏有變,敕温盡總內外兵,守省中。又以從子播、捷從弟璿、高嵩分領

|璿、髙、嵩,梟首以徇,軍中相率而應,無敢後。后死,遲且斬温, 公主屬尊,欲先除之,然後發其謀。而玄宗兵夜起,將軍葛福順攻玄武門,入羽林,斬播、 分捕諸偉子弟,無少長

惡之,送于野,數昔往視,故在。 周仁軌者,京兆萬年人,后母族也。 是月,韋后敗,使者誅仁軌,刑人舉刀,仁軌承以臂,墮地, 方爲丼州長史,殘酷嗜殺戮。異日,見堂下有斷臂,

銘載葬日月,與發冢日月正同,而陵與尉名合云。 睿宗夷玄貞、洵墳墓,民盜取寶玉略盡。 天寶九載,復韶發掘,長安尉薛榮先往視,

名譽,厚奉養,積媵妾貲貨而已。卒,年六十九,贈太尉、益州大都督、諡昭宜。官爲治葬。 即位,以后故,擢將作大匠,進累開府儀同三司,封祁國公,食戶三百。一仁皎避職不事,委遠 柩行,帝御望春亭過喪。詔張說文其碑,帝爲題石。 王仁皎字鳴鶴,玄宗廢后父也。景龍中,以將帥舉,授甘泉府果毅,遷左衞中郎將。帝

殿中少監、晉國公、累進太子少保、襲父爵、被遇良渥。后廢、貶柳州別駕、至藍田、賜死。守一 **沓墨無顧藉,財蓄巨萬、皆籍入于官。** 子守一,與后孿生,帝微時與雅舊,後韶尙淸陽公主。從討太平主有功,由尙乘奉御遷

新寡, 參軍、開廏 蒲簿,計 **糧**,君至,可取之也。」國忠至,乃得蜀貨百萬,即大喜。至京師,見羣 以國忠見,幹貌頎峻,口辯給,兼瓊喜, 化 夏其貲,至成都摴蒲,一日費輒盡,乃亡去。久之,調扶風尉,不得志。復入園,劍南節度使章 聞大豪鮮于仲通頗資給之。 從父玄琰死蜀州,國忠護視其家,因與妹通,所謂號國夫人者。 · 兼瓊與宰相李林甫不平,聞楊氏新有寵,思有以結納之爲奧助,使仲通之長安,仲通辭, ·三十從圖軍,以屯優當遷,節度使脹宥惡其人,答屈之,然卒以優爲新都尉。 楊 國忠多分路,宣淫不止。 國忠,太眞妃之從祖兄,張易之之出也。 算 剣官。 鉤 '畫,分銖不誤,帝悅曰:「度支郞才也。」累遷監察御史。 兼瓊入爲戶部尚書兼御史大夫,用其力也。 諸楊日爲棄瓊譽,而言國忠善摴蒲, 表爲推官, 使部春買長安。 嗜飲博,數丐貸于人,無行檢,不爲姻族齒。 國忠 稍入供奉,常後出,專主 女弟,致贈遺。於時號 玄宗 將行,告曰:「郫有一日 引見, , 擢 罷去, 益困, 金吾兵 曹 國

方深 探知其微,帝以爲能,擢兼度支員外郎。 慘文峭詆,逮繫連年,誣衊被誅者百餘族,度可以危太子者,先林甫意陷之,皆中所欲。林甫 阻 李林甫 固 [位,陰爲指嚮,故國忠乘以爲姦,肆意無所憚。 興軍堅等獄,欲危太子,獄事畏卻,以國忠怙寵,搏黜可 遷不淹年,領十五餘使,林甫始惡之。 虢國居中用事, 用,倚之使按劾。 帝所好惡,國忠必 國忠

皆列棨戟,而第舍華僭,彌跨都邑。 時海內豐熾,州縣粟帛舉互萬,國忠因言:古者二十七 課易布帛,以充天子禁藏。明年,帝詔百官觀庫物,積如丘山,賜羣臣各有差,錫國忠紫衣, 年耕,餘九年食,今天置太平,請在所出滯積,變輕齎,內富京師。 天寶七載,擢給事中、兼御史中丞,專判度支。會三妹封國夫人,兄銛擢鴻臚卿,與國忠 又悉天下義倉及丁租、地

金魚,知太府卿事。

薄之。 中外。 爲京兆尹,悉領其使。卽窮劾支黨,引林甫交私狀,牽連左逮,數以聞,帝始厭林甫, 善,林甫不能救,遂結怨。與寵方渥,位勢在國忠右,國忠忌之,因邢粹事,構與誅死,己代 初,楊愼矜引王鉷爲御史中丞,已而有隙。 吉温爲國忠謀奪林甫政,國忠卽誣奏京兆尹蕭炅、御史中丞宋渾,逐之,皆林甫所厚 **鐵挾國忠共劾慎矜,抵不道誅。** 由是權傾

藏庫,班賚百官。 戰爐川,舉軍沒,獨仲通挺身免。 時國忠兼兵部侍郎,素德仲通,爲匿其敗,更敍戰功,使白 西道採訪處置使,開幕府,引竇華、張漸、宋昱、鄭昂、魏仲犀等自佐,而留京師。帝再幸左 衣領職。 先此,南詔質子閻羅鳳亡去,帝欲討之,國忠薦鮮于仲通爲蜀郡長史,率兵六萬討之。 因自請兼領劍南,詔拜劍南節度、支度、營田副大使,知節度事。俄加本道兼山南 出納判官魏仲犀言:「鳳集通訓門。」門直庫西,有韶改爲鳳皇門,進仲犀

殿中侍御史,屬吏率以「鳳凰優」得調。 俄拜國忠御史大夫, 因引仲通爲京兆尹, 己兼領

الار بار^ا ا

旨,實杜禁言路,林甫果奏遣之。 [忠恥雲南無功,知爲林甫掎摭,欲自解於帝,乃使麾下請己到屯,外示憂邊,以合上 及辭,泣訴爲林甫中傷者,妃又爲言,故帝益親之,豫計召

文部尙書、集賢院大學士、監脩國史、崇賢館大學士、太淸太微宮使,而節度、 度支,不解也。 「死矣,公且入相,以後事累公!」國忠懼其詐,不敢當,流汗被顏。 然國忠就道,惴惴不自安。 國忠已得志,則窮擿林甫姦事,碎其家。 帝在華清宮,驛追國忠還。林甫病已困,入見牀下,林甫曰: 帝以爲功,封魏國公, 林甫 果死、遂拜 採訪等使、判 固讓魏, 徙 右相、兼

封衞。

白春 尙書、侍郎分案注擬。 天下耳目者。 文謬缺得再通,衆議翕然美之。先天以前,諸司官知政事者,午漏盡,還本司視事,兵、吏部 通,一辭不如式,輒不得調,故有十年不官者。 止夏乃訖。 國忠旣以宰相領選,始建罷長名,於銓日卽定留放。故事,歲揭版南院爲選式,選者自 自是資格紛謬,無復綱序。 而國忠陰使吏到第,預定其員,集百官尙書省注唱,一 開元末,宰相員少,任益尊,不復視本司事。 虢國居宣陽坊左,國忠在其南,自臺禁還,趣號國 國忠創押例,無賢不肖,用選深者先補官,牒 吏部銓,故常三注三唱, 日畢,以夸神明,駁

爲 第 通等調選者鄭怤願立碑省戶下以頌德,詔仲通爲頌,帝爲易數字,因以黃金識其處。 素、張倚與本曹郎趨走堂下,抱案牒,國忠顧女弟曰:「紫袍二主事 |思則召左相|陳希烈隅坐,給事中在旁,旣對注,曰:「已過門下矣。」希烈不敢異。 諸外,士大夫詬恥之。 恥駭。 郞官、御史白事者皆隨以至。 明年 ·大選,因就第唱補,惟女兄弟觀之,士之醜野蹇傴者,呼其名,輒笑于堂,聲徹 先是,有司已定注,則過門下,侍中、給事中按閱, 居同第,出駢騎,相調笑,施施若禽獸然,不以爲羞, 何如?」皆大噱。 有不可, 黜之。 侍郎韋見 鮮于仲 道路

賞賚不訾計,出有賜,曰「餞路」,返有勞,曰「軟脚」。 帝常歲 十月幸華清宮,春乃還,而諸楊湯沐館在宮東垣,連蔓相照,帝臨幸,必徧 遠近饋遺閹稚、歌兒、狗馬、金貝,踵疊 五家,

已漏出休,許之。文書塡凑,坐家裁決。旣成,敕吏持案詣左相陳希烈聯署,左相不敢詰, 食,取習文簿惡吏任之,軍凡須索,快成其手,又不能省視也。始,李林甫紿帝天下無事,請 相可否,官屬悉苛督句剝相惎。又便佞,專徇帝嗜欲,不顧天下成敗。帝雅意事邊,故 輕 署惟謹。 重 一,顯賕公謁無所忌。 國忠 至國忠時,韋見素代希烈,循以爲常。它年,大雨敗稼,帝憂之,國忠擇善禾以進, 由御史至宰相,凡領四十餘使,而度支、吏部事自叢夥,第署一字不能盡, 國忠性疏伐捷給,徑硜處決樞務,自任不疑,盛氣驕愎,百僚莫敢 分調兵 故

與珣同列,猶吒官不進。 曰:「雨不爲災。」扶風太守房琯上郡災,國忠怒,遣御史按之。 已而聞喧當黜,詬曰:「生子不富貴耶?豈以一名爲鼠輩所賣!」珣大驚,即致喧高第。 國忠意乃敢啓。 子暄舉明經,不中,禮部侍郎達奚珣遣子撫往見國忠,國忠方朝,見撫喜。 後乃無敢以水旱聞,皆前伺

戰功。 忠矯為捷書上聞。自再興師,傾中國曉卒二十萬,踦屨無遺,天下冤之。 屯,亡者以送吏代之,人人思亂。尋遣劍南留後李宓率兵十餘萬擊閻羅鳳,敗死西洱河,國 昂、韋儇以御史迫促,郡縣吏窮無以應,乃詭設餉召貧弱者,密縛置室中,衣絮衣,械而送 國忠雖當國,常領劍南召募使,遣戍瀘南,餉路險乏,舉無還者。 國忠令當行者先取勳家,故士無鬭志。凡募法,願奮者則籍之。 舊,勳戶免行,所以寵 國忠歲遣宋昱、鄭

諷 京兆尹李峴 圍其第,捕祿山所善李超、安岱、李方來、王岷殺之,貶其黨 吉温於合浦。祿山 不悅,故册拜司空。豫山還幽州,覺國忠圖已,反謀遂決。國忠令客何盈、蹇昂刺求反狀, 晏駕則稱兵。及見帝嬖國忠,甚畏不利己,故謀日急。俄而祿山授尚書右僕射,帝恐國忠 恃內援,獨暴發反狀,帝疑以位相娼,不之信。 豫山雖逆久,以帝遇之厚,故隱忍,何帝一日 上書自陳,而條上國忠大罪二十,帝歸過於峴,貶零陵太守,以尉祿山意。國忠寡謀矜躁, 安祿山方有寵,總重兵于邊,偃蹇不奉法,帝護之,下莫敢言。國忠知終不出己下,又

事。」國忠揣帝且禪太子,歸謂女弟等曰:「太子監國,吾屬誅矣。」因聚泣,入訴于貴妃,妃以 輔璆琳覘禄山,未還,帝致韶坐側。 謂祿山跋扈不足圖,故激怒之使必反,以取信於帝,帝卒不悟。乃建言:「請以祿山爲平章事, 死邀帝,遂寢。 禄山旣發范陽,歎咤曰:「國忠頭來何遲?」 韶焚之矣。」滁山反,以誅國忠爲名,帝欲自將而東,使皇太子監國,謂左右曰:「我欲行一 追入輔政,以賈循爲使,節度范陽,呂知誨節度平盧,楊光翽節度河東。」已草詔,帝使謁者 而璆琳納金,固言不反。帝謂國忠曰:「祿山無二心,前

降賊。 間,爲自完計。至是,帝召宰相計事,國忠曰:「幸蜀便。」帝然之。明日遲昕,帝出延秋門, 官子弟及募豪桀十萬拒守,衆以爲不可。初,國忠聞難作,自以身帥劍南,豫置腹心梁、益 謀反!」衞騎合,國忠突出,或射中其頞,殺之,爭噉其肉且盡,梟首以徇。 何?」衆曰:「念之久矣,事行身死,固所願。」會吐蕃使有請於國忠,衆大呼曰:「國忠與吐蕃 諸將曰:「今天子震蕩,社稷不守,使生人肝腦塗地,豈非國忠所致! 欲誅之以謝天下,云 羣臣不知,猶上朝,唯三衞彍騎立仗,尙聞刻漏聲。 百人護帝。 哥舒翰守潼關,按兵守險,國忠聞欲反己,疑之,乃從中督戰,翰不得已出關,遂大敗, 書聞,是日帝自南內移仗未央宮,國忠見百官,鯁咽不自勝。監察御史高適請率百 右龍武大將軍陳玄禮謀殺國忠,不克。 進次馬鬼,將士疲,乏食,玄禮懼亂,召 國忠與韋見素、高力士及皇太子諸王數 帝驚日:「國忠遂

列

第

百三十一

外

反耶? 一時 吐蕃使亦殲矣。 御史大夫魏方進責衆曰:「何故殺宰相? .」衆怒,又殺之。

| 出尚|| | 唐公主, 位鴻臚卿, 陷賊見殺。 JU 子:暄、朏、曉、晞。 暄位太常卿、戶部侍郎, 曉奔漢中, 聞亂,下馬蹶。弩衆射之,身貫百 爲漢中王瑀搒死。 晞及國忠妻裴柔 一矢,乃

同奔陳倉,爲追兵所斬。」柔,故圖倡也,併坎而瘞。

其黨翰林學士張漸、竇華,中書舍人宋县,吏部郎中鄭昂,俱走山谷,民爭其貲,富埓國

忠。
思戀貲產,竊入都,爲亂兵所殺;餘坐誅。

或 [忠本名]釗,以圖讖有「卯金刀」,當位御史中丞時,帝爲改今名。

纖巧,飾廚傳,結納閹寺,求善譽。憲宗以爲才,拜司農卿,進京兆尹,專聚斂以固恩寵,數 李翛字翛,起寒賤,繇莊憲太后婭婿得進,歷坊、絳二州刺史。無它才,爲政粗辨。 性

習毁近臣,一時側目。

始議 **較僅免,徹門乃得行。** 更造渭城門,計錢三萬,翛以爲勞,不聽,使鑿軌道深之,柱危不支,方過喪而門壞,輼 太后崩,詔翛爲橋道置頓使,嗇官費,物物裁損爲可喜者。梓宮至灞橋,從官多不得食。 **修妄奏車軸折,山陵使李逢吉劾罔上,請冤官。** 方帝用兵而脩屢有

擔遺利,以條爲觀察使。 所獻,得不坐,纔詔奪稟,逢吉持之,乃削銀青一階。 被疾還京師。 元和十四年卒,士有相賀者。 翌日,加賜黃金。 帝以浙西富饒、欲掊

使外戚疆。按王、公主喪不過三日,光宜少降。」詔罷二日。 景讓曰:「禮,外祖父母、舅服小功五月,伯叔父若兄弟齌縗期,所以疏外密內也。 王者不可 其家空短,帝厚賜金繒,終不復委方鎭。卒,贈司徒,詔罷三日朝,羣臣奉慰。 之。七年,來朝,對延英,占奏俚近,帝失所望,不悅,留爲右羽林統軍兼太子太保。太后言 免, 柰何以外戚廢法?」帝悟, 追格前詔。 中、鳳翔,又賜鄠、雲陽二縣良田。 大中四年,詔除其租賦,宰相言:「國常賦,窶人下戶不 之,工曰:「君且暴貴。」不闋月,宣宗卽位,光興民伍,拜諸衞將軍,遷累平盧軍節度使,徙河 鄭光, 孝明皇太后弟也。 會昌末,夢御大車載日月行中獨,光輝洪洞照六合,寤而占 俄封其妾爲夫人,光曉帝意,還詔不敢拜,帝嘉 御史大夫李

子漢卿,終義昌軍節度使。

校勘記

(二)獨孤懷恩元貞皇后弟之子也 各本原無「之子」兩字。 舊書卷一八三獨孤懷恩傳作「元貞皇后

后。」本卷下文旣云懷恩爲文獻后姪,則于元貞后亦當爲姪。又本書及舊書卷一爲祖紀並謂文 弟之子也」,按周書卷一六獨孤信傳:「信長女,周明敬后; 第四女,元貞皇后; 第七女,隋文獻

獻后爲高祖從母, 本卷下文高祖呼懷恩爲弟,亦足證明懷恩爲元貞后之姪,而不當爲弟。

補正。

唐書卷二百七

列傳第一百三十二

宦者上

劉貞亮 楊思勗 高力士 吐突承璀 程元振 駱奉先 馬存亮 嚴遵美 魚朝恩 仇士良 竇文場 楊復光 霍仙鳴

疾病死喪;四日內僕,主供帳鐙燭;五日內府,主中藏給納。局有令,有丞,皆宦者爲之。 伯、寺人各六。又有五局:一日掖廷,主宮嬪簿最;二日宮闈,扈門闌;三日奚官,治宮中 唐制:內侍省官有內侍四,內常侍六,內謁者監、內給事各十,謁者十二,典引十八,寺 太宗韶內侍省不立三品官,以內侍爲之長,階第四,不任以事,惟門閣守禦、廷內掃除、

列傳第一百三十二 宦者上

稟食而已。

五八五五

武后時,稍增其人,至中宗,黃衣乃二千員,七品以上員外置千員,然衣朱紫者

尙少。 爲之使,猶且數千緡。 宦官黃衣以上三千員,衣朱紫千餘人。其稱旨者輒拜三品將軍,列戟于門。其在殿頭供奉, 得常主兵也。 委任華重,持節傳命,光焰殷殷動四方。所至郡縣奔走,獻遺至萬計。 鎭 半京畿矣。 分提禁兵,是以威柄下遷,政在宦人,舉手伸縮,便有輕重。至慓士奇材,則養以爲子;巨 彊 藩, 玄宗承平,財用富足,志大事奢,不愛惜賞賜爵位。開元、天寶中,宮嬪大率至四萬, 則爭出我門。 庸、代庸弱,倚爲扞衞,故輔國以尙父顯,元振以援立奮,朝恩以軍容重,然猶未 德宗懲艾泚賊, 故以左右神策、天威等軍委宦者主之, 置護軍中尉、中護軍, 監軍持權,節度返出其下。於是甲舍、名園、上腴之田爲中人所名者 脩功德, 市禽鳥,

愎參會,黨類殲滅,王室從而潰喪,譬猶灼火攻蠹,蠹盡 情易遷 生所忽。 梟狐不神,天與之香,末如亂何。 小人之情,猥險無顧藉,又日夕侍天子,狎則無威,習則不疑,故昏君蔽於所昵,英主禍 1,褻則無上,怖則生怨,借之權則專,爲禍則迫 玄宗以遷崩,憲、儆以弒殞,文以憂僨,至昭而天下亡矣。 故取中葉以來宦人之大者粹之篇。 而近,緩相攻,急相一,此小人常勢也。 禍始開元,極於天祐 不剛,柔 区 区

軍 楊思勗 帝倚爲 羅州 爪牙。 石城人。 開元 初, 本蘇氏、冒所養姓。 安南蠻渠梅叔鸞 叛, 少給事內侍省,從玄宗討內難,擢左監門衞 號黑帝, 舉三十二州之衆,外結林邑、眞

將

防閣。 亂 臘 平之, 禽大海等三千人, 討斬支黨皆盡。 繇 馬援故道出不意, 、金隣等國,據海南,衆號四十萬。 ,詔思<u></u>島爲黔中招討使,率兵六萬往,執行章,斬首三萬級,以功進輔國大將軍, 從封泰山,進驃騎大將軍,封號國公。 賊駭眙不暇謀, **遂大敗**, 思勗 瀧州蠻陳行範自稱天子,其下何游魯號定國大將 請行, 邕州封陵獠梁大海 封尸爲京觀而還。 韶募首領子弟十萬, 與安南 反, 十二年,五溪首領覃行章 破賓、横等州, 大都護光楚客 給祿俸、 思勗又

於陣。 軍 馮璘南越王, 行範走盤遼諸 破州縣四十。 洞, 思勗悉衆窮追,生縛之,阬其黨六萬,獲馬金銀鉅萬計。 韶思勗發永、道、連三州兵,淮南弩士十萬, 襲斬游魯、 卒,年八 璘

,

功。 思勗鷙忍,敢殺戮,所得俘,必剝面、剺腦、褫髮皮以示人,將士憚服,莫敢視,以是能立 事 牛仙童 納張守珪路,詔付思勗殺之。 思勗縛于格, **箠慘不可勝**, 乃探心, 截手

楚客者,樂安人,後歷桂州都督致仕,封松滋縣侯。

足,剔肉以食,

肉盡

乃得

死

其彊悟,敕給事左右。坐累逐出之,中人高延福養爲子,故冒其姓。善武三思,歲餘,復得 入禁中,稟食司宮臺。 高 力士,馮盎曾孫也。 既壯,長六尺五寸,謹密,善傳詔令,爲宮聞丞。 聖曆初,嶺南討擊使李千里上二閹兒,日金剛,日力士,武后以

度軍 士,故能 爲翁 莊、牛仙童、劉奉廷、王承恩、張道斌、李大宜、朱光輝、郭全、邊令誠等,並內供奉,或外監節 蓋嘉運、 爲右監門衞將軍,知內侍省事。 什六,寵與力士略等,然悉藉力士左右輕重乃能然。 息殿帷中,徼倖者願一見如天人然。帝曰:「力士當上,我寢乃安。」當是時,宇文融、李林甫、 - ,脩功德,市鳥獸,皆爲之使,使還,所哀獲,動互萬計, ,戚里諸家尊日奢,帝或不名而 玄宗在藩,力士傾心附結,已平韋氏,乃啓屬內坊,擢內給事。 先天中,以誅蕭、岑等功 |踵至將相,自餘承風附會不可計,皆得所欲。 中人若黎敬仁、林昭隱、尹鳳翔、韓 章堅、楊愼矜、王鉄、楊國忠、安祿山、安思順、

高仙芝等雖以才寵進,然皆厚結力 於是四方奏請皆先省後進,小事卽專決,雖洗沐未嘗出,眠 三呼將軍 肅宗在東宮,兄事力士,它王、公主呼 ,京師甲第池園、良田美產,占者

否?」力士祖示之,如言。 力士 |幼與母婆相失, 後嶺南節度使得之瀧州, 母出金環,日「兒所服者」,乃相持號慟。 迎還,不復記識,母曰:「胸有七黑子在 帝爲封越國夫人,而追

爲兄弟,後麥亡,伯獻縗絰受弔。 史至少卿,子弟仕皆王傅。 其父廣州大都督。 延福與妻,及力士貴時故在,侍養與麥均。 玄晤妻死,中外贈賻送葬,自第至墓,車徒背相望不絕。 河間男子呂玄晤吏京師,女國姝,力士娶之,玄晤擢 金吾大將軍程伯獻約力士

所不逮 復事 北 下事付林甫,若何?」力士對曰:「天子順動,古制也。稅入有常,則人不告勞。今賦粟充漕, 用稍充。 臣恐國無旬月蓄,和糴不止,則私藏竭,逐末者衆。又天下柄不可假人,威權旣振,孰敢議 堰灃 」帝不悅,力士頓首自陳「心狂易,語謬當死」。帝爲置酒,左右呼萬歲。 始,李林甫、牛仙客知帝憚幸東都,而京師漕不給,乃以賦粟助漕,及用和糴法,數年,國 列五 加 累鰾 鍾成 帝齋大同殿,力士侍,帝曰:「我不出長安且十年,海內無事, 股將吐納導引,以天 磑 ,力士宴公卿,一 騎大將軍,封渤海郡公。 ,日僦三百斛直。 扣 鍾,納禮錢十萬,有佞悅者至二十扣,其少亦不滅十。 於來廷坊建佛祠,興寧坊立道士祠,珍樓寶屋,國貲 由是還內宅,不 都

亡,河南漢北爲戰區,天下痛心,而陛下以爲何憂,臣不敢聞。」從上皇還,進開府儀同三司 宗卽位,喜曰:「吾兒應天順人,改元至德,不忘孝乎,尙 監二員,秩三品,以力士、思藝爲之。 有袁思藝者,帝亦愛幸,然驕倨甚,士大夫疏畏之,而力士陰巧得人譽。 帝幸圖,思藝途臣賊,而力士從帝,進齊國公。 何憂?」力士曰:「兩京失守,生人流 帝 初置 帝聞庸 內侍省

列

傳第

百三十

=

官

者

上

實封戶五百。

泰陵。 攀梓宮,死有餘恨。」慟而卒,年七十九。 代宗以護衞先帝勞,還其官,贈揚州大都督,陪葬 色,死不恨。」輔國不許。 韶召,力士趨至閣外,遣內養授謫制,因曰:「臣當死已久,天子哀憐至今日, 願一見陛下顏 上皇徙西內,居十日,爲李輔國所誣,除籍,長流巫州。 为土方逃瘧功臣閣下,輔國以 寶應元年赦還,見二帝遺詔,北向哭歐血,曰:「大行升遐,不得

|出日:「大家不食,亦膳羞不具耶?」帝日:「爾,我家老,揣我何爲而然?」|力出日:「嗣君未 定耶?推長而立,孰敢爭?」帝曰:「爾言是也。」儲位遂定。 天寶中,邊將爭立功,帝嘗曰: 過。 明年禄山反。力士善揣時事勢候相上下,雖親昵,至當覆敗,不肯爲救力,故生平無顯顯大 者言雲南數喪師,又北兵悍且彊,陛下何以制之?臣恐禍成不可禁。」其指蓋謂祿山。帝曰: 「自陛下以權假宰相,法令不行,陰陽失度,天下事庸可復安?臣之鉗口,其時也。」帝不答。 「卿勿言,朕將圖之。」十三年秋大雨,帝顧左右無人,卽曰:「天方災,卿宜言之。」力士曰: 「朕春秋高,朝廷細務付宰相,蕃夷不龔付諸將,寧不暇耶?」對曰:「臣間至閤門,見奏事 議者頗恨宇文融以來權利相賊,階天下之禍,雖有補益,弗相除云。 初,太子||瑛廢,武惠妃方嬖,李林甫等皆屬||壽王,帝以||肅宗長,意未決,居忽忽不食。||力

事。帝以藥子昂判元帥行軍司馬,固辭,乃以命元振,封保定縣侯。 王,元振見太子,發其姦,興李輔國助討難,立太子,是爲代宗。 程元振,京兆三原人。少以宦人直內侍省,遷內射生使、飛龍廢副使。 拜右監門衞將軍,知內侍省 再遷驃騎大將軍、邠國 張皇后謀立越

1公,盡總禁兵。不踰歲,權震天下,在|輔國右,凶決又過之,軍中呼十郎

守襄、漢有功,元振嘗諉屬,不應,因仲昇共誣殺瑱。 大將軍兼御史大夫。 惡李光弼,數媒蝎以疑之。,鎮等上將,冕、光弼元勳,旣誅斥,或不自省,方帥繇是攜解。 王仲昇者,初爲淮西節度使,興襄州張維瑾部將戰申州,被執。 賊平,元振薦爲右羽林 將軍棄大夫由仲昇始。 裴冕與元振忤, 乃掎韓穎等罪貶施州。 同華節度使李懷讓被構,憂甚自殺。素 來瑱

陷,賊剽府庫,焚閶衖,蕭然爲空。於是太常博士、翰林待詔柳伉上疏曰:「大戎以數萬衆犯 宮闈,焚陵寢,此將帥叛陛下也。自嘲義之滅,陛下以爲智力所能,故疏元功,委近習,日引 關 ?長以成大禍,羣臣在廷無一犯顏回慮者,此公卿叛陛下也。 陛下始出都,百姓塡然奪府 『度隴,歷湊、渭,掠涨、涇,不血刃而入京師,謀臣不奮一言,武士不力一戰,提卒叫呼, 廣德初,吐蕃、党項內侵,詔集天下兵,無一士奔命者。 虜扣便橋,帝倉黃出居陝,京師

第

耶? 乎,宜卽募士西與朝廷會;若以殷惡未悛耶,則帝王大器,敢妨聖賢,其聽天下所往』。 也。 下也。 庫 流 放歸田里。 兵付大臣,然後削尊號,下詔引咎,率德勵行,屛嬪妃,任將相。 必欲存宗廟社稷,獨斬元振首,馳告天下,悉出內使隸諸州,獨留朝恩備左右, 而兵不至,人不感,天下不服,請赤臣族以謝。」疏聞,帝顧公議不與,乃下詔盡削元振官爵, |溱州 | 相 危耶? 若以爲危,豈得高枕不爲天下計? 臣聞良醫療疾,當病飮藥,藥不當疾,猶 陛下視 :殺戮, 內外離 景詮貶新興尉。 帝還,元振自三原衣婦衣私入京師,舍司農卿陳景詮家,圖不軌。 此三輔叛陛下也。 今日病何繇至此乎。天下之心,乃恨陛下遠賢良,任宦豎,離間將 叛 雖 一魚朝恩以陝郡勠力, 元振行至江陵死。 自十月朔召諸道兵,盡四十日,無隻輪入關者, 陛下獨能以此守社稷乎? 若曰『天下其許股自新 陛下以今日 相而 御史劾按,長 陛 此 下持神策 四方叛陛 幾于亡。 勢爲安 如此 改 無 過 益

恩 焰熾然。 軍者。 又有駱奉先者,亦三原人,歷右驍衞大將軍,數從帝討伐,尤見倖,廣德初,監僕固 永泰初,以吐蕃數驚京師,始城鄠,以奉先爲使,悉毀縣外廬舍,無尺椽。 奉先恃恩貪甚,懷恩不平,旣而懼其譖,遂叛。事平,擢奉先軍容使,掌畿內兵,權 累封江

國公,監鳳翔軍,大曆末卒。

陷, 爲觀 光 東,使神策將衞伯玉與賊將康文景等戰,敗之。 郊郡公。 進 軍容、宣慰、處置使。 思明長驅至硤石, 軍 魚 朝恩, 寶應中, 京師 瀘州 平, 爲三宮檢責使,以左監門衞將軍 瀘川人。 還屯陝。 使子朝義爲游 觀軍容使自朝恩始。 天寶末,以品官給事 代宗避吐蕃東幸, 軍。 肅宗 衞兵離散, 黃門, 洛陽平,徙屯汴州,加開府儀同三司, 韶銳兵十萬循渭而東以濟師。 史思明攻洛陽, 知內侍省事。 內 陰點, 朝恩悉軍奉迎華陰,乘興六師乃 善宣納詔令。 朝恩以神策兵屯陝。 九 節度 圍 賊 相州 至德 朝恩按兵陝 初, 以朝恩 封馮 洛陽 監

典程元 人 蕃 忠 內 (臣第一,心娼之,乘相州敗,醜爲詆譖,肅宗不內其語, 誠 入寇,遣 討場,以霍文場監之;王景岑討良,王希遷監之。敗場於萬泉,生擒良。 朝恩資小人,恃功岸忽無所憚。 乃勸 振 口口 劉德信討斬之。故嘲恩因麾下數克獲,竊以自高。 帝徙洛陽, 加毁,帝未及寤,子儀憂甚。 欲遠戎狄。 百僚在廷, 僕固場攻絳州,使姚良據温,誘回紇陷河陽。朝恩遣李 俄而 朝恩從十餘人持兵出, 吐蕃陷京師,卒用其力,王室再安。 然猶罷子儀兵, 是時郭子儀有定天下功, 曰:「虜數犯都甸, 留京師。 高暉等引吐 代宗立, 故朝恩 居

振,帝德之,更號天下觀軍容、宣慰、處置使,專領神策軍,賞賜不涯

列

傳

第

百

=

+ =

宦者上

爲?」劇恩色沮,而子儀亦謂不可,乃止。 云何?」宰相未對,有近臣折曰:「敕使反耶?今屯兵足以捍寇, 何遽脅天子棄宗廟

賜錢千萬,取子錢供秩飯。 集,京兆設食,內敎坊出音樂俳倡侑宴,大臣子弟二百人,朱紫雜然爲附學生, 判國子監,兼鴻臚、禮賓、內飛龍、閑廢使,封鄭國公。 始詣學,詔宰相、常參官、六軍將軍悉 朝恩好引輕浮後生處門下,講五經大義,作文章,謂才兼文武,徼何誤寵。 每視學,從神策兵數百,京兆尹黎幹率錢勞從者, 列廡次。 一費數十萬, 永泰中, 叉

京師無 而朝恩色常不足。 坐從之,因曰:「陰陽不和,五穀踴貴,皆軍容事,宰相何與哉! 天子臥不安席,宰相何以輔之?不退避賢路,默默尙何賴乎?」宰相俛首,坐皆失色。 廷,乃會百官都堂,且言:「宰相者,和元氣,輯羣生。 今水旱不時, 屯軍數 <u>里造、殿中侍御史李衎酬詰往返,未始降屈,朝恩不懌,黜</u>衎以動造。 有覆餗象,以侵宰相。 已,何所 凡詔會羣臣計事,朝恩怙貴,誕辭折愧坐人出其上,雖元載辯彊亦拱默,唯禮部郎中相 事 海罪? ず、六軍 」朝恩拂衣去,曰:「南衙朋黨,且害我。」會釋菜,執易升坐,百官咸在,言鼎 可相維鎭,又屯十萬,饋糧所以不足,百司無稍食,軍容爲之,宰相行文書而 王縉怒,元載怡然。 朝恩曰:「怒者常情,笑者不可測也。」 載銜之、 且軍拏不散,故天降之沴。今 又謀將易執政以震朝 (十萬) 饋運 、困竭, 造徙

未發。

毁郭子儀,不見聽,乃遣盜發其先冢,子儀詭辭自解,以安衆疑。 久之,讓判國子監、 修浩,公壞曲江諸館、華淸宮樓榭、百司行署、將相故第,收其材佐興作,費無盧萬億。 朝恩有賜墅,觀沼勝爽,表爲佛祠,爲章敬太后薦福,即后諡以名祠, 許之。 於是用度 鴻臚 旣 敷

禮賓等使,加內侍監,徙封韓,增實封百戶。 俄兼檢校國子監

得金紫,在班列上。」帝未答,有司已奉紫服于前,令徽稱謝。 養息合徽者,尙幼,爲內給使,服綠,與同列爭忿,歸白嘲恩。 萬,人無敢發其姦。 錄貲產入之軍,皆誣服冤死,故市人號「入地牢」。又萬年東賈明觀倚朝恩捕摶恣行,積財鉅 |鶴獨謹厚,亦封徐國公。|希暹諷朝恩置獄北軍,陰縱惡少年橫捕富人付吏考訊,因中以法, 初,神策都虞候劉希暹魁健能騎射,最爲朝恩昵信,以太僕卿封交河郡王。兵馬使王駕 朝廷裁決,朝恩或不預者,輒怒曰:「天下事有不由我乎!」帝聞,不喜。 帝笑曰:「小兒章服,大稱。」 滋 明日見帝曰:「臣之子位下,願

「安而潛計不軌。 自是 元 載 (朝恩隱謀奧語,悉爲帝知。 乃用左散騎常侍崔昭尹京兆,厚以財結其黨皇甫温、周皓。 帝遂倚載,決除之,懼不克,載曰:「陛下第專屬臣,必濟。」朝恩入殿, 希暹覺帝指,密白朝恩,朝恩稍懼, 温方屯陜, 然見帝接遇未衰, 面 皓射生

列

虞也。 萬以葬。 帝責其異圖,朝恩自辨悖傲,皓與左右爲縊之,死年四十九,外無知者。帝隱之,下詔罷觀 還營,有詔留議事。 軍容等使,增實封戶六百,內侍監如故。 卽遣,約與皓共誅朝恩。 謀定,以聞,帝曰:「善圖之,勿反受禍!」方寒食,宴禁中,旣罷,將 寶鷄與抱玉 節度鳳翔 從 武 郭子儀密白「朝恩嘗結周智光爲外應,久領內兵,不早圖,變且大一。載留温京師, 士百人自 ,而以興平、武功、鳳翔之扶風天興與神策軍,朝恩利其土地,自封殖,不知爲 重其權, 寔內温以自助。 衞,皓統之,而温握兵在外。 朝恩素肥,每乘小車入宮省。帝聞車聲,危坐,賦守中書省。 載又議析鳳翔之郿與京北,以鄂、盩厔及鳳翔之號、 外咸言「旣奉韶,乃投縊」云。 載乃徙鳳翔尹李抱玉節度山南 還尸於家,賜錢六百 西道, 朝恩至, 以温代 未

駕鶴白發之,遂賜死。 所厚禮部尙書、禮儀使裴士淹、戶部侍郎判度支第五琦皆坐貶。 帝懼軍亂,進劉希暹、王駕鶴並兼御史中丞。又下詔尉曉將士,獨希暹自知同惡,言不 而賈明觀兼得幸於載,故載奏隸江西,使立功自贖,路嗣恭搒殺

寶文場、霍仙鳴者,始並隸東宮,事德宗,未有名。 自魚朝恩死,宦人不復典兵,帝以禁

至者,惟文場等率宦官及親王左右從。 衞 詔 [監神策左廂兵馬,以王希遷監右,而 虚 委白志貞,志貞多納富人金補軍, 馬有麟爲左神策軍大將軍,軍額由 止收其庸而身不在軍。 至奉天,帝逐志貞,并左右軍付文場主之。 及涇師亂,帝召近衞,無一人 比始

策。 憚 衞 土 詔殺之于軍。 一朱華以按摩得幸文場, 是時,寶、霍權 帝自 Ш 南 還,兩 其隆 振 軍復完, (朝廷, 赫如 此。 參慮 諸方節度大將多出其軍, 而帝忌宿將難 補置,索財數萬緡, 制, 故詔文場、仙鳴分總之, 而藩鎭贈遺累百鉅萬,略士妻女無所 臺省要官走門下,丐援影者足相躡。 廢天威軍入左右神

之, 後 神 稍 策 五 故不拒。 守亮代之。 愈 中護軍, 久之,置 已而暴死,帝疑左 文場 張尙 護 軍 文場權 | 劾奏,詔流遠遠方。 進 中尉、中 爲 右。 累 、驃騎 右進毒, 護軍各二員,韶文場爲左神策護軍中尉, 中尉、護軍 大將軍。 捕詰 文場 自文場等始。 時監 小使問 年 ·老致 察 狀, 御 化卒。 史崔遠行 誅數十人, 後仙鳴移病, 囚于軍 贈開府儀同三司, 帝賜十馬, 丁,吏爲 仙鳴爲右, 具酒食,遠欲 令諸| 焦希望為左 以 祠 內常侍 祈 悦媚 解。

事 而 、俄得 其後楊 北 軍捕 釋 志 太學生何竦、曹壽繫訊 是時 廉、孫榮義爲 官官復盛 左右 矣。 中 尉 人情大懼, 招權 驕 肆, 司業武少儀上書「有如罪不測 與竇、 霍 略 等。 帝晚節聞民間 願 訛 語禁中 明示四

上

列

司。 志廉,弘農人,歷左監門衛大將軍 希望者 , 涇陽人, 歷明威將軍, 贈洪州都督。 ; 榮義,涇陽人,歷右武衞大將軍。並贈揚州大都督。 尚進,河東人,歷忠武將軍,贈開府儀同三

中,會虜變,被執且西,俄而得歸。 劉貞亮,本俱氏,名文珍,冒所養宦父,故改焉。 出監宣武軍, 自置親兵千人。 性忠彊、識義理。 貞元末, 宦人領兵附順者 平涼之盟,在渾瑊 軍

益衆。

帝納其奏,貞亮召學士衞次公、鄭絪、李程、王涯至金鑾殿草定制詔。 惡朋黨熾結,因與中人劉光琦、薛文珍、尙衍、解玉、呂如全等同勸帝立廣陵王爲太子監國, 北禁軍都將,收宦者權。 叔文與柳宗元等裁定,然後下中書。 會順宗立,淹痼弗能朝,惟李忠言、牛美人侍。 而忠言素懦謹,每見叔文與論事,無敢異同,唯貞亮乃與之爭。 然未得縱欲, 遂奪神策兵以自彊,即用范希朝爲京西 美人以帝旨付忠言,忠言授之王叔文, 太子已立,盡逐叔文 叉

貞亮勠以不拒賊,斬之,故以專悍見訾。 高崇文討劉闢,復爲監軍。 初,東川節度使李康爲闢所破,囚之。崇文至,闢歸康求雪, 遷累右衞大將軍,知內侍省事。 元和八年卒,贈開

黨,委政大臣,議者美其忠。

府儀同三司。

民家,搒二百,奪職,繇是莫不慴畏。 材 治第,送東都獄,至閿鄉自殺。 憲宗之立,貞亮爲有功,然終身無所寵假。 又郭旻醉觸夜禁,杖殺之。 呂如全歷內侍省內常侍、 五坊朱超晏、王志忠縱鷹人入 翰林使、坐擅 坂樟

監門將軍、左神策護軍中尉、左街功德使,封薊國公。 吐突承璀字仁貞,閩人也。以黃門直東宮,爲掖廷局博士,察察有才。憲宗立,擢累左

史,而間遣人說 使,爲御通化門慰其行。 獨孤郁、段平仲、白居易等衆對延英,謂古無中人位大帥,恐爲四方笑。 領易、定、幽、滄等州糧料使。於是諫官李鄘、許孟容、李元素、李夷簡、呂元膺、穆質、孟簡、 河南、陝、河陽,惟澄主之;原、華、河中至太原,進玉主之。又詔內常侍劉國珍、馬朝江分 處置使,以左右神策及河中、河南、浙西、宣歙兵從之。內寺伯宋惟澄、曹進玉爲館驛使:自 王承宗叛,承璀揣帝銳征討,因請行。帝見其果敢自喜,謂可任,即詔承璀爲行營招討 承宗上書待罪,乃詔班師,還爲中尉。 承璀御衆無它遠略,爲盧從史侮狎,踰年無功,賴 平仲勃承璀輕謀弊賦, 帝乃更爲招討宣慰 中韶擿使執從 損國威, 不斬

列傳第

百三

+ =

官者上

首無以謝天下。 帝不獲已,罷爲軍器莊宅使。尋拜左衞上將軍,知內侍省。

敬宗時,左神策中尉馬存亮論其冤,詔許子士曄收葬。 飾一 **璀,爲罷絳宰相,召爲內弓箭庫使,復左神策中尉。** 逐爲峽州司倉參軍。然帝於承璀殊厚,會李絳在翰林,苦論其過,故決遣之。 軍。纖人太子通事舍人李涉投匭言承璀等冤狀,於是孔戣知匭事,閱其副,不受,卽表其姦, 室藏所賜詔敕,地生毛二尺,惡之,躬糞除瘞之。 會劉希光納羽林大將軍孫璹錢二十萬緡求方鎭,有詔賜死,跡絓承璀, 惠昭太子薨,承璀請立灃王,不從。 踰年帝崩, 宣宗時,擢 士曄右神策中 穆宗銜前議, 故令出監淮南 帝後欲還承 殺之禁中。 常

祭使。 中, 杜宣 是時,諸道歲進閹 一猷爲觀察使, 每歲時遣吏致祭其先,時號 見,號「私白」,閩、嶺最多, 「敕使墓戶」。 後皆任事, 當時謂閩爲中官區藪。 宣猷卒用羣官 力徙宣歙觀 咸通

左 神策 馬 中 存亮字季明,河中人。 尉。 軍所籍凡十餘萬, 元和時,累擢左神策軍 存亮料東尤精,伍無 靇 副使、左監門衞將軍, 士、部無 冗 員 知內侍省事, 進

敬宗初,染署工張韶與卜者蘇玄明善,玄明曰:「我嘗爲子卜,子當御殿食,我與焉。

哲宋叔 浴堂 皆死。 之,悉以寶器賜其徒,攻弓箭庫,仗士拒之,不勝。 還。羣臣詣 淮南軍。 車中若 封戶二百 左軍以爲望。 (左軍 入清思殿, 上晝夜獵,出入無度,可圖也。」韶每輸染材入宮,衞士不呵也。 存亮逮 門 閉。 始賊 夜孟文亮,右神策大將軍康志睦、將軍李泳尚國忠,率騎兵討賊, ,近且速。」從之。 初,帝常寵右軍中尉梁守謙,每游幸,兩軍角戲, 輸材者,入右銀臺門,約昏夜爲變。 代還,爲內飛龍使。 ,梁守謙 延英門見天子,然至者不十一 事 時帝 入,中人倉卒繇望仙門出奔,內外不知行在。遲明,盡捕 升御坐, 一德宗 至是,存亮出迎,捧帝足泣,負而 擊毬清思殿,驚,將幸右神策。 進開府儀同三司,它論 ,更六朝 盜 乘輿餘膳, 資端 畏, 大和中,以右領軍衞上將軍致仕,封 揖玄明偶食, 善訓士,始去禁衞,衆皆泣。 二,坐賊所入闌 功賞有差。 有詰其載者、韶謂謀覺、殺其人、出兵大呼成列、 入。 或曰:「賊入宮,不知衆寡,道遠可虞,不如 且曰「如占」。玄明鶩曰:「止此 以五百騎往 存亮遣左神策大將軍康藝全、將軍何文 存亮於一 不禁者數十人,杖而 時功最 迎二太后, 岐國 唐世中人以忠謹稱者, 乃陰結諸工百餘人,匿兵 亂黨,左右軍清宮, 公,卒贈 高, 日暮, 射韶及 乃推 比至, 帝多欲右勝, 不 湯州 委權 誅,賜存亮 乎! 而賊已 大 勢,求監 都督。 (玄明 車 韶 唯 斬 m 實 惡

關

入

聞

西門季玄、嚴遵美三人而已。

邈美父季寔,爲掖廷局博士。大中時,有宮人謀弒宣宗。 是夜,季寔直咸寧門下,聞

變,入射殺之。明日,帝勞曰:「非爾,吾危不免。」擢北院副使,終內樞密使。

昭宗遷鳳翔,求致仕,隱靑城山,年八十餘卒。 三楹 [舍藏書而已,今堂狀帖黃決事,此楊復恭奪宰相權之失也。] 蓋疾時中官肆橫云。 遵美歷左軍容使,嘗歎曰:「北司供奉官以胯衫給事,今執笏,過矣。 樞密使無聽事,唯 後從

翔等軍。 吏供餉,暴甚寇盜 正寢,請 仇士良字匡美,循州興寧人。 如舊章。 嘗次敷水驛, 帝不直櫃,斥其官。元和、大和間,數任內外五坊使,秋按鷹內畿,所至邀 與御史元稹爭舍上聽,擊傷稹。 順宗時得侍東宮。 憲宗嗣位,再遷內給事,出監平盧、鳳 中丞王播奏御史、中使以先後至得

宮。 糜肉。 **土良因縱兵捕,無輕重悉斃兩軍,公卿半空。 事平,加特進、右曉衞大將軍,弘志右衞上將** 王涯、舒元輿已就縛,士良肆脅辱,令自承反,示牒于朝。 文宗與李訓欲殺王守澄,以士良素與守澄隙,故擢左神策軍中尉兼左衛功德使,使相 已而訓謀悉逐中官,士良悟其謀,與右神策軍中尉魚弘志、大盈庫使宋守義挾帝還 於時莫能辨其情,皆謂誠反,

軍兼中尉,守義右領軍衞上將軍。

輔政,稜稜有風岸,士良與論議數屈,深忌之,使賊刺石於親仁里, 馬逸而免。 石

懼,辭位,士良益無憚

申,而 且宦 有如 動,復言:「臣所陳繫國大體,可聽,則宜冼宥涯等罪;不可聽,則賞不宜妄出。 制 節士,畏禍伏身,誰肯與陛下共治耶?」即以訓所移書遣部將陳季卿以聞。 提挈,不使聞知。今四 盜 臣,願保富貴,何苦而反。今大戮所加已不可追,而名之逆賊,含憤九泉。不然,天下義夫 誓以 ,京師擾,疑不敢進。 |從||諫大怒,殺||季||卿,騰書于朝。 又言:「臣與||訓誅|注,以||注本宦豎所 大臣挾無將之謀,自宜執付有司,安有縱俘劫,橫尸闕下哉?陛下視不及,聽未聞也。 人根黨蔓延在內,臣欲面陳,恐橫遭戮害,謹修封疆,繕甲兵,爲陛下腹心。 澤潞劉從諫本與訓約誅鄭注。及訓死,憤土良得志,乃上書言:「王涯等八人皆宿儒大 生者荷祿? 死清君 側。」書聞,人人傳觀。 」固辭。 「方共傳宰相欲除內官,而兩軍中尉聞,自救死,妄相殺戮,謂爲反逆。 累上 書,暴指士良等罪。 士良沮恐,即進從諫檢校司 帝雖不能去,然倚其言差自彊 徒,欲弭其言。 季卿至,會石遇 安有死冤不 從諫 如姦 自 I是鬱 臣難 知 可

開成 列 四年 傳 第 百 風 = 海, + _ 少間, 窗 者 召宰相見延英, 退坐思政殿, 顧左右曰: 「所直 上 五八七三 學士謂誰? 鬱

不樂,兩軍毬獵

宴會絕矣。

七

足比,何自方二主哉?」帝曰:「赧、獻受制彊臣,今朕受制家奴,自以不及遠矣!」因泣下, **>一奏、舜主也。」帝曰:「所以問,謂與周赧、漢獻敦愈?」」墀惶駭曰:「陛下之德,成、康、文、景未** 曰:「周墀也。」召至,帝曰:「自爾所況,殷何如主?」」墀再拜曰:「臣不足以知,然天下言陛下

引安王,不克。武宗已立,士良發其事,勸帝除之以絕人望,故王、妃皆死。 將軍,封楚國公,弘志韓國公,實封戶三百。俄而珏、嗣復罷去,弘逸、季稜誅矣。 從,乃矯詔立潁王爲皇太弟,士良以兵奉迎,而太子還爲陳王。初,莊恪太子薨,楊賢妃謀 始,樞密使劉弘逸薛季稜、宰相李珏楊嗣復謀奉太子監國,士良與弘志議更立,珏不 士良遷驃騎大

惶惑不自安。 **德裕以白帝,命使者諭神策軍曰:「赦令自朕意,宰相何豫。爾渠敢是?」 士乃怗然。** 上尊號,士良宣言「宰相作赦書,滅禁軍縑糧芻菽」以搖怨,語兩軍曰:「審有是,樓前可爭。」 帝明斷,雖上良有援立功,內實嫌之,陽示尊寵。李德裕得君,士良愈恐。會昌二年, 明年,進觀軍容使,兼統左右軍,以疾辭,罷爲內侍監,知省事。固請老,詔可。 士良

「天子不可令閑暇,暇必觀書,見儒臣,則又納諫,智深慮遠,減玩好,省游幸,吾屬恩且薄而 士良之老,中人舉送還第,謝日:「諸君善事天子,能聽老夫語乎?」衆唯唯。 士良日: 零卒,贈揚州大都督。

權 貪酷二十餘年,亦有術自將,恩禮不衰云。 死之明年,有發其家藏兵數千物,詔削官爵,籍 斥經術,醫外事,萬機在我,恩澤權力欲焉往哉?」衆再拜。 輕矣。 爲諸君計,莫若殖財貨,盛鷹馬,日以毬獵聲色蠱其心,極侈靡,使悅不知息,則必 士良殺二王、一妃、四宰相,

胤,故胤惡中官,終討除之,蓋禍原於士良、弘志云。 殿,帝在焉。 乃送愼由出,戒曰:「毋泄,禍及爾宗。」 表千人,兄弟羣從且三百,何可與**覆**族事?雖死不承命。」<u>士良</u>等默然,久乃啓後戶,引至小 太后有制更立嗣君,學士當作詔。」愼由驚曰:「上高明之德在天下,安可輕議?愼由親族中 入,至祕殿,見士良等坐堂上,帷帳周密,謂愼由曰:「上不豫已久,自卽位, 政令多荒闕, 始,士良、弘志憤文宗與李訓謀,屢欲廢帝。 士良等歷階數帝過失, 帝俛首。 愼由記其事 旣而士良指帝曰:「不爲學士,不得更坐此。」 崔愼由爲翰林學士,直夜未半,有中使召 ,,藏箱枕間,時人莫知。 將沒,以授其子

宣宗時,玄价監鹽州軍,誣殺刺史劉皋。 楊復光,閩人也,本喬氏。 有武力,少養於內常侍楊玄价家,頗以節誼自奮,玄价奇之。 皋有威名者,世訟其冤。 稍遷左神策軍中尉,譖去

列

百三十二

宦者

上

宰相楊收,權寵震時

遏賊右 営。 傳舍。 復光定荆、襄,師次)鄧,淑逗遛,復光斬之,并其軍爲八,以<u>鹿宴弘、晉暉、張造、李師泰、</u>王 害,何丈夫哉! 黃 假留後,而奏浩罪,薦彥謨爲朗州刺史。詔鄭紹業爲荆南節度使,以復光監忠武軍,屯鄧州 爲禮,彥謨亦耻居浩下,遂有隙。復光曰:「胡不殺之?」彥謨引慓士擊殺浩,復光以客常滋 將宋浩領荆南,泰寧將段彥謨佐之。復光父嘗監忠武軍,而浩已爲大將,見復光,少之,不 宋威擊仙芝於江西,復光在軍, 不 功,密請僖宗誅之,故仙芝怨,復引兵叛。後天子寤威階禍,罷之,以兵與復光,乃進禽徐唐 日:「吾力不足, 金數 如毋行。」復光固往,酒所語時事,復光泣曰:「丈夫所感,獨恩與義耳,彼不顧 王鐸爲招討,復光仍監軍。鐸之棄荆南也,山南東道節度使劉巨容定其地,以忠武別 復 衝。 光 百 秦宗權 有謀 兩爲謝。 帝西幸,召紹業見行在,復光更引彥謨爲荆南節度使。 據蔡州叛,岌、 略,累監 公奮匹夫封侯,乃捐 陽合而陰離之,故召公計。」因持杯盟曰:「有如酒 其後忠武周岌受賊命,嘗夜宴,召復光,左右曰:「彼旣附賊,必不利公, 諸鎭軍。 復光以忠武兵三千入見之。 請判官吳彥宏約賊降, 乾符初,佐平盧節度使曾元裕擊賊王仙芝,敗之。 十八葉天子,北面臣賊, ,仙芝遣將尙君長自縛如約。 宗權卽遣部將王淑持兵萬 何恩義利害昧昧 **彦**謨給行邊, 詣復光, 以 耶? 恩義、規利 」岌流涕 威疾其 招討使 人從。

班師。 建、韓建等爲之將,進攻南陽。 俄起爲天下兵馬都監,總諸軍,與東面招討使王重榮幷力定關中。 賊將朱温、何勤逆戰,大敗,遂收鄧州,追北藍橋。 朱温守同州,復 會母喪,

光遣使鐫論,温以所部降。方賊之疆,重榮憂不知所出,謂復光曰:「臣賊邪,且負國; 拒戰 邪,則兵寡,柰何?」復光曰:「李克用與我世共患難,其爲人,奮不顧身,比數召未卽至者,

用兵乃出。 由太原道不通耳,非忍禍者。若諭上意,彼宜必來。」重榮曰:「善。」白王鐸以詔使至太原,克 京師平,以功加開府儀同三司、同華制置使,封弘農郡公,賜號「資忠輝武匡國

平難功臣」。

空河中,贈觀軍容使,諡曰忠肅。

復光御下有恩,軍中聞其死,皆慟哭,而麾下多立功者。 諸子爲將帥數十人,守宗亦爲

忠武節度使。

甚?不尸大勞,畏權處外,又愈賢矣。與夫書「龍蛇」之詩者,何其小哉! 莫及者。自古忠臣出於疏斥不用蓋多矣, 存亮豈通記書道理之人邪, 贊曰:楚鄖公宇不敢讎君而忘父冤,昭愍之世,兩軍寵遇有厚薄,而卒用存亮夷難,功 何其識君臣大誼明

唐書卷二百八

列傳第一百三十三

宦者下

李輔國 王守澄 劉克明 田令孜 楊復恭 劉季述

韓全誨 張彦弘

廏中簿最。 李輔國本名靜忠,以閹奴爲閑廢小兒。 王鉷爲使,以典禾豆,能檢擿耗欺,馬以故肥,薦之皇太子,得侍東宮。 貌僔陋,略通書計。 事高力士,年四十餘,使主

名護國,又改今名。凡四方章奏、軍符、禁寶一委之。輔國能隨事齪齪謹密,取人主親信, 靈武,愈親近,勸遂即位係天下心。擢家令,判元帥府行軍司馬。 陳玄禮等誅楊國忠,輔國豫謀,又勸太子分中軍趨朔方,收河、隴兵,圖興復。 肅宗稍稍任以肱膂事,更 太子至

傳第一百三十三 宦者下

列

而內深賊未敢肆。 不啖葷,時時爲浮屠詭行,人以爲柔良,不忌也。

子姓事之,號「五父」。帝爲娶元擢女爲妻,擢以故爲梁州長史,弟兄皆位臺省。李峴輔政,叩 請,乃得可。常止銀臺門決事。置察事聽兒數十人,吏雖有秋豪過,無不得,得輒推訊。 頭言:「且亂國。」於是詔敕不繇中書出者,峴必審覆,輔國不悅。 巳乃施行,羣臣無敢議。出則介士三百人爲衞。貴幸至不敢斥官,呼五郎。李揆當國,以 縣獄訟,三司制劾,有所捕逮流降,皆私判臆處,因稱制敕,然未始聞上也。 詔書下,輔國署 春宮等使,少府、殿中二監,封成國公,實封戶五百。宰相羣臣欲不時見天子,皆因輔國以 帝還京師,拜殿中監,閉廢、五坊、宮苑、營田、栽接總監使,兼隴右羣牧、京畿鑄錢、長 州

道,因裴回觀覽,或父老過之,皆拜舞乃去。上元中,劍南奏事吏過樓下,因上謁,太上皇賜之 微賤,雖暴貴,力士等猶不爲禮,怨之,欲立奇功自固。初,太上皇每置酒長慶樓,南俯大 帝不寤。先時,興慶宮有馬三百,輔國矯詔取之,裁留十馬。太上皇謂力士曰:「吾兒用輔 **醴、高力士、王承恩、魏悅、玉眞公主常在太上皇左右,梁園弟子日奏聲伎爲娛樂。輔國素** 居近市,交通外人,玄禮、力士等將不利陛下,六軍功臣反側不自安,願徙太上皇入禁中。」 酒,韶公主及如仙媛主之,又召郭英义、王銑等飲,賚予頗厚。輔國因妄言於帝曰:「太上皇 時太上皇居興慶宮,帝自複道來起居,太上皇亦間至大明宮,或相逢道中。帝命陳玄

再拜。 膳。 遮道 歸州,公主居玉眞觀 慶,吾王地,數以讓皇帝,帝不受。今之徙,自吾志也。」俄而流承恩播州,魏悅溱州,如仙媛 衞才數十,皆尪老。太上皇執力士手曰:「微將軍,朕且爲兵死鬼。」左右皆流涕。 日:「翁不解事 **奧還宮中。」力士厲聲曰:「五十年太平天子,輔國欲何事?」** 國 謀 自是太上皇怏怏不豫,至棄天下。 ,太上皇驚,幾墜馬,問何爲者,輔國以甲騎數十馳奏曰:「陛下以興慶宮湫陋 不得終孝矣。」會帝屬疾,輔國卽詐言皇帝請太上皇按行宮中,至睿武門,射生官五 力士復日:「輔國可御太上皇馬 !」斬一從者。 一、更料後宮聲樂百餘,更侍太上皇,備灑掃; 力士呼曰:「太上皇問將士各好在否!」將士納刀嘑萬歲,皆 一,輔國樺而走,與力士對執轡還西內,居甘露殿,侍 **叱使下馬,輔國失轡,駡力士** 韶萬安、咸宜二公主視服 叉曰:「興 奉迎

但羣望未一,如何?」輔國遂諷宰相裴冕使聯表薦己。 食,太常備樂,宰相羣臣畢會。 輔國以功遷兵部尙書。 南省視事,使武士戎裝夾道,陳跳丸舞劍, 旣得志,乃厭然驕觖,求宰相,帝重違曰:「卿勳力何任不可 帝密擿蕭華使喻止冕。 百騎前驅, 御府設

王、克王圖之。 元振告輔國,即伏兵凌霄門,迎太子,同變,是夜捕二王及中人朱輝光、馬英 張皇后數疾其顓,帝寢疾,太子監國,后召太子,將誅輔國及程元振,太子不從,更召越

列傳第一百三十三 宜者下

俊等囚之,而殺后它殿。、

許朝朔望。 失勢,舉相賀。 然欲翦除,而憚其握兵,因尊爲尙父,事無大小率關白,羣臣出入皆先詣輔國,輔國頗自安。 曰:「老奴死罪,專與君不了,請地下事先帝矣!」帝優辭諭遣。 又册進司空兼中書令,實封戶八百。未幾,以左武衞大將軍彭體盈代爲閑廢、羣牧、苑內、 、五坊等使,以右武衞大將軍藥子昂代判元帥行軍司馬,賜輔國大第於外。中外聞其 代宗立 輔國欲入中書作謝表,閣者不內,曰:「尙父罷宰相,不可入。」輔國氣塞,久乃 ,輔國等以定策功,愈跋扈,至謂帝曰:「大家弟坐宮中,外事聽老奴處決。」帝矍 輔國始惘然憂,不知所出,表乞解官。有詔進封博陸郡王,仍爲司空、尙父,

年五 梓州刺史杜濟以武人爲牙門將,自言刺輔國者。 領中書,穎進祕書監,烜中書舍人,裴冕引爲山陵使判官,輔國罷,俱流嶺南,賜死 十九,抵其首溷中,殊右臂,告泰陵。然猶祕其事,刻木代首以葬,贈太傅,諡曰醜。後 自 有韓穎、劉烜善步星,乾元中待詔翰林,穎位司天監,烜起居舍人,與輔國暱甚。 1輔國徙太上皇,天下疾之,帝在東宮積不平。 旣嗣位,不欲顯戮,遣俠者夜刺殺之, 輔國

王守澄者,史亡所來。 元和中監徐州軍,召還。 方憲宗喜方士說,詔天下求其人,宰相

左右, 皇甫 |麟德殿,悟出曰:「上體平矣。」內外乃安。 景珍、李元戢皆介泌、大通薦于天子,天子惑其說。 五十歲,有不死藥,並待詔翰林。 ·鎛、左金吾將軍李道古等白見楊仁晝、浮屠大通。 · 踵得罪,禁中累息,帝自是不豫。 十五年,罷元會,羣臣危恐。 號人田元佐言有祕方,能化瓦礫爲黃 是夜,守澄與內常侍陳弘志弑帝於中和殿, 泌以金石進帝餌之,躁甚,數暴怒,恚責 仁晝更姓名曰柳泌, 會義成 金, 韶除號令, 劉悟來朝 大通自言壽百 ;賜對 緣所 與董

人劉忠諒追殺元素于武昌,承和次公安賜死。訓乃脅守澄以軍容使就第,使內養齎耽賜死, 謀因事除之,不克,更因其黨鄭注、李訓乘其罅,於是流楊承和於驩州, 事 ,祕,時無知者,贈揚州大都督。其弟守涓自徐州監軍召還,死於中牟。 文宗嗣位,守澄有助力,進拜驃騎大將軍。 。帝疾元和逆罪久不討,故以宋申錫爲宰相 章元素象州 遣中

餌,以暴崩告天下,乃與梁守謙、韋元素等定册立穆宗。 俄知樞密事

戲樂。 寬以毬工得見便殿,內籍宣徽院或教坊,然皆出神策隸卒或里閭惡少年,帝與狎息殿中爲 劉 四方聞之,爭以趫 克明亦亡所來,得幸敬宗。敬宗善擊毬,於是陶元皓、靳遂良、趙士則、李公定、石定 勇進 于帝。 嘗閱角觝三殿,有碎首斷臂,流血廷中,帝歡甚,厚賜

列傳第

百三

十三

宦

ጒ

即位。 明、定寬弒帝更衣室,矯詔召翰林學士路隋作詔書,命<u>絳王</u>領軍國事 謙魏從簡與宰相裝度共迎江王,發左、右神策及六軍飛龍兵討之,克明投井死,出其尸戮 文端、石定寬、蘇佐明、王嘉憲、閻惟直等二十有八人羣飮,旣酣,帝更衣,燭忽滅,克明與佐 「打夜狐」,中人許遂振、李少端、魚志弘侍從不及,皆削秩。 務澄等皆斬首以徇,籍入家貲,又殺其黨數十人。 始,克明謀逆,母禁不許。 文宗立,嘉母忠,賜錢千緡、絹五百匹,給婢二人。 克明等恃功,將易置左右,自引支黨顓兵柄。于時,樞密使王守澄楊承和、中尉梁守 所親近旣皆凶不逞,又小過必責辱,自是怨望。帝夜艾自捕狐狸爲樂,謂之 帝獵夜還,與克明、田務澄、許 明日,下遺韶, 絳王

是時西門匡範位右中尉,世號「東軍」、「西軍」。 田 · 令孜字仲則,蜀人也,本陳氏。 咸通時,歷小馬坊使。 僖宗卽位,擢令孜左神策軍中

尉

,一委之,呼爲「父」。而荒酣無檢,發左藏、齊天諸庫金幣,賜伎子歌兒者日巨萬,國用耗 | 昵狎,倚寵暴横。 帝沖騃, 喜鬭鵝走馬,數幸六王宅、興慶池與諸王鬭鵝,一鵝至五十萬錢。 始,帝爲王時,與令孜同臥起,至是以其知書能處事,又帝資狂昏,故政 與內園小兒

閟櫃 盡。 令政語內園小兒尹希復、王士成等,勸帝籍京師兩市蕃旅、華商寶貨舉送內庫,使者監

坊茶閣,有來訴者皆杖死京兆 府

既所在盜起,上下相掩匿,帝不及知。 令孜 知帝不足憚,則販鬻官爵,除拜不待旨,假賜緋紫不以聞。 是時賢人無在者,惟佞鄙沓貪相與備員,偷安噤默而 百度崩弛,內外垢玩。

左拾遺侯昌蒙不勝憤,指言豎尹用權亂天下,疏入,賜死內侍省

政叱之,以羽林騎馳斬,即以羽林白馬載帝,晝夜馳,舍駱谷。 門,至咸陽沙野,軍十餘騎呼曰:「巢爲陛下除姦臣,乘輿今西,秦中父老何望?願還宮。」令 **丼力,賊不足虞。** 望,怊然流涕。 金吾衞上將軍,兼判四衞事,封晉國公。 兄也,故請帝幸蜀。 功,不聽賊。 宰相盧攜素事令孜,每建白,必阿邑倡和。 因又易置關東諸節度,賊乘之,陷東都。 令政何間開釋,呼萬歲,帝爲怡悅,因盛稱鄭畋、王鐸、程宗楚、李鋋、敬瑄方 帝曰:「善。」 有詔以令孜爲十軍十二衞觀軍容制置左右神策護駕使。 帝見蜀陿陋,稍鬱鬱, 初,黃巢求廣州,願罷兵,攜欲寵高駢,使有 今政急,歸罪攜,奉帝西幸,步出 時陳敬瑄方節度西川, 日與嬪侍博飲,時時攘袂 至成都,進左 令孜 北

而 不及黃頭軍,皆竊怨令孜。 初,成都募陳許兵三千,服黃帽,名「黃頭軍」,以捍蠻。 令 孜置酒會諸將,以黃金樽行酒,即賜之。 帝至,大勞將士,扈從者已賜 黃頭將郭琪不肯

列 傳

百

三 十

 \equiv

官

者下

)))))) 事 下 ; 難。 觀覆亡,疏入必死,而能收吾骸乎?」隸許諾,卒葬其尸。 宮中災,左右巡使不到,皆被顯責,安有天子播越,而宰相無所豫,羣司百官棄若路人?已 守,不召宰相,不謀羣臣,欲入不得,求對不許。 臣不得見。 解。 ·丹,數十戰,此與之功。」令政嘻怒曰:「知之。」密以酖注酒中,骐飮已,馳歸,殺一 ,誠不足諫,而來者冀可追也。」疏入,令孜匿不奏,矯詔貶昭圖嘉州司戶參軍,使人沈于蟆 曰:「軍容能易偏惠,均衆土,誠大願也。」令孜目曰:「君有功邪? 陛下固九州天子,非北司之天子。 今百官之在者,率冒重險出百死者也。 昔日 因夜燒營,剽城邑,敬瑄討敗之,奔廣都,遂走高駢所。 初,昭圖知正言必見害,謂家隸曰:「大盜未殄,宦豎離間君臣, 西幸,不告南司,故宰相、御史中丞、京兆尹悉碎于賊, 左拾遺孟昭圖 .請對,不召,因上疏極陳:「君與臣一體相成,安則 北司豈悉忠於南司?廷臣豈無用於敕使?文宗時, 昨昔黃頭亂, 且天下者,高祖、太宗之天下, 朝廷痛之。 火照前殿, 帝聞變,與令孜保東城自守,羣 唯兩軍: 」答曰:「戰党項 陛下惟與令孜閉 吾以諫爲官, 不可坐 中 尉 河寧, 非北司之天 以 婢,吮血得 扈 危則: 乘 城自 興得 薄契 共

統,以復光功第一。又忌復光且逼己,故薄其賞。 會復光死,大喜,卽罷復恭樞密使。中人曹知慤者,富家子,頗沈鷙。 賊平,令孜以王鐸爲儒臣且無功,而首謀召沙陀者,楊復光也,欲歸重北司, 自 謂 帷幄決勝,繫王室輕重, 賊在長安,知慤以清、 出入倨甚。 故罷鐸都

濁二谷之人倚山爲屯,不屈賊。 之。」令孜謂然,密令王行瑜以邠州兵度嵯峨山,襲殺其衆。 帝聞,賜金紫, 擢內常侍。 聞帝將還,因大言:「我且擁衆大散關 陰教士卒變衣服、 言語與賊類者,夜入長安攻賊營, 由是益自肆,禁制天子,不得有 下, 閱羣臣可歸者納 賊

帝以其專,語左右輒流涕

子。 晏弘 軍迎帝西縣,復以建及韓建等主之,號「隨駕五都」。令孜 己者以罪除徙。 別募神策新軍,以千人爲都,凡五十四都,分左右爲十軍統之。 自爲留後,以建及張造、韓建等爲部刺史。 復光部將應晏弘、王建等,以八都衆二萬取金、洋等州,進攻興元,節度使牛頊奔龍州 帝還,懼見討,引兵走許州。 以復光故, 纔授諸衞將軍, 又遣親信覘諸鎭,不附 王建率義 皆養爲 勇四

戰沙苑,王師敗。 政走還別州,與昌符皆恥爲令孜用,還與重榮合。 等兵凡三萬,壁沙苑。 重榮不奉詔,表暴令孜十罪。 軍 和 克用逼京師,令孜計窮,乃焚坊市,劫帝夜啓開遠門出奔。自賊破長安,火宮室、舍廬十 解乃去。 養子匡祐宣慰河中,王重榮厚爲禮,匡祐傲甚,舉軍怒, 匡祐還,訴令孜,且勸圖之。 重榮說太原李克用連和,克用上書請誅令孜、玫,帝和之,不從。 令孜自將討重榮,率邠寧朱玫、鳳翔李昌符,合鄜、延、靈、夏 令孜白以兩鹽池歸鹽鐵使,即自兼 重榮因數令孜罪,責其無禮,監 神策兵潰還,略所過皆 兩池権鹽 使。

惑小 南監 大散關 右被 困甚 難,使改進迎乘興。 護等皆不 及從。 | 孜 王建以義勇四軍扈帝,夜亂牢水,遂次陳倉。克用還河中,政畏克用且偪,與重榮連章請誅令 ,而駐鳳翔。 後京兆王徽葺復粗完,至是今孜唱曰:「王重榮反。」命火宮城,唯昭陽、蓬萊三宮僅存。 一命。 軍使, 人計,交亂羣帥,請誅之。 ,枕王建膝 剽戮者不勝計。 ,道險澀,帝危及難數矣。 致乃奉嗣襄王 留不去。 令孜請帝幸興元,帝不從, 且寐,覺而 政勸興元節度使石君涉焚閣道,絕帝西意。 重榮請幸河中,令孜沮而止。宰相遘率羣臣在鳳翔者表令孜顓 致引兵追行在,敗興鳳楊晟軍,帝次梁、洋,稍引而 令孜懼人圖己,蒙面以行。 煜 飯, 即僞位。 僅能至興元。 帝不及省,且詔重榮餉糧十五萬斛給行在, 分軍守靈壁,亢追兵。 |玫敗,帝乃得還京師 ,令孜以兵入寢,逼帝夜出,羣臣無知者,宰相 致、重榮表誅令政, 使王建長劍五 政長驅 邁惡<u>令</u>孜劫質天子,生方鎭之 一百淸道,囊傳國璽授之。 躡帝,帝以閣 安尉羣臣。 南, 政兵及中營, 重榮以令孜在, 道 韶以令孜爲劍 毁,走它道, 國煽

不能 **收怒抶王**,疆之行,王恥之。 俄削官爵,長流儋州,然猶依敬瑄不行。 始,帝入蜀,諸王 令孜自署劍南監 一徒步以從,壽王至斜谷不能進, |軍使,閱拱宸奉鑾軍自衞,晝夜馳入成都,固表解官求醫藥,詔 及帝病, 中外屬壽王, 令孜入候帝曰:「陛下記臣否? 令孜驅使前、王謝足且拘、得馬 」帝直 可濟。合 視

上 厚,何見困?」答曰:「父子恩,何敢忘!顧父自絕朝廷,苟改圖,則父子如初。」令孜曰:「吾 日「吾子也」,書召之。 建喜,將至,復卻之。 欲 位 通爲諸軍所疾,令孜因事召見,欲殺之。 旣見,乃欣然更養爲子,名彥實,即李茂貞也,故獨 一書雪其罪,詔爲湖南監軍。 面計事。」建然許,令政夜負印節授建,明日入成都,囚令孜碧雞坊。 [十軍容,殺我庸有禮!]因敎縊人法,旣死,而色不變。 因略定體、邛、蜀、黎、雅等州,韶卽置永平軍,拜建節度使。 Ŧ 即位,是爲昭宗。 楊復恭代爲觀軍容使,出王建爲壁州刺史。 凡二歲,與敬瑄同日死。 建怒,進圍成都。 臨刑,裂帛爲絚,授行刑者曰:「吾嘗 乾寧中,詔復官爵。 令孜登城謝建日:「老夫久相 令孜謀與建連衡亢朝廷,且 建取利州,自署防禦 始,右神策統軍宋文

略涉 藍田 令孜顓 六軍十二衞觀軍容使,封魏國公,實戶八百,賜號「忠貞啓聖定國 學 楊復恭字子恪,本林氏子,楊復光從兄也。 | 威福 術 僖宗出居興元,復爲樞密使,制置經略,多更其手。車駕還,遂代令政爲左神策中尉、 ,監諸鎭兵。 ,勁喪天下,中外莫敢亢,惟復恭屢與爭得失,令孜怒,下遷飛龍使,復恭乃臥疾 龐勛亂,戰有功, 自河陽監軍入拜宣徽使,擢樞密使。 宦父玄翼,咸通中領樞密,世 [功臣] 爲權家。 黄巢盗京師 復恭

帝崩,定册立昭宗,賜鐵券,加金吾上將軍,稍攘取朝政。 列 傳 百三十 Ξ 宦 者 下 帝嘗曰:「朕不德, 五 一八八九九 爾援立我

日小行從。」帝乃詔類減半。 五百,犢車、紅網朱網畫香車百乘,諸衞士三千。凡曲江、温揚若畋獵日大行從,宮中、苑中 頓首稱善。 矣,當減省侈長示天下。 帝遂問游幸費,對曰:「聞懿宗以來,每行幸無慮用錢十萬,金帛五車,十部樂工 我見故事,尙衣上御服日一襲,太常新曲日一解,今可禁止。」復恭

封拜。 态。 子守亮方領節度,陰勒利州刺史覆壞舟于江,宗屬賓客皆死,以舟自敗聞。 甚,至禁中見復恭詬辱之,遂居中任事。 是深銜之。 王瓊者,惠安太后弟〔〕,求節度使,帝問復恭,對日:「產、祿傾漢,三思危唐,后族不 於是宰相韋昭度、張濬、杜讓能等爲帝言大中故事,抑宦官不假借,帝亦稍厭復恭橫 陛下誠愛瓌,任以它職可也,不宜假節外藩,恐負勢顓地不可制。」帝乃止。 復恭不欲分己權,白爲黔南節度使,道興元, 帝知復恭謀,繇 瓊聞, 怒 而兄 口

甚。 門。 「卿家胡子安在?吾欲令衞殿內。」復恭以守立見帝,賜姓李,名順節,使掌六軍管鑰,光寵 既勢鈞,遂與復恭爭恨相中傷,暴發其私。 守立爲天威軍使,本胡弘立也,勇武冠軍,人畏之。帝欲斥復恭,懼爲亂, 復恭以諸子爲州刺史,號「外宅郎君」; 又養子六百人, 監諸道軍。 天下威勢, 乃好 舉歸其

復恭常肩興抵太極殿。 宰相對延英,論叛臣事,孔緯曰:「陛下左右有將反者。」 帝矍

然。 逞皆姓楊, 緯指復恭。復恭曰:「臣豈負陛下者?」緯曰:「復恭,陛下家奴,而肩輿至前殿。 ,非反 (邪?」復恭曰:「欲收士心輔天子。」帝曰:「誠欲收士心,胡不假|李姓乎? 廣 樹不

恭無以對。 。會緯出守江陵,乃使人劫之長樂坡,斬其旌節,貲貯皆盡,緯僅免。

攻復恭,治殺使者罪,帝御延喜樓須之。家人拒戰,守信亦率兵至昌化里,陣以待。會日入, 使者於道,遁居商山。 罷 復恭與守信舉族出奔,遂走興元。 父子且謀亂,時順節遙領鎭海軍節度使、同中書門下平章事,詔與神策軍使李守節率衞兵 復恭兵,出爲鳳翔監軍,不肯行,因丐致仕,詔可,遷上將軍,賜几杖。 復恭子守貞爲龍劍節度使,守忠洋州節度使,皆自擅貢賦,上書訕薄朝政。 俄入居昭化坊第,第近玉山營,而子守信爲軍使,數省候出入。 使者還, 遣腹心殺 大順二年, 或告

從 有 者 大 召順節, 順 誤 節已斥復恭,則橫暴,出入以兵從,兩軍中尉劉景宣、西門重遂察其意非常,以狀聞。 出 延喜門,剽永寧里,盡夕止。 輒以甲士三百入,至銀臺門,何止之,景宣引順節坐殿廡,部將嗣光審出斬之, 賈德晟與順節皆爲天威軍使,順節誅,頗嗟憤,重

遂 奏誅之。

請 出 兵討罪 於 是 鳳翔李茂貞、邠州王行瑜、華州韓建、同州王行約、 了,軍 饟 不仰度支。 茂貞 、請假山南招討使。 宦尹惜類執不可,帝亦謂茂貞得山南 秦州 李茂莊同劾守亮納叛臣,

列

傳

第

百

三 十

=

宦

者

瑜討之。 必難 徐彦若 是茂 亮官爵。 〈貞始 制 爲 詔 景福 **逐**擅 彊 鳳翔節度使,而以茂貞帥興元,不拜,請繼密爲留後。 兩 解之。 與行瑜出討,自號 元年,破其城,復恭、守亮、守信奔閬州,茂貞以子繼密守興元。 茂貞劾復恭自謂隋諸孫,以恭帝禪唐,故名復恭, 興元節度使,詒宰相書,慢悖不臣。 帝不得已,授以節度使, 帝爲下韶,令茂貞、行 逆狀明白, 韶吏部尚書 且請削守 自

栗訓 **檻車送守亮京師**、梟首長安市。 子也,其不臣類此。 兵 復恭與守亮等自閬州將北奔太原,趨商山,至乾元、爲韓建邏士所禽,卽斬復恭、守信, ,何進奉爲? 吾披荆榛立天子,既得位,乃廢定策國老,奈負心門生何! 假子意博奔太原收葬其尸,李克用爲申雪,韶復官爵 茂貞上復恭與守亮書曰:「承天門者, 隋家舊業也, 兒但積

遂謀誅 策軍 屋,薄興平,王師潰。 中 劉 之,乃興師 尉、 季述者,本微單,稍顯於僖、昭間, 觀軍 容使。 以嗣覃王戒丕爲京西 遂逼臨皋以陣,暴言讓能等罪,京師震恐,帝坐安福門,斬**重**遂、 時李茂貞得興元 招討使, 愈跋扈不 擢累樞密使。 神策大將軍李鐵 軌, 宰相杜讓能與 楊復 恭之斥, 副之。 入內樞 帝以西門重遂 密使李周謹 茂貞引 兵迎 爲右 壁盩 及 重

軍。 以謝 師,以景務脩、宋道弼代之,俄專國。宰相崔胤惡之,徐彥若、王摶懼禍不解,稍抑胤以和北 暍死十三,夜爲盜掠,哭聲殷山。徙駐石門。|茂貞恐,乃殺全瓘、景宜及|圭自解。 天子還京 繼晟縱火剽東市,帝登承天門,矢著樓闔。 天子出幸避其鋒。」景宣方與茂貞睦,故全瓘與鳳翔衞將閻圭共脅帝狩岐,王行實及景宣子 茂貞 胤怒,劾摶黨宦豎,不忠,罷去,俄賜死;流道弼驩州,務脩愛州,並死灞橋;逐彥若于 率師討茂貞,次渭北。 乃以季述、王仲先爲左右中尉,疾胤尤甚。 `,更以駱全瓘、劉景宣代爲兩中尉。 同州節度使王行實奔京師,謂景宣等曰:「沙陀十萬至矣,請奉 帝懼,暮出莎城,士民從者數十萬。至谷口, 乾寧二年,茂貞與王行瑜、韓建以兵入朝,李

也。 全忠爲兄弟,遣從子希正與汴既官程嚴謀廢帝。 因曰:「主上嚴急,內外惴恐,左軍中尉欲廢昏立明,若何?」振曰:「百歲奴事三歲郞主,常 不出,季述等共白帝,宮中不可妄處人。帝不納,詔著籍不禁。由是疑帝與有謀,乃外約朱 **亂國不義**,廢君 時帝嗜酒,怒責左右不常,季述等愈自危。先是,王子病,季述引內醫工車讓、謝筠,久 不祥,非吾敢聞。」希正 大沮 會全忠遣天平節度副使李振上計京師,嚴

南海。

先率王彦範 帝 夜獵 一苑中,醉殺侍女三人,明日午漏上,門不啓。 、薛齊偓、李師虔、徐彥回總衞士千人毀關入,謀所立,未決。 季述見胤曰:「宮中殆不測。」與仲 是夜,宮監竊取太

列

傳

第

百 Ξ

十 三

食自竇進,下至筆紙銅鐵,疑作詔書兵器,皆不與。方寒,公主嬪御無衾纊,哀聞 附上下。 瞀,倦于勤,願奉太子監國,陛下自頤東宮。」帝曰:「昨與而等飲甚樂, 榜殺之。 下,東宮官屬三品賜爵一級,四品以下一階,天下爲父後者爵一級,羣臣加爵秩厚賜, 季述液金以完鐍,師虔以兵守。 疾,令太子監國。」巖等皆呼萬歲。 牀、將走、季述、仲先持帝坐,以所持釦杖畫地責帝曰:「某日某事爾不從我,罪一 下如軍容語。」 程嚴等詣思玄門請對,士皆呼萬歲。 今立皇太子,以主社稷。」邌明,陳兵廷中,謂宰相曰:「上所爲如此, 子以入,季述等因矯皇后令曰:「車讓、謝筠勸上殺人,禳塞災咎,皆大不道。兩軍軍容知之, 胤告難於朱全忠,使以兵除君側,全忠封胤書與季述曰:「彼翻覆,宜圖之。」季述以責 皇后 殺帝弟睦王。 改東宮爲問安宮。 卽 诏百官署奏, ·出徧拜曰:「護宅家,勿使怖,若有罪,惟軍容議。」 宮監掖帝出思政殿,后倡言曰:「軍容一心輔持, 師虔尤苛察,左右出入搜索,天子動靜輒白季述。 胤 季述等皆先誅戮以立威,夜鞭笞,晝出尸十輦,凡有 不得對。 太子卽位於武德殿,帝號太上皇,皇后爲太上皇后,大赦天 后以傳國寶授季述,就帝輦,左右十餘人,入囚少陽院。 入思政殿,遇者輒殺。 季述衞皇太子至紫廷院, 帝方坐乞巧樓,見兵入,驚墮於 請上養疾。」帝亦曰:「朕久 季述出百官奏, 左右軍及十道邸官俞潭 非社 何至是?」 一稷主,今當以太子 帝衣 外廷 晝服夜浣 龍于帝,悉 也。」至數 后曰:「陛 日:「陛下 欲媚

李振入見曰:「豎刁、伊戾之亂,以資霸者。 人。」自是始離。 季述子希度至汴,言廢立本計,又遣李奉本齎示太上皇誥,全忠狐疑不決。 「左軍與胤盟,不相害,然僕歸心於公,丼送二侍兒。」 全忠得書, 胤曰:「姦人僞書,從古有之,必以爲罪,請誅不及族。」季述易之,乃與盟。 胤謝全忠曰: 今閹奴幽劫天子,公不討,無以令諸侯。」乃囚斋 **恚曰:「季述使我爲兩面**

度、奉本,遣振至京師與胤謀。

待旦。 足羞 中,出其尸斬之。全忠檻送巖京師,斬于市。 軍,執季述、彥範至樓前,胤先戒京兆尹鄭元規集萬人持大梃,帝詰季述未已,萬梃皆進,二 **先衆辱之,督其償,株連甚衆。** 檢校司徒、邕管節度使、視宰相秩。 度使,從實檢校司徒、容管節度使,並同中書門下平章事,賜氏李,曰繼昭,曰彥弼。 人同死梃下,遂尸之。兩軍支黨死者數十人。 皇后曰:「可獻賊首。」德昭擲仲先頭以進,宮人毀扉,出御長樂門,羣臣稱賀。 !」又遣客密告德昭,割帶內蜜丸通意。 是時季述欲盡誅百官,乃弑帝,挾太子令天下。都將孫德昭、董從實盜沒錢五千緡,仲 仲先乘肩興造朝,德昭等劫之,斬東宮門外,叩少陽院呼曰:「逆賊斬矣。」帝疑未信, 胤間其不逞, 曰:「能殺兩中尉, 迎太上皇, 而立大功, 何小罪 皆號「扶傾濟難忠烈功臣」,圖形凌煙閣,留宿衞凡十日 。中官奉太子遁入左軍,收傳國璽。 德昭邀別將周承誨,期十二月晦,伏士安福門 季述等夷三族。以德昭檢校太保、靜海 承誨馳入左 齊偓死 承誨 亦

乃休,竭內庫珍寶賜之。 當時號「三使相」,人臣無比。

權。 師虔請於屛風後錄宰相所奏,帝以侵官,不許,下詔與徐彦回同誅。 至是,詔如大中故事,對延英,兩中尉先降,樞密使侯旨殿西,宰相奏事已畢,案前受 初,延英宰相奏事,帝平可否,樞密使立侍,得與聞,及出、或矯上旨謂未然,數改易橈

易簡、周敬容爲樞密使。胤怒,約京兆鄭元規遣人狙殺之,不克。全誨等知胤必除己乃已, 帝謂胤曰:「議者不同,勿庸主軍。」乃以全誨爲左神策中尉,彥弘爲右,皆拜驃騎大將軍,袁 |昭等問以||胤所請奈何,對曰:「臣世世在軍,不聞書生主衞兵。且罪人已得,持軍還北司便。」 思領之。韓偓聞岐、汴交戍,數諫止胤,胤曰:「兵不肯去耳。」偓曰:「初何爲召邪?」 胤不 因諷 臣不敢謀。」昭宗意不決。李茂貞語人曰:「崔胤奪軍權未及手,志滅藩鎭矣。」帝聞,召李繼 陸展見武德殿右廡,胤曰:「自中人典兵,王室愈亂,臣請主神策左軍,以展主右,則四方藩 茂貞留選士四千宿衞,以李繼筠、繼徽總之。胤亦諷朱全忠內兵三千居南司,以婁敬 韓全誨、張彥弘者,皆不知所來,並監鳳翔軍。全誨入爲內樞密使。劉季述之誅,崔胤、

議者知京師不復安矣。

全海、 **彦弘見帝祈哀,帝知左右漏言,始韶襲封奏事。 宦人更求麗姝知書者數十人,侍 彥弘及彥弼合勢恣暴,中官倚以自驕,帝不平,有斥逐者,皆不肯行,胤固請盡誅**

內詗,由是胤計多露。

卻,韶罷胤領鹽鐵,胤銜之。 度支財盡,無以稟百官, 始,張濬判度支,楊復恭以軍貲乏,奏假鹽麴一歲入以濟用度,遂不復還。 請如舊制。 全誨擿李繼筠訴軍中匱甚,請割三司隸神策。 至胤, 帝不能 乃白

和 殿 和 解之,凶焰益肆。」帝乃止。 解之。 全誨等懼帝誅己,與繼誨、彥弼、繼筠交通謀亂。帝問令狐渙,渙請召胤及全誨等宴內 韓偓謂:「不如顯斥一二柄臣,許餘人自新,妄謀必息。 不然皆自疑,禍且速,雖

功,卽 自 愈誇,宮中禁索苛亟,帝與后相視泣,宮人私逃出都,民崩沸,或奔開化坊依胤第自固,閈無 討元惡。」帝未許,方在乞巧樓,全誨急,即火其下,帝降樓,乃決西幸。 曰:「全忠且至,欲脅陛下幸關東,將謀傳禪。 歸。 是時, 韶
井
力
。 今若後至,必先見討。」全忠得韶,還汴,悉師討全誨。 全忠丼河中,胤爲急韶,令入朝,又詒書曰:「上反正,公之力,而鳳翔 令胤
 令胤
 計二
 鎮書,
 示帝意。 全忠取同州,汴兵凡七萬,威震關中。 臣不忍見高祖天下移他姓,願至鳳翔,合義兵 帝以爲忠, **彦弼等以帝未即駕**, 又欲其與茂貞 全海等泣 入朝, 引功 奏 同

五八九七

列傳

第

百三十三

從,實天復元年十一月壬子。全誨等遂火宮城,繼誨、彥弼欲劫百官從天子,李德昭等按兵 **衞之,乃得免。** 時彥弼先入鳳翔,全誨逼帝出,惟皇后、諸王數百 鳳翔軍與左神策兵陣大衢,長樂門外若丘墟然。 茂貞以帝居盩厔。 :騎爲衞,帝繡袍、塗金帽,以右 於是日南至, 百官不朝, 帝坐思政 神策軍

則似 · 齊君,退則負國,然敢不勉?」胤率百官迎全忠灞橋,入舍長安一昔而 ,脅乘興出遷,暴露草莽,吾當入對言狀。」時公卿皆在長安,數日不聞朝廷敕 見全忠曰:「上猶在盩厔,公宜亟進。」羣臣盧知猷等奏記全忠, |全忠取||華州,下令自釋日:「吾被詔及得宰相書令入朝,旣至,皆僞也。 請西 「迎天子, 西 逆臣全誨震驚 答曰:「進 胤使

攻邠州 執催 部將 說全忠。 」明 胤 康 茂 公當 負 懷英襲破李繼昭于武功, 李繼 、聞全忠至,以帝入鳳翔,從臣纔三四人。 全忠亦自聞茂貞將戰,徙營渭北,據高原,戰不勝。 海內謗。 入覲。」全忠曰:「宦官齊驚乘 圍 徽嬰城三日,乃降。 鳳翔,茂貞不出。 全忠不答, 進屯鳳翔東偏。 、禽馘六千級。 帝遣中 質其 妻,復使繼徽守, 人韶全忠班 興, 吾以兵 全 懼,請救於李克用。 茂貞登城隃語曰:「天子厭災 全忠遺楊達、裴鑄 師 問 罪, 一, 不 回壁三原。 奉 迎 詔。 Ŀ 全忠夜入盩厔, 拔藍田, 復屯 一東還。 使者 胤與鄭元規 入鳳翔,奉表天子。 再往, 王 非 克用遺全忠書, 同謀 全忠 于 此, 辘 奎 三原, 命 尙 讒 。 引 何 人 設 邀 所

州 以精甲五萬與茂貞決戰,岐兵敗,仆尸萬餘,茂貞帳下八百人就縛,乃嬰城,自夏訖冬,兵連 帝入蜀。」且泣。全忠執其手,乃定計迎天子。會朱友寧敗岐兵于莫父,居人皆入保。 b、d、隴等州,間劫鈔以佐軍餉,故能不乏。 不能解,勝敗略相償。援軍十餘壁,數爲全忠擾襲,不得進,城中日困。全忠由是取鳳、鄜、 ,嗣昭遁還河東。 時李克用攻慈、隰,救鳳翔,全忠還河中。 全忠曰:「此茂貞所倚,今敗矣,何能久乎?」胤復說全忠曰:「宦豎謀擁 克用部將李嗣昭戰數不利,全忠取晉、汾二 全忠

俄 御膳賜全誨等,三讓,帝曰:「難得時欲同味耳。」 茂貞食鮓美,帝曰:「此後池魚。」 茂貞曰: 「臣養魚以候天子。」聞者皆駭。 而 :鴉不來,人以爲恐。 全誨等小人旣勢窘,更相怨疾,不復遠慮。 時財用窶短,帝輟所 茂貞疑帝與全忠有密約,增甲士守宮殿。 初,帝至鳳翔,有鴉數萬棲殿樹,謂之神鴉。

意。 社稷,請奉乘輿還宮,僕願以敝賦從。」全忠然許,然軍稍薄城,大謼者三,岐軍皆投塹,無關 曰:「禍亂之生,全誨首之。 帝召茂貞、 於是全忠軍攻東城,焚橋鏖戰,部將李繼龍出降,茂貞懼,密圖誅中官以紓難。 全誨、彥弼及宰相蘇檢、李繼岌、繼忠議,和已決,中官復沮罷。 變興倉卒,故迎天子至此。且公未至,懼它盜馮陵。公旣志輔 先遺書

竭,奈何?」皆不敢對。有衞士十餘人叩左銀臺門,遮全誨駡曰:「破一州,餓死者十萬,徒以 至,皆相賀,百姓笑曰:「紿我乎!」 見全誨曰:「昔楊軍容破楊守亮一族,今驃騎復破吾族乎?」駡之,乃出降。 軍容數人耳!」全誨詣茂貞叩頭訴,茂貞謝曰:「士伍亦何知?」復訴于帝,帝不許。 帝召茂貞等曰:「十六宅諸王日奏餒死者十三,王、公主、夫人皆間日食,今又將 官 豎 數 傳 援 軍 李繼昭

依趙匡凝,然不得去,乃定計歸全忠,以舒近禍。 迎天子。帝旣惡宦人脋遷,而茂貞又其黨,全忠雖外示順,終悖逆,皆不可倚。欲狩襄、漢, 克用攻晉州以爲援。全忠懼,圍益急。全誨等素譎險,常爲全忠、胤所憚,乃請先殺之,以 外曰「奪天子賊」。諸鎭見崔胤檄,皆狐疑不出師,唯青州節度使王師範取兗州,襲華州,李 是時,全忠合四鎭兵十餘萬,營壘相屬,晝夜攻。外兵詬守者曰「劫天子賊」,守者亦詬

以次誅矣。」於是內養八輩候廷中授命,每二輩以衞士十人取一首,俄而全誨、彥弘、易簡、 自見勢去,計無所用,垂頭喪氣。帝召韓偓見東橫門,執手涕泗,帝曰:「今先去四大惡,餘 思,諭密旨,乃以蔣玄暉入衞。二日,茂貞獨見,至日旰,全誨、彥弘恨甚,逮食,不能捉匕, 敬容皆死。 三年正月,茂貞請遣使諭全忠軍,詔崔構挾中人郭遵誨往,旣行,又命宮人寵顏馳見全 即韶第五可範爲左軍都尉,王知古、揚虔朗爲樞密使,知古領上院,虔朗領下

乎?」茂貞懼,復誅小使李繼彝等十人,於是開壘門。全忠獨攻北壘,帝遣寵顏賜御巾箱寶 **徧告軍中,以姚洎爲岐、汴通和使。全忠詒茂貞書曰:「宦者乘陴詈不已,曰『稟王旨』,是** 首內布囊,詔蔣玄暉、學士薛貽矩送全忠,曰:「是皆不肯使乘興東者,旣斬之矣。」全忠大喜, 繼筠、繼誨、彥弼皆伏誅,茂貞取其輜重。 是夜,誅內諸司使韋處廷等二十二人,悉以

狹于背,而左右莫敢動。是夜,帝三召,皆辭,朱友倫以兵衞帝。 帶以賜,召之食。帝顧衞兵,或有憤發者,因履係解,目全忠:「爲吾繫之。」全忠跪結履,汗 伏地泣曰:「老臣位將相,勤王無狀,使陛下及此,臣之罪也。」帝亦嗚咽,命韓偓起之,解玉 天子入全忠軍,全忠泥首素服,待罪客省,傳呼徹三仗,有詔釋全忠罪,使朝服見。全忠 器,使罷兵,又捕殺中官七十人,全忠亦使京兆誅黨與百餘人。

省若寺,兩軍內外八鎭兵悉屬六軍。 官主領者皆罷。於是追諸道監軍,所在賜死,其財產籍入之。詔以中官齊遷狀及全忠迎乘 于路,留單弱數十人,備宮中灑掃。胤以與人性謹厚,即詔王鎔擇五十人爲敕使,內諸司宦 興本末告方鎮,罷監軍院,咸視國初故事,以三十人爲員,衣黃衣,不得養子。 |李克用引軍去,帝還京師。胤、全忠議,盡誅第五可範等八百餘人於內侍省,哀號之聲聞 全忠還汴州,帝以第五可範等無辜,頗悼之,爲文以 內諸司皆歸

自是宣

一傳詔命,皆以宮人。

列

第

百

三十

Ξ

宦者下

校

勘記

張,帝卒弑死,唐室以亡,其禍本於全誨、彦弘云。 之,後稍稍誅夷,羣宦寖不安。時帝懲幽辱,能勵心庶政,數召見羣臣問治道,有志中興,而 胤爭權,外召彊臣,劫本朝以相吞齧,卒用關東軍窮討暴誅,君側雖清,而全忠勢遂 劉季述專廢立,中人皆與聞。 帝反正,誅季述及薛齊偓數族而已,餘貸不問,又悔

廢,而人謀洄剌乃然邪 柄于外,以內攘姦人,則大臣專,王室卑矣。 贊曰:袁紹誅常侍以逞,而曹操移漢;崔丞相血軍容甘心焉,而朱温篡唐。 漢、唐相去五百歲,產亂取亡猶蹈一 轍,非天所 大抵假威

校勘記

王瓌者惠安太后弟 〇昭宗紀, 惠安太后爲唐僖宗母,恭憲太后爲唐昭宗母,王瓌求節度使在唐昭宗時,則此應 按本書卷七七恭憲皇后傳,王瓊乃恭憲太后弟。 又據本書卷九僖宗紀、卷

作「恭憲太后弟」。

唐書卷二百九

列傳第一百三十四

酷吏

姚紹之 索元 禮 周利貞 來俊臣 來子珣 王旭 周興 吉温 丘神勣 羅希奭 侯思止 崔器 毛若虛 王弘義 敬羽 郭弘霸

止樂。 太宗定天下,留心聽斷,著令:州縣論死三覆奏,京師五覆奏。 至晚節,天下刑幾措。 是時州縣有良吏,無酷吏。 獄已決, 尙芋 然 爲 徹 膳

以勸 獄。 天下。 時四方上變事者,皆給公乘,所在護送,至京師,稟於客館,高者蒙封爵, 武后乘高、中懦庸,盗攘天權,畏下異己,欲脅制羣臣,椔翦宗支,故縱使上飛變,構大 於是索元禮、來俊臣之徒,揣后密旨,紛紛並興,澤吻磨牙,噬紳纓若狗豚然,至 下者被賚賜,

列

阵

第

百

Ξ

十四四

酷

吏

五九〇三

命已遷,猶慮臣下弗懲,而六道使始出矣。 叛胔臭達道路,冤血流離刀鋸,忠鯁貴彊之臣,朝不保昏。 而后因以自肆,不出韓闥, 而天

罪去。 寐,敲撲撼搖,使不得**瞑,號曰『宿囚』**。 攝逮,便與妻子決。 者,使推其情,有司必上下其手,希合盛旨。 空投隙,相矜以殘,泥耳籠首,枷楔兼暴,拉脅籤爪,縣髮熏目,號曰『獄持』。 至載初,右臺御史周矩諫后曰:「凶人告訐,遂以爲常,推劾之吏,以嶮責痛詆爲功, 且周用仁昌,秦用刑亡。 人苟賒死,何求不得?陛下不諒,試取告牒判無驗 今舉朝脅息,謂陛下朝與爲密,夕與爲歸, 惟陛下祭之。」后寤,獄乃稍息,而酷吏蹇蹇以 **晝禁食**, 夜禁 一罹

擊殺戮矣。 天寶後至肅、代間,政類事叢,姦臣作威,渠憸宿狡,頗用慘刻奮,然不得如武后時敢搏

嗚呼! 非吏敢酷,時誘之爲酷。觀俊臣輩忧利放命,內懷滔天,又張陽、郅都之土苴云。

索元禮,胡人也,天性殘忍。 元禮揣旨,即上書言急變,召對,擢游擊將軍,爲推使。 初,徐敬業兵興,武后患之,見大臣常切齒,欲因大獄去異 即洛州牧院爲制獄,作鐵籠

以苛猛,復受財,后厭衆望,收下吏,不服,吏曰:「取公鐵籠來!」元禮服罪,死獄中。 時來俊臣、周興踵而奮,天下謂之「來索」。薛懷義始貴,而元禮養爲假子,故爲后所信。 囚,窮根柢,相牽聯至數百未能訖,衣冠氣褫。后數引見賞賜,以張其威,故論殺最多。 聲囚首,加以楔,至腦裂死。 又橫木關手足轉之,號「曬翅」。或紡囚梁上,縋石於頭。 訊一 是

妻,先已娠而生俊臣,冒其姓。 來俊臣,京兆萬年人。父操,博徒也,與里人蔡本善。 本負博數十萬不能償,操因納其

纖介,皆入于死。 后以爲諒,擢累侍御史,按詔獄、數稱旨。 狀,杖之百。 天資殘忍,喜反覆,不事產。 。|天授中,續以罪誅,俊臣上書得召見,自陳前上|琅邪王|沖反狀,爲|續所抑。 拜左臺御史中丞,中外累息,至以目語。 客和州爲姦盜,捕送獄,獄中上變,刺史東平王續按訊無 后陰縱其慘,脅制羣臣,前後夷千餘族。 生平有

武

公卿 臣或侯思止推實必得。」后信之,詔於麗景門別置獄,敕俊臣等顓按事,百不一 俊臣乃引侯思止、王弘義、郭弘霸、李仁敬、康暐、衞遂忠等,陰嘯不逞百輩,使飛語 ,上急變。 每擿一事,千里同時輒發,契驗不差,時號爲「羅織」,牒左署曰:「請付來俊 貸。 弘義戲 誣衊

五 九〇五

列 傳

第

百

Ξ + 74

酷 吏

脈綱 實,八、死猪愁,九、求卽死,十、求破家。後以鐵爲冒頭,被枷者宛轉地上,少選而絕。 謂麗景門爲「例竟」,謂入者例皆盡也。 至,先布械于前示囚,莫不震懼,皆自誣服。 各爲號:一、定百脈,二、喘不得,三、突地吼,四、著卽臣,五、失魂膽,六、實同反,七、反是 絕其糧,囚至齧衣絮以食,大抵非死終不得出。每赦令下,必先殺重囚乃宜詔。又作大枷, 由,咸有首末,按以從事。。俊臣鞠囚,不問輕重皆注醞于鼻,掘地爲牢,或寢以匽溺,或 俊臣與其屬朱南山、萬國俊作羅織經一篇,具爲支 凡囚

傑六族皆免。又按大將軍張虔勗、內侍范雲仙,虔勗不堪枉,訟於大理徐有功,俊臣使衞士 亂斫之,雲仙自陳事先帝,命截其舌,皆卽死,人人脅息。 爲俊臣夷其家,有子九歲隸司農,上變,得召見,言:「俊臣凶慘,罔上不道,若陛下假條反狀 付之,無大小皆如韶。 誅大臣爲功,乃奏囚降制,一問而服者同首,法得減死。 舍人周綝往視,遽假仁傑樸帶立西廂,綝懼俊臣,東視唯唯去,莫敢聞。 先是,宰相樂思晦 仁傑乃遺子持帛書稱枉。后見愕然,責謂俊臣,對曰:「是囚不褫巾服,何肯服罪?」后遺通事 如意初,誣告大臣狄仁傑、任令暉、李游道、袁智弘、崔神基、盧獻等下獄。 俊臣顓以夷 臣父死族夷,不求生,但惜陛下法爲俊臣所弄耳!」后意寤, 仁傑等已論死,待日而決,稍挺之, 由是仁

久之,俊臣納賈人金,爲御史紀履忠所劾,下獄當死。

后忠其上變,得不誅,免爲民。

俊臣 之。 興其黨集龍門,題搢紳名於石,抵而仆者先告,抵李昭德不能中。 涕,俊臣奏與同惡,如璿自訴年老而涕,吏論以絞,后爲宥死,流漢州。 異謀,吉頊以白俊臣,殺數十族。 歌舞行了,令其黨告以謀反,而求其婢,諸蕃長數十人,割耳剺面訟冤,僅得解。 惡,未發。 **擢洛陽令,進司僕少卿,賜司農奴婢十人。以官戶無面首,聞吐蕃酋阿史那斛瑟羅有婢善** 長壽中,還授殿中丞,坐贓貶同州參軍事,暴縱自如,奪同僚妻,又辱其母。俄召爲合宮尉 它日,會妻族,酒酣,遂忠詣之,闍者不肯通,遂忠直入嫚駡,俊臣恥妻見辱, 誣司刑史樊戩,以謀反誅,其子訴闕下,有司無敢治,因自刳腹。 衛途忠雖無行,頗有辭辯,素與俊臣善。 既欲擅發姦功,即中頃以法,頃大懼,求見后自直,乃免。 始王慶詵女適段簡而美,俊臣矯詔彊 或以告昭德,昭德謀繩其 秋官侍郎劉如璿爲流 萬歲通天中,上巳, 綦連耀等有 已命驅而 娶

共證 騁志。遂忠發其謀。初,俊臣屢掎摭諸武、太平公主、張昌宗等過咎,后不發。 其罪。 俊臣 知羣臣不敢斥己,乃有異圖,常自比石勒,欲告皇嗣及廬陵王與南北衙謀反,因得 有韶斬於西市,年四十七,人皆相慶,曰:「今得背著牀瞑矣!」爭抉目、擿肝、醢 至是諸武怨,

縛于廷,旣乃釋之,自此有隙,妻亦慚,自殺。簡有妾美,俊臣遣人示風旨,簡懼,以妾歸之。

方俊臣用事,託天官得選者二百餘員,及敗,有司自首,后責之,對曰:「臣亂陛下法,身

其肉,須臾盡,以馬踐其骨,無孑餘,家屬籍沒。

百三十四

受戮;忤俊臣,覆臣家。」后赦其罪。

先墓,得遷游擊將軍。 常衣錦半臂自異,俄流死愛州 惡,后倚以按獄,多徇后旨,故賜姓武,字家臣。 旣誣雅州刺史劉行實弟兄謀反,已誅,掘夷 時 有來子珣、周興者,皆萬年人。 永昌初,子珣上書,擢左臺監祭御史,無學術,語言蚩

臣曰:「囚多不服,奈何?」興曰:「易耳,內之大甕,熾炭周之,何事不承。」 傻臣曰:「善。」 命 道爲讎人所殺。 尚書左丞,上疏請去唐宗正屬籍。是時左史江融有美名,興指融與徐敬業同謀,斬于市。臨 取甕且熾火,徐謂興曰:「有詔按君,請嘗之。」興駭汗,叩頭服罪。 刑,請得召見,興不許,融叱曰:「吾死無狀,不赦汝。」遂斬之,尸奮而行,刑者蹴之,三仆三 天授中,人告子珣、興與丘神勣謀反,韶來俊臣鞫狀。 |興,少習法律,自尙書史積遷秋官侍郎,屢決制獄,文深峭,妄殺數千人。|武后奪政,拜 初,興未知被告,方對俊臣食,俊 詔誅神勣而宥興嶺表,在

疊州刺史,俄復故官,佐俊臣等爲慘獄,遂見倚愛。 博州刺史琅邪王沖起兵,拜神勣淸平道 神 一勣者,行恭子,爲左金吾衞將軍。 高宗崩,后使害章懷太子於巴州, 歸罪神勣,下遷

積怨,教思止告舒王元名與貞謀反,付<u>周興</u>鞫訊,皆夷宗,拜思止游擊將軍。元禮懼,引與同 我,孰教爾邪?」思止驚汗,起謝曰:「幸蒙公教。」乃引登牀。 我頭,當鋸截之,無抑我臣反。汝位御史,當曉禮義,而曰『白司馬』、『孟青』,是何物語?非 足絓鐙,爲所曳者。」思止怒,復曳之曰:「拒制使邪?」欲抵殊死。 <u>版,將軍有孟青棒,即殺琅邪王沖者。元忠不承,思止曳之。元忠徐起曰:「我如乘驢而墜,</u> **没**遊人第,宜辭曰:『臣疾逆臣,不願居其地。』」旣而果假之,以其敎對,后益喜,恩賞良渥。 無何,后果問,思止以對,后大悅。「天授中,遷左臺侍御史,元禮又敎:「上以君無宅,必賜所 坐,密教曰:「上不次用人,如問君不識字,宜對『獬豸不學而能觸邪,陛下用人安事識字? 思止音吐鄙而訛,人效以爲笑,侍御史霍獻可數嘲靳之 思止本人奴,言語俚下,嘗按魏元忠,讓曰:「亟承白司馬,不爾受孟青。」洛陽有白司馬 侯思止,雍州醴泉人。貧,賴不治業,爲渤海高元禮奴,詭很無良。恆州刺史裴貞笞吏,吏 思止怒以聞,后責獻可:「我已用 元忠徐就坐,色不變,獄稍挺。 元忠駡曰:「侯思止,欲得

之,何所誚?」戲可具奏鄙語,后亦大笑。

列傳第

百三

十 四

酷吏

可,日:「俊臣往劫慶詵女,已辱國,此奴復爾邪?」 搒殺之。 來俊臣棄故妻,逼娶太原王慶詵女,思止亦請娶趙郡李自挹女,事下宰相,李昭德執不

王弘義,冀州衡水人,以飛變擢游擊將軍,再遷左臺侍御史,與來俊臣競慘刻。暑月繫

衆捕逐,畦蓏無遺。內史李昭德曰:「昔聞蒼鷹獄吏,今見白冤御史。」 |議輒詫日:「我文檄如狼毒、野葛矣!」始賤時,求傍舍瓜不與,乃騰文言園有白兔,縣爲集 囚,別爲狹室,積蒿施氈罽其上,俄而死;已自誣,乃舍佗獄。每移檄州縣,所至震慴。 弘

按之,弘義歸窮曰:「與公氣類,持我何急?」元禮怒曰:「吾尉洛陽,而子御史,我今御史, 延載初,俊臣貶,弘義亦流瓊州。自矯詔追還,事覺,會侍御史胡元禮使嶺南,次襄州,

子乃囚。何氣類爲?」杖殺之。

抽其筋,食其肉,飲其血,絕其髓。」武后大悅,授左臺監察御史,時號「四其御史」。再遷右臺 郭弘霸,舒州同安人,仕爲寧陵丞,天授中,由革命舉,得召見,自陳:「往討徐敬業,臣誓

侍御史,大夫魏元忠病,僚屬省候,弘霸獨後入,憂見顏間,請視便液,即染指嘗,驗疾輕重,

賀曰:「甘者病不瘳,今味苦,當愈。」喜甚。 元忠惡其媚,暴語于朝。

騎至曰:「汝枉陷我,今取汝! 慶:旱而雨,洛橋成,弘霸死。」 又洛陽橋久壞,至是成。都人喜。 嘗按

污州刺史

李思徵,不勝楚毒死。後屢見

思徵爲厲,命家人禳解。

俄見思徵從數十 」弘霸懼,援刀自刳腹死,頃而蛆腐。是時大旱,弘霸死而雨。 后問羣臣:「外有佳事邪?」司勳郎中張元一曰:「比有三

盡其情,會敕宰相李嶠等同訊,執政畏禍,粗滅無所問。 皎、張仲之、祖延慶等謀殺之、事覺、捕送新開獄、詔紹之與左臺大夫李承嘉按治。 數附承嘉耳呫嚅,紹之翻然不復顧,卽引力士十餘曳囚至,築其口,反接送獄中。謂仲之曰: 事 不諧矣!」仲之固言三思反狀,紹之怒,擊折其臂,囚呼天日:「吾雖死,當訴爾於天! 姚紹之,湖州武康人。初以鸞臺典儀累遷監察御史。中宗時,武三思烝僭不軌,王同 囚嫭曰:「宰相有附三思者。」 嶠等 初欲原

囚等已誅,紹之意岸軒傲,朝野注目,擢左臺侍御史。 列 傳 第 百 Ξ + 깯 뺩 吏 奉使江左,過**汴州**,廷辱錄事參 因裂衫束之,卒誣以謀反,皆論族。

軍魏傳弓。久之,傳弓爲監察御史,而紹之坐贓,詔傳弓卽按。紹之謂揚州長史盧萬石曰: 「我頃辱傳弓,今來按,我死矣。」獄具,得贓五百萬,法當死,韋后女弟救請,故減死,貶瓊山 俄逃還京,萬年尉捕擊,折其足。 更授南陵令,員外置。 開元中,爲括州長史同正,不

得與州事,死。

受,利貞曰:「此闌魚,公何疑?」問其故,答曰:「適見漁者,禽不獲,而有魚焉,闌得之。」刺 史大笑。 周利貞者,亡其系。」武后時調錢塘尉,時禁捕魚,州刺史飯蔬。 利貞忽饋佳魚,刺史不

利貞,提內兄也。 誅之,私語崔湜,湜反以其計告三思。 神龍初,擢累侍御史,諧附權彊,五王等疾之,出爲嘉州司馬。 表攝右臺侍御史馳嶺外, 五王貶,提勸速殺之以絕人望,問誰可使,以利貞對。 矯殺敬暉、恒彥範、袁恕己,還,拜左臺御史中 武三思亂禁中,五王謀

貞顓事剝割,夷獠苦其殘虐,皆起爲寇,詔監察御史李全交按問,得贓狀,貶涪州刺史。 先天初,爲廣州都督。 **提陷劉幽求謫嶺夷,諷利貞殺之。** 賴桂州都督王晙護而免。 제

數爲仇人狙報,幾不免。

黨,组 爲望。 罰之,而今日賞之? 痛毒至今。 散大夫。 海 忠於君者,猶仇 勿齒。」尋復授珍州司馬。 康 心服。 暐 、侍御史封詢行、判官張勝之劉暉楊允衞遂忠公孫琰、廉州司馬鍾思廉皆酷吏,宜終身 廖恒、敞,自陛下登宸極,布新政,奪其班級,遷之遐荒,以允天下之望,義士猶以罰輕 元初,詔:「利貞及滑州刺史裴談、饒州刺史裴栖貞、大理評事張思敬王承本、華原令 今錫以朱紱,委以藩維,是絀姦不必行也。」疏入,遂寢。 所謂英斷,殄凶逆、正朝廷是也; 所謂聖明,辨忠邪、信賞罰是也。 <u>廷珪又表還制書曰:「利貞險薄小人,附會三思,傾危朝廷,殺害功臣,人神憤惋,</u> 東都搜掩其家,得金銀錦繡,冒違制令,當加重貶。 歸然。 使之入朝則亂國,撫俗則傷人。 明年,授夷州刺史, 黄門侍郎張廷珪執奏曰:「陛下英斷聖明,四 今擢典要藩,繇六品遷三品,何往 、未幾,復授黔州都督, 且久據朝廷,捷給便佞,見 利貞、宗、武舊 加朝 日

待監 次而 復貶利貞邕州長史。 奏曰:「周利貞希姦臣意,枉殺先臣暉,惟陛下正罰以謝天下。」左臺侍御史翟璋劾讓不 可,請行法。 會 廷珪罷,起爲辰州長史,朝集京師,與魏州長史敬讓皆奏事。讓,暉之子也,以父冤越 玄宗曰:「訴父之枉,不可不矜也,朝廷之儀,不可不肅也。」奪讓俸三月, 未幾,賜死梧州。

」玄宗乃止。

開元中,又有洛陽尉王鈞、河南丞嚴安之,捶人畏不死,視腫潰,復答之,至血流乃喜。

五九一三

列

乾封尉,旭輒斬其首送東都,遷井州錄事參軍。 王旭者,貞觀時侍中珪孫也。神龍初,爲兗州兵曹參軍。時張易之誅,而兄昌儀先貶 長史周仁軌者,章后黨也,玄宗平內難,有

詔誅之,旭不待覆,斬首齎還京師,遷累左臺侍御史。

楚,當以重辟,崇道及三子皆死,門生故人,並海內名士,皆絓染流徙,天下咨其冤。 夫李傑不平,更相罄計,傑坐斥衢州刺史,故旭益橫,殘毒以逞。官數遷,常兼御史。 崔湜敗,其婦翁盧崇道自嶺外逃歸東都,爲讎家上變,詔旭訊覆。 旭廣捕親黨,窮極慘 旭與大

旭埒,京師號「三豹」,嵩爲赤,全交爲白,旭爲黑。 里閭至相詛曰:「若違教,值三豹。」 橛」、「犢子縣」等,以怖下,又縋髮以石,脅臣之。 時監察御史|李嵩、李全交皆嚴酷, 取名與 其爲人苛急,少縱貸,人莫敢與忤。每治獄,囚皆逆服。製獄械,率有名,曰「驢駒拔

<u>虬</u>泣訴于王,王爲上聞,詔劾治,獲姦贓不貲,貶龍川尉,恚而死。 贓數百萬。 宋王憲官屬紀希虬兄爲劍南令,坐贓,旭奉使臨訊,見其妻美,逼亂之,因殺其夫,而納 希虬使奴爲臺傭事旭, 旭不知, 頗愛任之, 奴盡疏旭請求, 積數千以示希虬, 希

,故宰相頊從子也。 性陰詭,果于事。諂附貴宦,若子姓奉父兄。 天寶初,爲新豐

丞。 時太子文學薩嶷得倖,引温入見,玄宗目之曰:「是一不良,我不用。」罷之。

蕭炅爲河南尹,御史遣温到府有所訊詰,乃并治炅,不爲末搬,右相李林甫善炅,故得

免。

也。」炅揖乃去。 乃先往,與力士語,執手歡甚,將出,吳通謁,温陽惶恐趨避,力士止之,語吳曰:「吾故人 它日,到炅府,辭曰:「國家法不敢隳,今而後洗心事公,云何?

後舍,楚械搒掠,皆呻呼不勝,曰:「公幸留死,請如牒。」乃挺出。 六十餘人,帝命京兆 林甫 與李適之、張垍有隙。 與御史雜治,累日情不得。 適之領兵部,而||1兄||均爲侍郎,||林|||密遣吏擿其銓史僞選 **炅使温佐訊**,温 分囚廷左右,中取二重囚訊 諸史迎懾其酷,及引前,不

訊 皆服。 日中獄 具,林甫以爲能。 温嘗曰:「若遇知己,南山白額虎不足縛。」

中 椎 侍御 鍛 林甫 詔 史。 獄 人當 希奭文深虐,其舅鴻臚少卿張博濟,林甫壻也,以姻家故,自御史臺主簿再遷殿 初,温因中官納其出武敬一女爲盛王妃,擢京兆士曹參軍 國,權焄天下,陰構大獄,除不附己者。先引温居門下,與錢塘羅希奭爲奔走,

林甫欲搖 東宮、左聽衞參軍柳勣影會發杜良娣家陰事。 温按狀, 勣以 〉 誣誅, 因引動所

F

傳第

百三

十四

酷

吏

,低帽障面 王脩己、盧寧、徐徵,悉逮縛論死,尸積大理垣下,家屬離竄。 温怒,乃諷勵引涉及嗣號王巨,皆斥 逐。 初, 中書舍人梁涉道遇

震以烈 讖不得。 相勗以虐,號「羅鉗吉網」。公卿見者,莫敢耦語。 再三請,乃與之,對如温所敕。 曰:「愼矜獄具,須君一辨,君卽服,罪可貸,卽不服,死不解。」 林甫 温 威, 馳至東都,捕逮楊氏親屬賓客,取敬忠於汝州,鐵鏁頸,布蒙面,未嘗正視,陰遣吏脅 御史盧鉉索其家,挾讖以入,於是慎於兄弟皆賜死,株連數十族。是時,温與希奭 惡楊愼矜,王鉷飛書言圖識事,委温 隨問輒承,無敢迕,鞭楚未收于壁,而獄具矣。林甫才其爲,擢戶部郎中兼侍 温謝曰:「丈人毋懼!」乃下拜。 以獄。 温推事未窮,而先計贓成奏, 初,慎矜客史敬忠與温父善,見温繈葆 敬忠卽索筆自款,温陽不見, **愼矜以左證具,欲自誣,而** 乃引囚問,

營田、管內採訪,總留事,拜鴈門太守,知安邊鑄錢事。以母喪解,祿山表爲魏郡 思當國,引拜御史中丞,兼京畿關內採訪處置使。 可 ·擠矣。」

減山大悅,

亟稱温才,

天子亦忘前語。

於是

祿山領 厚待公,然不肯引共政;我見遇久,亦不顯以官。公若薦我爲宰相,我處公要任,則右相 楊 國忠、安祿山方尊寵,高力士居中用事,温皆媚附之。兄事祿山,嘗密諗曰:「李右相 禄山敕吏設白紬帳于傳以候命, 河東節度,表温自副,并知 節 國 度

御而餞之,温銜其德,故朝廷動靜輒報,不淹宿而知。 天寶十三載,滁山入朝,領閉廢使,薦

温武部侍郎以爲副。

山 ,編饋權近,國忠遣人發其狀,斥溫灃陽長史,其屬員錫及陟皆坐貶。 國忠與祿山爭寵,而温昵祿山甚,國忠不善也。 會河東太守韋陟怨失職,因温以交禄 明年,温仍坐受財、

奪民馬,貶端溪尉。 始,林甫死,希奭出爲始安太守,張博濟、韋陟、韋誠奢、李從一、員錫皆逗留始安,温旣

人。温之斥,帝在華清宮,韶從臣曰:「温本酷吏子,朕過用之,故屢構大獄,專威福。今旣 謫,又依希奭以居。國忠奏遣蔣沈臨按,希奭擅稽罪人,貶海康員外尉,俄遣使者殺温等五

斥,公屬安矣。」

温死五月而祿山反,即僞位,求温子,方十歲,授河南參軍以報之。

崔器,深州安平人。曾祖恭禮,尙眞定公主(三),爲駙馬都尉,貌豐偉,飮酒至斗不亂。

爲東畿採訪使,引爲判官。 器有吏幹,然性陷刻樂禍。天寶中,舉明經,爲萬年尉。 渾坐贓敗,器亦廢,後爲奉先令。 踰月,擢監察御史,中丞宋渾

皆相顧愧悔。及聞崔器議刑,衆心復搖。」帝曰:「殷幾爲器所誤。」後爲吏部侍郎、御史大 所厚貞。 帝旨,欲深文繩下,乃建議陳希烈、達奚珣等數百人皆抵死。李峴執奏,乃以六等定罪,多 賊者,悉入含元廷中,露首跣足,撫膺頓首請罪,令刀仗環之,以示扈從羣臣。 御史中丞、戶部侍郎。 兵且數萬,器大懼,悉毀賊所署符敕,募衆以應之。 上元元年病亟,叩頭若謝罪狀,家人問之,曰:「達奚尹訴於我。」三日卒。 安祿 。後蕭華自賊中來,因言:「王官重爲安慶緒驅脅,至相州,聞廣平王宣詔釋希烈等, 山陷京師,器受賊署,守奉先。頃之,同羅背賊,賊將安守忠、張通儒亡去,渭上義 肅宗至鳳翔,兼禮儀使。 。二京平,爲三司使。 渭上軍敗、遂走靈武。 器草定儀典,令王官陷 素善呂諲 器既殘忍希 得爲

家貲以定贓,有不滿意,攤案保伍姻近,人懼其威,無敢不如約。 **擢監察御史,以國用大竭,數請掊天下財,巧傅於法,日月有獻,漸見識用。 大抵覈囚,先收** 毛若虛,絳州太平人。眉長覆目,性殘鷙。天寶末爲武功丞,年六十餘。肅宗還京師,

請御史孫鎣窮治,獄久不具,詔中丞崔伯陽與三司參訊,未決。 乾元中,鳳翔七坊士數剽州縣間殺人,尉謝夷甫不勝怒,搒殺之。 乃使若虚按之,卽歸罪夷 士妻訴李輔國,輔國

嶺外。 死。」因磁岩虛殿中,而召伯陽。 伯陽爭甚力,若虛慢拒,伯陽怒,若虛卽馳入白于帝。 李峴頗左右鎣等,罷宰相。 伯陽至,具劾若虛罔上,帝主先語,叱伯陽出,幷官屬悉貶 於是若虛權焰震朝廷,羣臣不舒息。 韶姑出, 若虛泥訴曰:「臣出即 **尋擢御史中丞。**上

元元年,以罪貶濱化尉,死。

肅宗初,擢監察御史,以言利幸。京師平,任遇蹇顯,凶態不能忍,乃作互枷,號「勧尾楡」,囚 人多死。 敬羽,河中寶鼎人。貌寢甚,性便辟,善候人意。補匡城尉,朔方安思順表爲節度府屬。 又仆囚于地,以門牡轢腹;掘地實棘,席蒙上,瀕坎輷囚,不服則擠之坎,人多濫

死。

遷累御史中丞、宗正卿。

| 羽窮勃,乃悉召支黨,環以搒具,囚惶怖,一昔獄成,| 珍賜死,左衞將軍| 竇如玢等九人皆斬, 日:「公乃囚,我延公坐,何可慢?」邈仆三四,徐受所言,得贓至數百萬。 鄭國公李遵坐賄下韶獄,羽參按,遵肥而羽瘠,則引遵危坐小牀,痺且仆,遵欲申足,羽 嗣岐王珍謀反、韶

先是,胡人康謙以賈富,楊國忠輔政,納其金,授安南都護,領山南東路驛事,吏疾之,

太子洗馬趙非熊等六七人斃杖下,聞者毛豎。

列傳

第

百三十

四

酷吏

校勘記

誣其通史朝義。 |羽鞫之,|謙須長三尺,明日脫盡,膝腂皆碎,人視之,以爲鬼,乃殺之。

寶應初,羽斥道州刺史,詔殺之。 更相告訐,咤曰:「不及推,死矣,治州者無宜寢。」 |初與毛若虛、裴昇、畢曜同時爲御史,皆暴忍,時稱「毛敬裴畢」。未幾,昇、曜流黔中。 羽聞使者至,譲服而逃,吏械之。 臨死,袖中出牒數番,乃

校勘記

(1) 聞吐蕃會阿史那斛瑟羅有婢善歌舞 「吐蕃」,舊書卷一八六上來俊臣傳作「西蕃」,通鑑卷二〇

六作「西突厥」。按據本書卷二一五下及舊書卷一九四下突厥傳,阿史那斛瑟羅爲西突厥步真

子,武后時拜左衞大將軍,封竭忠事主可汗。此當以「西突厥」或「西蕃」爲是。

(11) 曾祖恭禮尙真定公主 「真定」,各本原作「館陶」。按本書卷八三諸帝公主傳、冊府卷三〇〇 俱云館陶公主嫁崔宣慶,真定公主嫁崔恭禮;唐會要卷六亦同,惟「真」作「貞」。今從諸帝

公主傳改。

唐書卷二百一十

列傳第一百三十五

藩鎭魏博

韓允中 田承嗣 簡 悅 樂彦禎 緖 季安 羅弘信 紹威 懷諫 縉 史憲誠 何進滔 弘敬

全皞

孫,脅百姓,加鋸其頸,利忧逆汙,遂使其人自視由羌狄然。 一寇死,一賊生,訖唐亡百餘 成禍根。亂人乘之,遂擅署吏,以賦稅自私,不朝獻于廷。效戰國,肱髀相依,以土地傳子 安、史亂天下,至肅宗大難略平,君臣皆幸安,故瓜分河北地,付授叛將,護養孽萌,以

當其盛時,蔡附齊連,內裂河南地,爲合從以抗天子。杜牧至以「山東,王不得,不王; 列 傳第 一百三十五 濳 鐵鏈 博 五九二一

年,卒不爲王土。

霸不得,不霸;贼得之,故天下不安」。又曰:

之壯,不圖擒取,乃偷處恬逸,以爲後世子孫背脅宜根,此復何也? 其不知乎,其俟蹇頓顚傾而後爲之支計乎?且天下幾里,列郡幾所,自河以北,蟠城數 百,角奔爲寇,伺吾人顦顇,天時不利,則將與其朋伍駭亂吾民於掌股之上。 今者及吾 事大人曾不歷算周思,以爲宿謀,方且嵬岸抑揚,自以爲廣大繁昌莫己若也。 厥今天下何如哉?干戈朽,鈇鉞鈍,含引混貨,照育逆孽(1),殆爲故常。 嗚呼! 而執

然後爲快也。 拘,猶豢虎狼而不拂其心,則忿氣不萌,此大曆、貞元所以守邦也。何必疾戰焚煎吾民, 議者曰:倔彊之徒,吾以良將勁兵爲銜策,高位美爵充飽其腸,安而不橈,外而不

樹一 前英後傑,夕思朝議,故能大者誅鉏,小者惠來。大抵生人油然多欲,欲而不得則怒, 同日而起,梁、蔡、吳、蜀,歸而和之,其餘混澒軒囂,欲相效者,往往而是。 器,分劃大盡,而賊夫貪心,未及畔岸,淫名越號,走兵四略,以飽其志。趙、魏、燕、齊, 來,几杖扶之;逆息虜胤,皇子嬪之。地益廣,兵益彊,僭擬益甚,侈心益昌。 一家,破制削法,角爲尊奢。天子不問,有司不呵;王侯通爵,越錄受之;覲聘不 愚曰:大曆、貞元之間,有城數十,千百卒夫,則朝廷貸以法,故於是闊視大言,自 運遭孝武 土田名

怒則爭亂隨之。 知非此,而反用以爲經,將見爲盜者非止於河北而已。 嗚呼! 大曆、貞元守邦之術,永 |元之間反此,提區區之有,而塞無涯之爭,是以首尾指支,幾不能相運掉也。 是以教笞於家,刑罰於國,征伐於天下,裁其欲而塞其爭也。 凡今者不 大曆、貞

戒之哉!

朱克融反,傳十二世,有州九。淄青傳五世而滅,有州十二。滄景傳三世,至程權入朝,十 至王承元入朝,明年,王廷凑反,傳六世,有州四。盧龍更三姓,傳五世,至劉總入朝,六月, 滅,有州三。澤路傳三世而滅,有州五。 六年而一李全略有之,至其子同捷而滅,有州四。 魏博傳五世,至田弘正入朝,十年復亂,更四姓,傳十世,有州七。成德更二姓,傳五世, 宣武傳四世而滅,有州四。彰義傳三世而

若田弘正、張孝忠等,暴忠納誠。以屛王室,自如別傳云 雖然,迹其由來,事有因藉,地之輕重,視人謀臧否歟!今取擅興若世嗣者,爲藩鎭傳。

功至武衞將軍。 田 承嗣字承嗣,平州盧龍人。世事盧龍軍,以豪俠聞。 禄 山反,與張忠志爲賊前驅,陷河、洛。 嘗大雪,祿山按行諸屯,至其營,若 隸安祿山麾下,破溪、契丹,累

列傳第

百三十五

藩與魏博

無 人,已而 : 擐甲列卒,閱所籍,不缺一人,祿山異其能,使守潁川。

志,承嗣重略之以免。 間場將士。 僕固瑒追北,承嗣急,乃詐嘲義使自求救幽州。 **珣合兵六萬**,慶緒復振,抗王師。 郭子儀平東都 **陽慮下生變,即約降。** 承嗣以郡降,俄而復叛。 ,乃與張忠志、李懷仙、薛嵩皆詣僕固懷恩謝,願備行間 歲餘,史思明亂,承嗣又爲賊導, 承嗣詐疾不出,陽欲馳入取之,承嗣列千刀爲備,陽不得 安慶緒 承嗣守莫,因執賊妻息降于陽, 奔鄴 承嗣自潁 及朝義敗, 河來, 與蔡希德、武令 與共保莫州。 厚以金帛反

賊平則任不重,因建白承嗣等分帥河北,賜鐵券,誓不死。 瀛等州節度使,檢校太尉。 朝廷以二賊繼亂,州縣殘析,數大赦,凡爲賊詿誤,一切不問。 拜承嗣莫州刺史,三遷至貝博滄 當是時,懷恩功高,亦恐

軍 軍 又求兼宰相, ,不數年,有衆十萬。 白 天雄,以魏州爲大都督府,即授長史,韶子華尚永樂公主,冀結其心。 承嗣沈猜陰賊,不習禮義。 旣得志,卽計戶口,重賦斂,厲兵繕甲,使老弱耕,壯者在 代宗以寇亂甫平,多所含宥,因就加同中書門下平章事,封鴈門郡王, 又擇趫秀彊力者萬人,號牙兵,自署置官吏,圖版稅入,皆私有之。 而性著凶詭, 龍其

|大曆八年,相衞薛嵩死,弟博求假節,牙將裴志淸逐博,博以衆歸承嗣。 而帝自用李承

|礎降。 子期軍 中人 勉 英、辛忠臣等決 彊 幽 叉 重 帝 東 敢詰,於是厚賞請己者。 置 昭 使脫 爲相州 又遣 守宰。 州 、汴宋田神玉等兵六萬掎角進,若承嗣不承命,聽在所討執 節度使薛兼訓 遣 各遣 多出 相 將 爲實臣所逐,火輜 御史大夫李涵督諸節度幷力。 與盧子期 李正己攻拔德州,李忠臣攻衞 盧子期取洺州 自 見。 刺 兵 御 逼使者行際、相,遣劉渾從之,陰使從子悅諷諸將詣使者剺面請承嗣 閉 〈救礠。 一史,未至,承嗣使人就吏士反,陽 服、 會 壓 戦 良 以 正 將萬人攻磁州 、成德李寶臣、幽州朱滔 驕 己 而 馬、 時 賊。 軍 黄 成 承昭 輒引 ,楊光朝取衞州,脅刺史薛雄 德、 白白 重 子 帝乃下詔貶承嗣永州刺史,許一子從,悅及諸子皆逐惡地 金萬 以神 一,歸于貝,計益窮, 去, 幽 期 州兵繞出子期後 分步騎 忠臣 計 策射 屯東山 :勞賚, 生繼 乃棄月 萬 ,築偃月壁 承嗣遣裴志清等攻冀州 人環 使 進,入河東 宣 人供 昭義李承昭 壘 言救, 承昭 慰使韓朝彩 不知所出, 濟河 ,於是圍解。 帳 河上。 壁 高 實襲取之。 屯陽武 以 亂,不從, 壘。 會。 兵四 承嗣列將往往攜阻,殺數十人乃定。 遣其下郝光朝奉表請委身北闕下。 淄青李正己、淮西李忠臣、永平李 諸 等固守, 諸 軍 軍 千乘 更陣高原,諸將 屠其家 進討 ,以軍法從事。 承 少 帝遣使者踰罷兵, 志清以兵附成德,承嗣悉衆 昭使成德、幽 懈 高 兼 數有 望 訓以萬 丽 一麾而 悉四州兵財以歸, 正己、寶臣二 功,頗顧賞, 騎屯 進。 與承昭夾攻, 州 其下霍榮國以 爲帥,使 兵循 西山, 河 東 承嗣不奉 一軍會棗 將劉 天子使 東 成 山 人 詔 文 不 襲 河

列

僔

第

戦臨 萬。 率餘 ,降之,復徇瀛州,瀛州亦降。 兵夜走,盡棄旗幕鎧仗五千乘。 諸軍乘勝進,距磁十里,暮而舍。 水,賊敗,屍旁午數里,斬九千級、馬千匹,執子期及將士二千三百,旗纛器甲鼓角二十 得兵萬人,粟二十萬石,獻子期京師,斬之。 成德將王武俊以子期歸寶臣, 承昭舉燧,朝彩出銳 兵鼓躁薄魏營,斬首五百,悅驚, 寶臣方攻洺州,

勉、 皆仍故官,復賜鐵券。 良,死者殆半,乘勝屯汴北郛,與靈耀合。 所管與更始。 請 東走、欲歸承嗣 天子許承嗣 河陽馬燧 天子遣中人勞寶臣,不爲禮,寶臣乃貳,反攻朱滔,與承嗣和, 心合討。 入朝。 承嗣 ,爲如江所禽,丼魏將常準獻京師。 逗留不至。 十一年,帝遣諫議大夫杜亞持節至魏受其降,許闔門還京師 靈耀求救於魏, 其秋, 承嗣使悅將兵三萬赴之, 復略滑州, 燧、忠臣逆擊,破之,悅脫身遁,斬獲數萬。 敗李勉兵。 明年,承嗣上書請罪,有韶復官爵,子弟 會李 敗勉將杜如江、 靈耀以汴州 承嗣與之滄州。 叛, 正己將尹伯 韶忠臣、 正己又 赦魏博 靈

而復縱,故承嗣得肆姦無怖忌。 |承嗣盜有具、博、魏、衞、相、礠、洺七州,而未嘗北 十四年死,年七十五,贈太保。 面 天子。 凡再興師, 會國威中奪,

悦, 蚤孤,母更嫁平盧戍卒,悅隨母轉側潞、青間。 承嗣得魏,訪獲之,年十三,拜伏有

義,輕財 禮,承嗣異之,委以號令,裁處皆與承嗣意合。 子佐之。 重施,以鉤美譽,人皆附之。 帝因詔悅自中軍兵馬使、府左司馬擢留後,俄檢校工部尚書,爲節度使。 承嗣愛其才,將死,顧諸子弱,乃命悅知節度事 及長,剽悍善鬭冠軍中,賊忍狙詐,外飭行 令諸

不從。 妻子,今罷去,何恃而生?」衆大哭。脫乃悉出家貲給之,各令還部,自此,魏人德悅。 罷其四萬歸田畝。 |悅始招致賢才,開館字,禮天下士,外示恭順, 陰濟其姦。 德宗立,不假借方鎭,諸將稍惕息。 悦卽奉命,因大集將士,以好言激之曰:「而等籍軍中久,仰縑廩養父母 會黜陟使洪經綸至河北,聞悅養士七萬,輒下符 帝晚年尤寬弛,悅所奏請無

俊、孟希祐、李長春、符璘、康愔爲爪牙。建中二年,鎭州李惟岳、淄青李納求襲節度,不許 曹州,乃遣人說悅同叛。悅因與梁崇義等阻兵連和,以王侑、扈粤、許士則爲腹心,邢曹 悦爲請,不答,遂合謀同叛。 會于邵、令狐峘等表汰浮圖,悅乃詐其軍曰:「有詔閱軍之老疾 及劉晏死,藩帥益懼,又傳言帝且東封泰山,李勉遂城汴州;而李正己懼,率兵萬人屯

M面守,食且盡,賞賜不足,乃飾愛女示衆曰:「庫廩竭矣,願以此女代賞。」士感泣,請死**戰** 楊朝光以兵五千壁盧瞳,絕昭義餉道。悅自將兵數萬繼進,又使朝光攻臨洺將張伾。 會幽州朱滔等奉詔討惟岳,悅乃遺孟希祐以兵五千助惟岳,別遺康愔以兵八千攻邢

疲弱者。」繇是舉軍咨怨。悦與納會濮陽,納分兵佐悅

列

百三十

五

銀数

饲

以紙爲風鳶,高百餘丈,過悅營上,悅使善射者射之,不能及。 遁保洹水。 解,臨洺士且爲悅食」。燧乃自虛關鼓而東,破盧瞳,戰雙岡,禽賊大將盧子昌而殺朝光, 大破悅軍。 有韶河東馬燧、河陽李芃與昭義軍救伾。三節度次狗、明二山間,未進。怪急, 燧營譟迎之,得書言「三日不

皆抱持之曰:「今士馬之衆,尚可一戰,事脫不濟,死生以之。」悅收淚曰:「諸公不以悅喪敗, 明日,悅得入,殺長春,持佩刀立軍門,流涕曰:「悅藉伯父餘業,與君等同休戚。 今敗亡及 脫大敗,死傷二萬計,引壯騎數十夜奔魏,其將李長春拒關不內,以須官軍。而三帥頓不進。 惟公所命。今攻臨洺,糧竭卒老,不見其可。」悅所昵扈粵、孟希祐等皆訾短之,故悅不聽其 十則攻,今公以逆干順,勢不敵也。宜留兵萬人屯啷口,以遏西師,則舉河北二十四州, 家財及府庫所有,大行賜與。而李再春及其子瑤以博州降,悅從兄昂以洛州降,燧等受之, 誓同存亡,縱身先地下,敢忘厚意乎?」乃斷髮爲誓,將士亦斷髮,約爲兄弟,乃率富民大 民塗炭。悅正緣母老不能自剄,願公等斬悅首以取富貴,無庸俱死。」乃自投于地。衆憐, 此,不敢圖全。然悅久稽天誅者,特以淄青、恆冀子弟不得承襲,旣弗能報,乃至用兵,使士 |燧等距||悅軍三十里,樂壘相望。||悅與||納合兵三萬,陣||洹水。 於是曹俊爲具州刺史,乃承嗣時舊將,果而謀。悅未得志,召問計安出,對曰:「兵法, 燧引神策將李晟夾攻悅,

悦皆族昂等家。 脫自視兵械乏,衆單耗,懼,不知所出,復召曹俊與之謀。 曹俊爲整軍完壘

以振士氣,羣心復堅,後十餘日,燧等始進薄城下。

使悄等奉簿最孔目,司徒朝至魏則夕入具,惟孰計之。」滔心素欲得具,即大喜,使悄先還告 安,鄙州尙書必以死報德。 <u>|</u>崇義,誅其口三百餘,血丹漢江。今日破魏,則取燕、趙如牽轅下馬耳。夫魏博全則燕、趙 斷,有秦皇、漢武風,將誅豪桀,掃除河朔,不使父子相襲。又功臣劉晏等皆旋踵破滅,殺梁 滔曰:「司徒奉詔討賊,不十日,拔東鹿,下深州,惟岳勢蹙,故王大夫能得逆首。 深、趙二州觀察使。 武俊恨賞薄,滔怨不得深州,悅知二將可間,乃儳路使王侑、許士則說 日,有詔破惟岳得其地卽隸麾下,今乃以深州與康日知,是朝廷不信於公也。 未幾,王武俊殺惟岳,而深州降朱滔,滔分兵守之。天子授武俊恆州刺史,以康日知爲 且合從連衡,救災卹患,不朽之業也,尚書願上貝州以廣湯沐, 且上英武獨 聞出 幽州

也,豈特栗不出窖,馬不離廏,又有排危之義,聲滿天下。 師 北伐,不肯歸粟、馬。 君軍。今若舉魏博,則王師北向,潭、滏勢危。誠能連營南旆,解田悅於倒縣,大夫之利 先是,韶武俊出恆冀粟三十萬賜滔,使還幽州,以突騎五百助燧軍。 浴因使王郅說武俊曰:「天子以君善戰,天下無前 大夫親斷逆首,血衊衣袖,日知不 武俊懼悅破,將起 ,故分散粟、馬以

列

Ħ

使報滔 出趙 城 何 . 功於國,而坐兼二州。 河北士以不得深州爲大夫恥。」武俊旣得深,亦喜,卽日使

兵三千,自邢、趙興張孝忠合攻涿、莫二州,以絕幽、薊路。 上,大敗,棄甲走城。悅怒,閉門不內,蹈藉死塹中者甚衆。 於是滔率兵二萬屯寧晉,武俊以兵萬五千會之。 燧等營魏河西,武俊、滔、悦壁河東,起樓櫓營中, 悦恃教至, 使康愔督兵與王師戰御河 兩軍相持, 其夏,滔、武俊軍至,悅具牛酒 自秋汔冬。 燧遺晟以

田晁 |晁以 奉天,燧還太原,武俊等皆罷,悅餞之,厚遺武俊、寔,官屬皆有 司 以 刑 府爲大名府 兵數千 悅 高 並 重德滔 緬 爲侍郎 爲征 ·助李納守鄲。 ,欲推爲盟主而臣之。 ; 、署子爲府留後;以扈粵爲留守,許士則 西節度使,蔡濟、薛有倫爲虎牙將軍,高崇節知軍前兵馬,夏侯赬 劉 士素爲內史舍人,張瑜、孫光佐爲給事中,邢曹俊、孟希祐爲左 明年夏,滔屯河間 滔不敢當,乃更議如 留 大將馬寔以兵萬人戍魏。 爲司武,曾穆司文, 七國故事。 贈 悅國 裴抗 號魏,僭稱魏王, 會朱泚亂, 司禮, 爲 兵 右僕射, 、馬使。 帝出

合勢以取大梁,孤得西收鞏、陝,與秦兵會,天下可定也。 一難以 興元 全魏 元年,滔自將兵欲南度 月。 今秦帝 已據關中,孤 河助 泚, 以步騎 使王郅見悅計事 十萬與回紇 則王與趙王永無南盧,爲脣齒之 日:「頃大王在重 趨 東都相 應接 三、王 園, 能 孤與趙 從孤濟河, 刻日

殺懷仙 約。 薊 約。 怆 許我貝州 供儗屈竭。』以悅日拊循,猶恐人且攜間,一日去城邑,朝出夕變,且何歸?不然,悅不敢背 滔。 都,與

測連禍,

兵多勢張,

返制于豎子乎。

今日天子復官

板罪,

乃王臣,

豈捨天子而北面滔、 之親不加泚,勇不加懷仙、希彩也,而念恩不已,拘攣匹夫義,出且見禽。 不可顧恩取禍也。」脫然之。先是,武俊陰約脫背滔,使相望。 國 囚抗等,使馬寔取數縣,已而釋抗還之。 曰:「王約出館陶與大王會,乃濟河。」、悅良久曰:「始約從王,今舉軍持悅曰:"魏比困侵掠 「,幸速計之。」是時,悅聞天子已赦罪,復官鶴,心不欲行, ,南入梁、鄭,而與泚合,其理然也。 曰:「聞大王欲從滔度河,爲泚掎角,非也。方泚未盜京師時,滔爲列國,且自高, 今遺孟希祐悉兵五千助王。」因使其屬裴抗、盧南史報命。 **滔喜,自河間悉師而南,踰良州,次淸河,使人報悅,悅不至。** ,屠希彩,就兄使如京師而奪之權,有恩者誅, 大喜,復使舍人李琯申固所言,悅獨豫,許士 ,我不取;尊我爲天子,我與同爲王;教我遠來而不出。 大王不如僞許出迎,遣州縣具牛酒, 悦兵不敢出, 遂圍 月州。 則 同謀者覆,彼心腹渠可量哉?今大王 諫曰:「冀王勇決權略, 重遽絕滔,陽遣薛有倫報滔如 及聞滔要悅西, 滔怒罵曰:「逆虜前日求救, 進屯永濟,使王郅等督之 滔取武城,通德、棣,供軍 是賊不擊,尙何誅?」乃 彼得魏博,北聯幽 至則以 使田秀馳說 世之雄也 事自解 如得東

列

百三十

五

帶與親博

巢父至,莫不欣然。 脫方醉,寢酣。 緒挺刃升堂,二弟諫止,緒斬之,因手刺脫,并殺其母妻。 脫死,年三十四。 孔巢父持節宣勞。 比明,以悅命召許士則、蔡濟計事,至則殺之。 劉忠信者,悅常使防督緒直寢門,緒呼曰: 起兵,幾赤吾族。以金帛厚天下,而不至兄弟。」或諫止之,緒怒,殺諫者,乃與左右踰垣入。 . 忠信刺僕射,與扈導反。」衆執之,語曰:「無之。」支已殊絕。 於是李抱眞、武俊約出兵救魏。 '始悅阻兵凡四年,狂愎少謀,亟戰數北,死者什八,士苦之,且厭兵。 悦與巢父張飲,門階皆徹衞。至夜分,從弟緒與族人私語曰:「僕射妄 。會有詔拜悅檢校尙書右僕射,封濟陽郡王 一,而給事中

粤,斬其首以徇。 邢曹俊率衆追還。 食衣服,儉嗇有節,緒常苦不足,頗怨望,故作難。悅旣死,懼衆不附,以其徒數百將出奔, |緒字||緒,||承|||開第六子。||悅待諸弟無所間,使||緒主牙軍,而凶險多過,嘗答勗之。||悅於飮 復殺悅親信薛有倫等數十人,因巢父遣使者聽命天子。 |緒乃下令軍中日:「我先王子,能立我者賞。」衆乃共推緒爲留後,歸罪扈

使人入魏招緒降。 |俗聞悅死,以兵五千合||寔軍,進攻魏州。||寔瀕王莽河壁,南距|河,東抵||博州,殺略甚衆。 緒新篡,而寔圍且急,乃遣使以好言見滔,滔許與盟。 會穆勸緒絕滔,

而 緒部分亦定,乃乘城戰,武俊、抱眞各脩好如悅時。 韶卽拜緒節度使。 **寔**圍魏凡三月,滔

敗走。

兄弟姑妹凡數人。 貞元元年,以嘉誠公主降緒,拜駙馬都尉。 李希烈平,以功賜一子八品官。 緒猜忌、殺

兄廟,仕李納爲齊州刺史。或言納將入之魏以代緒,緒厚路納,且召廟,朝以死請不行,

乃送之京師,過滑,緒將篡取之,買躭以兵援接,乃免。

疾死,年三十三,贈司空。少子季安嗣。 累遷檢校尙書左僕射、常山郡王,又徙王鴈門,實封五百戶,加同中書門下平章事。

死時,年十五,匿喪觀變,軍中推爲留後,因授節度使。 除喪,加檢校尙書右僕射,進位檢校 司空,俄同中書門下平章事。季安畏主之嚴,頗循禮法。及主薨,始自恣,擊鞠從禽,酣嗜 |季安字||變。母微賤,公主命爲己子,寵冠諸兄。數歲,爲左衞胄曹參軍、節度副使。

趙,趙誠虜,魏亦虜矣,奈何?」或請以五千騎決除君憂。季安曰:「善,沮軍者斬!」時幽州 會詔中尉吐突承璀以神策兵討王承宗, |季安謀日:「王師不跨|河二十五年,今越|魏伐

列

百三十五

藩鎮

博

欲,軍中事率意輕重,官屬進諫皆不納。

惲,大抵如此。死年三十二,贈太尉。 賓佐,與同府侯臧爭權,季安怒,斥爲下縣尉,俄召還,先坎道左,既至,生瘞之。 忍酷無忌 安然之, 遣大將率兵會王師伐承宗, 糧餉自辦, 取堂陽以報, 加太子太保。 有丘絳者, 父時 獻捷天子以爲符,此使魏北得以奉趙,西得以爲臣,不世之利也。』趙不拒君,則魏安矣。」季 |趙,爲賣友;|魏若與趙,爲反君。賣友反君,魏不忍受。| 執事能弛陴鄣,遺一城,魏得持之 趙,不使耆臣宿將而付中臣,不起天下甲而出秦甲,君知誰爲之謀?此上自爲謀,以夸服臣 來也。」季安日:「計安出?」忠日:「王師入魏,君厚犒之。悉甲伐趙,而陰遺趙書曰:『魏若伐 再舉涉河。鑒前之敗,必不越魏誅趙;校罪輕重,必不先趙後魏。是上不上,下不下,當魏而 下。若師未叩趙,而先碎於魏,是上之謀不及下,且能不恥!旣恥且怒,必任智畫,仗猛將, 劉濟將譚忠適使魏,聞之,入見季安曰:「往年王師取蜀取吳,算不失一,是宰相謀也。 今伐

怒,取田興爲留後,所謂田弘正者,以懷諫歸第,殺士則等十餘人。季安旣葬,送懷諫京師, 妻元誼女,召諸將立其子懷諫,最幼,不能事,政決於私奴蔣士則,數易置諸將,軍中

緒弟縉、華顯于朝。

授右監門衞將軍,寵錫蕃渥。

開元時,置宥州,扼寇路,久而廢,縉復城之。 縉字雲長,貞元十年入朝,授左驍衞將軍,封扶風郡公。 王師伐蔡,縉上橐它牛馬助軍。 元和中,拜夏綏銀節度使。 吐蕃寇豐州 始

縉設伏邀其歸,俘斬過當。 人羊馬,故吐蕃得乘隙。 貶衡王傅。 入爲左衞大將軍, 李聽代之。 俄而吐蕃又攻鹽州, 貶房州 聽刻縉盜沒軍糧四萬斛,彊取羌 司馬。 長慶初,終左領軍

衞將軍。

華,太常少卿,尙永樂、新都二公主。

田氏自承嗣至懷諫,四世,凡四十九年。

敢從父軍 史憲誠,其先溪也,內徙靈武,爲建康人。 ,田弘正討李師道,將先鋒兵四千濟河,拔城栅,師踵進,乘勝逐北,傅鄲堞。 三世署魏博將,祖及父爵皆爲王。 憲誠始以 師

道傳首,以功兼御史中丞。

趫

衆乃逼還府,擅總軍務。 長慶二年,田布之自殺也,軍亂且囂。 穆宗以朱克融、王廷凑方盜幽、鎭,未有以制,卽以節度使授之。 時憲誠爲中軍兵馬使,頗言河朔舊事以搖其衆,

|憲誠外詫王命,而陰結幽、鎭、依以自固

中韋文恪宣慰,憲誠見使者禮倨, 「、唯知識主,雖日加箠不忍離。」其譎獪類此。 時李齐方亂,私與交通,數助請旄節,城馬頭,具舟黎陽,示將濟師者。會天子遣司門郞 言辭悖慢。 俄聞斬內,更恭謹謂文恪曰:「我本溪,如狗 進檢校司空。

中, 封千乘郡公, 以李聽代。 合兵劫具州,爲廳所敗,奔廷湊。 滄景平,憲誠不自安,請納地,進檢校司徒兼侍中,徙河 |志沼反,屯永濟,兵銳甚,諸鎭共禦之。|憲誠告急,天子詔義武李聽進討。 於是志沼與廷湊 懼,出兵從王師討之,復遣大將丁志沼率師二萬攻德州。時王廷凑援同捷,陰誘志沼以利。 中書門下平章事。 與李全略爲婚家,大和中,其子同捷反,潛以粮餉資之。文宗申約,使者相望,因進同 憲誠使大將至京師偵事,作謾言自大,宰相章處厚折其詐,遣去。 憲誠

甲,將入魏,魏軍聞之懼,明日盡甲而出。 |忠曰:「彼假道取賊,吾軍無負朝廷,何懼爲?」乃稍安。然|魏素聚兵|淸河, 請詔聽引軍聲圖志沼而假道淸河,帝從之。憲誠因欲倚聽公去魏,及聽次淸河,魏 初, 」夜攻殺之,并監軍史良佐,推何進滔爲帥以請,詔贈憲誠太尉,實大和三年。 憲誠將以族行,懼魏軍之留,問策於弟憲忠,憲忠教分相、衞,請置帥,因以弱魏。復 聽按軍館陶不進。 衆謂憲誠 賣己,日:「紿我 聽 悉出其 以沽

起,凡七年,死。

等旣迫我,當聽吾令。」衆唯唯。「孰殺前使及監軍者,疏出之。」凡斬九十餘人,釋脅從者。素 壓 服臨哭,將吏皆入弔。 討李師道,以功兼侍御史。 憲誠死,軍中傳謼曰:「得何公事之,軍安矣!」進滔下令曰:「公 鎭 州 何 進滔,靈武人,世爲本軍校。 承宗使健將以鐵冒面,引精騎千餘馳魏壁。進滔率猛士逐之,幾獲,鎭人大懼。從 韶拜留後,俄進授節度使。 居魏十餘年,民安之。 進累檢校司徒、同 少客魏,委質軍中,事田弘正。弘正攻王承宗,夜以兵

中書門下平章事。

開成五年死,贈太傅,諡曰定。

射。 |敬倚||旗相脣齒,無深入意,詔因稱其事母孝,在軍久,宜亟戰。 位 得已,乃出師。 攻澤州,天子慮輝起山東兵,命弘敬掎角塞其道,不奉詔。 重起兵,乃授福王綰節度大使,以重順自副,賜名弘敬。 澤路平,加同中書門下平章事。 子全嗥襲,明年,拜節度使。平龐勛,以功遷檢校司空、同中書門下平章事。 子重順襲。武宗詔河陽李執方、滄州劉約諭朝京師,或割地自效,不聽命。時帝新即 未幾,宰統陳許兵假道收磁州, 懿宗初,兼中書令,封楚國公。 弘敬懼,乃進戰,拔平恩, 王元逵克邢州, 攻上黨, 帝討劉確, 弘敬亦自 威通 如 加東面招討使。 七年死,贈太師。 詔檢校尚書左僕 及王宰踰乾河 弘敬不 弘

五九三七

母喪,納

列 傳

第

百 =

+

五

藩 鎮 魏

博

所賜節,願行喪,詔不許。 減糧帛,衆遂叛,全暤單騎遁,衆推韓君雄以總軍事,而殺全暤、實咸通十一年。 全暤年少好殺戮,下有小罪,鮮縱貰,人人危懼。後軍中相傳朘 詔贈太保。

自進滔至全嗥,凡三世,四十二年。

僖宗卽位,進同中書門下平章事,賜名允中。 懿宗更以普王爲大使, 擢君雄留後。 |君雄,魏州人。不五月,進副大使, 死年六十一,贈太尉。 三遷檢校司

略邢、洛 取河陽。 下亂,簡恃彊完,欲拓地,覬望非常。 再世,凡十二年。 子簡,襲留後。俄授節度使,進累檢校太尉、同中書門下平章事,封魏郡王。帝在蜀, 而歸。 簡還攻之,陝迎擊新鄉,簡大敗,樂彥禛以一軍先還,簡奔歸,疽發背死。 東攻鄲,鄲將曹存實出戰,敗死,其將朱宣率衆以守,久不下,爽乘其隙, 時諸葛爽爲黃巢守河陽,簡攻之,爽走,卽戍以兵, 復 北

書,領留後,進節度使,累加檢校尙書左僕射、同中書門下平章事 彦禎者,亦魏人。 簡時,歷博州刺史,下河陽有功,遷澶州。 魏人立之,詔檢校工部尙

<u></u> 彦禛喜儒術,引公乘億、李山甫皆在幕府。 嗣襄王煴之亂,彥禛使山甫往見鎭州王鎔,

相州刺史,輦兵械泉布,跡接於道,軍中益貳。彥禛常夢解佩帶履而行,旣寤曰:「此神告 百人,號「子將」,出入臥內,軍中藉藉惡之。從訓懼,易服奔近縣,彥禛即以爲六州指揮使、 |魏周八十里,一月畢,人怨其殘。子|從訓,資凶悖,劫|王|鐸,取其家,魏人不直。又聚亡命五 欲合幽、邢、滄諸鎭同盟拒賊,谿厚謝,卒不克。

彥禛見王室微,頗驕滿不軌,大興其衆,城

我,下將有背乎?」已而軍亂,果囚彥禎,迫爲桑門,尋殺之,推大將趙文珠總留後。

首軍門,實文德元年。彥禛起,凡七年。 懼,殺之,更推羅弘信帥軍。。弘信出戰,從訓敗,哀餘衆壁洹水,弘信遣將程公佐擊斬之,梟 從訓求救於朱全忠,全忠爲起師,次內黃。從訓自相州以軍三萬傳城,文珠不敢出,衆

弘信輒曰:「神命我矣! 「頭老人使謝君,君當有是地。」弘信曰:「神欲危我耶?」文)好死,衆曰:「孰願主吾軍者?」 羅 弘信字德孚,魏州貴鄉人。善騎射,狀貌雄偉。爲裨將,主馬牧。 .」衆環視,以爲宜,遂立之。 詔擢知留後,再遷節度使,加檢校司空、 魏有巫告弘信曰:

朱全忠討黃巢,餉粟三萬斛、馬二百匹。 列 傳 第 百三十 五 溜 鎭 魏 博 秦宗權亂, 復詔弘信以粟二萬斛助軍,未輸, 同中書門下平章事、豫章郡公。

全忠使丁會、龐師古、葛從周、霍存等引萬騎度河, 檢 校工部尚 ,乃厚幣求和。 全忠討太原李克用,遣將趙昌嗣見弘信假糧馬; !書雷鄴來責粟,弘信素脅于牙軍, 方全忠圖河北,欲結納弘信,乃還兵。 擅殺鄴。 弘信壁內黃, 又議屯邢、洛,假道 全忠以檄譙讓, 凡五戰皆敗,禽大將馬武 弘信不敢報。 相、衞,

爲闇竇 乃引 全忠 不至, 怒,以兵掠魏博。 袁奉韜自殺。 將 還,爲公憂之。」弘信乃攻瑭,告全忠師期,全忠將趨滑爲援,次封丘 |太原將||李瑭救|宣,復壁||幸,||弘信厭其暴,而||瑭溝壘自固。 壁 復 克用欲合鎭、定兵營河曲 洹水救魏。 全忠攻克鄆、朱宣求援於克用、 全忠疑其給, 自將至滑州。 造葛從周 每克用兵至,輒出精卒薄戰,必捷。 然侵魏不已,大戰白龍潭,弘信敗,克用 不五日,取三州,斬首二萬級,禽其將百餘人,自是克用兵不出。 將兵追躡,拔洺州,執其刺 克用游兵剽相、 全忠將侯言屯洹水,克用兵數求戰,言不敢出, 魏,民死十九,弘信 弘信來告曰:「魏人未動者, 正欲緩圖之。」 遺李存信率兵救之,請道屯幸,其下侵魏獨牧, 史邢行恭; 克用踰洹 追薄魏門而還。 不堪其偪。 西北挑戰, 復攻邢,馬師素自拔走; 全忠遣使謂曰:「晉人志丼 ,全忠以葛從周代將。 從周大破之,禽其子落落 弘信乃乞師全忠,全忠遣 ,而弘信已破瑭。 元年, 來。 全忠遂屯曹。 如全忠告亟。 久之, **遂**圍磁州 河朔 弘信不 魏人 克用 師

始全忠亟討兗鄆,懼弘信貳,故歲時賂遺良厚。 弘信每有饋答,全忠引其使北面拜受,

兄事之,弘信以爲厚己,故推心焉。

進累檢校太師,守侍中,徙臨淸郡王。 光化元年死,年六十三,贈太師,追封北平王,諡

日莊肅。子紹威襲。

所敗。 闕,而紹威營太廟,加侍中,封鄴王。 ·范橋,六遇輒勝。

仁恭約和,乃還。

紹威德全忠,故奉事愈固。 將與仁恭戰內黃,日中,大破之,斬首三萬級。

葛從周方守邢,亦敗其衆於魏縣。

仁恭以衆 滄州,從周攻拔德州,進薄浮陽。 仁恭以兵至,監軍蔣玄暉請須其入壁,食盡可取。 從周曰: 者曰:「前有疆敵,不可易。」命闔扉。士死戰,執仁恭將二人。仁恭使別將攻內黃,爲思安 十萬陷貝州,全忠使李思安屯內黃,從周悉軍入魏。仁恭攻魏,從周以五百騎出鬭,謂門 太尉,號「忠勤宜力致聖功臣」。幽州劉仁恭引兵攻鎭、冀,遂掠魏,紹威告急於全忠,全忠自 「兵在機,機在上將,豈監軍所知!」逆戰老鵶堤,破之,斬首五萬,獲其將百餘人。又戰唐昌 紹威字端已。少有英氣,性精悍,吏事明辦。 從周乘勝破八壁,追北至臨淸。仁恭乃還滄州,與李克用圖魏。紹威與全忠連兵伐 既領留後,昭宗卽詔嗣父節度,加累檢校 全忠遷帝洛陽,命諸鎭治宮

列

八千族 紹威 思安助 決策屠 **彊也。** 實甲以入。 立,有不慊,輒害之無噍類。 遣 魏 翦 ,闉市爲空。 人潛入庫,斷絃解甲,注夜,將奴客數百與嗣勳攻之,軍趨庫得兵,不可戰,因夷滅凡 戰,魏軍不之疑。 紹威 牙軍 ", 遺楊利言與全忠謀。 ,起田承嗣募軍中子弟爲之,父子世襲,姻黨盤互,悍驕不顧法令,憲誠等皆所 全忠自滑濟河,聲言督滄景行營。 一懲曩禍,雖外示優假,而內不堪。 紹威子,全忠婿也,會女卒,使馬嗣勳來助葬,選長直千人納盟器, 厚給稟,姑息不能制。 全忠乃遣府道昭將兵合魏軍二萬攻滄州,求公佺,又遣李 俄而小校李公佺作亂,不克,奔滄州。 紹威欲出迎,假銳兵以入,軍中勸毋出而 時語曰:「長安天子,魏府牙軍。」謂其勢 紹威

游騎所獲,支解之,進拔博、澶二州。 分據貝、澶、衞等六州。 平明, 全忠亦至,聞事定,馳入軍。 仁遇自稱魏博留後, 李重霸走,俄斬其首,相、衞皆降。 魏兵在行者聞變,於是史仁遇保高唐,李重霸屯宗 全忠解滄州兵以攻高唐, 仁遇引衆走,

紹威 主饋 間說曰:「邠、岐、太原皆狂譎,以復唐室爲言。 輓,自鄴至長蘆 紹威雖除其偪,然勢弱,爲全忠牽制,比州刺史矣,內悒悒悔恨。 五百里,不絕于道。 全忠還,紹威 王宜自取神器,專天下之望。」全忠歸, 建元帥行府,極土木壯麗,全忠大悅。 全忠兵在滄州

乃受禪。

紹威多聚書,至萬卷。 江東羅隱工爲詩,紹威厚幣結之,通譜系昭穆,因目己所爲詩爲

「偷江東集」云。

贊曰:田承嗣幾禽矣,李寶臣怒承倩而釋魏。 建中之際,三將軍持銳躪血, 功無成者。

夫竪刀亂齊,敦爲輕重? 四叛連勢,兵結難作,天子不能守宗廟。 傳及弘正,去汙入朝,數年復亂,唐終不得魏。

與

校勘記

(二) 照育逆華 「照」,樊川集卷五及文苑英華卷七四三守論並作「煦」。

唐書卷二百一十一

列傳第一百三十六

藩鎭鎭冀

惟岳 惟簡 王武俊 士具 承宗 王廷湊 元逵 紹鼎

紹懿 景崇 鎔

志。 相州也,忠志懼,歸命于朝, 以出,追兵萬餘不敢逼。 射生子弟,出入禁中。 爲盧龍府果毅,常覘虜陰山,追騎及,射六人盡殪,乃還。 李寶臣字爲輔,本范陽內屬溪也。善騎射。 | 豫山反,遁歸,更爲豫山假子,使將聽騎十八人,劫太原尹楊光翽,挾 又督精甲軍土門,以扼井陘。 肅宗卽授故官,封密雲郡公。 范陽將張鎖高畜爲假子,故冒其姓,名忠 事安慶緒爲恆州刺史。 史思明度河,忠志復叛,勒兵三萬 爲安祿山射生,從入朝,留爲 九節度師 圍

五九四五

列

傳

第

百

三十

六

藩鎭

頻翼

固守,賊將辛萬寶屯恆州相掎角。

東討 籠異,加賜實封 熱爲表裏。 使,賜鐵券許不死,它賚與不貲,賜姓及名。於是遂有恆、定、易、趙、深、冀六州地,馬五千, 步卒五萬,財用豐衍,益招來亡命,雄冠山東。 ,開土門納王師,助攻莫州。 思明 死,忠志不肯事 先是天寶中,玄宗冶金自爲象,州率置祠,更賊亂,悉毀以爲貲,而恆獨存,故見 朝義 ,使裨將王武俊殺萬寶,挈恆、趙、深、定、易五州以獻。 朝義平,擢禮部尙書,封趙國公,名其軍曰成德,即拜節度 與薛嵩、田承嗣、李正己、梁崇義相姻嫁,急

徳州, 嗣弟廷琳方守貝州,遣高嵩嚴將兵三千戍宗城,寶臣使張孝忠攻破之,斬嵩嚴,逸所執將四 十餘人。會王武俊執賊大將盧子期,遂降洺、瀛。當是時,河南諸將敗田悅於陳留,正己取 軍怨望,正己懼有變,即引去。惟滔、寶臣攻滄州,歷年未下,擊宗城,殘之,斬二千級。承 攻其北,正己與滑毫、河陽、江淮兵攻其南。師會棗彊,椎牛饗軍,寶臣厚賜士,而正己頗觳, 觸維死,承嗣怒,囚之,以告寶臣,寶臣謝敎不謹,進杖,欲使示責,而承嗣遂鞭殺之,由是交 乃與正己共劾承嗣可討狀。代宗欲其自相圖,則勢離易制,即詔寶臣與朱滔及太原兵 始,寶臣與正己素爲承嗣所易。其弟寶正,承嗣婿也,往依魏,與承嗣子維擊毬,馬駭, 欲頗窮討。 承嗣懼,乃甘言給正己,正己止屯,諸軍亦莫敢進。

京師,一匹夫耳。」曰:「奈何?」對曰:「養魏以爲資,上策也。」實臣曰:「趙、魏有釁,何從而 諸將已休,獨武俊佩刀立戺下,語之故。

武俊計曰:「趙兵有功尚爾,使賊平,天子幅紙召置 可?」對曰:「勢同患均,轉寇讎爲父子,欬唾間耳。 於是天子遣中人馬希倩勞寶臣,寶臣歸使者百縑,使者恚,抵諸道,寶臣顧左右愧甚。 朱滔屯滄州,請禽送魏,可以取信。」實

臣然之。

遂陰交承嗣而圖幽州, 承嗣陳兵出次以自驗。 願取范陽以報。公以騎前驅,承嗣以步卒從,此萬全勢也。」寶臣喜得滄州,又見語與讖會, 客說曰:「公與滔共攻滄,即有功,利歸天子,公于何賴?誠能赦承嗣罪,請奉滄州入諸趙, 寶臣掘得之,文曰:「二帝同功勢萬全,將田作伴入幽燕。」「帝」謂寶臣與正己爲二。而陰使 先是,承嗣知寶臣少長范陽,心常欲得之。乃勒石若識者瘞之境,教望氣者云有王氣。

俄進封隴西郡王,又拜同中書門下平章事。德宗立,拜司空。 者。」時二軍不相虞,忽聞變,滔大駭,戰瓦橋,敗,衣佗服得脫,禽類滔者以歸承嗣。 **釁**成,還軍入堡,使人謝寶臣曰:「河內方有警,未暇從公。 石識,吾戲爲耳!」寶臣慚而還。 大會諸將,熟視曰:「信神人也!」密選精卒二千,夜馳三百里欲劫滔,戒曰:「取彼貌如射堂 寶臣謬謂滔使曰:「吾聞朱公貌若神,願繪而觀可乎?」滔卽圖以示之。寶臣置圖射堂, 承嗣知

列

死,年六十四。惟岳悉誅殺妖人,時建中二年也。遺表請以惟岳領軍,詒書執政諉家事 瑞自至。」衆莫敢辨者。 芝、朱草,齋別室,築壇置銀盤、金匜、玉斝,猥曰:「內產甘露神酒。」刻玉印,告其下曰:「天 南容、張彭老等二十餘人,籍入其貲,衆乃攜貳。 旣而畏事露且誅,祚曰:「公飮甘露液,可與天神接。」密置堇于液,實臣已飮卽瘖,三日 寶臣 . 晚節尤猜忌,自顧子惟岳且暗弱,恐下不服,即殺骨骾將辛忠義、盧俶、許崇俊、張 。妖人復言:「當有玉印自天下,海內不戰而定。」 寶臣旣貯異志,引妖人作識兆,爲丹書、靈 寶臣大悅,厚賚金

節於朝,詔贈太傅。

近且 奴等專畫反計。府屬邵眞泣曰:「先公位將相,恩甚厚,而大夫違命緩絰中,愚固惑焉。 還京師,以張孝忠代之。田悅爲請,不聽。遂與悅、李正己謀拒命。府小史胡震、私人王他 且請致討。上嘉大夫忠,所請宜許。」惟岳寤,使眞作奏。 慶與將吏議不可, |與國,不可遽絕,絕之速禍,請厚禮遣其使,徐更圖之;|齊遠而交疏,不如械使者送京 其舅谷從政,豪俊士也,切諫不納。 惟岳,少爲行軍司馬、恆州刺史。寶臣死,軍中推爲留後,求襲父位,帝不許。 惟岳又從 趣護喪

於是張孝忠以易州歸天子,天子詔朱滔與孝忠合兵討惟岳,盡赦吏士,購惟岳首有賞。

其 亂 來 積 能 後 命 昌 不 弟 乏! 祥 誅 圖 岳 惟岳 因 與滔 惟 敝 眞 今君 可 輕 辽 邑 簡 武 惟岳 下。 敗,火其營去。 益 慮]暴兵, 俊 戦 徇 見 信 困 生 東鹿 帝 以精 見深 齊兵 邵眞 一禍。 請 乃付牙將衞常寧兵五 ,本爲 斬大將 事 2、大奔。 兵先陷 且孟 勁 、讒間 圍未解 公 地 如 君 廣, 京命節,豈爲 謝罪 欲 祐 初。」惟岳 於是 陣, ,畏励 遂 驍將,王武 裾帶 歸脫之罪 ,以兵 圍深州 師 深州 卻 還,乃斬眞以 Щ 懦不能 日急 「河,所謂 屬 ,以自 鄭詵 滔 俊善戰 一千,而俾王 **叛逆耶?雖** 明年正月,率兵萬餘 繢 |悅 決, 帛 湔 身朝京師。 亦嬰城矣。 東秦險固 爲狻猊,使壯 畢華 , 蕩, 謝 前 武俊騎 日逐 悅。 何負而 見破 見曰:「大 之國, 滔 明 於馬燧,而感 |17, 惟 孟 八 日 然 土百 復 祐 岳 百 大典魏 ,使王武俊爭束鹿, 僅 ! 與相 懼, 知 攻 戰, 不 一免,今合兩 漢其謀, 1人蒙以 日知 又大 則遣祐還軍 持維 召眞議遣使詣 盟未 激激士 敗。 ٠, 走告悅, 課, 久,魏 足以抗 大夫乘城拒守,以爲 將,破滔 而 趨惟 無無 康 雖 田悅 天下。 悦使扈岌來讓 日 河東馬燧, 岳軍 被 遺 知 必 至 重 舉趙 亦遣 矣。 ٠, 師禽。若 馬駭 夫背義 彼多蓄 孟 州 惟 令 軍 聽 審

也。 斬 復 入 武 夫 恆 武 俊 俊然之。 首 矣! 才 以 將以 雄 其官畀之。 ,素爲惟岳忌,及 身託定州 惟岳使要藉官謝遵至武俊壁議事,武俊與謀,使內應。 觀大夫 張公,安能 、勢終爲滔滅, 師行,謂常寧日:「大 品持頸就 刀乎? 若 倒 戈 」常寧與 大信讒,吾朝不 /還府, 事 副 實 李 分圖, 獻 誠 圖 晏, 日:「君不 有 至期 是行勝 如 不 ,啓城門, 捷, 聞 與否,吾不 張公 詔 書 武俊 平 H ?

傳

第

百

Ξ

+

六

藩

鎭

鎭

翼

府將士,給部中租役三年。 裨校任越牽惟岳出,縊之戟門下,并殺鄭詵、他奴等數十人,使子士眞傳首京師。 入,殺人廷中,無亢者。 乃傳令曰:「大夫叛命,今且取之,敢拒者族!」士不敢動。 帝盡赦其 武俊使

真始事寶臣,掌文記,武俊表其忠,贈戶部尙書。 其息呂擢冀州長史。

常寧在武俊時用事,爲內史監,其後謀亂,誅。

惟岳異母兄惟誠,尙儒術,謙裕,寶臣愛之,使決軍事,以惟岳正嫡,固讓不肯當。

妻李納,故寶臣請惟誠復故姓,而仕諸鄲,爲納營田副使,四爲州刺史。

得及行在。帝見厚撫之,拜太子諭德,討賊有功。帝徙山南,惟簡以三十騎從,夜失道,馳至 **遂決趨興元,惟簡前導。及帝還,封武安郡王,號元從功臣,圖形凌煙閣,賜鐵券。** 從股耶?」對曰:「臣誓以死!」比明,北方有塵起,帝憂。惟簡登高曰:「渾瑊以騎來。」臧至, |盩厔西,聞中人語,問天子所在,密語曰:「上在此。」帝見之流涕,執其手曰:「爾有母,乃能 子,不能效忠,吾不子汝矣!」督其行曰:「而能死王事,吾不朽矣!」乃斬關出,道更七戰, 難,謀於鄭,鄭曰:「爾父立功河朔,位宰相,身未嘗至京師,兄死於人手。爾入朝,未識天 初,惟岳叛,弟惟簡以家僮票士百餘奉母鄭奔京師,帝拘于客省。 及出奉天,惟簡將赴

卽 憲宗時,爲左金吾衞大將軍,長上萬國俊奪興平民田〔〕,吏畏不敢治,至是訴於惟簡 出爲鳳翔節度使,市耕牛佃具給農,歲增墾數十萬畝。卒,年五十

五 **,贈尙書右僕射。** 日廢國俊,以地與民。

死,流嶺南。 子元本,輕薄無行。 弟鮢,好學多識,有儒者風。 長慶末,與薛渾私侍襄陽公主,事敗,主幽禁中,元本以功臣子,貸

然見其屈損,又惜善鬭,未忍殺。 斷,實臣倚愛,出入帳中,以女妻之。寶臣以疑殺許崇俊等,士眞密結左右,故武俊兎於難。 **脛,武俊謂寶臣曰:「以寡敵衆,曲遇直,戰則離,守則潰,銳師遠鬭,庸可禦乎!」寶臣遂以** 帶,入居膩。」武俊甫十五,善騎射,與張孝忠齊名,隸李寶臣帳下爲裨將。寶應初,王師入井 命之使佐大夫,而 恆、定等五州自歸,共平餘賊,武俊謀也。奏兼御史中丞,封維川郡王。其子士眞,亦沈悍有 惟 |武俊字元英,本出||契丹怒皆部。父路俱,開元中,與饞樂府都督||李詩等五千帳求襲冠 岳拒命,或言武俊有他志,武俊知之,出入導從纔一二,未嘗接賓客。 士眞又大夫女弟婿,今事急,宜去猜嫌以任之,不然,尙誰使? 康日知以趙州降,惟岳謀伐之,皆曰:「武俊故心膂,先君 惟岳 」乃遣與衞 雖內疑,

列傳第

百

三 十

六

帶鎖鎮

Æ.

俊檢校祕書監兼御史大夫、恆冀觀察使 興齊、魏同惡,今魏兵已敗,齊爲趙州所限,幽州兵近在定,三軍且救死。 常寧將兵往 **亟歸。」惟岳惶遽出,遂縊。** 因謀執惟 岳,而日知亦遣人邀說以禍福,武俊乃還兵,使人謂惟岳曰:「大夫 卽遣其屬孟華奏天子。 |華辯對稱旨,| 德宗擢爲兵部郎中,授武 聞有韶召大夫,宜

滔,與之叛。帝聞,詔 華 瑜解,不聽。 爲深趙觀察使。 是時,惟岳將楊政義以定降,楊榮國以深降,朱滔受而戍之。帝以定賜張孝忠,而日知 武俊怨不得節度而失趙、定,滔亦怨失深州,二人相結。 武俊即縛使者送

善戰,天下無前,吾固宜敗,幸公圖之,使老夫得還河東,諸將亦罷兵,吾爲言天子,以河北地 渠,斷燧餉路、 騎横突,而滔軍踵馳,王師亂,相蹈藉死,尸梗河爲不流。懷光還走壁。武俊夜決河注王莽 入滔壁,殺千餘人。脫軍旣屢北,不能陣。懷光緩轡觀之,武俊乘其怠,使趙萬敵等以二千 神策兵助討賊,軍就舍,氣銳甚,謂燧曰:「奉詔毋養寇,及壁壘未成擊之,可滅也。」乃縱兵 答曰:「燧等皆國名臣,連兵十萬,一戰而北,貽羞國家,不知何面目見天子耶?彼行不五 付公。」滔亦陰忌武俊勝且不制,卽謂武俊曰:「王師旣敗, 馬公卑約如此,不宜迫人以險。」 時馬燧、李抱眞、李芃、李晟討田悅,悅方困,武俊、滔救之,屯連篋山。帝詔李懷光督 燧計窮,而與滔素姻家,乃遣使謾謝滔曰:「老夫不自量,與諸君遇。 王大夫

張鍾葵攻趙州,日知斬其首以聞。 十里,必反拒我。」滔固許之。燧至魏縣,堅壁自固,師復振。 滔慚謝,嫌隙始構矣。 武俊使

鄭儒爲左右內史,王士良司刑,王佑司文,士凊司武,並爲尙書;士則司文侍郎,宋端給事 於是武俊與田悅等擅相王。武俊國號趙,以恆爲眞定府,命士眞留守兼元帥,以畢華

知撫 中,王治內史舍人,張士淸執憲大夫,衞常寧內史監,皇甫祝尙書右僕射,餘以次封拜。 焉?誠能與昭義同心,曠然改圖,上不失君臣之義,下以爲子孫計。」武俊曰:「僕虜人也,尙 耶!』今大夫親斷逆首,而宰相闍於事宜,國家與大夫烏有細故哉?朱滔以利相動,公何取 誠,上見表動色曰:『朕前誤無及矣。朋友失意尙可謝,朕四海主,毫芒過失,返不得自新 者,奉辭伐之,河北不五十日可定。」會帝出奉天, **憚歸國** 「天子知大夫登壇建國撫膺顧左右曰:『我本忠義,天子不省,故至是。』今諸軍數表大夫至 曰:「夫退軍,前輜重,後銳師,人心固壹,不可圖也。 百姓,天子固不務殺人以安天下。今山東連兵比戰,骨盡暴野,雖勝尙誰與居?今不 建中四年,抱真使客賈林詐降武俊,旣見,曰:「吾來傳詔,非降也。」武俊色動,林曰: ·,業與諸軍盟,虜性樸彊,不欲曲在我,天子若能以恩盪刷之,我首倡歸命,有不從 今滄、趙乃故地,胡不 取之?」武俊遂引而北,林復激之曰:「公異邦豪英,不應謀 抱眞將還澤路,悅說武俊、滔踵襲之。 使戰勝得地,利歸於魏,不幸喪師,趙

「二百年天子猶不能事

,安能臣豎子耶!

」乃定計通好抱眞,而約馬燧盟

中夏。 冀,心圖公冀州矣。 燕、 魏幽 險,彼王室疆則須公之援,削則己欲丼吞。 使滔能制山東,大夫當臣事之,否則見攻。能臣滔乎?」 且河北惟有趙、魏、 武俊投袂日: 燕耳、滔 乃稱

部尚書、恆翼深趙節度使,又加檢校司空、同中書門下平章事 興元元年赦天下, 武俊大集其軍, 黜僞號。 詔國子祭酒董晉與中人宜慰, 棄幽州盧龍節度使、 拜檢校工

說武俊曰:「滔素欲得魏博,會悅死,魏人氣熾,公不救,魏且下。滔益甲數萬,張孝忠將北 南略江淮 西 大喜,與抱眞相聞,自將屯南宮,抱眞屯經城,兩軍相距十里而舍。武俊潛會抱眞于軍,陳 未附,公與昭義合兵破之,聲振關中,京邑可坐復,天子反正,不朽之業,誰與公參!」武俊 事滔,三道連衡,濟以回紇,長驅而南,昭義軍必保山西,則河朔舉入滔矣。今魏倘完,孝忠 飽食日:「軍未合,毋妄動! 說 忧慨,抱眞 李少成引回紀翼之。 是 時,滔悉幽、蒯兵與回紇圍艮州,將絕白馬津,南趨洛, ·<u>李</u>納方叛,唯<u>李</u>晟軍渭上。 羽書調發天下十之三,人心惴恐。 及田緒殺悅,林復 亦傾意結納,約爲兄弟,遂俱東壁見州,距城三十里止。。滔欲迎戰,武俊戒士 日中兵接,武俊與子上清引精騎望少成軍,抱眞次之,滔馳騎二百 」遣趙琳、趙萬敵兵五百蔽林以待。 李懷光據河中,李希烈陷汴, 浴使票將馬塞、盧南史 (陣而

之,武俊邀于隘,滔大敗,免者八千人。會夜,各按屯,武俊營滔東北,抱眞營西北。 | 統旣卻,即欲引還,因囂不能止,軍大奔,滔走還壁。 | 武俊中流矢,謂抱眞曰:「士少衰,盍以 過,未及返,武俊急擊,琳等兵亦出,回紇驚,中斷,遂先奔。 支,夜半焚車糧,遁歸幽州,火如晝,師大譟,其聲殷地。抱眞以山東蝗,食少,歸于潞,武俊 騎濟師,巢穴可覆也。」抱眞使來希皓率勁騎薄滔營,盧玄眞乘其後,滔懼,引衆去,希皓迫 出武俊東南,乘高鼓譟。武俊使步兵決戰,而自以騎當回紇,勒兵避其銳。 初,滔兵蹙武俊軍,不能傷, 回紇馬怒突而 回

賜德、棣二州,以士眞爲觀察使、淸河郡王。天子至自梁,遇武俊益厚,子弟雖襁褓,悉官 俄進檢校太尉兼中書令,得建廟京師,有司供擬。 武俊善射,嘗與賓客獵,一日射鷄兔九十五,觀者駭伏。」貞元十七年死,年六十七。羣 會有詔復滔官爵,武俊上還幽州盧龍節度。又詔以恆州爲大都督府,卽授武俊長史,

臣奉慰天子,如渾瑊故事,贈太師。有司諡威烈,帝更爲忠烈。士眞襲位。

貢數十萬緡,比燕、魏爲恭。 |士眞,其長子也。 少佐父立功,更患難。 旣得節度,息兵善守,雖擅置吏,私賦入,而歳 元和初,即拜同中書門下平章事。四年死,贈司徒,諡曰景襄。

列

第

百三十六

鎭 錻 超

軍中推其子承宗爲留後。

准水潦,財力刓困,宜卽韶承宗嗣領。季安等雖病,徐圖所宜。定四方有天時,不可速也。」 帝然之,欲析鎭分建節度,使承宗歲輸賦如李師道。絳曰:「假令承宗奉詔,諸道以割地同 世 度使,統德、棣。 怨,是官爵虚出而無當也。 何其變。承宗數上疏自言。帝聞劉濟、田季安俱大病,議更建節度。 詔恭甚,請上德、棣二州,遂以檢校工部尚書嗣領節度,而以德州刺史薛昌朝爲保信軍節 [相繼,人所狃習,惟拒命則討之。 且諸道之賞饋百萬士,又燕、魏、淄青,勢同必合。方江、 始,河北三鎮自置副大使,常處嫡長,故承宗以御史大夫爲之。及總留事,憲宗久不報, 不如令使者諭之,無出上意。」帝乃詔京兆尹裴武慰撫,承宗奉 翰林學士李絳曰:「鎭州

以健鬭聞,士眞時入朝,上言討之必捷,令與承璀偕。有詔:「武俊忠節茂著,其以實封賜子 官爵,遣中人吐突承璀將左右神策,率河中、河陽、浙西、宜數兵討之。趙萬敵者,故武俊將, 昌朝,嵩子也,與承宗故姻家,帝因欲離其親將,故命之。詔未至,承宗馳騎劫而歸,囚 詔更用棣州刺史田渙爲二州團練守捉使,遣中人傳詔令歸昌朝,承宗拒命,帝怒,詔削

承璀至軍,無威略,師不振。 神策大將||酈定進號驍將,以禽劉闢功,王陽山郡,至是戰

士則,毋毀墳墓。」

常卿權德輿諫曰:「神策兵市井屠販,不更戰陣,恐因勞憚遠,潰爲盜賊。 善將,令倍驛馳,度至半道,授以澤潞,而徙從史它鎮,破其姦圖,然後越承宗,衆情必服。」 皆以息自副,人心不遠,誰肯爲陛下盡力者。又盧從史倚寇爲援,試承璀邀寵利,宜召行營 師出半年,費緡錢五百萬。方夏甚暑水潦,疾疫且降,誠慮有潰橈之變。」又言:「山東諸侯, 之必引時月,西戎乘間,則禁衞不可頓虛。 勢易,不如赦承宗,專事准西。」帝不聽。 北,馳而僨,趙人曰:「酈王也」,害之,師氣益折。及吳少誠死,李絳奏:「蔡無四隣援,攻討 昭義節度使盧從史市承宗,外自固,內實與之。 山東,疥癬也;京師,心腹也。不可不深念。 恆冀騎壯兵多,攻

歸罪從史,得不詰,自謂計得,譽然無顧憚。 韶院雪,盡以故地畀之,罷諸道兵。昌朝歸京師,授右武衞將軍。承宗見兵薄境,已而罷, 求利,願請吏入賦得自新。」是時宿師久無功,餉不屬,帝憂之。而淄青、盧龍數表請赦,乃 拔安平。 五年,河東軍拔其一屯,張茂昭破之木刀溝,帝患從史詐,卒以計縛送京師,劉濟又 承宗懼,遣其屬崔遂上書謝罪,且言:「往年納地,迫三軍不得專,而爲盧從史賣以

宥, 教其將尹少卿爲蔡游說, 見宰相語不遜, 武元衡怒, 叱遣之。 承宗怨甚, 與師道謀, 遣惡 七年,軍庫火,器鎧殆盡,殺守吏百餘人,不自安。及吳元濟反,承宗與李師道上書請

傳第一

百三十六

藩鎮鎮翼

誅,帝使率師壓境。 斷建陵門戟,燔獻陵寢宮,伏甲欲反洛陽,不克。承宗數出兵掠鄰鄙, 盜,亡去不獲,凡敗錢三十萬緡、粟數萬斛。 貢,竄其弟承系、承迪、承榮於遠方,以博野、樂壽故范陽地,命歸劉總。而所遣盜處處竊發 少 /年數十曹伏 承宗嘗疏元衡過咎,留中。 河陰 ,乘昏射更,更奔潰,因火漕院,人趣火所,鬭死者十餘輩,縣大發民**捕** 承宗揣詔旨兵不卽進,卽肆剽滄、景、易、定間,人苦之。 至是帝出表示羣臣大議,咸請聲其罪伐之。 未幾,張晏等賊宰相元衡,京師大索,天子 田弘正上言承宗宜 韶乃絕承宗朝 為 冊

守南宮,士則招之,約歸命,謀泄遇害;子元伯奔還,擢監察御史,詔贈恰尙書左僕射。 昭義郗士美薄賊境,賊不敢犯。始,承宗不能叶諸父,皆奔京師。」士則爲神策大將軍,聞其 節度兵進討,大抵數十萬,環地數千里,以分其勢。 然營屯離置,主約不得一,故士觀望,獨 叛,請占數<u>京兆,裴度請用爲邢州</u>刺史,使隸昭義,以傾趙人。 有<u>王怡者,武俊從子,爲承宗</u> 十一年,詔削爵,以實封賜士平,使奉武俊後。 。今河東、義武、盧龍、横海、魏博、昭義 六

州,入租賦,待天子署吏。以正遣知感、知信詣闕下請命。前此, 景等州,復承宗實封戶三百,以所部飢,賜帛萬匹。 書許自新,承宗素服待罪。及是乃詔復官爵,以華州刺史鄭權爲橫海節度使,統德、棣、滄、 明年元濟平,承宗大恐,使牙將石汎奉二子至魏博,因田弘正求入侍,且請歸德、棣二 |李師道平,奉法盆謹,表所領州錄事、參 帝使尚書右丞崔從賜詔

軍、判司、縣主簿、令,皆丐王官。

使,事見本傳。

五年死, 贈侍中。 軍中推其弟承元爲留後。 承元不敢世于鎮, 韶用爲義成軍節度

王廷凑,本回紇阿布思之族,隸安東都護府。曾祖五哥之,爲李寶臣帳下,驍果善鬭,

王武俊養爲子,故冒姓王,世爲裨將。

敕橫海、昭義、河東、義武軍抖力。於是大將王位等謀執廷湊,不克,死者三千餘人。會朱 監軍表請節。 韶以度支緡錢百萬勞軍,不時致,廷湊暴其稽以觀衆心,衆果怨,由是害弘正,自稱 克融囚張弘靖,以幽州亂,乃合從拒王師。 廷凑生駢脅,沈鷙少言,喜讀鬼谷、兵家諸書。王承宗時,爲兵馬使。 又取冀州,殺刺史王進岌。穆宗怒,以弘正子布爲魏博節度使,率軍進討,仍 田弘正至鎭州, 留後,脅

兵,俾死生不得相聞, 怨,濟以晉陽、滄德,掎角而進。 有詔議攻討先後,劍南東川節度使王涯以爲「范陽亂非宿謀,可先事鎭州,又有魏博之 間諜 不入,此莫勝之策」。帝乃韶義武節度使陳楚閉境, 夫用兵若鬭然,先扼喉領。 今<u>瀛莫、易定實賊咽喉,宜屯重</u> 督諸軍三道

列傳第

百三十

六

潛鎮

鎮翼

五

攻。 率諸道兵救深州,戰博野,大奔,失所持節,以身免,貶歸州刺史。 中人,入見帝,大言曰:「賊不足破!」會度逐延湊兵於會星,又入元氏,焚壁二十二。 知時不可,案兵未肯前,帝浮於聽受,銳克伐,更以深冀行營節度使杜叔良代之。 會至靈武節度使,坐不職罷,復階貴近,帥滄景。 而滄德烏重胤最宿將,當一面。 裴度以河東節度使兼幽、鎭招撫使,屯承天軍。 廷湊知其怯,故先犯之,師由是敗 叔良者, 將家子, 本以附 叔良素結 叔良 重胤

王師統制不一,訖無功。宰相不知兵,爲異議搖就,裁報乖戾,深州圍益急。 者,不得衣食。又監軍宦人,悉取精票士自隨,疲瑣者備行陣,戰輒潰。二賊衆不過萬餘, 乘間奪轉運車六百乘,食愈困,至所須衣帛,未半道,諸軍彊取之,有司弗能制。其縣師深入 十五萬,有司懼不給,置南北供軍院。旣薄賊鄙,饟道梗棘,樵蘇不繼,兵番休取芻蒸。廷湊 當是時,帝賜賚無藝,府帑空,旣集諸道兵,調發火馳,民不堪其勞。 仰度支者大抵兵

德軍節度使。 明年,魏牙將史憲誠叛,田布衆潰于南宮。帝不得已,乃赦廷凑,檢校右散騎常侍、成 會牛元翼出奔,廷凑遂取深州,詔兵部侍郎韓愈慰其軍。

幽、魏、徐、兗兵討同捷,廷凑橈魏北鄙以牽制之,而饋滄景鹺糧,囚隣道使者不遣。帝怒, 不許,更授兗海節度使。 延凑既原,則稍挺,與克融、憲誠深相結,爲輔車援。 滄州李全略死,子同捷求襲,文宗 同捷逆命,乃以珍幣子女厚結廷湊,帝虞其變,故授檢校司徒。及

縣固守,復上書謝。帝方厭兵,赦之,悉復官爵,還所上州。久之,進兼太子太傅、太原郡公。 營李載義獲之,又納魏叛將丌志沼。會同捷平,廷湊稍畏,表上景州,而弓高、樂陵、長河三 之官;以州鎮降者,等差爲比。」公濟再戰行唐,皆克,焚栅十五。廷湊射蠟書求救於幽州,行 韶絕其輸貢。於是易定柳公濟戰新樂,斬首三千級。 昭義劉從諫戰臨城,敗之,引潭注深、 **鎭冀自惟岳以來,拒天子命,然重隣好,畏法,稍屈則祈自新。至廷凑資凶悖,肆毒甘** 有韶:「同捷亂,廷凑同惡,宜削官爵,諸道以兵進討,有能斬廷凑者,賜錢二萬緡,優界

亂,不臣不仁,雖夷狄不若也。 |大|和八年死,贈太尉。 軍中以|元|違請命,帝聽襲節度。

門下平章事。隨平,加兼太子太師,封太原郡公,食實封戶二百,進至兼太傅。大中八年死, 年四十三,贈太師,諡曰忠。 納 面 聘闕下,進千盤食、良馬、主糚澤奩具、奴婢,議者嘉其恭。 其後劉稹叛,武宗詔元逵爲北 .招討使。 詔下,卽日師引道,拔宣務壁,破援軍|堯山,攻|邢|州降之,累遷檢校司徒、同中書 元建,其次子也。 **識禮法,歲時貢獻如職。** 帝悅,詔尚絳王悟女壽安公主。元逵遣人

路人以爲樂。衆忿其虐,欲逐之。會病死,贈司空。 子紹鼎襲,字嗣先,累擢檢校尙書左僕射。其爲人淫湎自放,性暴,厚哀斂,升樓彈射

上狀,懿宗悅,擢景崇爲留後,尋進節度使。 屬我,須爾長,將授之。今疾甚,爾雖少,勉總軍務,禮藩隣,奉朝廷,則家業不墜矣。」 監軍 政簡易,咸通七年死,贈司徒。以紹鼎子景崇嗣。初,紹懿病篤,召景崇曰:「先君以政 子幼未能事,宣宗以元逵次子紹懿爲留後以嗣,俄爲節度使,累封太原縣伯,加檢校司

醁 五年,進王 屬不得與。 食 可也, 主薨,諡曰章惠,景崇居喪如禮。 景崇,字孟安,以公主嫡孫,尤被寵。 一常山 何必以官。」景崇謝。 嘗欲引母昆弟爲牙將,其佐張位曰:「軍中用人,有勞有能,若私其人,厚畀田宅 進同中書門下平章事、檢校太尉兼中書令,封趙國公。 母張卒,號慕羸惙,當時稱之。 龐勛反,景崇遣兵會王師平賊,進檢校尚書右僕 以政委賓佐, 檢戒親

問行在,貢輸相踵 **黃巢反,帝西狩,僞使齎詔至,景崇斬以徇,因發兵馳檄諸道,合定州處存連師西入關,** 每語及宗廟園陵,輒流涕

史,擁兵之官,道于鎭,景崇館于靈壽,肆其下 蔚州 刺 史蘇祜爲沙陀所攻,乞師於幽州,屯美女谷,兵不利。 剽奪,景崇殺之。

嗣節度凡十四年,十三遷至檢校太傅。 中和三年死,年三十七, 贈太傅, 諡日忠穆。

鎔,年十歲,軍中推爲留後,授檢校工部尚書。李克用、楊復光攻黃巢,鎔凡再饋粟以濟

師。僖宗還自蜀,獻馬牛戎械萬計。

鎭,克用還,然未得志,故復伐鎔。 |鎔引騎十萬夜濟磁水,襲敗之,斬二萬級,奪鎧器三百乘,克用退壁欒城。 鎔,拔堅固鎮,攻新市。 會之。一鎔侵堯山,存孝擊敗之,遂至深、趙。一路求救於匡威。 滹沱諜軍,會大濁,平地水出,鎔兵奄至,克用匿林中以免。是時,幽州李匡威亦謀取易、定 金二十萬以謝。 天子詔出鎭、幽、魏兵援之。景福元年,克用假道于鎔,以討存孝,鎔不答,乃與處存連兵侵 者,善騎射,攻葛從周,敗張濬、韓建,數有奇功。至是懼讒,挈邢州歸朱全忠,幷結鎔爲助。 屯鄗,引師去。存信素忌存孝,妄曰:「無擊賊意。」克用信之。存孝,飛狐人,所謂安敬思 分其地。|王處存方厚專克用,克用寵將|李存孝已拔|邢,則略|鎔南鄙,別將|李存信等出|井陘 於是克用方擊孟方立於邢州,鎔歸獨糧。邢州平,克用遂謀山東,屯常山西,引輕騎涉 鎔禽克用將薛萬金。 匡威以五千騎敗克用於元氏, 鎔具牛酒會匡威稟城, 餉 匡威以兵三萬救鎔。 克用自攻常山,度滹沱。 存孝方攻臨城等數縣,聞匡威 天子有詔和解三

五

貞俱死。 鎭 靡,乃挾鎔踰城入。旣兎,賞千金,與第一區,約宥十死。 屬楊洽及親吏淡從,有甲者牽鎔袖。|匡威曰:「與我四州,可不死!」|鎔許之。 軍譟而闔左門,坎垣出戰。會大雨風,木拔瓦飛。兵相接,有屠者墨君和袒而薄賊,衆披 俄 m 明日,鎔以禮斂匡威,素服哭諸廷,遣使告匡籌。 匡威爲弟匡籌所逐,鎔德其助己,迎而館之。 匡威親忌日,鎔往弔, 医威走東園,兵圍之,與從事|李抱 匡籌怒,移書詰兄所以死狀,表 將||鎔入牙城, 伏起,殺其府

出 萬,請出兵助討存孝,乃得解。 [縛馬關,敗鎭兵於平山,因進攻鎔外壘。 | 鎔內失||幽州助,因乞盟,進幣五十萬,歸糧二十 克用聞匡威死,自率兵傅城下。 鎔大鷲,納縑二十萬,乃退。 匡籌攻樂壽、武強,克用 天子請討鎔,詔止之。又詔朱全忠平幽、鎭怨。

誤計,使我生見王,死不恨!」克用遣家嫗招之,存孝出,泥首言爲存信誣構,克用曰:「爾與 踏書,罵我多矣! 欲溝堞成則西歸,公何不聽之?」<u>存</u>孝兵不出,壘成,攻益急,城中食盡。<u>存</u>孝登城哭曰:「我 溝堞,欲示久圍者;城中兵數出,溝壘不可成。裨將|袁奉韜給|存孝曰:「君所畏唯王耳,王 克用屯欒城,存信屯琉璃陂,爲邢人夜襲其營,存信軍亂,不克追。克用進薄邢,環城爲 」轘而尸於市。

光化中,全忠討幽州劉仁恭,鎔遣兵屯蓨城,俄而仁恭敗,擊其歸,得十八。全忠旣取

脩好。 家,不可恃遠救。今定密邇,與太原親,宜使全忠圖之。」鎔遣式使全忠,全忠乃取定州,王 用將李嗣昭攻洺州,全忠自將擊走之,得鎔與嗣昭書,全忠怒,引軍攻鎔,次元氏。 邢、洛、磁,又得路,因圖河東。使羅紹威諷鎔絕太原,共尊全忠。 恒、文,方以仁義成霸業,寧困人於險耶?」全忠喜,把|式袂曰:「吾特戲耳!」 延入帳中,議 耳。 原,今無赦矣!」即出書示|式日:「嗣昭在者,宜速遣。」|式日:「王公所與和者,息人鋒鏑間 屬曰:「國危矣,奈何?」周式請見全忠,可以口舌罷也,許之。 全忠迎折日:「爾公朋附大 沉繼奉天子詔和解,能無一番紙墜北路乎?太原與趙本無恩,嗣昭庸肯入耶?公爲唐 |鎔以幣二十萬路師,遣子昭祚質仕全忠府,全忠因妻之。| 鎔判官張澤謀曰:「失火之 一路 符違, 全忠不悅。會克 |谿調 其

母 ,數游覽,妄求長年事,踰月不還。 |鎔 母何, 有婦德,訓鎔嚴。至母亡,鎔始黷貨財,姬侍千人,儀服僭上。又以房山有西王

問途奔 太原

及之, 浴 皆 王。 何? 始 問其故, 子孫 延湊賤微時,潔有道士爲卜,得乾之坤,曰:「君將有土。」及得鎭,迎事甚謹。 <u>|廷湊嘗使至||河陽,醉寢於路,有過其所者視之曰:「非常人也!</u> :幾何?答曰:「公三十年後,當有二王。」已而廷凑立 曰:「吾見君 爲之息,左若龍,右若虎,子孫當王百年。家有大樹,覆及堂,公興 十三年死,蓋廋文也,景崇、 」從者以告廷湊,馳 復問壽

列傳

第

百三十六

藩鍼鍼翼

校勘記

矣。」及害以正,而樹適庇寢。自廷凑訖鎔,凡百年。

身,德宗爲不明哉! 語寤武俊,軋兵相仇,折幽、膩之銳,泚失其朋,不出孤城,終底覆夷。 贊曰:朱滔、王武俊南面稱王,地聯交昵。 及泚僭天子, 滔將應之, 當時危矣。 用林之功, 賞不及 賈林以

校勘記

(1)長上萬國俊奪與平民田 衲本作「長上」, 宋十行本、汲、殿、局本作「長史」。

唐書卷二百一十二

列傳第一百三十七

藩鎭盧龍

李懷 張仲 武 仙 直 朱滔 方 張 允伸 劉 怦 張公素 濟 緫 李茂 朱克融 勳 可舉 李載義 李全忠 楊志誠 匡 威 史元 匡 忠 霉

劉仁

恭

亂, 士,居三日,大會, 思明盜河南,留次子嘲淸守幽州,以阿史那玉、高如震輔之。 朝義以懷仙爲幽州節度使,督兵馳入。 李懷 仙, 柳城胡也。 斬如 震 世事契丹,守營州 州部悉平。 朝義敗, 如震欲拒,不及計, 善騎射,智數敏給。 將趨范陽。 中人駱奉先間遺鐫 朝義殺立,移檄誅朝清。 乃出迎。 禄山之反,以爲裨將。 懐仙 外示 說, 懐仙 寬 以安 將 史

列

傳

第

百

=

+

七

藩

鋮

应

龍

五九六七

五九六八

將吏,私貢賦,天子不能制。 不解,朝廷方勤西師,故懷仙與田承嗣、薛嵩、張忠志等得招還散亡,治城邑甲兵,自署文武 僕固懷恩卽表懷仙爲幽州盧龍節度使,遷檢校兵部尚書,王武威郡。 降,使其將李抱忠以兵三千戍范陽。 朝義至,抱忠閉關不內,乃縊死,斬其首,因奉先以獻。 屬懷恩反,邊羌挐戰

朱泚爲留後。 泚自有傳。 即領節度。 卒伍,大陳戎備以逆。 縉建旌棨徐驅,浠彩迎謁恭甚。 縉度不可制,勞軍,閱旬乃還。 忠志以兵討其亂,不克。代宗因赦罪,詔宰相王縉爲節度使,以希彩副之。希彩聞縉至,蒐 欲亡,滔曰:「謀不成,有死,逃將焉往?」俄希彩至,共斬懷仙,族其家。 希彩自稱留後。 大曆三年,麾下朱希彩、朱泚、泚弟滔,謀殺懷仙,斬閽者以入,希彩不至。 五年,封高密郡王。 驚恣不軌,人不堪。七年,其下|李暖間衆之怨,殺之,共推 遼明, 泚懼 希彩

召見滔殿中。 爲天子西乘塞,爲諸軍倡。始,安、史後,山東雖外臣順,實傲肆不廷。至泚首效款,帝嘉之, 朱滔,性變詐多端倪。 帝問曰:「卿材孰與泚多?」滔曰:「統御士衆,方略明辨,臣不及泚;臣年二 |希彩以同宗倚愛之,使主帳下親兵。||泚領節度,遣||滔將兵三千

州,置 意,子 ,孫安矣。」泚信之,因入朝。 酒開 獲謁 遠門餞之。戍還,乃謀奪泚兵,詭說曰:「天下諸侯未有朝者,先至,可以得天子 天子, 泚長臣五年, 未識朝廷, 此不及臣。」帝愈喜, 特詔勒兵貫王城而 稍不相平,泚遂乞留,西討吐蕃。 以滔權知留後,兼御史 出, 屯涇

滔殺

《有功者李瑗等二十餘人,威振軍中。

忠順 滔 州。 朝廷乃見奪,奏賞不報。 書諫日:「司徒身節制 軍,復不許, 幽 不從,連兵救悅。 願安之,不卹其它。」滔罷,潛殺不可共亂者數十人。 人死於南者,骸撑不揜,痛藏心髓,奈何復欲暴骨中 德宗以 自 李惟 將,則無 岳 拒命 愈怨。 康 日知爲深、趙二州團練使,詔滔還鎭。滔失深州,不平,又請恆、定七州所賦供 不濟。 ,滔與成德張孝忠再破之東鹿,取深州,進檢校司徒,遂領節度,賜德、棣二 時馬燧圍田悅,悅窮,間滔與王武俊同叛。 又懼張孝忠之襲,使怦壁險而軍。 ,太尉位宰相,恩遇極矣。 比忘 君等疾趣,破馬燧軍以取貨糧 上樂戰,不顧 成敗如安、史者,今復何有?司徒圖之,無貽悔。」 今昌平有太尉鄉、司徒里,不朽業也。 ,可乎? 野乎? 滔激其衆曰:F士蹀 日知發其謀於燧,天子聞,以悅未 司徒兄弟受國寵, 浴姑子劉怦為涿州 軍 中不應,三號之,乃曰: 血鬭,旣下堅城 士各蒙官 刺 史, 能以 以

滔 愈悖,分兵與武俊屯趙州 脅日知,矯詔發其糧貯, 即引兵救悦, 次束鹿。 軍大躁日:

重起兩寇,即封滔通義郡王,實戶三百。

列傳

第

百

+

七

鎭

虚

龍

橋,久不戰。 約取成德,所得州縣賜有功者。拔深州者,燕也。 顧不得。又天子以帛賜有功士,爲馬燧掠去,今引而南,非自爲也。」軍中悔謝,復曰:「雖然, 司徒南行違詔書,莫如還。」滔回次深州,誅首變者二百人。 「天子令司 。帝命馬燧、李懷光擊之,滔屬鄭雲逵、田景仙皆奔燧。 徒北還,而南救魏,寧有韶邪?」滔懼, 走匿傳舍。 本鎭常苦無絲纊,冀得深州以佐調率,今 已而滔破懷光軍,則與王師屯魏 衆懼,乃率兵南壁寧晉,與武俊 裨將蔡雄好諭士曰:「始天子

從之。滔以祿山、思明皆起燕,俄覆滅,惡其名,以冀,堯所都,因號冀,武俊號趙,悅號魏 賊瑞邪! |納號||齊。||建中三年多十月庚申,爲壇||魏西,祀天,各僭爲王,與||武俊等三讓乃就位。||滔爲盟 議:「古有列國連衡共抗湊。今公等在此,李大夫在鄲,請如七國,並建號,用天子正朔。 且 主,稱孤;武俊、悅及納稱寡人。是日,三叛軍上有雲氣頗異,燧望笑曰:「是雲無知,乃爲 師在外,其動無名,豈長爲叛臣,士何所歸?宜擇日定約,順人心,不如盟者共伐之。」,滔等 脫德滔援,欲尊而臣之,滔讓武俊,曰:「篋山之勝,王大夫力也。」於是,滔、武俊官屬共 」先是,其地土息高三丈,魏人韋稔佞悅,以爲益土之兆。後二年,滔等册壝,正值

滔改幽州爲范陽府,以子爲府留後,稱元帥,用親信爲留守。 滔等居室皆曰殿,妻曰妃,

瞻 范陽府留守 侍 子 大 至監察 夫, 爲 、楊榮 中 國 中書 視 御 公,下皆稱 諫議 或 ·史 ; 令 爲 大夫; 司 柳良 驅 文、司 東 使要籍官日 西 臣,謂殿下。 、器、李子千爲左 侍 六官省, 武、司 郎 視門下、中書; n禮、司 承令; 視 尚書;東、西曹僕射, 上書日牋,所下日令。 刑侍郎,李士 右 左右將 1內史, 東曹給事、 滔兄瓊瑰、 軍日虎牙、豹 眞、樊播 西曹舍人, 視給 視左右僕射 置左右內 陸慶爲東、 爲執憲大夫、中丞。 略 ; 軍 使日 西曹僕射 御 鷹 事中、中書舍人; 史臺 揚 龍 ; 日 其餘以 內史令、監, 楊霽、馬寔、寇 驤。 執憲,置大 以劉 次補署。 怀爲 司 夫 視

聘處土張遂、王道爲司諫。

還。 敗, 節度足矣。」寔遣具道所以然,武俊亦遣使謝滔,滔悅,亦報謝。 還, 戰 滔 殺城卒數百 1且病, 使馬 奔易州 武 滔 燧 俊 寔 遣 疑 河謂 就醫 將兵 有 李晟將兵至易、定,率張茂昭攻逐、莫,以絕滔援。明年, 寔曰:「寡人望王速來指蹤 伏,不敢逼,遽保瀛州。 |
歴 茂昭 | 藥, 萬 人,與武俊 走滿城。 出。 而王已復云云。 景濟望滔軍 [担燧, 滔已破晟, 自以 立 孤 而孝忠、晟合兵千人城萊水 南 一幟爲應。 (兵萬 則 決勝負 救魏 回 餘救清苑 屯 棄兄背君 河間 滔進 復 何惡? 不 軍 進。 絕晟 ·薄晟營, 如 王 脱屣。 武俊使宋端趣 糧道。 異 晟 日井天下,寡 然武俊內銜之,滋不懌, 段不利,城中兵亦出,晟大 滔驍將烏薩戒以兵七 兵至定州,晟不 王 圍清苑, 滔將鄭景 必 相 疑,亦聽所爲 護, 人得六七城,爲 滔怒曰:「孤 知,夜引兵 濟固守。 百 與 应 襲

田悅潛謀絕滔

和俱西。 發書,西向再拜,移檄諸道曰:「今發突騎四十萬走洛陽, 與皇帝會上陽宮。」 使王郅說悅連 攻康日知於趙州,謀覆其軍,不克。寔歸,武俊餞之,厚贈遺。泚遣人密召滔,使趨洛陽。滔 及泚反,燧等皆班師,武俊、寔亦還。悦、武俊遣使至河間,賀泚即位。 |滔素疆調斂,|武俊等不能堪。又令各以兵五千從攻洛,欲僭稱帝,乘興、法從及赦 武俊詭請塞共

南,以兵斷公歸路,宜少備。」滔聞怒,入永濟,執悅吏掠訊,不得其情,殺之。 脫 其會達于曰:「若能同度河而南,玉帛子女不貲,計可得也。」 達于許諾,滔啗以金帛,約日 |納納四金鑰於回紇,日:「四國願聽命於可汗,謹上金鑰,啓閉出納,唯所命。」至是,乞師焉。 爲婚,女悅,許焉。旣而遣使修壻禮於回紇,回紇喜,報以名馬重寶。及僭相王,與武俊、悅、 令皆具。 過武俊境,武俊勞之,牛酒芻米皆具。然悅已用武俊謀,不肯出,儲峙于野以待。滔至貝州, 「五十里舍,以須悅軍」。 滔兵五萬,車千乘,騎二萬,士私屬萬餘,虜兵三千,馬橐它倍之; 回紇以二千騎從,而武俊亦先乞師,以斷懷光餉路,未至,而王師還。 刺史邢曹俊上謁滔,即歸閉城守,滔疑之,次永濟。 初,回紇以女妻奚王,大曆末,奚亂,殺王,女逃歸,道平盧,滔以錦繡張道,待其至,請 武俊陰遣客反間滔日:「悅有憾,須公 回紇過幽州,滔使說 使回紇大

掠,南及澶、衞,係執老幼無遺者。 悦大恐, 闔城自保。 滔遣將楊布略定館陶, 屯平恩

滔整軍北還,使馬塞屯冠氏, 聞悅死, 遂攻魏州, 圍貝州。 於是,武俊、李抱眞合軍擊

勝。 雄、布之謬,殺之。 難圖,請戰。 旣戰,爲二軍所乘,大敗,大將朱良祐、李進皆被執,委仗如丘, 滔急召 寔至 艮州,步馬乏頓。 楊布日:「大王將取康都,逢小敵卽怯,何以長驅天下邪?」術士尹少伯亦言必 俄而京師平,滔已敗,不能軍,走還幽州, 明日,輒約戰,寔請休士三日, 上書待罪。 蔡雄、達干等畏武俊堅壁 滔奔入德州。 有韶武俊、抱眞開 恨少伯、

二十里迎謁,望滔哭,滔遂入府。 氣沮索,日邑邑,被病,政事一委怦。 貞元元年死,年四十 初,滔以劉怦忠力,使留守,及敗,疑圖己,仿徨不敢入。 怀聞其至, 蒐兵繕鎧, 夾道 陳

一,贈司徒。

示大信,若誠心審固者,當洗釁錄勳,與更始。

應。 劉怦 朱滔時,積 幽州昌平人。少爲范陽裨將,以親老疾宜侍,輒去職。 一功至雄武軍使,廣墾田,節用度,以辦治稱。稍遷逐州刺史。滔之討田承嗣 李懷仙爲節度使,檄召不

第

百

三 十

七

藩 籅 盘

鼅

表知府事 了, 和 不敢謀,擢御史中丞。滔敗歸,終不貳,益治兵,人嘉怦忠於所奉。 裕得衆心。李寶臣以兵劫滔于瓦橋,滔走,寶臣乘勝欲襲幽州,怦設方略,勒

十九,贈兵部尚書,諡曰恭。 及滔死,軍中盡推怦,乃總軍事。 子濟。 俄韶爲節度副大使、彭城郡公。 居鎭纔三月死,年五

檢校尙書右僕射、同中書門下平章事。一溪數侵邊,濟擊走之,窮追千餘里,至青都山, 其後又掠檀、薊北鄙,濟率軍會室車,破之。 游學京師,第進士,歷莫州刺史。 |怀病,韶濟假州事。 及怦卒,嗣節度,累遷

伐趙,趙亦不備燕。」濟曰:「計安出?」曰:「今天子誅承宗,而燕無一卒濟易水者,正使潞人 從史則告天子曰:『燕、趙,宿怨也,今趙見伐而不備燕,是燕反與趙。』此所以知天子不使君 趙,內實與之。此爲趙畫曰:『燕倚趙自固,雖甚怨,必不殘趙,故不足虞也。』趙旣不備燕 數日,詔書許濟無出師。濟釋忠,謝而問之,忠曰:「昭義盧從史外親燕,內實忌之;外絕 欲激濟伐承宗,疾言曰:「天子不使我伐趙,趙亦不備燕。」濟怒,繫之。 王承宗叛,濟合諸將曰:「天子知我怨趙,必命我伐之,趙且大備我,奈何?」 裨將譚忠 使視趙, 果不設備。

賣恩於趙、販忠於上,是君貯忠誼心,而染私趙之名,卒不見德於趙,惡聲徒嘈嘈於天下。」濟

然之,以兵七萬先諸軍,斬首數千級,又拔饒陽,屯瀛州。 進攻安平,久不拔,濟命次子總以

兵八千先登,日中拔其城。 會赦承宗,進中書令。

總使吏唐弘寶寘毒,濟飲而死,年五十四。 兵大將數十人及素與緄厚善者,亟追緄,以田兄皐代留事。 復使人曰:「詔節至太原矣。」又使人走呼曰:「過代矣。」舉軍驚。 內親近謀殺濟,乃使人詐從京師來,曰:「朝廷以公前屯瀛州逗留,韶副大使代節度。」明日 ||莊武 濟之出,以長子尡攝留務,總爲行營都知兵馬使。 | 展至|| 涿州,總矯濟命殺之。 濟病甚,總與左右張田、成國寶及帳 濟自朝至中昃不食,渴索酏漿, 濟質且怒,不知所爲,誅主 乃發喪,贈太師, 誠

書門下 校司空。 又數見父兄爲祟,乃衣食浮屠數百人,晝夜祈禳 總性陰賊,尤險譎,已毒父,卽領軍政,朝廷不知其姦,故詔嗣節度, 平章事。 承宗 再拒命,總遣兵取武疆 及吳元濟、李師道 平,承宗憂死,田弘正 一,按軍 兩端,以私饋資。 ,而總憩祠場則暫安,或居臥內, 入鎭州,總失支助, 憲宗知之,外示崇寵 封楚國公, 大恐, 輒驚不能 謀自安。 進 進累檢 同

|譚忠復說總日:「天地之數,合必離,離必合。 列 第 百三 + 七 蕃 鎭 虚 餛 河北與天下離六十年, 五 數窮必合。 往朱

寐。

晚年

益慘悸,請剔髮,衣浮屠服,欲祓除之。

謝,因上疏願奉朝請,且欲割所治爲三:以幽、涿、營爲一府,請張弘靖治之;、瀛、塻爲一府, 來,趙人已獻德、棣十二城,助魏破齊,唯燕無一日勞,後世得無事乎?爲君憂之。」總泣且 劉闢、李錡、田季安、盧從史、齊、蔡之疆,或首于都市,或身爲逐客,皆君自見。今兵駸駸北 |泚、|希烈自立,趙、'冀、'齊、'魏稱王,郡國弄兵,低目相視,可謂危矣,然卒於無事 元和以來,

以節、印偕來。時總已自髠祝,讓節、印,遂衣浮屠服。行及定州,卒。 觀察使。 會廖宗沖逸,宰相崔植、杜元穎無遠謀,欲寵弘靖,重其權,故全付總地,唯分瀛、莫置 拜總檢校司徒兼侍中、天平節度使。 又賜浮屠服,號大覺,榜其第爲佛祠,遣使者

<u>盧士</u>政治之;平、蒯、嬀、檀爲一府,薛平治之。 盡籍宿將薦諸朝。

其惠,擁留不得進。 歲,緡錢百萬勞軍,高年惸獨不能自存者,官吏就問,賜粟帛。總遂與忠俱行,軍中世懷 始,總請代,獻馬萬五千匹,羣臣或疑其詐,帝獨納之,使給事中薛存慶宣慰,給所部復 |總殺首謀者十人,以節付張阜,夜間道去,遲明,軍中乃知。

喜兵,善謀事,蓋健男子云。 韶贈太尉。子礎及弟約至長安者十一人,皆擢州刺史。 忠護總喪至,亦卒。 忠,絳人,

地,謂天下曠然無復事。 薦之朝,冀厚與爵位,使北方歆豔,無甘亂心,克融在遣。 朱克融,滔孫也。以偏校事劉總。總將入朝,盧後有變,籍其軍材勇與點暴不制者,悉 克融等留京師,久之不得調,數詣宰相求自試,皆不聽,羸色敗服 方是時, 執政非其人, 旣見總納

飢寒無所資丐,內怨忿。 會張弘靖赴鎭,因悉遣還。

州 朝廷度幽薊未可復取,乃拜克融檢校左散騎常侍,爲幽州盧龍節度使,長慶元年也。 推 ,敗兩縣;寇蔚州,易州刺史柳公濟戰白石嶺,斬三千級;轉寇定州,節度使陳楚破其兵 克融領軍務。 俄幽州亂,囚弘靖。時克融父洄,號有智譎,以疾廢臥家,衆往請爲帥。 會鎭州反,殺田弘正,議者謂二賊均逆,而克融全弘靖不敢害,可悉兵先誅趙,赦燕 詔以劉悟爲節度使馳往,俄而瀛、冀皆附克融,悟不得入。 洄辭老且病,因 克融縱兵掠易

尙書,表獻馬萬匹、羊十萬,請直賞軍。敬宗初,遷檢校司空,賜邊屯時服,克融以帛疏惡, 十萬,備一歲費。」帝怒,用裴度謀,忍不問,以好言答之,屈其謀,進飮吳興郡王。 囚詔使楊文端以聞。又上言:「聞陛下東幸雒,願率匠丁五千助營宮室,迎乘輿,且請帛三 明年,陷弓高,攻下博,與王廷凑共圍深州。裴度以檄譙諭,克融乃還,因進檢校工部

代之,丼族其家。 是年,軍亂,殺克融及其子延齡,詔贈司徒。 次子|延嗣立,領留後,爲大將|李載義殺而

引 忍,殺之,暴其罪于朝。 補 .帳下,從征伐, 積多爲牙中兵馬使。 載義,自稱恆山愍王之後。 敬宗卽授檢校戶部尚書、盧龍軍節度使,封武威郡王 性矜蕩,好與豪傑游,力挽疆搏鬭。 朱克融死,子延嗣叛命, 殘用其人。 劉濟在幽州,高其能, 載義因衆不

賊平 而 李同捷據滄、景,邀襲封,載義請討賊自效,文宗嘉之,進檢校尚書右僕射。 - ,詔同中書門下平章事,賜白玉帶,示殊禮。 初 ,張弘靖之囚,幕府多見害,妻子留不遣。 及是、載義悉護送京師,雖僮厮舉行。 斬級數有功,

妻子 仍平 身入見。」帝令使者抵太原尉迎,賜袍笏裝器;又以其嘗有功,且意恭順,乃册拜太保, 大和 四年,爲兵馬使楊志誠所逐,奔易州,即上言:「自破滄州賊, 俄為 山南 西道節度使。 徙河東。 屢請朝不許, 今願將

若將軍所部不戢,而奪攘自如,我必殺所犯者,將軍其少戒。」因悉罷所防兵,以兩卒護闔。 剽突市區 可 汗以舅甥故, 始 回 關使者歲入朝,所過暴慢,吏不敢何禁,但嚴兵自守。虜忸習,益警悍,至 時大會李暢者,曉華人語,尤凶 使將軍 ·朝貢, 證不容將軍 暴也。 點。 旣就館,橫須索 天子 厚饗餼以禮客, ,
扶
疻
郵 有不謹 人。 載義 , 召暢語 吏皆 一鞭候 論 死。

惕嚴憚之,訖無犯者。 「周書『凡厥正人,旣富方穀。』卿宜當之,以方穀爲字。」其寵待如此。 進兼侍中。 會吏下請立碑紀功,詔李程爲之辭, 開成二年卒,年五十, 未有字。 帝韶日:

贈太尉。

又欲殺之,官屬苦救乃免,然盡戕其妻息士卒,其天資驕暴云,帝屈法弗劾也 初, 載義母葬范陽,爲楊志誠掘發。後志誠被逐,道太原,載義奏請剔其心,償母怨,不

服 輒 魏 進 知 寶義 以待 檢 去。 兵馬使。 校吏部。 |志誠者,事載義爲牙將。 及它使焦奉鸞、尹士恭,而遣部將王文穎入謝,讓還所命。 帝忍不責,乃遣使進檢校尚書右僕射 天子命,如復爲尙書,則舉軍慚,使者勢不得出。」旣志誠果怨望,軍有嫚言,囚中人 文宗更以嘉王領節度,用志誠爲留後。俄檢校工部尚書,擢節度副大使。踰年, 詔下,邸吏白宰相曰:「軍中不識朝廷儀,惟知尙書改僕射爲進秩。 今一府盛 載義宴天子使者鞠場,志誠與其黨譟而起,載義走,因自爲都 帝復賜之,文穎不肯受,

元忠 表而 工部尚書,爲副大使。 八年,爲下所 暴于朝, 韶御史按治,斥嶺南,至商州,誅之,而 逐,推部將史元忠總留後。 會昌初,爲偏將陳行泰所殺。 志誠在鎮, 以通王領節度,授元忠留後。 密製天子衮冕, 行泰邀節制, 未報 其被服皆擬 次將張絳殺 明年, 乘輿。

檢校 列 傳 第 百 = + -6 藩 鎚 虚 龍 五九七九

行泰,起求帥軍,武宗自用張仲武代之。

|仲武 崩 將張光朝子,年五十餘,通書,習戎事,性忠義,願歸款朝廷舊矣。」德裕曰:「卽以爲帥,軍得 入朝,請以本軍擊回鶻。 逐,即拜仲武副大使、檢校工部尙書、蘭陵郡公。 無復亂乎?」答曰:「仲武得士心,受命必有逐絳者。」 德裕入白帝曰:「行泰等邀節不可許, 軍以請,亦置未報。是時,回鶻爲點戛斯所破,烏介可汗託天德塞上,而仲武遣其屬吳仲舒 請 (求自效,用之有名,軍且無辭。」乃擢兵馬留後,而詔撫王領節度。 前,皆報下太速,故軍得以安,若少須下,且有變。 帝許之,未報,果爲絳所殺,復誘其 張 仲武,范陽人。 通左氏春秋。 德裕因問北方事,仲舒曰:「行泰、絳皆遊客,人心不附。 會昌初,爲雄武軍使。 行泰殺元忠,宰相李德裕計:河 韶下,絳果爲軍中所 仲武,

萬破之,獲馬、牛、橐它、旗纛不勝計,遣吏獻狀,進檢校兵部尚書。 旦 [鶻特勒|那頶啜擁|赤心部七千帳逼漁陽, 仲武使其弟仲至與別將游奉寰等率銳兵

執諜者八百餘人殺之。 始,回鶻常有酋長監溪、契丹以督歲貢,因詗刺中國。一件武使裨將石公緒等厚結二 回鶻欲入五原,掠保塞雜虜,乃先以宣門將軍四十七人詭好結歡,

仲武 獲雜畜不貲。 烏介失勢,往依康居,盡徙餘種,寄黑車子部。 表請立石以 路其下,盡得所謀, 紀聖功,帝詔德裕爲銘,揭碑盧龍,以告後世。 **擢累檢校司徒、同中書門下平章事。** 因逗留不遣,使失師期,回鶻人馬多病死者,由是不敢犯五原塞。 回鶻遂衰,名王貴種相繼降,捕幾千人。仲武 卒,諡曰脏。 大中初, 又破溪北部及山溪,

京師 工部 尙書俸。 直方,以右金吾將軍襲節度留後,俄進副大使。 軍中以張允伸總後務。 久之,進檢校尙書右僕射 直方至,宣宗遣使者郊勞,授金吾大將軍,以其族大,給檢校 舉動多不法,畏下變起,乃託 出畋奔

直方百 那 ? 射,進左金吾衞大將 時 識之,見必羣 入,下 」久乃復 性暴 口 遷驍 不自存, 率, 噪。 授羽 衞將 坐以 乾符 林統 每內燕,以衣敞惡, 軍 小罪答殺金吾使, 軍 奴婢細 中,累進左聽衛大將 軍。 縱部下爲盜,復貶 過輒殺, 改右羽林統 辭不赴。 積其罪, 貶 軍 康 陛下錄功念舊, 時鄭畋 州 軍。 思州 司 馬。 好馳獵, 輔政,頗言:「仲武 司戶參 後居東都,弋獵 軍 往往設置罘於道。 宜少優假。」 母驚日:「尙有 會昌 愈甚,洛陽 韶還檢校右僕 時功第一 尊 當宿衞 飛 於 我子 鳥皆

黄巢犯京師 列 傳 第 百 直方迎灞上,既而納亡命,謀劫巢報天子,公卿多依之。 = + 七 蕃 鎭 虚 館 五 九八八 賊覺,屠其族。

報 印。 張 允伸字逢昌, 未幾,檢校散騎常侍,爲節度使,累進檢校司徒、兼太傅、同中書門下平章事, 范陽人。 世為軍校。 直方出奔,以都知兵馬使爲衆立爲留後, 封燕

國公。

簡會爲副大使。卒,年八十八,贈太尉,諡曰忠烈。 嘉美,賜玉帶、寶器、紈錦,進兼侍中。 龐勛以徐州反,上書欲遣弟允阜領兵討賊,不許。 <u>咸通十二年,以疾甚,上節、印,便醫藥,詔聽許,以子</u> ' 上米五十萬斛、鹽二萬斛佐用度,詔

史、郡佐者,而軍中推張公素爲留後。 |允伸性勤儉,下所安賴,未嘗有邊鄙虞。子十四人。|簡|會入朝, 昆弟多至大將軍、刺

號「白眼相公」。爲李茂勳所襲,奔京師,貶復州司戶參軍。 簡會知不可制,卽出奔。詔公素爲節度使,進同中書門下平章事。性暴厲,眸子多白,燕人 |公素,|范陽人。以列將事||允伸,擢累||平||刺史。||允伸卒,以兵來會喪,軍士素附其威望, 以輕兵三千蒙羊皮,夜布之野,以精騎伏它道,全忠軍望爲羣羊,爭趨之,處存伏騎發,大敗 之,鎔引 獲萬 玄紹 之,因舉兵,紿稱貢言反。公素迎擊不利,走,茂勳入府,衆始悟,因推主州務,以聞,詔卽拜 六萬圍易州。 節度使。俄以病自上,詔進尚書右僕射致仕。 校太尉。 吐渾都督赫連鐸、鎭州王鎔聯和,揚言易、定本燕、趙屬,得其地,且參有之。 以將兵,常乘邊積功,賜姓及名。陳貢言者,燕健將,爲納降軍使,軍中素信服,茂勳襲殺 中和 擊沙陀藥兒嶺 李茂勳,本回鶻阿布思之裔。 去,追破之九門。 末,太原李克用始疆大,與定州王處存厚相結,可舉惡其窺山東爲己患,乃遣使約 鐸 又破沙陀於蔚州,詔以鐸爲雲州刺史,進可舉檢校侍中。乃遣票將李全忠率衆 |鎔以兵攻||無極,處存求援||太原,克用自將赴之,鎭人懼,退保||新城,克用急 ,斬首七千級,殺其將朱耶盡忠等,收牛、馬、器鎧數萬。 易久未下,盧龍將劉仁恭穴地以入,得其城,士卒有驕 張仲武時,與其侯王皆降。 資沈勇,善馳射,仲武器之, 表子可舉代,遂領留後,進爲節度使,擢累檢 又戰雄武軍,殺 即遣軍司馬韓 色; 處 攻

之,復取易州

全忠遁還,盡失芻糧仗鎧,懼得罪,乃哀餘衆反攻幽州,可舉度不支,引其族

登樓自燔

死。

爲留後。 蘆 ,茅類,生於澤,公茅土兆也。 |李全忠,范陽人。 仕爲||棣州司馬。 。光啓元年,拜節度使,未幾卒。 傳節者其三世乎?」罷歸,事可舉爲牙將。 有蘆生其室,一尺三節,怪之,以問別駕張建,建曰: 可舉死,衆推

歸,守雲州十五年。 |井陘,屯常山,大掠深、趙。||匡威以步騎萬餘援||王鎔,克用還,因急攻鐸。 會食盡,鐸棄州奔 伏河上。 譯以精騎追阿檀,抵河而伏起,乃大敗,禽其將賈塞兒,遂圍雲州,塹而守,分兵出 而朱全忠亦上言願協力,故張濬因請用兵矣。濬敗,克用攻雲州,以騎將薛阿檀爲前鋒,設 太原,爭雲、代。李克用使安金俊攻鐸,匡威救鐸,戰蔚州,射金俊殺之,乃共表請討沙陀, 子匡威嗣,領留後,進爲使。性豪爽,恃燕、蒯勁兵處,軒然有雄天下意。與赫連鐸共攻 克用取雲州,表石善友爲刺史。譯本吐谷渾部會也,開成中,其父率種人三千帳自 至是,失其地。

年,兵復出|井陘, 匡威自將援路, 將行, 置酒大會。 景福初,鎔誘太原將李存孝降之,克用怒,伐鎔。鎔來求救,匡威遣將赴之,克用去。明 其弟兵馬留後、檢校司徒匡籌妻張,國

豔,匡威酒酣,報之,弟怒,匡威軍次博野, 乃據城自爲留後。 天子卽授檢校太保,

度使。

|鎭軍 浮屠 危懼 忠於王氏、皆惡之。 ()顧望流涕,美其山川,乃共圖鎔。 , 傳言金頭王且來, 皆亡竄山谷。 匡威親忌日,鎔過慰。 陽爲鎔繕甲,治城塹,施授方略,陰施予,以傾士心。 抱貞還,而鎔已迎館于鎭。 匡威士衷甲劫鎔入牙城,戰不勝,鎮人斬匡 匡威引抱貞登城西大悲

威以徇。 匡籌表訴諸朝,傲暴盛罪,攻樂壽、武彊以報

得,皆吾之宗,無所悔,然其材恐不足以守。」果亡,而幽州地歸克用,以仁恭爲帥。 於居庸關。 車馬僮妓。 始,匡籌之奪也,燕人不以爲義。 妻方乳,不能進,仁恭獲之,納于克用爲嬖夫人。始,匡威見逐,嘆曰:「兄失弟 李存審與戰,匡籌又敗,挈其族奔京師,次景城, 劉仁恭出奔太原,克用倚其謀,下武、嬀二州,敗匡籌 滄州節度使盧彥威殺之,掠入

「窟頭」,稍遷裨校。 劉仁恭,深州人。父晟,客范陽,爲李可舉新興鎭將,故仁恭事軍中。從李全忠攻易州 爲人豪縱,多智數,有大志,嘗自言:「夢大幡出指端,年四十九,當秉

旄節。」李匡威惡之,補景城令。

去。 田 會 宅, 三 籌奪地,故戍卒擁仁恭趨幽州, 仁恭與苻存審人城,封府庫以待。 會瀛 拜壽陽鎭將。 州亂,殺守吏,仁恭募士千人定其亂。 數以策干克用,請步騎一萬東取幽州 匡籌逆戰,敗之,遂以族奔太原。 克用悅,留仁恭守之,以親信分典其兵。 匡威復使將兵、戊蔚州、踰期未代,士皆怨。 且爲導。 克用攻匡籌, 匡籌遁 李克用待之甚厚,賜

言三十萬,南徇魏、鎭。 次 具州,屠之,清水爲不流 景、德三州地,用守文爲節度留後,請命於朝。昭宗怒,不與。會中人至,仁恭嫚謂曰:「旄 節吾自可爲,要假長安本色耳,何見拒邪?」由是兵益張,顯圖河北。悉幽、滄步騎十萬,聲 用以書讓之,仁恭乃慢罵,執其使,盡囚太原士之在滅者。 盧龍兵,仁恭以契丹解。 既與克用絕,則益募兵。光化初,使其子守文襲滄州,節度使盧彥威棄城走,遂有滄、 克用怒,自將往擊,不勝,師喪過半。 乾寧二年,克用擊王行瑜,表仁恭爲檢校司空、盧龍軍節度使。 又明年,克用復興其兵救朱瑄,仁恭不答,使者數十往,卒不出。克 仁恭獻馘於朱全忠,全忠表同中書門下平章事。 復以厚利誘克用麾下士,多亡歸 明年,克用攻魏州,

懦,當先破之,乃取魏。」守文與單可及精甲五萬,循淸水上。思安設伏,自引兵逆戰,僞不 羅紹 威求救於朱全忠,全忠使李思安、葛從周赴之,屯內黃。仁恭負疆,下令曰:「思安

邢、洛兵與魏將賀德倫等出館陶門,夜擊仁恭,破八屯。 守文躡北至內黃,思安整兵還擊守文,伏發,斬可及,獨守文挺逸,衆無還者。 仁恭走,自魏抵長河數百里,尸蔽 從周 興

道。鎭人邀敗之東境。仁恭遂衰。

仁恭求戰,不許,復從克用乞師,使百輩往,乃許。仁恭以兵三萬合攻潞州,降全忠將丁會, 滄州園乃解。 「一心事主」,盧龍閭里爲空,得衆二十萬,屯瓦橋。 自將攻滄州,壁長蘆。 於克用求救,克用爲侵邢、洺。俄而全忠取瀛、莫,克用使周德威出飛狐。 三年,葛從周攻滄州,仁恭壁乾寧。從周潛軍戰老鵐隄,仁恭敗,退壁瓦橋, 仁恭悉發男子十五以上爲兵,湟其面曰「定霸都」,士人則湟于臂曰 全忠環滄築而溝之,內外授絕,人相食。 天祐三年,全忠 卑辭歸窮

南方茶,自擷山爲茶,號山日大恩,以邀利。 大安山,掠子女充之。又招浮屠,與講法。 是時,中原方多故,仁恭得倚燕彊且遠,無所憚,意自滿。 以堇土爲錢,斂眞錢,穴山藏之,殺匠滅口。 從方士王若訥學長年,築館 禁

守光引兵出戰,思安去、因回攻大安,虜仁恭,囚別室,殺左右婢媵,遂有盧龍。 子守光烝嬖妾,事覺,仁恭謫之。李思安來攻,屯石子河。 仁恭居大安山, 城中無備。

得幽州,朱氏無遺種,其禍與泚鉤,而族夷有先後爲間也。 贊曰:朱滔脅其兄泚入朝,及引兵東嚮,稱帝以自尊,名雖助泚,志可知矣。

書卷二百一十三

列傳第一百三十八

藩鎭淄靑橫海

李正己 納 師古 師道 程日華 懷直 懷信 權 李全略 同捷

士皆牆立觀,約日:「後者批之。」旣逐而先,正己批其頰,回紇矢液流離,衆軍哄然笑。 酋大 應中,以軍候從討史朝義。時回紇恃功横,諸軍莫敢抗。 李正己,高麗人。爲營州副將,從侯希逸入靑州,希逸母即其姑,故薦爲折衝都尉。 正已欲以氣折之,與大角角逐,衆

慚,自是沮憚不敢暴。

出之,有韶代爲節度使。本名懷玉,至是賜今名,遂有淄、凊、齊、海、登、萊、沂、密、德、棣十 希逸以爲兵馬使,沈毅得衆心,然陰忌之,因事解其職。 列 傳 第一百三十八 橫 軍中皆言不當廢,尋逐希逸 五九八九

藩

鎭 溫 青

海

州 酷,在所不]復取 興 田 曹 承 敢偶語,威震鄰境。 濮、徐、克、卿, 嗣 薛嵩 李寶臣、梁崇義輔牙相倚。 凡十有五 歷檢校司空, 州 市渤 加同中書門下 海 名馬,歲不絕,賦 嵩死,李靈耀 卒 章 事 反, 繇 諸道攻之, 均約, 以司 號最 徒兼太子 共 噩 (披其 大。 太保 政令嚴 地。 正

納 扼 順命, 江 建中 詔 初,聞城汴州 贈太尉。 天子於是改運道,檄天下兵爲守備, ? 乃約 田悅、梁崇義、李惟 河南騒然。 岳 偕 叛。 自屯 會發疽死, 年四十九。 濟陰 , 陳兵按習 益 師 徐州以

饒陽郡王

請附屬籍,許之。

因徙治鄆,以子納及腹心將守諸

州

|己署爲||淄、||靑二州刺史,又爲行軍司馬,|濮||徐||兗||沂||海留後,進御史大夫。 納 少時爲奉禮郎,將兵防秋。 代宗召見,擢殿中丞, 賜金紫。入朝, 擢兼侍御史。

款, 中人宋鳳朝以納窮 玄佐進圍之,殘其郛。 |納患消背已,且徐險集,悉兵攻消。 收洹水。 正己死,秘喪不發,以兵會田悅于濮陽。 德宗詔諸軍合討,其從父洧以徐州歸,大將李士眞以德州、李長卿以棣州送 欲立功, 納登陴見玄佐、泣 建不可赦, 帝命宣武劉玄佐督諸軍進援,大破其兵。納還濮陽 且悔, 帝乃械說等禁中。 馬燧方擊悅,納使大將衞俊救之,爲燧所破 造判官房說與子弟質京師,因玄佐謝罪。 納於是還軍, 與悅、 李希烈、 略

朱滔、王武俊連和,自稱齊王,置百官。

平章事, 封隴 司 徒。 興元初,帝下詔罪己,納復歸命,授檢校工部尚書,復平盧帥節,賜鐵券,又同中書門下 死年三十四,贈太傅。 西郡王。希烈圍陳州,納會諸軍破之城下,加檢校司空,實封五百戶,進檢校 子師古、師道

武俊子士清兵先濟滴河, 武俊患之。 德、 棣入王武俊, 納乃築壘德州南, 跨河以守蛤蟆,謂之三汊, 通魏博以交田緒, 盗掠德州 三汊聽命。 棣州有蛤嵥鹽池,歲產鹽數十萬斛。 師古, 以蔭累署青州刺史。 師古始襲,武俊易其弱,且納時將無在,乃率兵取蛤蟆、三汊。師古使趙鎬拒戰, 會營中火起,士大譟不敢前。 納死,軍中請嗣帥,詔起爲右金吾衞大將軍、本軍節度使。 李長卿以州入朱滔,獨蛤蠑爲納所據以專利。 德宗遣使者諭武俊罷兵。 師古亦隳

以 國 爲夫人,進同中書門下平章事 嘗怒其僚獨孤造,使奏事京師,遣大將王濟縊殺之。 貞元末,與杜佑、李欒皆得封妾媵

士告:「元素僞作遺韶,豈欲反邪?不可不討! 德宗 崩,哀使未至,義成節度使李元素騰遺韶示之。 · 」執使者,名討元素,勒兵出次,聞順宗立,乃 師古幸國喪,欲攻掠州縣,即集將

列傳

第

百三十八

瀊

鎭

淄青横海

罷。累加檢校司徒、兼侍中。|元和初卒,贈太傅。

後。 朝。 朝者厚納之。以嚴法持下,凡所付遣,必質其妻子;有謀順者,類夷其家。以故能脅汙士衆, 道邪?彼不服戎,以技自尙,慮覆吾宗,公等審計之。」及死,沐、公度與家奴卒立之,而請于 傳三世云 杜黃裳欲橈削其權,而憲宗方誅劉闢,未皇東討,故命建王審領節度大使,而以師道 召親近高沐、李公度等曰:「卽我不諱,欲以誰嗣?」二人未對。 師古曰:「豈以人情屬師 歲中,加檢校工部尙書,爲副大使。自正已以來,雖外奉王命,而嘯引亡叛, 於是制書久不下,師道謀哀兵守境,沐爭止,更上書奉兩稅,守鹽法,請吏朝廷。 師道 ,異母弟也。 師古嘗曰:「是不更民間疾苦,要令知衣食所從。」乃署知密州。 有得罪于 宰相 師古 知留

兵,是不用師,蔡圍解矣。,乃使人殺元衡、傷裴度。 朝廷救腹心疾,此解察一奇也。」師道乃遣客燒河陰漕院錢三十萬緡,米數萬斛,倉百 又有說師道曰:「上雖志討察,謀皆出宰相,而武元衡得君,願爲袁盎事,後宰相必懼,請罷 命少年爲師道計曰:「河陰者,江、准委翰,河南,帝都,請燒河陰敖庫,募洛壯士劫宮闕,即 帝討察,詔興諸道兵而不及鄭,師道選卒二千抵壽唐,陽言爲王師助,實欲援察也。 l 餘 區。

守、防禦將、都亭驛史數十人,皆陰受師道署職,使爲酮察,故無知者。及窮治,嘉珍、察乃 .者,年八十餘,嘗爲史思明將,驍悍絕倫。 旣執,力士椎其脛,不能折,駡曰:「豎子,折人脚 以兵掩邸,賊突出,轉略畿部,入山中數月,奪山棚所市,山棚怒,道官軍襲擊,盡殺之。圓靜 害武元衡者。鹽鐵使王播又得嘉珍所藏弓材五千,幷斷建陵戟四十七。 且不能,乃曰健兒!」因自置其足折之。且死,歎曰:「敗吾事,不得見洛城流血!」於時, 屠圓靜爲之謀。元和十年,大饗士邸中,椎牛釃酒,旣衷甲矣,其徒白官發之。留守呂元 初 ,師道置邸康都,多買田伊闕、陸渾間,以舍山棚,遣將訾嘉珍、門察部分之,嵩山浮 膺

殺晏平。 濟暴師數萬,而晏然居內,與妻妾戲博,必敗之道也。師道本倚察爲重,聞之怒,乃以它事 撫之,加檢校司空。 始,師道欲知元濟虛實,使劉晏平間道走淮西。元濟日與宴,厚結歡。晏平歸,以爲元 及聞李光顏拔凌雲栅,始大懼,遣使歸順,帝重分兵支兩寇,故命給事中柳公綽慰

三州,遣子弘方入侍。 百年天子,不屈三也。今反狀已暴,上猶許內省,宜遣子入宿衞,割地以贖罪。」師道乃納 叔父矣,不屈一也。 察平, 又遣 比部員外與張宿諷令割地質子。宿謂曰:「公今歸國爲宗姓,以尊卑論之, 以十二州事三百餘州天子,北面稱藩,不屈二也。以五十年傳爵,臣 宿既還,師道中悔,召諸將議,皆曰:「際數州 戰三四年乃克,公今

列傳

第

百三十八

藩鎭淄青橫海

朝廷以 十二州 漿十餅誘之去矣。」師道恚,遣承度詣京師,戒候吏時其還斬之。 何所 虞?」大將崔承度獨進曰:「公初不示諸將腹心,而今委以兵,此皆嗜利者, 承度待命客省,

不敢還

李光 使田 度使韓弘拔考城。淮南節度使李夷簡命李聽趨海州,下沭陽、朐山,進戍東海。 怒,下韶削其官,韶諸軍進討。 之,何也?願得要言奏天子。」師道許之,然懦暗不自決。 及李祐 千,略地至平陰。 何一旦割之?今不獻三州,不過戰耳,卽不勝,割地未晚。」師道乃上書,以軍不協爲解。 弘正身將兵自陽劉濟河,拒鄆四十里而營,再接戰,破三萬衆,禽三千人。 帝以其負約,用左散騎常侍李遜喩旨。 取金鄉,左右莫敢白 攻濮陽,收斗門、杜莊二屯。弘正又戰東阿,殘其衆五萬。 橫海節度使鄭權戰福城,斬五 武寧節度使李愿使將王智興破其衆,斬二千級, 既至,師道嚴兵以見,遜讓曰:「前已約,而今背 一百級。 武寧將李祐戰魚臺,敗之。 私奴婢媪爭言:「先司徒土 師道每聞敗,輒悸成疾, 陳許節度使 魏博節 獲馬牛四 宣武節 一地,奈 度

許,復請送京師,悟使謂曰:「司空今爲囚,何面目見天子!」 猶俯仰祈哀,弘方曰:「不若速 [其嫂|裴曰:「悟兵反,將求爲民,守墳墓。」 即與弘方匿溷間,兵就禽之。 () 遣大將劉悟屯陽穀,當魏博軍,疑其逗留,悟懼不免,引兵反攻城。 師道請見悟,不 師道晨起聞之,

死 」乃幷斬之,傳首京師。 棄其尸,無敢收視者, 有士英秀爲殯城左。 馬摠至,

更多

是悟得行其謀。師道首傳弘正營,召澄驗之,澄舐目中塵,號絕良久。悟素與師道妻魏亂,妄 四 言鄭公徵之裔,不死,沒入掖廷,它宗屬悉遠徙。 |承慶,承宗弟也,師道以兄女妻之,潛約左右,欲因肄兵執師道,會悟入,出奔徐州, 十七人,有詔悉赦之,給繒絮,還隸魏博、義成軍,父母在欲還者優遣,賊皆感慰相告, 初,師古見劉悟,曰:「後必貴,然敗吾家者此人也。」田弘正之度河也,禽其將夏侯澄等 悟獨表師古子明安爲朗州司戶參軍。親將 由

殺固 定州 悉帑以行,軍中怒曰:「馬瘠,士飢死,刺史不棄豪髮卹吾急,今刮 孝忠亦以日華寬厚,遂假以 刺 烈 程 削 史,故日華籍本軍,爲張孝忠牙將。 日 屠其家。 華,定州安喜人,始名華,德宗以其有功,益曰日華。父元皓爲安祿山帳下,僞署 刺史李固烈與惟岳姻屬,即牢守。 日華驚匿牀下,將士迎出之曰:「暴吾軍者已死,何畏而亡?」 共逼領州。 刺 史。 滄,故成德部州也, 孝忠令日華往喻之, 孝忠絕李惟岳,德宗以滄界 地以去,吾等何望? 固烈請還恆州。 旣治裝, 」遂共

列

傳第

五

華 糧數萬 史,復置橫海軍,即以爲使,時建中三年也。 拜檢校工部尙書。 君能用僕計,請至京師爲天子言之。」日華謂然,乃遣字西,帝果大喜,拜御史中丞、滄州刺 軍本號橫海,將軍能絕易定歸天子,自爲一州,敕甲訓兵,利則出, 乘 朱滔 城自固。 斛 一级,兵屯河間,以故滄、定道阻不相聞。 滔及王武俊皆招日華 以字爲判官。 參軍事李宇謀曰:「城久圍,府兵不爲援。 今州七縣瀕海,有魚鹽利自給,此 詔滄歲饋養武錢十二萬緡, 無利則守, 不納, 可亢盜喉襟。 即攻之。

怨,乃 贈兵部尚書。 抗 贼,贼退, 武 咔 俊欲 久之,武俊歸命, 海滄 請 以地授公。」 ,遣人說日華歸己, 武俊喜,歸之馬,日華留馬謝其使。 日華乃還馬,以珍幣厚謝,復結好, 日華紿曰:「敝邑爲賊攻,力屈則下之。 武俊亦釋然。 武俊大怒,與滔方睦, 願假騎二百以 貞元二年卒, 懼有

州 擢 懷直 且請刺史。 一爲留後。 懷直擅 河朔刺 知留事,帝以日華故,卽拜權知滄州刺史。 明年,爲節度使。九年來朝,寵遇加等,進檢校尙書右僕射,賜大第、宮女。 史不廷授幾三十年,帝嘉其忠,以徐申爲景州 宇入朝,願析東光、景城二縣置景 刺史。昇横海軍 爲節度,

懷直荒田獵,出輒數日不返,帳下程懷信乘衆怒,閉門不納。

懷信,其從昆也。

於是懷

直入朝,帝不之罪,更以虔王爲節度使,擢懷信留後,以懷直兼右龍武軍統軍。 明年, 懷信

爲節度矣。 一十六年,懷直卒,贈揚州大都督。

鄭權代之。後以檢校司空爲哪寧節度使。卒,贈司徒,宗族奉朝請宿衞者三十餘人。 署「權」字,乃改名以應之。及淮西平,惕不安,丐入朝。至京師,固辭軍政,乃詔華州刺史 封邢國公。六年入朝,憲宗寵禮遣還鎮,加檢校尙書右僕射。 後五年,懷信死,子權襲領軍務,詔授留後。 元和元年,拜節度使,累進檢校兵部尙書, 權始名執恭,嘗夢滄諸門悉

以報,遂授德州刺史。是時,杜叔良兵敗博野,故以全略爲橫海軍節度、滄德棣州觀察使, 不得已,可其請。 賜今姓名。 田弘正遇害,穆宗以全略故鎭州將,召問所欲言,全略多陳利害,冀合帝意, 李全略,本王氏,名日簡,事王武俊爲偏裨。 未幾,貢錢千萬,使子同捷入朝。 全略陰規傳久計,選材武,以所私結士心。 既還,即奏同捷爲滄州長史,押中軍兵馬。 承宗時,虐用其軍,故入朝,授代州刺史。 棣州刺史王稷善撫衆,而家富 且請盡死力

未幾死,同捷領留後事,重路鄰藩,求領父節,敬宗持久詔不下。 三 十 脊 横 海 俄而文宗立, 同捷以 于財,全略內忌,以計殺之,族其家

列 傳

第

百

入

審 鈲 湽

成德 淮 月 諸 進 誠 餰 帝 朝 討 令 重 度 新 其將張 有舊 使 滄州 大 嗣 、將傳 憲誠 以 位 王 廷 烏 必 乃傾玉 叔 湊 手詔 智興 重胤 大 連 本関 開 降。 入于軍 及汴滑 帛 代之。 貸 横海 宗四 子女 始, , 方, 李聽 市 同捷 刺 欲 |同 乘其隙 史欒濛以 河 捷 乃遣 北 、平盧 不受, 計 窮 = 弟 取 鎭 同志、 矯言 康志睦、 |德、 河捷 之, 驩 棣 引軍 軍 同巽 叛 載 民多奔入鄲。 中留己。 義 易定 來 密 入朝 不 援。 上 張 許 變, 璠 於是 智 絕 而 幽州 興 事 其交, 使其屬崔 乃下 文棣州 洩,), 王 李 智、 詔 執使者并所 載義 爲所害 興 削官 長 請 火譙 以兵 奉 以全 爵 表 FJ, 傳境。 贈 請 命 軍 遣 工 命, 引 重胤 出 部 奴 水 討 尙 婢 有 同 灌 率軍 書 魏 兀 捷 詔 城 自 博 拜 + 以 齊 兗 七 智 凡 史 海 賏 憲 興 兵

奔 堅 智 將 延湊 陵 壓 興 又 多張 一務農 將 是 斬 诗 李君謀以 同 (俘首 同捷 捷 帝 非被襲, 絕王 使其 以冒賞。 益 輕 一急,乞降, 一廷凑 兵絕 勿決 下傳首京 (朝貢, 戦。 河, 自重胤 酤 夜殘 師 疑 且討之,兵須 而 卒後, 其 祐 無棣 詐。 兵已 詔貸 李寰、傅良 薄 降饒安 四 誉 徳州 州 引 (夥繁, 兵 年租 壁 直 帝遣 調發 五 丽 入 賦 城 千 不 諫 終事 兵。 不 赦 議 取 時 同捷母并妻息, 同 大 明年, ,更以 , 大夫相 捷 始 置供 及 家 献 左 耆 金. 軍 言 拔 屬 慰。 無 吾 糧 馴 棣、 衞 料 西 徙湖南 使, 庙 大 平原。 攻拔 將軍 陆 以 濟 滄州 徳州 李祐 有詔 流崔長 兩 河 代 行 |耆 餘 卒 營 丽 諸

州

同巽等以異母貸死,得隨母流所云

唐書卷二百一十四

列傳第一百三十九

藩鎭宣武彰義澤潞

劉玄佐 鄧惟恭 吳少誠 少陽 元濟 李祐 劉悟 從諫 稹 李佐之

李師晦 李丕

稍爲牙將。 劉玄佐,滑州匡城人。少倜夢,不自業,爲縣捕盜,犯法,吏笞辱幾死,乃亡命從永平軍, 大曆中,李靈耀據汴州反,玄佐乘其無備,襲取宋州,有韶以州遂隸其軍,節度

使|李勉卽表署刺史。

列傳

第

百

三十九

番與宣武

彩霞翠

潞

之, 詔玄佐援洧,大破納兵,斬首萬餘級,東南饟漕乃通。 **德宗建中初,進兼御史中丞,充宋、亳、潁節度使。** 時李納叛, 進圍濮州 ,徇濮陽,皆下, 李洧以徐州歸, 再降其 |納急攻

五九九九九

守將,遂通濮陽津。 遷檢校兵部尚書、兼曹濮觀祭、淄青兗惲招討使、汴滑都統 副

乃詔 韶加汴宋節度使、陳州諸軍行營都統。 檢校尙書左僕射、同中書門下平章事。 李希烈之反,玄佐與李勉、陳少游、哥舒曜聯兵屯淮、汝,數困賊。帝在 | 玄佐本名||洽,至是賜名以尊寵之。 入朝,復兼||涇原、 希烈攻陳州,玄佐救之,希烈 走,遂進取汴州。 奉天, 垂意 關東,

四鎭

、北庭兵馬副

元帥,檢校司

徒。

佐自往 當 死,年五十八,贈太傅, 數教敕玄佐盡 後殺帥 納最憚之。 因以赡 爾。 性豪縱,輕財好厚賞,故下益困。汴自李忠臣以來,士卒驕,不能自還,至玄佐彌甚。其 長,大鈔劫,狃于利而然也。 軍。 大施金帛,於是將吏、商賈奔 而據案當之,可安乎?」玄佐 其權譎類若此。初,李納遣使至汴,玄佐盛飾女子進之,厚饋遺,皆得其陰謀,故 所寵 臣節。 |更張士南及假子樂士朝貲皆鉅萬,而||士朝私||玄佐嬖妾,懼事覺,耽||玄佐, 見縣令走廷中 諡日壯武。 走輸 感悟,故待下益加禮。 白事,退, 戒曰:「長吏恐懼卑甚。 玄佐貴,母尚在,賢婦人也。 金錢, 惟恐後。 十日, 玄佐敕止, 常月織絁 吾思而父吏於縣, 或傳佛軀汗流, 一端,示不忘本。 籍所入得互萬,

可乎?」監軍孟介、行軍盧瑗以爲便,乃拜凑爲節度使。 中匿喪俟代,帝亦爲隱。踰三日乃發喪。 使至, 帝問所欲立,曰:「陝號觀察使吳凑 至汜水,玄佐柩將遷,士請具禮,暖

議, 竇參曰:「汴人挾字納以邀命,若不許,勢且合,不可解。」 遂以 士寧爲左金吾衞將軍 金岸、浚儀令李邁,醢之,唯暖、介獲免。士寧乃出貯財分勞吏士。 ,衆皆怒。 陵晨,甲而譟,起玄佐子士寧於喪,使坐重楊,墨其衣,尊爲留後,殺大將曹 **介以聞**, 帝召宰相計

帝惡其專,亦賜士幹死。 始,玄佐養子士幹與士朝皆來京師,士幹知玄佐死無狀,遣奴持刀給爲弔,入殺士朝於 嗣節度。

厭苦不服。 手殺人杯案間;又疆烝父諸妾,逼吏民妻女亂之,或贏而觀;每畋獵,數日乃還。其下 |士寧未授詔時,私遣人結王武俊、劉濟、田緒等,諸鎭不直之,皆執其使。 而士寧忍暴,

京師、 衆二萬畋城南,未還,萬榮晨入府,召所留親兵告曰:「天子有詔召大夫,俾我代節度。 以獻。」士寧知衆不與,將五百騎出奔,次中牟,亡者已半,至東都,惟僮妾數十人從之。旣 錢三萬。」士皆拜。 大將|李萬榮者,故與|玄佐同里相善,寬厚得士心。|士寧|忌之,奪其兵,使攝州事。 韶就第,禁出 於是分兵閉諸門,使告土寧曰:「詔書召大夫,宜速去,不然,事急且 入。 萬榮斬其支附數十人,以二十萬緡勞軍,詔籍士寧家貲給之。 一傳首 拜萬

列傳第

百

三 十

九

審與宣武彰義睪瑙

榮兵馬留後。 斬之,以狀聞,故<u>士寧斥置郴州</u> 其妻子,以故衆不安,或呼於市曰:「大軍至,城且破。」萬榮捕按之,或言爲士寧所教, 萬榮 不許,使其子迺將,未行,彥琳等因其怨,誘使反攻萬榮,不勝,幼運財、民貲,殺掠數千人而 惟清奔鄭州,彥琳走東都自歸,有詔宥死竄惡地。殘士奔宋州,劉逸淮撫之,萬榮悉誅 於是籍驕兵數百人,悉遣西防秋,當戍者怨之。大校韓惟淸、張彥琳等請往,

京師,杖死京兆府,以董晉代之。 出大將李湛、張伾、伊婁兇等于外,欲殺之,不果。 俄進萬榮節度使。會病甚,以兵屬鄧惟恭。惟恭者,與萬榮同里閈。而署子迺爲司馬, 萬榮死,是夜惟恭與監軍俱文珍執迺送

死,推陳仙奇主後務,旣又殺之,衆乃共推少誠,德宗因授申、蔡、光等州節度觀察留後。 封通義郡王。 少誠爲治,能儉損,完軍實。自浠烈以來,申、蔡人劫於苛法而忘所歸,及耆長旣物故, 從入朝,道襄陽,度梁崇義必叛,密畫計,將獻天子,而李希烈以其事聞,有詔嘉美, 吳少誠,幽州潞人,以世廕爲諸王府戶曹參軍事。 崇義反,希烈以少誠爲前鋒。 事平,賜實封戶五十。 客荆南,節度使庾準器之,留爲牙門 希烈叛,少誠爲盡力,及 擢

則 厭 勝 壯 .者習見暴掠,恬於搏鬭。 三, 詛 主師。 其屬 鄭常、楊冀欲劫少誠,逐之以聽命,不克,常、冀被害。少誠盡宥諸將 地少馬、乘騾以戰、號「騾子軍」,尤悍銳。 甲皆畫雷公星文以

以結衆心。

貞元

五年,進拜節度使。

救之, 朗 所 冰 前 乘 處置使,上官稅副之,諸將皆受節度。 Ш 全義 營, ,禽其三將。 久之,曲環卒,少誠間陳許無帥,以兵攻臨潁, 悉爲賊俘,遂圍許州。 遂大潰。 全義懼 乃斬 旣戰小溵河,諸道 路將夏侯仲宣、滑將時昂、 全義 退保 王宗以壽州兵破賊於秋栅。 及監 陳 而潞、滑、河陽、河中兵逃歸,唯陳許將孟 軍賈英秀等夜遯保 師未交而潰,棄輜 德宗怒, 削少誠官爵, 合十六道兵進討。 于頔以襄陽兵戰吳房、 與賊 河陽將權文度、河中將郭湘、欲以振師,不能也。 一般水。 吳少陽等戰廣利 仗不貲。 於時師雖衆,無統帥 戍將韋淸與賊通, 汴宋、徐泗、淄青兵走陳州 帝 乃詔 城 夏州節度使韓全義爲准蔡 ,師復敗, 元陽、神策將 ",而宦 留後上官兇遣兵三千 人監軍 退營五樓,爲 蘇光榮壁艘 顓 少誠 進退,互 薄 賊 招 般

相買耽 女爲 全義 **%婢媵。**」 日:「五 之敗, 樓 以激怒其衆, 少誠 軍 退 一,而少 得帳中諸公書數 誠卷甲不追 絕向 順 意 (百番, 少誠 ,有自新路。」 帝意稍挺, 弱王 持以紿衆曰:「朝廷公卿託 師 移書: 於英秀 少誠復固巢穴矣。 水昭 雪。 全義破察日掠將士 帝 召 大 臣 然循以 議,

誠引兵去

列

傳

第

百

Ξ

+

九

藩

鎭

宜

武彰

義澤

潞

洗,罷兩河諸軍,亦其次也。使少誠禍盈惡周,變生帳下,必其賊黨,又當以官爵與之,則一 少誠死,一少誠生,亦何足賴?」帝遂赦少誠,盡還其官爵。 老,更求其次,則臣請以銳士萬人順流趨荆、楚,可以攘翦元憝。 不然,因其請罪,特加原 宦者監諸道軍。 劍南韋皋上言,以爲不如擇重臣爲統帥,因薦渾瑊、 賈耽,「陛下若重煩元

吳少陽代之。 順宗卽位,進同中書門下平章事,檢校司空,徙封濮陽郡王。 元和四年死, 贈司徒, 而

爲弟,署右職,親近無間。少陽度少誠猜忍,且畏禍,請爲外捍,少誠乃表爲申州刺史。爲治尙 自稱留後。憲宗以王承宗方叛,故詔遂王爲節度使,以少陽領留後。居三年,進拜節度使。 寬易,舉軍附賴。少誠病亟,家奴單于熊兒矯召少陽至,攝副使,總軍事,於是殺少誠子元慶, 少陽者,滄州淸池人。與少誠同在魏博軍,相友善。少誠得淮西,多出金帛邀之,養以

少陽不立繇役籍,隨日賦斂於人。 地多原澤,益畜馬。 時時掠壽州茶山,劫商賈、招四

方亡命,以實其軍。 不肯朝,然屢獻牧馬以自解,帝亦因善之。

九年死,子|元濟匿不發喪,以病聞,僞表請|元濟主兵。 帝遣太醫往視,即陽言少愈,不

元濟者,其長子也,山首燕頷,垂頤, 鼻長六寸。 始仕試協律郎, 攝蔡州刺 史。 有董 重

質者 **衡、黔、巫傳一矢可定,五嶺非朝廷所有。** 州,東約李師道以舟師襲潤州,據之;遣奇兵掩商、鄧,取嚴緩,進守襄陽,以搖東南,則荆、 ,少誠壻也,勇悍,久將,善爲兵,元濟倚之,因說元濟,請以精兵三千由壽之間道 又請輕兵五百,自崿領三日襲東都,則天下騷動, 取揚

可以横行。元濟獨豫不能用。

增戍以須變。 相李吉甫,具言淮西事,且請察使在道者,隨在所繫之。少陽死四十日, 囚惟清。 先是,其屬蘇兆、楊元卿、侯惟淸嘗勸少陽入朝,或言其有異志,元濟縊兆,歸其屍,而 帝以二人者皆死,故贈惟淸兵部尚書,兆尚書右僕射。時元卿奏事在長安,見宰 帝不爲輟朝,易將

光、 爲之副,以戍襄城;李光顏爲忠武節度使,總兵臨屯;析山南東道, 里,關東大恐。弔使至,弗克入而還。乃詔烏重胤兼汝州刺史,引軍壓其境,寧州刺史曹華 不得命,乃悉兵四出,焚舞陽及葉,掠襄城、陽翟。 察等州招撫使,以中人崔潭峻監其軍。 會傳言重質殺元濟,族其家,吉甫因請爲少陽輟朝,遣使弔賻,贈尙書右僕射。 下詔奪元濟官爵,趣諸道進討。時大旱,詔旣 時許、汝居人皆竄伏榛莽間,剽係千餘 詔節度使嚴綬爲申 而元濟

列傳

第

百三十

九

番與宜

武彰義澤

潞

詔左金吾衞大將軍李文通宣慰,度其至,使代通 賊襲,敗于礠丘 雨 雪凡三 , 退保唐州 田 弘正、韓弘各遣子率兵隸綬、光顏軍。 壽州刺史令狐通戰數北,賊乃拔霍丘,屠馬塘,通嬰城不敢出。 |授屯察西鄙 , 師 小勝 不設 備、爲

高霞寓唐鄧隨節度使。 賊於時曲,復與重胤合擊賊小澱河,敗之,夷其屯塹。 雅丘間, 覽、趙曄、王仁淸等以便宜人自爲戰,抗王師,有少誠、少陽舊風。而李師道餽鹽,出入寧陵、 會裝度輔政,賊始懼,而元濟不能有所指授,諸將趙昌、凌朝江、董重質、李祐、李憲、王 ,韓弘知而不肯禁。文通引兵與賊將王覽、董重質戰史蔟岡,馘覽首。 天子責經失律,更以韓弘兼都統,擢 。光顏又大破

級,焚其壁,次鐵城。 賊僞奔,霞寓窮追,伏發,死傷略盡,退保新興,賊圍之,監軍李議誠馳 十一年,諸軍大合。 光顏 壁掌河; 文通 敗 賊於 固始,拔 皦山; 霞寓 戰 朗山, 斬首 千餘 以救兵至,圍解,還守唐州

待有功,斥金帛募死士。 所 與重胤合攻凌雲栅,拔之。 分兵 元濟以霞寓敗,不足虞,倂兵以備陳。 其秋,文通以兵銜枚夜出九女原,屠保壁三十 西北並安陽山,破屯邏數百人,降者萬餘,執兩將。 進拜光顏檢校尚書左僕射,重胤右僕射,你御史中丞,公武御史大 帝怒諸軍無大功,韶內常侍梁守謙宣 光顔 一慰,因督戰,付詔書五百以 敗郾城兵二萬,俘六將,復

詔旨約束,厲賞罰,諸將恐懼。 貶[霞寓,以袁滋代之。| 滋懦不能軍,更以李愬爲唐]鄧隨

北闕下,帝遣使者許以不死。 甲三萬首,伯良奔還蔡。 所,執丁士良、吳秀琳,皆賊票健者。賊帥張伯良以兵三萬與光顏戰郾城,大敗。獲馬千匹、 又襲破朗山,執戍將梁希果,平汝港等三屋。 不復禁,諸將爭納之。 元濟食盡,士卒食菱芡魚鼈皆竭,至斵草根以給者。民苦飢,相與四潰,元濟亦嗇其食, 帝始僑置郾城、吳房於行營,以綏新附。 曹華取靑陵城,斷鄽歸路。賊將鄧懷金懼,即送款,光顏受之。 元濟取行營馬三百,董重質不與,故不果降。 元濟知衆數潰,而外失秀琳等,因奉表請東身 | 惣引兵攻其西,破屯栅十餘 | 惣略興橋,得守 |惣

兵皆在外,若直擣縣瓠,賊成禽矣。」愬然之,以精騎夜襲察,坎垣入之,戍者不知也。 賊恃 劫,不得降。 立功,諸將亟戰,不勝。 度至,大勞將士,皆感激請戰。 間遣士入察,約元濟降,爲左右所 陀梟騎濟師,命裴度爲彰義節度兼申、光、蔡四面行營招撫使。 陂寖重阻,故合天下兵攻之,三年纔克一二縣。帝旣責罷霞萬、滋等,諸將乃用命。 自少誠盜有蔡四十年,王師未嘗傅城下,又嘗敗韓全義、于頔,以是兵驕無所憚, 光顏每戰冠軍,故元濟悉衆亢時曲。 梁守謙與諸將計,先度未至 韶起沙 內恃

列

百三十

九

潛

鎭寬

武彰義澤潞

董重質兵在洄曲,不虞師之至,及懲攻內城,防卒尚千餘接戰,元濟始驚,被甲乘城以待重 城上鏃可拾也。居二日,門壞,執元濟,舉族傳之長安。 申、光戍兵尙三萬,皆降 會重質降愬,而李進誠取賊庫兵,即攻之。明日,燒其門,民相率抱薪增火,王師縱射,

沒入掖庭,二弟、三男子流江陵,皆殺之。斬其屬官劉協庶、趙曄、王仁淸等十餘人。 度還, 帝御興安門受俘,羣臣稱賀,以元濟獻廟社,徇于市斬之,年二十五。 夜失其首。

以馬摠爲留後,俄拜節度使,析溵州隸陳許。

郊廟! 魏、博、貝、衞、澶、相,無不從志。 朝,乃考圖數頁,曰:「嗚呼!天旣全付予有家,今傳次在予,予不能事 適去,莨莠不薅,相臣將臣,文恬武嬉,習熟見聞,以爲當然。 受報收功,極熾而豐,物衆地大,孽牙其間。 州 始度之出,太子右庶子韓愈爲行軍司馬,帝美度功,卽命愈爲平淮西碑,其文曰: ,罔有內外,悉主悉臣。 天以唐克肖其德,聖子神孫,繼繼承承,於千萬年,敬戒不怠,全付所覆,四海九 」羣臣 [震懾走職 。 明年 高祖、太宗,既除既治。 一,平蜀。 皇帝曰:「不可究武,予其少息。」 又明年,平江東。 肅宗、代宗,德祖、順考,以勤以容。 高宗、中、睿,休養生息。 又明年,平澤潞,遂定易定,致 睿聖文武皇帝旣受羣臣 事 了,其何以見于 至于玄宗, 大慝

九年,蔡將死,蔡人立其子元濟以請,不許,遂燒舞陽,犯葉、襄城,以動東都,放兵

無憚大吏。庚申,予其臨門送汝。」曰:「御史,予閔士大夫戰甚苦,自今以往,非郊廟 既厥事,遂生察人。賜汝節斧、通天御帶、衞卒三百。凡茲廷臣,汝擇自從,惟其賢能, |謙,汝出入左右,汝惟近臣,其往撫師。」曰:「度,汝其往,衣服飮愈予士,無寒無飢,以 守壽,維是宣武、淮南、宣歙、浙西、徐泗五軍之行于壽者,汝皆將之。」曰:「道古,汝其 七軍之在行者,汝皆將之。」曰:「弘,汝以卒萬二千屬而子公武往討之。」曰:「文通,汝 將之。」曰:「重胤,汝故有河陽、懷,今益以汝,維是朔方、義成、陝、益、鳳翔、鄜延、寧慶 樹本堅,兵利卒頑,不與它等。因撫而有,順且無事。」大官臆決唱聲,萬口和附,丼爲 四劫。皇帝歷問于朝,一二臣外,皆曰:「蔡帥之不廷授,于今五十年,傳三姓四將,其 祀,無用樂。」 二臣同,不爲無助。」曰:「光顏,汝爲陳許帥,維是河東、魏博、郃陽三軍之在行者,汝皆 「度,惟汝予同,汝遂相予,以賞罰用命不用命。」曰:「弘,汝其以節都統諸軍。」曰:「守 一談,牢不可破。皇帝曰:「惟天惟祖宗所以付任予者,庶其在此,予何敢不力!况一

戰,降萬三千,再入申,破其外城。文通戰其東,十餘遇,降萬三千。檄入其西,得賊將, 傳第一百三十九 **颜、胤、武合攻其北,大戰十六,得栅城縣二十三,降人卒四萬。 道古攻其東南,八** 藩 頻宜武彰義睪酚 六〇〇九

命赦其人。 樂爲兵願歸爲農者十九,悉縱之。斬元濟京師。 二十里,用夜半到蔡,破其門,取元濟以獻,盡得其屬人卒。辛巳,丞相度入蔡,以皇帝 輒釋不殺,用其策,戰比有功。十二年八月,丞相度至師,都統弘責戰益急,顏、胤、武戰 益用命。 元濟盡丼其衆洄曲以備。十月壬申, 惣用所得賊將, 自文城因天大雪疾馳百 准西平,大變資功。師還之日,因以其食賜察人。凡察卒三萬五千,其不

光祿大夫,以舊官相;而以其副揔爲工部尚書,領察任。 帥 脚坊丹延,道古進大夫,文通加散騎常侍,丞相度朝京師,進封晉國公,進階金紫 册 功: 弘加侍中; | 觀爲左僕射,帥山南東道;顏、胤皆加司空;公武以散騎常侍

旣 還奏,羣臣請紀聖功,被之金石。 皇帝以命臣愈,愈再拜稽首而獻文曰:

以車 利,內驚京師。 以爲彊 河南附起。 「惟汝文武,孰恤予家? ·,爲卒賜糧。 唐 承天命,遂臣萬方。 提兵 四 、叫讙,欲事故常。 聖 羣公上言:「莫若惠來。」帝爲不聞,與神爲謀。 及相同德,以訖天誅。 **乃** 不宥,屢興師征。 外多失朝,曠不岳狩。 一、既斬吳、蜀,旋取山東。 孰居近土, 始命討之,遂連姦鄰。 有不 能克, 襲盜以狂?往在玄宗, 百隸怠官,事亡其舊。 益戍以兵。 魏將首義,六州降從。 陰遣 夫耕 刺客, 不食, 崇極 帝時繼位, 來賊相臣。 后 圮。 婦織 准蔡 不裳。 顧瞻容嗟 河北悍驕, 不順, 方戰未 輸之 自

年,小大並疑。不赦不疑,由天子明。凡此察功,惟斷乃成。旣定]推察,四夷畢來。遂 我太平。」准察爲亂,天子伐之。旣伐而飢,天子活之。始議伐蔡,卿士莫隨。旣伐四 吭。凡叛有數,聲勢相倚。吾疆不支,汝弱奚恃?其告而長,而父而兄,奔走來階,同 人有言:「天子明聖,不順族誅,順保性命。汝不吾信,視此察方。孰爲不順,往斧其 人,以收餘憊。 選吏賜牛,敎而不稅。 蔡人有言:「始迷不知,今乃大覺,羞前之爲。」蔡 不往來。今相從戲,里門夜開。始時一人,進戰退戮。今眠而起,左後右粥。爲之擇 舞。|蔡之婦女,迎門笑語。|蔡人告飢,船栗往哺。|蔡人告寒,賜以繒布。始時|蔡人,禁 旣入而有,莫不順俟。帝有恩言,相度來宣:誅止其魁,釋于下人。察之卒夫,投甲呼 復屯相望。兵頓不勵,告功不時。帝哀征夫,命相往釐。士飽而歌,馬騰於槽。試之 倍之。嘗兵時曲,軍士蠢蠢。旣翦凌雲,蔡卒大窘。勝之邵陵,郾城來降。 敕顏、胤,愬、武、古、通:「咸統於弘,各奏汝功。」三方分攻,五萬其師。 大兵北乘,厥數 ,賊遇敗逃。 。盡抽其有,聚以防我。西師躍入,道無留者。頟頟蔡城,其疆千里。 。自夏及秋

| 蔡功居第一。| | 愬妻,唐安公主女也,出入禁中,訴|| 愈文不實。帝亦重牾武臣心,詔斵其文,更 愈以元濟之平,繇度能固天子意,得不赦,故諸將不敢首鼠,卒禽之,多歸度功,而懲特以入

開明堂,坐以治之。

列傳

第一百三十九

瀒

飯宜武彰義翠

路

命翰林學士段文昌爲之。

李祐 以功遷神武將軍,賜田宅米粟。 帝迹董重質教元濟亂、欲誅之、而李愬先許不死,

故貶春州司戶參軍,凌朝江潘州司戶參軍。

是歲,申、蔡州始輸貢物,戶部以其久不至,請元日陳於廷。

僕射。 左右神策劍南 重質之貶,未幾,轉太子少詹事,隸武寧軍,遷左神武將軍, 西川行營節度使,歷帥夏綏銀宥,訓兵有法,羌戎畏服。 討李同捷也,改滄德景節度,累檢校尚書左 **資金幣與功臣等。** 終右龍武統軍,贈尙 擢累

書右僕射。

其才,令將後軍,妻以從媦,歷牙門右職。 甚知,後從擊毬,軒然馳突,撞師古馬仆,師古恚,將斬之,悟盛氣以語觸師古,不慴,師古奇 用之。從惡少年殺人屠狗、豪橫犯法、繫河南獄、留守庫夏卿貸免。李師古厚幣迎之、始未 牙將,以罪奔路州。 劉悟,其祖正臣,平盧軍節度使,襲范陽不克,死。 王虔休復署爲將,被病去,還東都, 師道以軍用屈,率賈人錢爲助,命悟督之。悟獨 叔父全諒,節度宣武, 全諒積緡錢數百萬在焉,悟破縢鐍 器其敢毅,

寬 假,人皆歸賴。 師道 被討,使將兵屯曹,法一而信,士卒樂爲用,軍中刁斗不鳴。

悟 道幷大將魏銑等數十人。 恣 驅 悟 去,師道遣使兩輩來責戰,密語其副張遙使斬悟。 城下矣。」左右諫曰:「兵成敗未可知,殺大將, 爲 追說就 [取之,唯完軍帑,違者斬。」因遣報以正,使進兵
一方 因殺之,幷殺所惡三十人,尸帳前,衆畏伏。 乃斬使者,召諸將議曰:「魏博兵彊,出則敗,不出則死。 的 田 師道 死地,孰若還兵取軍立大功,轉危亡爲富貴乎?」衆皆唯唯, IE. 內疑 | 兵屯陽穀,悟徙營潭趙,魏師踰河取盧縣,壁阿井,城中飛語以謂馮利涉與悟當 ()數召悟計事,悟日:「今與魏 即拜悟義成節度使,封彭城郡王,實封戶五百 孰肯爲用?」師道然之。 如角力者,勢已交,先退者負。 下令曰:「入鄆,人賞錢十萬,聽復私 使者與暹屏語移時, 悟夜半薄西門, 且天子所誅,司空而已。 而別將趙垂棘沮其行 或言悟且亂,不如速 悟疑之,暹以情告, **邀明啓而入**, 悟還,魏 怨,財蓄 吾屬爲 殺師 踵 薄

謀 其亂 城 空死有知,使公所爲至此,軍中將復有如公者矣!」悟遽謝曰:「吾不欲聞李司空字,少選 [縛悟送京師,以問代節度 ,觀望久不拔,與監軍劉承偕不叶,衆辱悟,縱其下亂法, 元和十五 移守盧龍。 年 來朝,進檢校兵部尙書。 至那州 , 會王廷湊之變,不得入,還屯。 事。 悟知之,以兵圍監軍,殺小使。 穆宗立,徙昭義軍。 進兼幽、鎭招討使,治邢州。 悟不堪其忍。 朱克融亂, 其屬賈直 承偕 |言質責悟日:「李 議者假威名以厭 與都將張問 重 臨

列傳

绑

百三

-†-

九

藩鎮

宜武彰義

澤路

當定。」即撝 · 負罪亡命者多歸之, 彊列其冤。 兵退,匿承偕囚之。 帝重違其心,貶承偕,然悟自是頗專肆 累進檢校司徒、 同中書門下本章 天

嘔 血數斗,卒,贈太尉。 寶曆初,巫者妄言師道以兵屯瑠璃陂,悟惶恐,命禱祭,具千人膳,自往求哀。 表其子從諫嗣。 將易衣,

交通 事,起將作監主簿,檢校左散騎常侍。晉王帝所愛,從諫饋獻相望,未幾,拜節 沛國公。 初,李聽敗館陶,走淺口,從諫引鐵騎黃頭郎救之,聽免。 存,數月可覆。」時李逢吉、王守澄納其賂,數爲請,敬宗乃以晉王爲節度大使,詔從諫主留 若詔比鎭大將領節度,馳入軍,笮其未備,使軍情有屬, 謂上黨內鎮,與河朔異,不可許。 , 具知其陰密事, 悉疏于悟,故悟得立功。 從諫,母微賤,少狡獪。 師道時,使悟出屯,署從諫門下別奏。 左僕射李絳奏言:「悟匿死,衆不必同亂, 悟卒,從諫知留後, 謀自屈矣。 進檢校尙書左僕射,拜司空,封 持金幣路當權 從諫與師道諸 有如拒命,三州勢難獨 從諫威惠未著, 度使。 者。 奴日戲 大和 朝議 博

思立功。六年,請入朝,文宗待遇加等。 昭義自悟時治邢州,而人思上黨,從諫還治路。 明年,還藩,進同中書門下平章事。 悟苛擾,從諫寬厚,故下益附。 公卿多託以私 方年壯,

政 非其罪。 又見事柄不一,遂心輕朝廷,有驕色。 ()藉其論執以立權綱,中人憚而怨之。 從諫不平,三上書請王涯等罪,譏切中人。時宦豎得志,天子弱,鄭覃、李石新執 李訓約從諫誅鄭注,及甘露事,宰相皆夷族,傳言死 又劾奏蕭本非太后弟。 仇士良積怒,倡言從諫志

路州 窺伺。 夷三族,凡三百餘家。 貨銅鐵,收緡十萬。賈人子獻口馬金幣,卽署牙將,使行賈州縣,所在暴橫沓貪,責子貸錢, 軍者四十八人,從諫徙山東,懼其重遷且生變,而子弟亦豪縱,少從諫, 病,卒,年四十一,贈太傅。 不納,疑士良所沮,怒殺馬,益不平。 吏不應命,即愬于從諫。 性奢侈,飾居室興馬。 、牧津梁寺,地美水草,馬如鴨而健,世所謂津梁種者, 從諫亦妄言淸君側,因與朝廷猜貳。 姬妾有微過,輒殺之。人皆知其將亡。 欲論奏,或遣客游刺,故天下怨怒。 初,大將李萬江者,本退渾部,李抱玉送回紇,道太原,舉帳 無遠略,善貿易之算。徙長子道入路,歲権馬征商人,又熬鹽, 又聞士良寵方渥,愈憂惑,欲自入朝,恐不脫禍, 武宗立,兼太子太師 歲入馬價數百萬。 從諫畜馬高九尺,獻之帝,帝 不甚禮, 子弟姆婭隸 因誣其叛 從至 因被

一、劉武德、劉守義等佐稹。 從子櫃,父從素仕右驍衞將軍。 祕不發喪,協謀遣將姜岑請醫於朝。 從諫以爲嗣,病甚,與妻裴謀,令主軍事,置大將王協、 中人與醫至,時從諫死

傳第

百三十

九

番頭

宜

一武彰

養澤

潞

康邀 使。」諸將哄然笑,遂出見三 說,請如河朔故事 中 旬 ,人欲直入,武德等戶之,中人恐有變, 一數舍,衆懼,武德與將董 **稹曰:「公困革不任受詔,稹請代拜。」中人曰:「臥而視** 士康懦,不敢拒, 軍 可武出兵萬 乃至喪次,扶出稹,爲裹絁巾, 一趣出 人迎勞, 貺 饋 至牙門, 百 萬 後使 不得前。 可 也。 者繼往, 辭以 諸將 O. 爲 乃詣監軍 夫 知從諫 入侍, 崔

諭上旨,出山東兵,破之必矣。」有詔奪|從諫、旗官,敕諸軍進討 素書敕輝護喪還東都,種不奉韶。 帝怒前使者不入,謫隸恭陵 ; 種所遣姜岑、梁叔文、梁叔明三輩,皆杖死京兆府。 韶羣臣議, 李德裕建言:「稹所恃者, 河朔耳。 若遣大臣 韶從

內。」字疑不進,失期,茂卿扼腕悵恨。 偽挑戰,亟北,委天井關去,左右七營皆潰。 賊自潰去。 恩 成德王元逵次臨洺,略任、薨山、向城,河中陳夷行營冀城,侵冀氏。 ,爲賊將薛茂卿所破,執四將,火十七栅。 於是河陽王茂元以兵屯萬善,河東劉沔守昂車關,壁楡社,魏博何弘敬栅肥鄉,侵平 或言:「其兵 詔忠武王宰以本軍入懷澤行營,陳許士票武,賊衆素憚畏。 犯王略深,朝廷且怒,節益不可至。」履然之,故茂卿 種聞其貳,召誅之。 茂卿奔澤州,使諜言於宰曰:「澤可取, 張巨進攻萬善,不能下。 宰進破劉公直,拔陵川 大望,乃與宰通,卽 茂元欲走,會日暮, 而茂卿負戰勝,冀 茂元別遣將營天 吾應於 劉沔又

俄而太原將楊弁逐李石,與隨連和,隨諸將建議:「我求承襲,彼叛卒,若與之,是與反者。 之,帝怒,斥碣鄧城令,詔敢言罷兵者戮賊境。 取石會關。李石代河領河東,顧因石兄洺州刺史恬移書乞降,石以聞,右拾遺崔碣表請納 上令石答書許履面縛,石馳往受之,履不出。

溪所囚。 之,送款魏博軍。 志。 士幣布一端,櫃檄代歲稟。 | 釗謂衆曰:「庫物尙多,欲發以爲賞,可乎?」 士皆喜。 悉所有給 姓始怨。 械其使送京師, 使康良佺屯鼓腰嶺, 敗太原兵, 生禽卒七百。 府中財貨尚山積,而協請稅商人,使劉溪等分出檢實,而溪幷齊民閱其貲,十取二,百 始,從諫將死,命稹無答辱羣奴,故李士貴等與王協尤用事 問以爲言,溪大怒,問因殺溪,與刺史崔嘏斬大將,自歸成德軍。 從諫妻弟裴問守邢州,有募兵五百,號「夜飛將」,多豪姓子,其家以輸貲不時,爲 帝猶不赦。 ',士戰,有功不賞,下無鬭 王釗守洛州,給

宰,獻京師,告廟社,帝御興安門受之。劉公直亦降於宰。 斬首,悉取從諫子在襁褓者二十餘,并從子積、匡周等殺之。誅張谷、張沿、陳揚庭、李仲京 王渥、王羽、韓茂章、茂實、賈庠、郭台、甄戈十一族,夷之,軍中素不附者皆殺。函櫃首送王

顧聞三州降,大懼。 大將郭誼與王協始議圖櫃,使董可武誘櫃至北第,置酒,飮酣,卽

石雄以兵守境,軍大掠,誼移書責之,雄銜怒。 櫃之死, 誼斥從諫妻伏夾室,收其貲私

第

百三十

九

藩鎮宣

武彰義覃

雄戰,懼不敢降,自武鄉殺都將康良佺,欲降盧鈞;雄遣人召降,惟信殺之,卒降鈞。 道德、李佐堯、劉武德、董可武等送京師,並殊死。 於己,建大廢,日望旌 「從諫且死,乃署稱軍事,宜剖棺暴尸于市三日。」雌發視,面如生,一目尙開,雌三斬之,仇 人至矣!」從諫捕誅之,乃請詔雄率兵如數以入。 無以懲姦臣。 人剔其骨幾盡。 及兵在境,宜悉取逆黨送京師,論如法。」先是有狂人呼於路市曰:「石雄七千 節。 宰相德裕建言:「循庸下,亂繇誼始,及軍窮蹙,乃圖稱邀榮,不誅 杖崔士康殺之。白惟信者,路梟將,數與 雄至路,縛誼及王協、劉公直、安全慶、李

當三世爲都頭異姓。」河北謂都頭異姓,至貴稱也。「然窆過二丈不利。」 誼以岌假刺史,穿 三丈,得石蛇并三卵,工破之,皆流血。至是,誼及岌三子同誅。 **誼者,兗州人。兄岌,事悟爲牙將,常樂滏山秀峻,曰:「我死必葬此。」望氣者言:「其地**

嚴女爲侍人,號新聲。當從諫潛圖窺脅,新聲諫俗曰:「始天子以從諫爲節度,非有戰野攻 爲天子壽,左右皆無賴。 城之功,直以其父挈齊十二州還天子,去就間未能奪其嗣耳。自有澤路,未聞以 女手中,苟不以法得,亦宜以不法終。 張谷、張沿、陳揚庭皆有文,時時言古今成敗以佐從諫,故善遇此三人。 俗納邯鄲人李 章武朝,數鎭顕覆,皆雄才傑器,尚不能固天子恩,況從諫擢 君當脫族西去,大丈夫勿顧一飯恩,以骨肉腥健兄 縷 自兒

食。」言訖悲涕。浴不決者三月,畏言泄,縊之。

茂實,約之子。 李仲京,訓之兄,爲蕭洪府判官,擢監察御史。王渥,璠之子。 賈庠,餗子。 郭台,行餘子。 。甘露難作,皆羸服奔從諫,從諫衣食之。 王羽,涯族孫。 韓茂章、

爲逆旅上謁,留飮三日,乘間斬其首。 它日,又使取仇人,乃引不逞者十餘輩劫之。 從諫不 |甄戈者,頗任俠,從諫厚給卹,坐上座,自稱||荆卿。 從諫與定州戍將有嫌,命戊取之,因

悦,號「偽||期卿」。

|韋至京師,乃言:「|李丕降,|裴會大將妻號哭曰:『爲我語若夫,勿忘先公恩,願以子母託。』|諸 許婚。封燕國夫人。 室封者。君承朝廷姑息,宜自黜削,求洗濯,顧以婢爲夫人,族不日滅耳!」從諫赦然止。及 **父敞,冕之裔,辟悟府,悟奇之,故爲從諫納其女。 裴年十五,火光起袿下,家人以爲怪,因** 婦亦泣下,故潞諸將叛益堅。」由是及禍。 從諫妻襲,以弟立功,詔欲貸其死。刑部侍郞劉三復執不可,於是賜死,以尸還問。 寬厚有謀,每勸從諫入朝爲子孫計。從諫有妾庫願封夫人,許之,詔

公生直之。今鎭復至,當有災。」從諫卽徙軍山東,開毬場,鑿柳泉,大興役以厭。及病,有 初,術者李琢能言禍福,從諫以重幣邀,辟署大將。會昌初,謂從諫曰:「往歲長星經斗,

列傳第一百三十九

潛

銀宣武彰魏澤路

言琢所興造皆逆歲,疑有異謀,使稱數其罪殺之,府中恟恟,俄而李丕降。

東都。 使還東都,從諫雖不能從,然感服其言。病且革,王協等恐佐之妻母有所關說, 府支使,因娶其從祖妹。 有李佐之者,康孫也,累調河南尉,號彊直。 會佐之奴告佐之交通賓客,漏軍中虛實,積囚之。 從諫薄疏屬,資媵寒闕,佐之亦薄之,不甚答。 **嘗客潞,爲從諫所禮,留不得去,遂署觀察** 妻訴不見禮,頹遂殺之。 從諫病, 即輦母歸 佐之力諷

等所譖,請居涉,從諫不之疑。櫃敗,有爲帝言者,擢伊闕令,而贈薛茂卿博州刺史。 始悟辟致幕府,見從諫稍恣橫,假言求長生術,不與事。 初,又贈漢賓本縣令。 武鄉令唐漢賓,儉裔孫,以頹拒命,固諫歸朝,不聽,舉族見害。李師晦者,本宗室子, 從諫使歸東都,師晦懼爲俗、楊庭

出,乃用兵,大抵不半歲不能定,故警將逆子皆得爲之備。履初不意帝怒卽見討,及茂元錄 韶示)稱,舉族號慟,欲自歸,而愚懦不決云。 自悟至1種三世,凡二十六年。 先時, 河北諸將死,皆先遣使弔祭,次册贈,次近臣宣慰,度軍便宜乃與節,軍中不許

帝召見,擢忻州刺史。 入,以圖營壓處,遂自歸。。議者疑爲賊遣,德裕奏言:「討賊半年,始有降者,當賞以勸餘。」 |李丕者,善長短術,與||從諫厚善,署大將。及||旗阻命,軍中疾其才,||丕懼,乞爲游弈深 |丕請取檢社,東徑武安入討賊,雖|邢、|洺未下,而兵不得救路。 不聽。

潞

路,賊破矣。」乃趣不討戶,兵未至而戶已禽。 楊弁亂,遣人誘还,还斬之,以兵扼走集。 德裕言于帝曰:「度支戶部物積代州,今还寨其 遷汾、晉二州刺史。 大中初,拜振武節度使,

檢校刑部尙書。

党項叛,徙鄜坊,卒。

也。 奮,舉魏、趙、燕之地,莽爲盜區,挐叛百年,夷狄其人,而不能復。 昏上庸佐,惟不知盜故 引妖就暝,以奪厥明,寧蕭俛、崔植等謂耶 贊曰:慎稱:「作過者其知盜乎!」然則盜之情,非聖人不能知。 1 唐中衰, 姦雄 園睨

m

唐書卷二百一十五上

列傳第一百四十上

突厥上

有四:突厥、吐蕃、回鶻、雲南是也。 方其時,羣臣獻議盈廷,或聽或置,班然可睹也。 夷狄爲中國患,尙矣。在前世者,史家類能言之。唐興,蠻夷更盛衰,嘗與中國亢衡者

劉貺以為:

爲寇不能也,爲臣不得也。 之?荒服之外,聲敎所不逮,其叛不爲之勞師,其降不爲之釋備,嚴守禦,險走集,使其 嚴尤辯而未詳,班固詳而未盡,推其至當,周得上策,秦得其中,漢無策。 「惠此中夏,以綏四方」,周之道也,故曰周得上策。 何以言

燕、秦亦築長城限中外,益理城塹,城全國滅,人歸咎焉。 易稱:「王侯設險以固其國。」築長城,脩障塞,所以設險也。 後魏築長城,議者以爲人治 趙簡子起長城備胡,

六〇二三

列

百四四

十 上

突厥

上

步,方千里,役三十萬人,不旬朔而獲久逸,故曰秦得中策。

路。 於彼,無納女之辱,無傳送之勞。棄此而不爲,故曰漢無策。 哉!誠能移其財以賞戍卒,則民富,移其爵以餌守臣,則將良。 以征之;其服也,養之如初。 麥, 毁節異類, 垢辱甚矣。 漢之君臣, 莫之恥也。 魏、 晉羌狄居塞垣, 資奉踰昔。 **脋,千口之長,賜金印紫綬,食王侯之俸。 牧馬之童,乘羊之隸,齎毳毼邀利者,相錯於** 號,與胡媪並御;蒸母報子,從其汚俗。中國異於蠻夷者,有父子男女之別也。 冒頓 稱其來,不言往也。公及吳盟,諱而不書。奈何以天子之尊,與匈奴約爲兄弟, 人,降於沙漠。 遠徙,循襲奉春之過舉,傾府藏給西北,歲二億七十萬。皇室淑女,嬪於穹廬,掖庭良 耗華夏,連兵積年,故嚴尤以爲下策。 然而漢至昭、宣,武士練習,斥候精明,匈奴收迹 天下初定,紓歲月之禍耳。」武帝時,中國艾安,胡寇益希,疏而絕之,此其時也。方更糜 耒耨之利,絲枲所生,散於數萬里之外。 胡夷歲驕,華夏日蹙**。** 手弑其親,而冀其不與外祖爭彊,豈不惑哉?然則知和親非久安計而爲之者,以 漢以宗女嫁匈奴,而高祖亦審魯元不能止趙王之逆謀,謂能息匈奴之叛,非也。且 夫貢子女方物,臣僕之職也。 詩曰:「莫敢不來享,莫敢不來王。」 荒服 病則受養, 彊則內攻, 中國爲羌胡服役且千載, 富利歸於我,危亡移 方其彊也,竭人力 帝女之 百人之 婉冶之 可不悲

也。 秦亡,非攘狄也。 嚴尤謂古無上策, 漢得下策,謂伐胡而人病。人旣病矣,又役人而奉之,無策也。 謂不能臣妾之也。 秦無策, 謂攘狄而亡國

故日嚴尤辯而未詳也。

使不得還,衝以長戟,臨以彊弩,非求勝也,譬諸蟲豸虺蜴,何禮讓之接哉?故曰班固 華人步卒利險阻,虜人騎兵利平地,堅守無與追奔競逐,來則杜險使不得進,去則閉險 太官之珍,服以文綺羅紈,供之則增求,絕之則招怨,是飽豺狼以良肉,而縱其獵噬也。 坐於門外,舌人體委以食之,不使知馨香嘉味也。漢氏習玩驕虜,使其悅燕、趙之色,甘 麗外散,則戎羯之心生,戎羯之心生,則侵盜之本也。 班固 [謂「其來慕義,則接以禮讓」。何者?禮讓以交君子,非所以接禽獸夷狄也。纖 。聖人飮食聲樂不與之共,來朝

杜佑謂:

詳而未盡者,此也。

而人夥,誘三晉之人耕而優其田宅,復及子孫,使秦人應敵於外,非農與戰不得入官。 佐溱,以爲地利不盡,更以二百四十步爲畝,百畝給一夫。又以秦地曠而人寡,晉地狹 有兵革未寧,三紀矣。豈制置異術,古今殊時乎?周制,步百爲畝,畝百給一夫。商鞅 |秦以區區||關中滅六彊國,今竭萬方之財,上奉京師,外有犬戎憑陵,陷城數百,內 而已。 甚,誠能復兩渠之饒,誘農夫趣耕,擇險要,繕城壘,屯田蓄力,河、隴可復,豈唯自守 之南,終南之北, 舉國之衆,不過漢一大郡,鼂錯請備障塞,故北邊妥安。今潼關之西,隴山之東,鄜坊 |徽中,兩渠灌寖不過萬頃,大曆初,滅至六千畝。 畝朘一斛,歲少四五百萬斛。 地利耗, 人力散,欲求彊富,不可得也。漢時,長安北七百里即匈奴之地,侵掠未嘗暫息。 率百人纔十人爲農,餘皆習佗技。 又秦、漢鄭渠溉田四萬頃,白渠溉田四千五百頃,永 大率百人以五十人爲農,五十人習戰,故兵彊國富。其後仕宦途多,末業日滋。今大 十餘州之地,已數十萬家。吐蕃縣力薄材,食鮮藝拙,不及中國遠

至佑孫牧亦日:

哉?此賞厚之過,其敗三也。 多喪兵士,顚翻大都,則跳身而來,刺邦而去,迴視刀鋸、 封、凱還未歌、書品已崇、爵命極矣,田宮廣矣、金繒溢矣、子孫官矣、肯外死勤於我 此不實實之過,其敗二也。戰小勝則張皇其功,奔走獻狀以邀賞,或一日再賜,一月累 名,大將小裨操其餘贏,以虜壯爲幸,執兵者常少,糜食者常多,築壘未乾,公襲已虛。 驅以戰,是謂宿敗之師。此不蒐練之過,其敗一也。百人荷戈,仰食縣官,則挾千夫之 天下無事時,大臣偷處榮逸,戰士離落,兵甲鈍弊,車馬刓弱,天下雜然盜發,則疾

其敗五也。 菜色甚安,一歲未更,已立於壇墀之上。此輕罰之過,其敗四也。大將將兵,柄不得專, 長 慶 曰爲偃月,一曰爲魚麗,三軍萬夫,環旋翔佯,愰駭之間,虜騎乘之。此不專任之過, [初,盗子若孫悉來走命,未幾而|燕、趙亂,引師起將,五敗益甚,不能加威於反虜。 元和時,團兵數十萬以誅察,天下乾耗,四歲然後能取之,蓋五敗不去也。

二杜之論如此。

要害。 巴、蜀危憂。 則官無餽運,吏無牟盜。」此其備禦之策可施行者,著之于篇 緩步一舍,已呵然流汗。 卒出於邊則習險,相地分屯,春耕夏蠶以資衣食,秋冬嚴壁以俟寇。 自是羣蠻常有屠閩之心,閩民苦於重征者,亦欲啓之以幸非常。 殘我。」至章皋鑿青谿道以和羣蠻,使道圖入貢,擇子弟習書算於成都,業成而去,習知山川 鏃,不能斃一戎。 戎兵日深,疫死日衆,自度不能留,輒引去。 廣德、建中間、吐蕃再飲馬岷江,常以南詔爲前鋒,操倍尋之戟,且戰且進,蜀兵折刃吞 文宗時,大入成都,自越巂以北八百里,民畜爲空,又敗卒貧民因緣掠殺,官不能禁。 孫樵謂:「宜詔嚴道、沈黎、越巂三州,度要害,募卒以守。 爲將者刻薄自入,給帛則以疏易良,賦粟以沙參粒,故邊卒怨望而 蜀人語曰:「西戎尙可, 歲發戍卒,不習山川之險, 歲遣廉吏視卒之有無, 且兵籍於州則易役, 南蠻

凡突厥、吐蕃、迴鶻以盛衰先後爲次,東夷、西域又次之,迹用兵之輕重也,終之以南

列

第 一

百

四十

Ŀ

突厥上

唐

蠻,記唐所繇亡云。

勒, 更號 坐常東嚮。 達干,凡二十八等,皆世其官而無員限。 大臣曰葉護,曰屈律啜、曰阿波、曰俟利發、曰吐屯、曰俟斤、曰閻洪達、曰頡利發、曰 可汗,循單于也,妻曰可敦。其地三垂薄海,南抵大漠。其別部典兵者曰設,子弟曰特 突厥阿史那氏,蓋古匈奴北部也。居金山之陽,臣于蠕蠕,種裔繁衍。至吐門,遂彊大, **衞士日附離。可汗建廷都斤山,牙門樹金狼頭纛,**

段物三萬賻之。子什鉢苾幼,不克立,以爲泥步設,使居東偏,立其弟俟利弗設,是爲處羅 門無故壞,是年文帝崩,豈其類耶?」二年,始畢自將度河,至夏州,與賊梁師都合,又佐劉 武周以五百騎入句注,將侵太原。 殿,爲奏九部樂,引升御坐。是歲,始畢牙帳自破,帝問內史令蕭瑀,瑀曰:「魏文帝幸許,城 兵五百來會。帝平京師,遂恃功,使者每來多橫驕。」武德元年,骨咄祿特勒來朝,帝宴太極 疆,古未有也。 **竇建德、薛舉、劉武周、梁師都、李軌、王世充等倔起虎視,悉臣尊之。 控弦且百萬,戎狄熾** 隋大業之亂,始畢可汗咄吉嗣立,華人多往依之,契丹、室韋、吐谷渾、高昌皆役屬, 高祖起太原,遣府司馬劉文靜往聘,與連和,始畢使特勒康稍利獻馬二千、 會病死,帝爲發哀長樂門,詔羣臣卽館弔其使,遣使者持

發死。 萬餘。 道,卜之,不吉,左右諫止,處羅曰:「我先人失國,賴隋以存,今忘之,不祥。卜不吉,神詎無 知乎?我自決之。」會天雨血三日,國中犬夜羣號,求之不見,遂有疾,公主餌以五石,俄疽 三日,多掠城中婦人女子去,總管李仲文不能制,以俱儉特勒助屯。 明年,謀取幷州置楊正 者隸之,行其正朔,置百官,居定襄,衆萬人。秦王討武周也,處羅以弟步利設騎二千會井州 處羅復妻隋義成公主,遣使來告,則又潛通王世充,路州總管李襲譽擊斬其使,取牛羊 主以子奧射設陋弱,棄不立,更取其弟咄苾嗣,是爲頡利可汗。 處羅迎隋蕭皇后及齊王陳之子正道於竇建德所,因立正道爲隋王,奉隋後,隋人沒

長遜所部會秦王軍。 利 1,使與舉絕,隋五原太守張長遜以所部五城附虜,歐幷說還五原地。 衙利始爲莫賀咄設, 牙直五原北。 太子建成議廢豐州, 薛舉陷平凉,與連和,帝患之,遣光祿卿宇文歌路問 并割楡中地。 於是處羅子郁射設以所部萬帳入 皆見聽, 且發兵舉

頡利又妻義成,以始畢子什鉢苾爲突利可汗,使居東。 列 傳 第 百 四 + 上 突 厥 上 義成,楊諧女也,其弟善經亦依 大〇二九

處河南,以靈州爲塞。

騎氣 突厥 子非文帝後,宜立正道以報隋厚德。」頡利然之,故歲入寇。 直出百蠻上, 與王世 充使者王文素共說頡利曰:「往啓民兄弟爭國, 視中國爲不足與, 書辭悖嫚,多須求。 帝方經略天下,故屈禮,多所舍 然倚父兄餘資,兵銳馬 賴隋得復位, 子孫 有 國。 多 了,警然 今天

瓌、太常卿鄭元璹、左聽衛 王孝基二一、略河東, 四 年, 頡利 率萬騎與苑君璋合寇 犯原州,穿延州塞,諸將與戰,不能 大將軍長孫順德,帝亦囚其使與相當。 **爬門**, 定襄王李大恩壓却之。 有 所 由是寇代州,敗行軍 **頡利執我使者漢陽** 一總管

賃,贈賚不貲,然而

不厭無厓之求也

道,秦王 縱兵掠弘州 總管襄 大恩 厚與金還之。 不敢進, 明年,還順德等, 爲李高 重 邑王 拝州 將兵出蒲州 神符 總管字文歌、靈州楊師道拒之,獲馬、橐它數千。 遷所破。 屯新城 深鈔汾、 戰汾東, 大恩上言:「突厥飢, 道擊之; 且請和 潞,取男女五 黑麗 頡利 斬虜五 以突厥萬 自將數萬 **,贄魚膠,紿云:「固二國之好也。」帝雖未情,** 李子和以兵 百首 一千,分數千 人擾 騎與劉 馬邑可圖也。」 取馬 山東, 趨 雲中, 三千 黑闥合圍之, 騎 又殘定州 ; 轉掠原、靈 掩 汾州 可汗後; 詔殿 刺 史 中少監獨孤晟共擊之。 間。 大恩沒, 頡利 蕭顕獻俘 段德操出 頡利聞秦王且至, 於是 未得志, 太子 士死者數千 五 夏州 千。 建成將 乃率 釋其使特勒 虜 狙 中 引出塞,王 陷 其 兵出 五. 大震 歸。 晟 萬 後約, 熱寒 進 网 騎 州

師還。

請和

,歸我馬邑。

屯 北邊、秦王屯幷州備虜,久乃罷。 叉 明年,與黑闥、君璋等小小入寇定、匡、原、朔等州,與屯將相勝負。 俄又破代地一屯,進擊渭、豳二州,取馬邑,不有也,復 帝遣 太子建成復

月,頡利與突利兵悉起,自原州連營而南,所在震恐,秦王、齊王拒之。 王元吉屯豳州道以備胡。 七年,攻原、朔二州,入代地,不勝,更與君璋合攻隴州及陰槃城,分擊抖地, |君璋與虜出入原、朔、忻、抖地, 剽係騒然, 數爲諸將驅逐。 秦王與齊

固戰, 語,陰相忌,卽遺使者來曰:「王毋苦,我固不戰,將與王議事耳。」 託 突利乃歸心,不欲戰,頡利亦無以彊之,乃遣突利及夾畢特勒思摩請和,帝許之。 難相助,今無香火情邪?能一決乎? 秦王馳百騎掠 於王爲昆弟。 初,關中霖潦,饟道絕,軍次豳州,可汗萬騎奄至,陣五龍坡,以數百騎挑戰,舉軍 我纔百騎耳,徒廣殺傷, 陣,大言曰:「國家於突厥無負,何爲深入?我,秦王也, 帝見思摩,引升御榻,思摩頓首辭,帝曰:「我見若獨頡利也。」乃聽命 無益也。」頡利笑不答。 」突利亦不對。 王將絕水前,頡利見兵少,又聞與突利 又馳騎語突利日:「爾往與我盟,急 於是引却。 故來自與可汗決,若 秦王縱反間 突利途自 失 色。

突厥旣歲盜邊,或說帝曰:「虜數內寇者,以府庫子女所在,我能去長安,則戎心止矣。

其入。 中 治,至是以虜患方張,乃復置之,以練卒蒐騎 矢皆弛惡,遂解而還。 帝 大發卒治戰艦。 國 使 中書侍郎宇文士及踰南山,按行樊、鄧,將徙都焉。 患 中書侍郎温彦博曰:「魏爲長塹遏匈奴,今可用。」帝使桑顯和塹邊大道,召江南船工 未 聞 周、漢爲 頡利遣使來,願款北樓關請互 遷 帝會羣臣問所以備邊者,將作大匠于筠請五原、靈武置 也。 願假數年,請取 可汗以報。」帝乃止。 市,帝不能拒。 羣臣贊遷,秦王獨曰:「夷狄自古爲 帝始兼天下,罷十二軍,尚文 頡利已和, 亦會甚 一舟師於河 雨 扼扼

敗績 設掠綏州,請和 軍楊屯擊之,且發士屯大谷 八年,頡利 圍井州 秦王 中書侍郎温彦博陷于賊,鄆州 今卒敗約,股將擊滅之,毋須姑息。」命有司更所與書爲詔若敕。 一屯蒲: ,攻靈州,轉擾路、沁。 州道。 去。 攻靈、朔,與代州都督藺謇戰新 敗幷州數縣, 初,帝待突厥 入臟、鬱、彭州諸屯,或小勝,不能制。 都督張德政死之。遂攻廣武,爲任城王道宗破。 李靖以兵出潞州道,行軍總管任躟屯太行 用敵國禮,及是, 城,蓍敗績。 怒曰:「往吾以天下未定,厚於虜以 於是張瑾兵屯石嶺, 俄寇原州 **邁未至屯**, 運 李高遷 戰大谷, 其欲谷 虜已踰 屯

祥隴、渭間,平道將軍<u>柴</u>紹破之於<u>秦州,</u>斬一特勒、三大將,虜千級。 九年,攻原、靈,又圍凉州,進犯涇、原,李靖與戰靈州 虜引 寇 大抵虜得志則深入,負 西 會州 圍烏城,

後,伏邀諸 皆來謁 若 及亡、懼而 吾地旣深, 不聽,既 敵 俄 軍周範等馳六騎出玄武門,幸渭上,與可汗隔水語,且責其負約。 蕭瑀、封德彝諫帝,不如禮遣之,帝不許,繫於門下省。 賜玉帛多至不可計,何妄以兵入我都畿,自夸盛疆耶?今我當先戮爾矣!」思力懼,請命, 則 百萬,今至矣!」太宗曰:「我與可汗嘗面約和,爾則背之。 且義師之初,爾父子身從我,遺 叫; 闔城、彼 而 ,獲俟斤烏沒啜,斬首千餘級。 翌日 衆 和, 馬諫 我,我醉而縛之, 軍至,旗鎧光明,部隊靜嚴,虜大駭。 而 不恥 刑白馬 脩德,與我爲怨, 前,取之反覆掌耳。 虜 懼 1且大掠吾境,故我獨出,示無所畏,又盛兵使知必戰, ,帝曰:「我思熟矣,非爾所知 |自退,其策奈何?」帝曰:「突厥衆而 不能返,故與戰則克,和 也。 ,與頡利盟便橋上,突厥引還。 其七月,頡利自將十萬騎襲武功,京師戒嚴。 其勢易甚。 其可當耶?今仆械卷鎧,陷以玉帛,虜志必驕,驕則亡之端也, 然我新卽位,爲國者要在安靜,一與虜校,殺傷必多,彼敗未 頡利遣謀臣執失思力入朝以覘我, 因夸說曰:「二可汗兵 又我敕長孫无忌、李靖潛師幽州以須 .則固,制賊之命,在此舉矣!」 也。 夫突厥掃地入寇,以我新有內難,謂不 帝與頡利按轡,即麾軍却而陣焉。 蕭瑀 不整,君臣惟利是視,可汗在水 日:「頡利之來,諸將多請 乃與侍中高士廉、中書令房玄齡、將 不意我能沮其始謀。 攻高陵,尉遲敬德與戰涇 羣 角見帝,皆驚,下馬拜。 是日,頡利果請和, (E), 若大軍躡 蕭 與戰 酒,而 瑀以帝輕 能 師。 彼入 香 帥 陛下 其 我

列

俥

護送突厥,頡利獻馬三千匹、羊萬頭,帝不納,詔歸所俘於我。 故曰『將欲取之,必固與之』。」]瑀再拜曰:「非臣愚所逮也!」乃詔殿中監豆盧寬、將軍趙綽

議者 以取之耶?須其無禮於我,乃伐之。」 突利由是怨望。是歲大雪,羊馬多凍死,人飢,懼王師乘其敵,即引兵入朔州地,聲言會獵。 ·請責其敗約,因伐之,帝曰:「匹夫不可爲不信,況國乎?我旣與之盟,豈利其災,邀險 貞觀元年,薛延陀、回紇、拔野古諸部皆叛,使突利討之,不勝,輕騎走,頡利怒,囚之,

|厥盛 胡性冒沓,數翻覆不信,號令無常。 和於親也。 **土趙德言,才其人,委信之,稍專國;又委政諸胡,斥遠宗族不用,興師歲入邊,下不堪苦。** 多死,不用地也。 救,奈何?」兵部尙書杜如晦日:「夷狄無信,我雖如約,彼常負之,今亂而擊之,侮亡之道 也。」乃詔將軍周範壁太原經略之,頡利亦擁兵窺邊。 明年, |夏而霜,五日並出,三月連明,赤氣滿野,彼見災而不務德,不畏天也。 突利自陳爲頡利所攻,求救。 有是四者,將亡矣,當爲公等取之,安在築障塞乎?」突厥俗素質略, 頡利得華 俗死則焚,今葬皆起墓,背父祖命,嫚鬼神也。 歲大飢,夏斂苛重,諸部愈貳。 帝曰:「殷與頡利盟,又與突利有昆弟約,不可不 或請樂古長城,發民乘塞。 與突利不睦,內相攻殘,不 遷徙無常,六畜 帝日:「突

又明年,屬部薛延陀自稱可汗,以使來。詔兵部尚書李靖擊虜馬邑,頡利走,九俟斤以

衆降, 州 初定,太上皇以百姓故,奉突厥,詭而臣之,朕常痛心病首,思一刷恥於天下,今天誘諸將, 出 定襄道 ,俘人畜 恆安道,營州都督薛萬淑出暢武道,凡六總管,師十餘萬,皆授靖節度以討之。 拔野古僕骨同羅諸部、霽奚渠長皆來朝。 一,左武 「萬計,突利及郁射設、蔭奈特勒帥所部來奔,捷書日夜至,帝謂羣臣曰:「往國家 衛大將軍柴紹出金河道,靈州大都督任城王道宗出大同道,幽州都督 於是韶幷州都督李世勣出通漢道 道宗 李靖出 衞孝 戰 節 靈

所向輒克,股其遂有成功乎

以 襲擊之,盡獲其衆,頡利得千里 哀言謝罪,請內屬,帝詔鴻臚卿唐儉、 隋,今反側旣安,何足治耶? IE 宗降,其國遂亡,復定襄、恆安地,斥境至大漢矣。 道降。 四 年正月,靖進屯惡陽嶺,夜襲頡利,頡利驚,退牙磧口,大酋康蘇蜜等以隋蕭皇后、楊 或言中國 人嘗密通書於后,中書舍人陽文瓘請劾治。 」置勿劾。 馬,獨奔沙鉢羅 將軍安脩仁等持節慰撫。 頡利窘,走保鐵山,兵猶數萬, ,行軍副總管張寶相爲之。 帝曰:「天下未一,人或當思 **靖知儉在** 令執失思力來,陽 虜所, 虜必安, 沙鉢羅設蘇尼失 爲

也; 五 而父國破,賴隋以安,不以一 恃兵不戢, 部落攜怨, 三也;賊華民, 暴禾稼, 四也;許和親而遷延自遁, 五也。 頡利至京 師,告俘太廟,帝御順天樓, 鏃力助之,使其 陳仗衞, 廟祉不血 士民 一縱觀, 食,一 吏執 也; 可汗至, 與我鄰 而棄信擾邊,二 帝日:「而罪有 股殺

爾非無名,顧渭上盟未之忘,故不窮責也。」乃悉還其家屬,館于太僕,稟食之。

爲瘞藏之。 七 城以獻,因其地爲西伊州。 思結俟斤以四萬衆降,可汗弟欲谷設奔高昌,旣而亦來降。伊吾城之長素臣突厥,舉 又詔:隋亂,華民多沒于虜,遣使者以金帛贖男女八萬口,還爲平民。 制詔:突厥往逢癘疫,長城之南,暴骨如丘,有司其以酒脯祭,

以虢州負山多麕麋,有射獵之娛,乃拜爲刺史,辭不往,遂授右衞大將軍,賜美田宅。 之,遂給母肉。 今其滅者,殆背德忘義致然耶? · 昔啓民失國,隋文帝不恡粟帛,興士衆,營護而存立之,至始畢稍彊,則以兵圍煬帝鴈門, 其母最後至,不得給,羅支不敢嘗品肉。 <u>頡利不室處,常設穹廬廷中,久鬱鬱不自憀,與家人悲歌相泣下,狀貌羸省。帝見憐之,</u> 頡利子疊羅支,有至性,既舍京師, 帝聞,數曰:「天稟仁孝,詎限華夷哉 諸婦得品供,羅支預 帝日: 厚賜

死殉。 官吐谷渾邪者,頡利母婆施之媵臣也,頡利始生,以授渾邪,至是哀慟,乃自殺。 仁惠御下,人多歸之;頡利政亂,其部獨不貳。 贈中郎將, (年) 頡利死, 贈歸義王, 諡曰荒, 詔國人葬之, 從其禮, 火尸, 起冢屬東。 尼失者,啓民 命葬頡利 可汗弟也。 了

家旁,韶中書侍郎

岑文本刻其事于

頡利、

渾邪之墓碑。 始畢以爲沙鉢羅設,帳部五萬,牙直靈州西北,麥雄邁,以 俄蘇尼失亦以 其臣胡祿達 帝異之,

衆來,漠南地途空,授北寧州都督、右衞大將軍,封懷德王云。

於是中書侍郞顏師古、給事中杜楚客、禮部侍郞李百藥等皆勸帝不如使處河北,樹首長,俾 內地,將敎以禮法,職以耕農,又選酋良入宿衞,何患之卹?且光武置南單于,卒無叛亡。」 |武帝逐出之,不能用。|劉、石之亂,卒傾中夏。陛下必欲引突厥居|河南,所謂養虎自遺患者 獸野心,非我族類,弱則伏,彊則叛,其天性也。 亡而存之,彼世將懷德,何叛之爲?」徵曰:「魏時有胡落分處近郡,晉已平吳,郭欽、江統勸 種歸命,不加哀憐而棄之,非天地蒙覆之義,而有阻四夷之嫌。臣謂處以河南,蓋死而生之, 甸,心腹疾也。」。彥博曰:「不然,天子於四夷,若天地養萬物,覆載全安之,今突厥破滅,餘 以不欲使近中國也。 其部落,以爲扞蔽,不革其俗,因而撫之,實空虛之地,且示無所猜。 中國久,今天喪之,非慕義自歸,請悉籍降俘,內兗、豫閉處,使習耕織,百萬之虜,可化爲齊 非函育之道。」祕書監魏徵建言:「突厥世爲中國仇,今其來降,不即誅滅,當遣還河北。彼鳥 人,是中國有加戶,而漢北遂空也。」中書令温彥博請:「如漢建武時,置降匈奴留五原塞,全 頡利之亡,其下或走薛延陀,或入西域,而來降者尚十餘萬,詔議所宜,咸言:「突厥**擾** 。陛下奈何以河南居之?且降者十萬,若令數年,孳息略倍,而近在畿 。且〉、漢以銳師猛將擊取河南地爲郡縣者, 若內克、豫,則乖本性,

列

統部落 置雲中都督二府統之。擢酋豪爲將軍、郞將者五百人,奉朝請者且百員,入長安自籍者數 卒度朔方地,自幽州屬靈州,建順、酤、化、長四州爲都督府,剖頡利故地,左置定襄都督、右 1,視地 多少,令不相臣,國小權分,終不得亢衡中國,長轡遠馭之道也。 帝主彥博語,

隋敵。 督,毋相侵掠,長爲我北藩。」突利頓首聽命。 王,食戶七百。 以無懼,有不逮者,禍可舒乎! 今突厥喪亂,由可汗不君,突利雖至親,不自保而來。夷狄弱則邊境安,然觀彼亡,我不可 起相攻。 衆騒離 方之衆皆屬焉。突利斂取無法,下不附,故薛延陀、奚、霤等皆內屬,頡利遣擊之,又大敗, 設主層部,統特勒主胡部,斛特勒主斛薛部,以突利可汗主契丹、靺鞨部,樹牙南直幽州,東 突利初爲泥步設,得隋淮南公主以爲妻。頡利之立,用次弟爲延陀設,主延陀部,步利 爾今窮來歸我,所以不立爾爲可汗,鑒前敗也。 ,頡利囚捶之,久乃赦。突利嘗自結於太宗,及頡利衰,驟追兵於突利,不肯從,因 乃以突利可汗爲順州都督,令率其下就部。 突利請入朝,帝謂左右曰:「古爲國者勞已以憂人,則系祚長;役人以奉已,則亡。 及爲都督,太宗敕曰:「而祖啓民破亡,隋則復之,棄德不報,而父始畢反爲 」突利至,禮見良厚,輟膳以賜之,拜右衞大將軍,封北 後入朝,死井州道中,年二十九,帝爲舉哀,亦 我欲中國安,爾宗族不亡,故授爾都 平郡

韶文本文其墓,子賀邏鶻嗣。

外。 中營,譟而殺人,衞士等共擊之,乃走,殺廢人盜馬,欲度潤,徼邏禽斬之,赦實邏鶻,投嶺 聞晉王丁夜得辟仗出,我乘間突進,可犯行在。」是夕,大風冥,王不出,結社率恐謀漏,即射 於是羣臣更言處突厥中國非是,帝亦惠之,乃立阿史那思摩爲乙彌泥孰俟利苾可汗 帝幸九成宮,突利弟結社率以鄓將宿衞,陰結種人謀反,劫賀邏鶻北還,謂其黨曰:「我

賜氏字,樹牙河北,悉徙突厥還故地。

主之;其南,突厥保之。各守而境,無相鈔犯,有負約,我自以兵誅之。」思摩乃行,帝爲置 畜牧,衆日孳蕃,今復以忠摩爲可汗,還其故疆。延陀受命在前,長於突厥,舉磧以北,延陀 未始滅人國,以頡利暴殘,伐而取之,非貪其地與人也。故處降部於河南,薦草美泉,利其 留,與頡利俱禽,太宗以爲忠,授右武侯大將軍、化州都督,統頡利故部居河南,徙懷化郡 特勒,而不得爲設。」武德初,數以使者來,高祖嘉其誠,封和順郡王。及諸部納款,思摩獨 去可汗號。性開敏,善占對,始畢、處羅皆愛之。然以貌似胡,疑非阿史那種,故但爲夾畢 及是將徙,內畏薛延陀,不敢出塞。帝詔司農卿郭嗣本持節賜延陀書,言:「中國禮義, 思摩,頡利族人也,父曰咄六設。始,啓民奔隋,磧北諸部奉思摩爲可汗,啓民歸國,乃

列傳第

百

四十上

突厥上

築壇場河上,拜受册,賜鼓纛,又詔左屯衞將軍阿史那忠爲左賢王,左武衞將軍阿史那泥孰 父母墳墓在河北,今復舊廷,故宴以慰行。」思摩泣下,奉觴上萬歲壽,且言:「破亡之餘,陛 下使存骨舊鄉,願子孫世世事唐,以報厚德。」於是趙郡王孝恭、鴻臚卿劉善就思摩部(三), 酒,引思摩前曰:「蒔一草一木,見其滋廡以爲喜,況我養爾部人,息爾馬羊,不減昔乎!爾

五年 犬,守吠天子北門,有如延陀侵逼,願入保長城。」韶許之。 畜牧廣衍,龍荒之最壤,故突厥爭利之。 婢,以償唐人。 乃養之如子,而結社率竟反,此不可信明甚。 謹 爲右賢王,相之〔四〕。 頓首奉詔。 - ,思摩帥衆十餘萬、勝兵四萬、馬九萬匹始度河,牙於故定襄城,其地南大河,北白道, 薛延陀聞突厥之北,恐其衆奔亡度磧,勒兵以待。 及使者至,乃謝曰:「天子詔毋相侵, 然突厥酣亂翻覆,其未亡時殺中國人如麻,陛下滅其國,謂宜收種落皆爲奴 思摩遣使謝曰:「蒙恩立爲落長,實望世世爲國一 後有亂,請終爲陛下誅之。」十

中流矢,帝爲吮血,其顧厚類此。 居三年,不能得其衆,下多攜背,思摩慚,因入朝願留宿衞,更拜右武衞將軍。 還,卒京師,贈兵部尚書、夏州都督,陪葬昭陵,築墳象白 從伐遼,

道山,爲刊其勞,碑於化州。

右賢王阿史那泥孰,蘇尼失子也。 始歸國,妻以宗女,賜名忠。 及從思摩出塞,思慕中

國,見使者必流涕求入侍,許之。

股策五十年中國無突厥患。」

思摩衆既南,車鼻可汗乃盜有其地。 下皆叛,非止夷狄也。朕閔突厥之亡,內河南以振膽之,彼不近走延陀而遠歸我,懷我深矣, 請帝無東。 思摩旣不能國,殘衆稍稍南度河,分處勝、夏二州。 帝曰:「夫爲君者,豈有猜貳哉!陽、武化傑、紂之民,無不遷善,有隋無道,舉天 帝伐遼,或言突厥處河南,邇京師,

萬,自稱乙注車鼻可汗,距長安萬里,西葛邏祿,北結骨,皆井統之,時時出掠延陀人畜 延陀後衰,車鼻勢益張。 去,騎數千尾追,不勝。竄金山之北,三垂斗絕,惟一面可容車騎,壤土夷博,即據之,勝兵三 薛延陀稱可汗,乃往歸焉。 車鼻,亦阿史那族,而突利部人也,名斛勃,世爲小可汗。 其爲人沈果有智數,衆頗便附,延陀畏逼,將殺之,乃率所部遯 頡利敗,諸部欲共君長之,會

韓華往迎之,至則車鼻偃然無入朝意,華謀與葛邏祿共劫之,車鼻覺,華與車鼻子陟茲特勒 **鬭死**,調遮被殺。 二十一年,遣子沙鉢羅特勒獻方物,且請身入朝。帝遣雲麾將軍安調遮、右屯衞郎將 帝怒,遣右聽衞郎將高品發回紇、僕骨兵擊之,其大酋長歌邏祿泥孰闕俟

傳

百

四十上

突厥上

雲中。 衆稍 頟 杰 利發、 大都 都 也。 請歸國,不聽。 護 武 金微新黎等七都督、仙萼賀蘭等八州。即擢領酋爲都督、刺史。 爲封疆臣矣。 護府, 府 衛將軍,賜居第,處其衆鬱督軍山, 追至金山、獲之、獻京 而罪當死,然股見先帝所獲酋長必宥之,今原而死。」乃釋縛,數俘社廟,又見昭陵。 處木昆莫賀咄俟斤等以 門即 ,領回紇,徙故瀚海都護府於古雲中城,號雲中都護府,磧以北蕃州悉隸瀚海, 雲中者,義成公主所居也,頡利滅, 建言願以諸王爲可汗,遙統之。帝曰:「今可汗,古單于也。」乃改雲中府爲單于 以 殷王旭輪爲單于都護。 乃遣子菴鑠入朝,後來降,拜左屯衞將軍,建新黎州,使領其衆。 始置單于都護府領狼山雲中桑乾三都督、蘇農等二十四州, 師。 一次降。 高宗責曰:「頡利敗,爾不輔,無親也; **偘師攻阿息山,部落不肯戰,** 帝封 詔建狼山都督府統之。初,其子羯漫陀泣諫車鼻 禪,都督葛邏祿叱利等三十餘人皆從至泰山下; 李靖徙突厥嬴破數百帳居之,以阿 麟德初,改燕然爲瀚海 車鼻攜愛妾, 延陀破,爾遯亡,不忠 史德爲之長, 瀚海都護府 於是突厥 從數 南隸 百

之,恃勝不設備,會雨雪,士戰寒,反爲處襲, 乃以 調 露 初, 鴻 臚 單于府大
個温
傳、 卿 單于大都護府長 奉職二部反,立阿史那泥孰匐爲可汗,二十四州酋長皆叛應 史蕭嗣業、 左領 大敗,殺略萬餘人,大智等收餘卒, 軍衞將軍苑 大智、右千牛衞 將 行且戰, 軍李景嘉討

封

勒

名

於

封

禪

碑云。

凡三十年

北方無戎馬警

発。 右領軍中鄓將程務挺逐出之。 者,南飛,胡必至。」比春還,悉墮靈、夏間,率無首,泥孰果亡。 匐 將 李思文、營州都督周道務、西軍程務挺、東軍李文暕,士無慮三十萬,捕擊反者。 ,以首降,禽温傅、奉職以還,餘衆保狼山。始虜未叛,鳴鵽羣飛入塞,吏曰:「所謂突厥雀 軍曹懷舜屯井陘,右武衞將軍崔獻屯絳、龍門。明年,行儉戰黑山,大破之,其下斬泥敦 於是嗣業流桂州, 餘坐発官。 更拜禮部尙書裴行儉爲定襄道行軍大總管,率太僕少卿 狼山衆掠雲州,都督竇懷哲、 詔右金吾

降,行儉虜之, 伏念、温傅保黑沙,飢甚,可輕騎取也。 于鎭兵躡之,伏念意王 山 爲 餘部,降之;引還至長城,遇温傅與戰,所殺相當。行儉兵壁代之陘口,縱反間,故伏念、温 原、慶二州。 相 貳, (廣所乘,死不可算,皆南首仆。 以 |永隆中,温傳部又迎頡利族子伏念於夏州,走度河,立爲可汗,諸部響應。)輕騎 因遣兵擊伏念,敗之。伏念走,與懷舜遇,行且戰一日,爲伏念所破,棄軍弈雲中, 將襲懷舜,會行儉造部將掩得其輜重,比還,無所歸, 復詔行儉爲大總管,以右武衞將軍曹懷舜、幽州都督李文暕副之。 送京師 ,斬東 師不能遠,不設備,及兵至,惶駭不得戰,遂遣使間道詣行儉,執温傅 懷舜殺牲與伏念盟,乃免。伏念益北,留輜重妻子保金牙 懷舜獨信之,輕兵倍道至黑沙,乃不見虜,得薛延陀 乃北走保細沙。 明年, 遂寇 課者給言 行儉縱單 傅

永淳元年,骨咄祿又反。

單于都護府,殺司馬張行師,攻蔚州 北鄙 材山 爲葉護。 務挺爲單于道安撫大使備邊 請諭還諸部贖罪,許之。至卽降骨咄祿,與爲謀,遂以爲阿波達干,悉屬以兵。 , 遂攻丼州, 殺嵐州刺史王德茂, 分掠定州, 北平刺史霍王元軌擊卻之。 又攻嬀州 骨 又治黑沙城,有衆五千,盜九姓畜馬,稍彊大,乃自立爲可汗, 咄 禄 時單于府檢校降戶部落阿史德元珍者,爲長史王本立所囚。 頡利族人也, 雲中都督舍利元英之部酋,世襲 ,殺刺史李思儉,執豐州都督崔知辯。 吐屯。 伏念敗, 以弟默啜爲殺, 會骨咄祿來寇,元珍 韶右武衞將軍程 乃嘯亡散 乃寇單于府 咄悉匐 保總

后怒, 里,間 材 四十 明年, 山,至忻州 嗣 虜無 誅 聖、垂拱間, 寶壁 ·里,遯過磧。 備 入昌平,右鷹揚衞大將軍黑齒常之擊卻之。復入朔州 ,改骨咄祿日不卒祿。 趨 與賊遇,鏖戰不利,死者五千人。 襲之。 連寇崩、代,掠吏士。 右監門衞中郎 將至,漏言 **宁**軍 俄而元珍攻突騎施,戰死。 將爨寶璧當追,意虜即破,欲幸取功,乃募諜出 ,虜得整衆出,皆死戰,大敗,寶璧跳還,舉軍沒。 左玉鈴衞中郎將淳于處平爲陽曲道總管,將擊賊 更以天官尚書章待價爲燕然道 地,常之與戰黃花堆,虜敗, 天授初,骨咄祿死,其子幼, 大總管討 塞二千

道總管王孝傑、威化道總管李多祚、豐安道總管陳令英、瀚海道總管田揚名等凡十八將軍 兵出塞,雜華蕃步騎擊之,不見虜,還。 總管,內史李昭德爲行軍長 默啜自立爲可汗,篡位數年,始攻靈州, 史,鳳閣鸞臺平章事蘇味道爲司馬,率朔方道總管契茲明、鴈門 俄詔孝傑爲朔方道行軍總管備邊。 多殺略士民。 武后以薛懷義爲朔方道行

突厥遂彊 默啜又請粟田種十萬斛,農器三千具,鐵數萬斤,后不許,宰相李嶠亦言不可。」默啜怨,爲 女諸王,且求六州降戶。初,突厥內屬者分處豐、勝、靈、夏、朔、代間,謂之河曲六州降人。 閻 重 一(金), 知微卽部册拜遷善可汗。默啜乃引兵擊契丹,會盡忠死,襲松漠部落,盡得孫萬榮妻子輜 未及命,俄攻靈、勝二州,縱殺略,爲屯將所敗。 又遣使者謝,請爲后子,復言有女,願 契丹李盡忠等反,默啜請擊賊自效,詔可。 執使者司賓卿田歸道。於是納言姚璹等建請與之, 后美其攻,復詔知微持節册默啜爲特進、頡跌利施大單于、立功報國 授左衞大將軍、歸國公,以左豹韜衞將軍 乃歸粟、器、降人數千帳, 繇是 印

准陽王武延秀聘其女爲妃,韶知微攝春官尚書,與司賓卿楊鸞莊持節護送。 默啜猥

六〇四五

詔

傳第

百四四

十上

突厥上

崱以 悉院 |若應之,入殺刺史高叡,進攻相州。 彥高,焚廬舍,鄉聚爲空。 后怒,下詔購斬默啜者王之, 更號 忠義爲天兵 卽 吉頊 軍嵎夷公福富順 閻敬容、李多祚爲天兵西道後軍總管,兵**亦**十五萬。 默啜破蔚州飛狐,進殘定州, ·囚延秀等,妄號<u>知</u>微爲可汗, 之, 兵 我以 為監 爲 副 五千降。 出 軍 ,文昌右丞宋玄爽爲長史, 女嫁唐天子子 五 ·使,將軍扶餘文宣等六人爲子總管。 、西道總管,幽州都督張仁亶爲天兵東道總管,兵凡三十萬擊之; 回 道 爲奇兵總管,擊虜。 廣入圍媽、檀, 后詔司屬卿武重規爲天兵中道大總管, 右武威衞將 去,所過人畜、 ,今乃后 自將十萬騎 家子 金幣、子女盡剽 韶沙吒忠義爲河北道 左 乎 時中宗還自房陵,爲皇太子,拜行 肅 ! 政臺御史中丞 且我 南向擎靜難 世 有之,諸將皆顧望 附唐 未行 默啜聞之,取趙、定所掠 霍 、平狄、清夷等軍,靜難 今聞其子孫獨二人在 前軍總管,李多祚爲後 獻 可爲 日斬啜。 司 不 馬, 敢 虜圍 戰,獨狄 軍 右 大元帥 肅 趙州 右羽林大將 政臺 仁傑以 軍使 男 我當立之。」 殺刺 ,以納言狄 軍總管, 女 御 長史唐波 軍 史 慕容玄 八 兵 中丞 九 史 沙 萬 吒

悉 匐 姓 兵四萬 爲 默 左 啜 負勝 察 骨 號 輕 拓 咄 中國 西 禄 可汗。 子 默 有 驕 矩 爲 歲入邊, 志,大抵兵 右 祭, 皆統 戍兵不得休, 、與頡 兵 二萬 利 時略等, 乃高選魏元忠檢校井州長史為天兵軍大 子 匐 地縱廣萬 俱 爲 小 可 里 汗 諸蕃 · 位 两 悉 祭 往 Ŀ, 聽 典 命。 處 木 復 良 立 等 Ш

之,不及

妻師德副之,按屯以待。 又徙元忠靈武道行軍大總管,備

道 等九州之軍,以瀛州都督張仁亶統諸州及淸夷、障塞軍之兵,與季昶掎角,又以相王爲安北 遂 武 運井州 攸 ·行軍元帥,監諸將,王留不行。 虜入代、忻,仍殺略。 宜 嫼 一一般剽魔右牧馬萬匹去,俄復盜邊,詔安北大都護相王爲天兵道 、夏州都督薛訥與元忠擊虜,兵未出,默啜去。 以雍州長史薛季昶爲持節山東防禦大使, 明年,寇鹽、夏,掠羊馬十萬 節度滄、瀛、幽、易、恆、定、嬀、檀、平 大元帥, ,攻石嶺 史

鳴沙 屯。 戰 張仁亶爲朔方道大總管屯邊,明年,始築三受降城於河外,障絕寇路。 服 冷陘 立 了,於是靈武軍大總管沙吒忠義與戰,不勝,死者幾萬人,虜遂入原、會,多取牧馬。 睿宗: 玄宗 諸朝公。 長安三年,遣使者莫賀達干請進女女皇太子子,后使平恩郡王重俊、義興郡王重明盛 購斬默啜者王以國、官諸衞大將軍。 ,爲奚所執 初立 ,絕和親。

默啜乃遣子楊我支特勒入宿衞,固求昏,以蜀王 ,又請和 默啜更遣大會移力貪汗獻馬千匹,謝許婚,后渥禮其使。 ,戲諸默啜,默啜殺之,更以刑部尙書郭元振 親,韶取宋王成器女爲金山公主下嫁。 默啜殺我行人鴻臚卿臧思言,詔左屯衞大將軍 代休璟。 會左羽林大將軍 一女南 久之,以唐休璟代 中宗始卽位,入攻 和縣主妻之,下 孫佺等與奚 帝韶

書和 尉可汗。 明 年, 使子移涅可汗引同俄特勒、火拔頡利發石失畢精騎攻北庭, 都護郭虔

列

傳

第

百

四

+

上

突厥

Ŀ

六〇四

-6

妻爲 瓘 擊之, 金 山 斬 公主,賜賚優縟。 同俄 城下 虜 奔 解。 楊我支死, 火拔不敢歸,攜妻子來奔,拜左武衞大將軍 韶宗親三等以上弔其家。是時突厥再上書求昏, 帝 燕 Ш 郡王 號其

未報

爲凉州 離支高 進、右 新附 麗 郭虔瓘爲朔州鎭軍大總管,節度和戎、大武、井州之北等軍,屯井州 衞 都督謀落匐雞、玄池都督蹋實力胡鼻率衆內附、詔處其衆於金山。 + 姓左 將軍 平城郡公, 初 衞 文質, 檢鈔暴。 鎭 棄刺史、陰山郡公,苾悉頡力左武 五 大將軍兼陝跌都督、樓煩郡公,道奴左武衞將軍兼刺史、雲中郡公,鶻屈頡斤左 景雲中,默啜西滅娑葛,遂役屬契丹、奚,因虐用其下。 軍大總管,節度赤水、建康、河源等軍,屯凉州,以都督楊執一副之;右衞大將 一咄陸、右五弩失畢俟斤皆請降,葛邏祿胡屋鼠尼施三姓、大漠都督特進朱斯、 與跌跌都督思太,吐谷渾大酋慕容道奴,郁射施大酋鶻屈頡斤、苾悉頡力, 將軍皆員外置,賜各有差。 默啜屢擊葛邏祿等,詔在所都護、總管掎角應援。 衞將 軍兼刺史、鴈門郡公,拱毅左領 引拜文簡左衞大將軍、遼西郡王,思太特 既年老, 虜勢寖削。 以右羽林軍大將軍薛 以長史王晙副之。 愈昏暴, 軍衞 其婿高麗莫 部落怨畔, 將 軍 陰 Ш 刺 撫 軍

默啜討九姓,戰磧北,九姓潰,人畜皆死,

思結等部來降,帝悉官之。

拜薛訥朔方道行

圖 軍大總管,太僕卿呂延祚、 ·取默啜,班賞格,賜物諭之。 靈州刺史杜賓客佐之,備邊。 默啜又討九姓拔野古,戰獨樂河,拔野古大敗, 韶金山、大漠、陰山、玄池都督等共 默啜輕歸不

爲備,道大林中,拔曳固殘衆突出,擊默啜,斬之,乃與入蕃使郝靈佺傳首京師

骨咄祿子闕特勒合故部,攻殺小可汗及宗族略盡,立其兄默棘連,是爲毗伽可汗。

校勘記

敗行軍總管王孝基 突厥寇代州,執行軍總管王孝基」。 各本「王孝基」上原有「永安」二字。 冊府卷三九三亦記此戰役,稱代州總管李大恩 按本書卷一高祖紀載:武德四年八月, 「遣刺史王

殺。 刺史,名異實同。 孝基出戰,一 則此時不得 軍皆沒」。 更爲行軍總管,其爲王孝基之誤無疑。「永安」二字行,今刪。 考本書卷七八宗室傳, 突厥集史卷四謂隋、唐往往以刺 永安王孝基于武德二年戰劉武周被俘,謀亡歸,爲所 史充行軍總管。今一 日行軍 總管,

曰

 \exists 北 李靖潛 豳 潤水 州。 附 師 近,則李靕等不得遠至幽州以待,當以豳州 按唐幽州治在今北京城 区区 州 以須 「幽州」,舊書卷一九四上突厥傳同。舊書卷六七李靖傳及冊府卷九九一 西南, 幽州治即今陝西彬縣。 爲是。 是役突厥進軍至今陝西 西安市 作

3 鴻 温卿 劉 善就思摩部 通典卷一九九及舊書卷一九四下突厥傳載: 貞觀七年遺鴻臚少卿劉善

列

僔

第

百

四

+

上

校

勘 記

大〇四九

六〇五〇

因冊拜西突厥咄陸可汗。 本書卷二一五下突厥傳合。 突厥集史卷一 三新唐書突厥傳校注 又雜

考諸碑、認爲「劉善」乃「劉善因」之奪。

四日 又詔左屯衞將軍阿史那忠爲左賢王左武衞將軍阿史那泥孰爲右賢王相之 那泥熟本爲 一人,據下文阿史那泥熟賜名忠可知。 此承舊書突厥傳誤作二人,又於諸夷蕃將傳 按阿史那忠 與 阿史

和突厥傳中各立一傳,更屬大謬。商権卷九二有詳辨。

(三) 卷九八六及遜鑑卷二〇五改。 盡得孫萬榮妻子輜重 「孫」,各本原作「李」。 據舊書卷一 九四上突厥傳、通典卷一九八、

洲府

(元) 后使平恩郡王重俊義興郡王重 宗諸子傳,平恩郡王爲重福,義興郡王爲重俊。 明盛服立諸朝 據本書卷八一 三宗諸子傳、 舊書卷八六高宗中

列傳第一百四十下

突厥下

欲谷者以女婆匐爲默棘連可敦(II)獨免,廢歸其部。後突騎施蘇祿自爲可汗, 嗣位,實開元四年。以特勒爲左賢王,專制其兵。初,默啜死,闕特勒盡殺其用事臣,惟憞 多貳,默棘連乃召暾欲谷與謀國,年七十餘,衆尊畏之。 毗伽可汗默棘連,本謂「小殺」者,性仁友,自以立非己功,讓於闕特勒,特勒不敢受,遂 突厥部種

厥 怒;及姜晦爲巡邊使,遮訴禁弓矢無以射獵爲生,晦悉還之。乃共擊張知運,禽之,將送突 俄而跌跌思太等自河曲歸之。始,降戶之南也,單于副都護張知運盡斂其兵,戎人怨 思太等分爲二隊北走,圧睃又

列傳第一百四十下

突厥下

破其左隊。

悉蜜 十萬 而居, 抗者, 與張嘉貞 昆都督右武 突厥欲擊之,暾欲谷曰:「兵千里遠出,士殊死鬭,鋒不可當也。 道掩其牙,捕默 以不情 赤亭,掠凉州 王墨特勒、左威衞將軍右賢王阿史那毗伽特勒、燕山郡王火拔石失畢等蕃漢士悉發,凡三 不可動也。」默棘連 輕而 二百里,乃分兵由它道襲拔其城,即急擊拔悉蜜,衆走趨 了。 以御史大夫、朔方道大總管王晙統之,期八年秋並集

灣落水上,使拔悉蜜、溪、契丹分 默 如兵出,吾且決戰,必有功。」燈令于軍曰:「羸臂持滿外注。」 會大寒裂膚, 戰 隨 : , 答而 棘 水草 一敗,必爲彼禽。 好利,當先至,擊之可取也。」俄而拔悉蜜果引衆逼突厥牙,知畯等不至, 《有隙,必相執異,亦必不能來。 連 旣 【衞大將軍骨篤祿毗伽可汗、契丹都督|李失活、)奚都督|李大酺、)突厥|默啜子左賢 不許。 射獵,居處無常,習於武 都督楊敬述使官屬盧公利、元澄等勒兵討捕 得降胡,欲 棘連。 俄下韶伐之,乃以拔悉蜜右聽衞大將軍金山道總管處木昆執米啜、 又欲城所 默棘連大恐,暾欲谷曰:「拔悉蜜在北庭,與二蕃相距遠,必不合。 (南盜塞,暾欲谷曰:「不可,天子英武,人和歲豐,未有間,且我兵新 且佛、老教人仁弱,非武彊術。」默棘連當其策,即遣使者請和 都 起佛、老廟, 事 丁, 彊 卽皆能來,我當前三日悉衆北徙,彼糧竭自去。 別進 取、弱 暾欲谷曰:「突厥衆不敵唐百 則 (道伏, 暾欲谷日:「 北庭,無所歸,悉 唐兵雖多 不如躡之,邀近而 一,無所用 敬述若 分一 禽之。 士手不能張 也。 取之。」距 , 所能 當與 還出 若城 晙 與

弓矢,由是大敗,元澄走,敬述坐以白衣檢校凉州事,突厥遂大振,盡有默啜餘衆。

然卒不許和親。 斃之,頡利發奉冤頓首賀曰:「陛下神武超絕,若天上則臣不知,人間無有也。」 詔問:「飢欲 謂振曰:「吐蕃,犬出也,唐與爲昏;溪、契丹,我奴而役也,亦尙主;獨突厥前後請,不許, 使召其大臣入衞,乃遣鴻臚卿袁振往諭帝意。 食乎?」對曰:「仰觀弧矢之威,使十日不食猶爲飽。」因令仗內馳射。 扈封畢,厚宴賜遣之, 大臣阿史德頡利發入獻,遂從封禪。有詔四夷諸酋皆入仗佩弓矢,會冤起帝馬前,帝一發 何不可云?且公主亦非帝女,我不敢有所擇,但屢請不得,爲諸國笑。」振許爲請,默棘連遣 云何?」振曰:「可汗,天子子也,子而昏,可乎?」默棘連曰:「不然,二蕃皆賜姓,而得尙主, 愈老而智,李靖、世勣流也,三虜方協,知我舉國東巡,有如乘間,何以禦之?」光庭卽請以 曰:「突厥雖請和,難以信結也。且其可汗仁而愛人,下爲之用,闕特勒善戰,暾欲谷沈雄, 令張說謀 明年,固乞和,請父事天子,許之。又連歲遣使獻方物求婚。 益屯以備突厥,兵部郎中裴光庭曰:「封禪以告成功,若復調發,不可謂成功者。」說 默棘連置酒與可敦、闕特勒、暾欲谷坐帳中, 是時天子東巡泰山,中書

引使者梅錄啜宴紫宸殿,詔朔方西受降城許互市,歲賜帛數十萬。十九年,闕特勒死,使金 自是比年遭大臣入朝,吐蕃以書約與連和鈔邊,默棘連不敢從,封上其書,天子嘉之,

第

百四十下

突

下

吾將軍張去逸、都官郎中呂向奉璽詔弔祭,帝爲刻辭于碑,仍立廟像, 手工六人往,繪寫精肖,其國以爲未嘗有,默棘連視之,必悲梗。 四垣圖戰陣狀,

錄啜 ,夷其種,乃卒。 默棘連請昏旣勤,帝許可,於是遣哥解栗必來謝,請昏期。 帝爲發哀,韶宗正卿李佺弔祭,因立廟,韶史官李融文其碑。 俄爲梅錄啜所毒,忍死殺梅 國人共

立其子爲伊然

可汗。

登 歲獻月,願以萬壽獻天子」云。 利從父分掌東西兵,號左右殺,士之精勁皆屬。 將軍李質持册爲登利可汗。 利 可汗 伊然 可汗立八年,卒。 殺之。 凡遣使三入朝。 明年,遣使伊難如朝正月,獻方物,曰「禮天可汗如禮天, 可汗幼,其母婆匐與小臣飫斯達干亂,遂預政,諸部 其弟嗣立,是爲苾伽骨咄祿可汗, 可汗與母誘斬西殺,奪其兵, 左殺懼,即攻 使右金吾衛 不協。 今新

伊施 施 攻烏蘇米施,米施遁亡。 自 河汗 可汗, 可汗。 左殺者,判闕特勒也,遂立毗伽可汗子,俄爲骨咄葉護所殺,立其弟,旋又殺之,葉護乃 · ,以其子葛臘哆爲西殺。 於是回紇、葛邏祿自爲左右葉護,亦遣使者來告。 天寶初,其大部回紇、葛邏祿、拔悉蜜並起攻葉護,殺之,尊拔悉蜜之長爲頡跌 其西葉護阿布思及葛臘哆率五千帳降,以葛臘哆爲懷恩王 帝使使者諭令內附,烏蘇不聽,其下不與,拔悉蜜等三部共 國人奉判闕特勒子爲烏蘇米

裴羅定其國,是爲骨咄祿毗伽闕可汗。明年,殺白眉可汗,傳首獻。 山,擊其左阿波達干十一部,破之,獨其右未下,而回紇、葛邏祿殺拔悉蜜 率衆自歸,天子御花萼樓宴羣臣,賦詩美其事 於是突厥 始突厥國於後魏大統時,至是滅。 三載,拔悉蜜等殺烏蘇米施,傳首京師,獻太廟。 大亂,國人推拔悉蜜質爲可汗,詔朔方節度使王忠嗣以兵乘其亂, 後或朝貢,皆舊部九姓云,其地盡入回紇。 ,封可敦爲賓國夫人,歲給粉直二 其弟白眉特勒鶻隨匐立,是爲白眉 毗伽可汗妻骨咄祿婆 可汗,奉回紇骨力 抵薩河內 始其族 萬。 可

分國於西者,日西突厥。

與都陸、弩失畢、歌邏祿、處月、處蜜、伊吾諸種雜。其風俗大抵突厥也,言語少異。 西雷翥海,南疏勒,北瀚海,直京師北七千里,由焉耆西北七日行得南庭,北八日行得北庭, 瑟帝米。瑟帝米之子曰達頭可汗,亦曰步迦可汗。始與東突厥分鳥孫故地有之,東即突厥 西突厥,其先訥都陸之孫吐務,號大葉護。 長子日土門伊利可汗,次子日室點蜜,亦日

立大邏便,國人以其母賤,不肯立,而卒立菴羅。 初,東突厥木杆可汗死,舍其子大邏便,而立弟佗鉢可汗。 佗鉢死,先令戒其子菴羅必 菴羅後以讓木杆兄子攝圖,是爲沙鉢略可

列 傳 第

百

十 下

突 厥 下

達頭爲西面可汗,即授阿波兵十萬,使與東突厥戰。而阿波竟爲沙鉢略所禽。及啓民可汗 而大邏便別爲阿波可汗,自臣所部,沙鉢略襲擊之,殺其母,阿波西走達頭。 當是時,

達頭可汗歲以兵相加,而隋常助啓民,故達頭敗奔吐谷渾。

也。」 瓊據甘州誘之,俄與瓊合,共擊賦,兵不勝,走達斗拔谷,與吐谷渾相輔車,爲軾所 長安,高祖降榻與共坐,封歸義王,以大珠獻帝,帝不受,曰:「朕所重者王之赤心,是無用 留其弟闕達度設畜牧於會寧郡,卽自稱闕可汗。 立,是爲泥橛處羅可汗,政苛察多忌。大業中,從煬帝征高麗,賜號曷薩那可汗,妻以宗女, 彌山 闕 始,阿波旣禽,國人立鞅素特勒子,是爲泥利可汗。達頭之奔,泥利亦敗,及死,其子達漫 初 ,曷薩那朝隋,國人皆不欲,旣被留不遣,乃共立達頭孫,號射匱可汗,建廷 |可汗有馬三千,|武德元年內屬,賜號吐烏過拔闕可汗,與李軌連和。 ,玉門以西諸國多役屬,與東突厥亢。 射匱死,其弟統葉護嗣,是爲統葉護可汗。 江都亂,曷薩那從宇文化及至黎陽,遁歸 隋西戎使者曹 龜茲北之

統葉護可汗勇而有謀,戰輒勝,因幷鐵勒,下波斯、罽賓,控弦數十萬,徙廷石國北之千

曷薩那有世憾,請殺之,帝不許。 西域 人諸國 ,悉授以頡利發,而命一 羣臣曰:「存一人,失一國,後且爲患。」 秦王曰:「不然,人 吐屯監統,以督賦入。 明年, 射匱使使來(三),以

道,我且留之。」統葉護可汗病之,未克昏。 之。」帝乃許昏,詔高平王道立至其國,統葉護可汗喜,遣眞珠統俟斤與道立還,獻萬釘寶 賀咄殺之,帝欲齎玉帛焚祭其國,會亂,不果至。 大懼,乃與和,約毋相伐也。統葉護可汗來請昏,帝與羣臣謀:「西突厥去我遠,緩急不可杖, 連年係貢條支巨卵〔三〕、師子革等,帝厚申撫結,約與抖力討東突厥。統葉護可汗請期,頡利 來歸我,我殺之不祥。」帝又不聽。 金帶、馬五千匹以藉約。 可與昏乎?」封德彝曰:「計今之便,莫若遠交而近攻,請聽昏以怖北狄,待我旣定,而後圖 會東突厥歲犯邊,西道 宴禁中,酒酣,至中書省,縱使者戕之,不宜也。 方負其疆,不以恩結下,衆怨,多叛去,其諸父莫 一梗澀,又頡利遣謂曰:「若迎唐公主,必假我 射匱亦 鈿

勒 可汗 爲泥孰所殺,奉肆葉護爲大可汗。 叛之,國大虛耗,衆悉附肆葉護可汗,雖俟毗之部亦稍稍去,共以兵擊俟毗,俟毗走保金山 汗請昏,不許,詔曰:「突厥方亂,君臣未定,何遽昏爲?各敕其部毋相侵。」由是西域諸國悉 鬭 避莫賀咄亂,亡在康居,泥孰迎立之,爲乙毗鉢羅肆葉護可汗,與俟毗可汗分王其國, 不解,各遣使朝獻。 ,國人不附。 莫賀咄立,是爲屈利俟毗可汗,遣使者來獻。 弩失畢部自推泥孰莫賀設爲 太宗追憐曷薩那死非罪,爲贈上柱國,具禮以葬。 可汗,泥孰辭不受。 俟毗可汗初分統突厥爲小可汗, 會統葉護可汗子咥力特 貞觀四年,俟毗 旣稱大 山

列

謂 沒 於國 號吞阿婁拔 而 之,是爲咄陸 泥孰 卑達干與弩失畢部諸豪謀執廢肆葉護,葉護輕騎走康居,憂死。 長孫无忌 最 肆 葉護 代之,或曰伽那設。 有 功 巨立 利邲咄陸 ,肆葉護聽讒,種夷之,衆皆沮駭。 曰:「今蠻夷率服,古亦有乎? 可汗。 ,即北討鐵勒、薛延陀,爲延陀所敗。 可汗父莫賀設,本隸統葉護者,武德時來朝,太宗與之盟,約爲 可汗,賜鼓纛,段綵巨萬。 旣立, 遣使諂闕, 」无忌上千萬歲壽,太上皇喜, 不敢當可汗號。 又忌 泥孰遣使謝。 泥孰,陰圖殺之,泥孰亡入焉耆。 性猜愎, 狹於統下。 它日 帝 韶鴻臚少卿劉善因持節册 ,太上皇宴使者兩儀殿, 國人迎泥敦 以酒屬帝, 小 可汗乙利者, 於焉耆, 足弟。 帝頓首 未幾, 立 死

號 不俞 立欲谷設爲乙毗咄陸 利 咥 陸部,置五大啜,居碎葉東; 失 利 爲 姓部 失與其弟步利 咄 陸 小 可汗分其國爲十部,部以一人統之,人授一箭,號十設,亦日十箭。 可 可开 汗。 死,弟同俄設立,是爲沙鉢羅 會統 然不爲衆悅賴,其部統吐屯以兵襲之,咥利失率左右戰, 設 吐屯 奔焉耆。 可汗,而與咥利失交戰,殺傷不可計,乃因伊列河約諸部:河以西受令 被殺、欲谷設又爲其俟斤所破,咥利失乃復得故地。 右五 阿悉吉闕俟斤與統吐屯召國人謀立欲谷設爲大可汗, 一弩失畢部,置五大俟斤,居碎葉西。其下稱一箭日一 :咥利失可汗,歲三遣使奉方物, 爲左、右 **遂**請 統吐屯不勝去。 後 香, 西部 帝 左 部 以咥 五叫 卒自 慰而

謝,亦奉觴上太上皇壽。

於咄陸,其東咥利失主之。 自是西突厥又分二國矣。

踰年死。 列發以兵攻咥利失。 且末、吐火羅、焉耆、石、史、何、穆、康等國皆隸屬。 領軍將軍張大師持節册命,賜鼓纛,建庭雖合水北,謂之「南庭」,東薄伊列河,龜茲、鄯善 昢 陸可汗建廷鏃曷山西,謂之「北庭」,駮馬、結骨諸國悉附臣之,陰與咥利失部吐屯俟 弩失畢大會迎伽那設之子畢賀咄葉護立之,是爲乙毗沙鉢羅葉護可汗。太宗詔左 咥利失援窮,奔拔汗那而死。 國人立其子,是爲乙屈利失乙毗可汗,

否?」遂與共攻康居,道米國,即襲破之,係虜其人,取貲口不以與下,其將泥敦啜怒,奪取 汗性很傲,留使者元孝友等不遣,妄曰:「我聞唐天子才武,我今討康居,爾視我與天子等 取之,乃入寇伊州。 咄陸不肯聽,遣石國吐屯攻葉護可汗,殺之,幷其國。弩失畢不服,叛去。咄陸又擊吐火羅 亡,阿悉吉闕俟斤逆擊之,咄陸敗,襲取白水胡城以居。弩失畢不欲咄陸爲可汗,遣使者至 大臣勸其返國,不從,率衆去,度葉水,及石國,左右亡去略盡,乃保可賀敦城。自輕出招叛 之,咄陸斬以徇。泥孰啜之將胡祿屋舉兵襲咄陸可汗,多殺士,國大亂(1),將歸保吐火羅 圍天山而不克,孝恪追北,拔處月俟斤之城,抵遏索山,斬千餘級,降處蜜部而歸。咄陸可 是時咄陸兵寖盛,與沙鉢羅葉護數交戰。會二可汗使者皆來,帝敕以敦睦,令各罷兵, 安西都護郭孝恪以輕騎二千,自鳥骨狙擊,敗之。咄陸以處月、處蜜兵

列

儜

唐

闕下,請所立。 帝遣 通 事 舍人温無隱持璽韶與國大臣擇突厥可汗子孫賢者授之,乃立乙屈

利失乙毗可汗之子,是爲乙毗射匱可汗。

猶不從也。」咄陸自知衆怨,乃走吐火羅。乙毗射匱遣使貢方物,且請昏,帝令割龜茲、于闐、 鳴 疏勒、朱俱波、葱嶺五國爲聘禮,不克昏。 鼓 |角薄鬭,弩失畢不能軍,殺獲甚多。 乙毗 射匱旣立,改館使者,悉還之長安,使弩失畢將兵攻白水胡城。 咄陸因其勝招徠舊部, 於是阿史那賀魯反,盡得可汗部落。 皆曰:「戰千人,存一人,我 咄陸勒兵自城出,

數千帳,與賀魯皆內屬,帝優撫之。會討龜茲,請先馳爲向導,詔授崑丘道行軍總管,宴嘉 舍地、處木昆、婆鼻三種者,以賀魯無罪,往請可汗,可汗怒,欲誅執舍地等,三種乃舉所部 **弩失畢五姓之衆。咄陸之走吐火羅也,乙毗射匱以兵迫逐,賀魯無常居,部多散亡。** 壽殿,厚賜予,解衣衣之。 可汗以賀魯爲葉護,代步眞,居多邏斯川,直西州北千五百里,統處月、處蜜、姑蘇、歌邏祿、 幕益衆。 賀魯者,室點蜜 可汗五世孫,曳步利設射匱特勒劫越子也。始,阿史那步眞來歸國 **擢累左聽衞將軍、瑤池都督,處其部於庭州莫賀城,密招攜散,廬** 一、咄陸 有執

方帝崩,即謀取西、庭二州,刺史駱弘義以聞,高宗遣通事舍人喬寶明馳撫,因令賀魯

等攻之,衆潰,追行五百里,斬孤注,上首九千級,虜其帥六十,不如弘義所計。 憑洛水上爲之景助,此驅戎狄攻豺狼也。 |魯窮矣。」天子然其奏,詔弘義佐建方等經略之。 除禍務本,不可先治枝葉也。 兵苦皸墮,又不可久留費邊糧,使賊得堅黨附、賒死期也。 積 兵本誅賀魯,而處蜜、處木昆等亦各欲自免,若留不進,彼與賀魯復合矣。今雖嚴冬風勁, 騎五萬擊之。 力爲弓月道行軍總管,右聽衞將軍高德逸、右武衞將軍薩孤吳仁副之,發府兵三萬,合回紇 啜, 遭子咥運入宿衞。 五俟斤,曰阿悉結闕俟斤、哥舒闕俟斤、拔塞幹暾沙鉢俟斤、阿悉結泥孰俟斤、哥舒處半俟 而 雪,謂唐兵必不來,宜乘此一舉滅之。遷延及春,且生變,縱不率連諸國,必遠迹遁去。且 西,取咄陸可汗故地,建牙於千泉, 而胡祿 曰處木昆律啜、胡祿屋闕啜、攝舍提暾啜、突騎施賀邏施啜、鼠尼施處半啜。 遂寇庭州 啜闕(至),賀魯婿也。 駱弘義獻計曰:「安中國以信,馭夷狄以權,理有變通也。 , 敗數縣, 殺掠數千人去。 咥運)中悔,劫於勢,不得去,拜右驍衞 願發射脾、處月、處蜜、契苾等兵,齎一月食,急趨之,大軍住 阿悉結闕俟斤最盛彊,勝兵至數十萬。 自號沙鉢羅可汗, 遂統 且戎人藉唐兵爲羽翼,今胡騎出前,唐兵躡後,賀 韶左武衞大將軍梁建方、右驍衞大將軍契苾何 處月朱邪孤注者,引兵附賊,據牢山,建方 中郎將。 請寬處月、處蜜等罪,專誅賀魯, 咄陸、弩失畢十姓。 帝遭還,咥運即勸賀魯引 賀魯保 一城, 方寒 以咥運爲莫賀咄 咄陸 弩失畢有 有五

列

第

前。 萬 文 管 度 明 前 永 徽 年 不 軍 쬭 肯 蘇 , DU 諸將 知 戦 定方擊賀魯別 降 撃 進 馧 歌邏祿、 討 瑤 怛篤城,取其財 池 是歲 都督 處月 偃鼠 府 咄 尼施 陸 ,斬千級,收馬萬計。 卽處月置 可汗死 屠之, 于鷹娑川 知節 ,其子眞珠 金滿州, ,斬首 不能 制 又遣左 1虜獲馬 葉護請討賀魯自效, 副 將 屯衞大將軍程 周 甚 智度擊處木昆城 衆, 賊棄鎧仗彌 爲賀 知節爲葱 野。 ,拔之,斬馘三 魯所拒 會 山道 副 總 不 得 軍

潰,追 里, 功, 瀚海 沙道 大 Ш 卒據原, 退,破之。 陸 雪, 陣而 安撫 聞 都 顯 奔數 軍 策 賀 督 慶 中 欑 行,抵金牙山。 也 魯 大使, 口 初 請 稍 賀 敗 7, 擢 **紇婆閏等窮討。** 於 外注, 魯舉 里 須 是 分出 一, 俘 定方伊麗道 霽,定方日:「今雾晦 趨 南道 晝夜進,收所 十姓兵 自以 斬三萬 金山 降 騎 賀魯衆適獵,定方兵縱破其牙,俘數萬人,獲鼓纛器械,賀魯跳度伊 步真。 道 + 陣 人,殺其大酋都搭達干等二百 萬騎來 行 , 於北。 韶右屯 俟斤嫩獨 軍 過 定方 大總管, 拒 畜 風 賀魯先擊原 衛大將 命嗣 , 冽,虜 定方以萬 減線等萬 至 率 燕 雙河 軍 謂 婆閨 印 然 餘 我 興 上 都 史 人當之,虜見兵少,以 帳 不 . 趨 軍 護 彌 那 能師 迎 邪羅 射、 任 降。 彌 射 雅相、 犯, 步眞 人。 掩其不 斯 定方 Л 左屯 軍 明日 會, 副 追 不動。 以精騎至 都 虜 庭 衞 軍 護蕭嗣業、左驍衛 躃 2. 大將 可 任雅 飽 北 也,緩 騎 定方縱 氣 , 五弩 繞 軍 張 相 曳 唐 阿 咥 提 則 距 失 畢 軍 史那 降 騎 河 遠矣 賀魯 乘之, 兵 酉 皆降。 定方令步 步 、踵後。 擊 眞 牙 省 大 虜 處 將 日 百 五

不進,衆飢,齎寶入城,且市馬,城主伊涅達干迎之,旣入,拘送石國。會彌射子元爽與嗣業 爾射攻之,潰,定方追賀魯至碎葉水,盡奪其衆。賀魯、咥運將奔鼠耨設,至石國蘇咄城, 嗣業次千泉,彌射至伊麗,處月、處蜜諸部皆下。次雙河,賀魯先以步失達干據栅戰,

陛下奉園寢與宗廟等,可行不疑。」於是執而獻昭陵,赦不誅。 獻昭陵其可乎?」許敬宗曰:「古者,軍凱還則飮至于廟。若諸侯獻馘天子,未聞獻于陵。然 人必都市,我願就死昭陵,謝罪於先帝也。」帝曰:「先帝賜賀魯二千帳主之,今罪人旣得, 賀魯謂嗣業曰:「我,亡虜也,先帝厚我,我則背之,今天降怒罰,尙何道? 且聞漢法殺

兵至,取之。乃悉散諸部兵,開道置驛,收露胔,問人疾苦,賀魯所掠悉還之民,西域平。

置州,西盡波斯,並隸安西都護府。以阿史那彌射爲興昔亡可汗,兼驃騎大將軍、崑陵都 帛十萬,以光祿卿盧承慶持册命之。 護,領五咄陸部,阿史那步眞爲繼往絕可汗,兼驃騎大將軍、濛池都護,領五弩失畢部,各賜 都督府,鼠尼施處半部爲鷹娑都督府,又置崑陵、濛池二都護府以統之。其所役屬諸國皆 鹿都督府,突騎施阿利施部爲絜山都督府,胡祿屋闕部爲鹽泊都督府,攝舍提暾部爲雙河 賀魯已滅,裂其地爲州縣,以處諸部。木昆部爲匐延都督府,突騎施索葛莫賀部爲唱 質魯死,詔葬頡利冢旁,紀其樂於石。

奚利 **眞皆爲可汗,得補所部刺史以下。** 等入 屯衞大將軍。 朝 邲咄陸 **SP** . 史那 ,拜右監門衞大將軍。 而步眞遂自爲咄陸葉護,衆不厭,去之,亦與族人來朝,拜左 彌射,亦室點蜜可汗五世孫,世爲莫賀咄葉護。 可汗,賜鼓纛。 彌射從帝征高麗有功,封平壤縣伯云,遷右武衞大將軍。 族兄步眞謀殺彌射,欲自立,彌射不能國,即舉所部處月、 。是歲,彌射擊眞珠葉護於雙河,斬之,殺闕啜二人。 貞觀中, 遣使者持節立彌 及平賀魯,乃與步 處蜜 射爲

闖 部鼠尼施、拔塞幹叛走,海政追平之。步眞死乾封時。 不能察,即集軍吏計議先發誅之,因稱詔發所齎賜可汗首領,彌射以麾下至,悉收斬之。其 爾射、步眞以兵從風海道總管蘇海政討龜茲,步眞怨彌射,且欲丼其部,乃誣以謀反。 , 韶左驍衞大將軍蘇定方討之,都曼兵保馬頭川。 五年,定方傅其城,擊降之。 龍朔二年, 爾射、步眞無綏御材,下多怨,於是思結都曼率疏勒、朱俱波、喝槃陀三國叛,擊破于

中,都支自號十姓可汗,與吐蕃連和,寇安西,詔吏部侍郎裴行儉討之。行儉請毋發兵,可 禽之,召執諸部渠長,降別帥李遮匐以歸,調露元年也。 咸亨二年,以西突厥部酋阿史那都支爲左驍衞大將軍兼匐延都督,以安輯其衆。 卽詔行儉册送波斯王子,并安撫大食,若道兩蕃者。 都支果不疑,率子弟上謁,遂 儀鳳

西姓自是益衰,其後二部人日離散。 途擢<u>彌射子元慶爲左玉鈴衞將軍,步眞子步利設</u>

武 斛瑟羅爲右玉鈴衞將軍 后 擅命,率諸蕃長請賜睿宗氏曰武,更號斛瑟羅曰竭忠事主可汗。 ₽, 盡襲父所領及可汗號。 元慶累拜鎭國大將軍、 長壽中, 元慶坐謁皇 行左 一威衞 大將軍

嗣,爲來俊臣所誣,要斬,流其子獻于振州。

領谷, 城。 了,斛瑟羅不敢歸,與其部人六七萬內遷 死長安,擢子懷道爲右武衞將軍 聖曆二年, 其明年,西突厥部立阿史那俀子爲可汗,與吐蕃寇,武威道大總管王孝傑與戰冷泉、大 破之,碎葉鎭守使韓思忠又破泥熟俟斤及突厥施質汗、胡祿等,因拔吐蕃泥熟沒斯 以斛瑟羅爲左衞大將軍兼平西軍大總管,令撫鎭國人。是時鳥質勒兵張

施 故 護。 屬,爲默啜侵掠,以獻爲定遠道大總管,與北庭都護陽嘉惠等掎角。 攻之,此夷狄 姓 一吸蘇 獻 漸之,傳首闕下,收碎葉以西 葛邏 乞益 四年,以懷道爲十姓可汗兼濛池 長安中, 祿 禄 爲 師,身入朝,玄宗不許。 順 兵與獻共擊之。 自 以阿史那獻爲右驍衞大將軍,襲興昔亡可汗、安撫招慰十姓大使、北庭大都 國公,而突騎施已圍撥換、大石 1相殘, 非朝 廷出 帝將 也。 . 帳落三萬內屬, 詔左武 詔王惠 大者傷, 都護。 與相經略, 衛中郎將王惠持節安尉。 小者滅, 未幾,擢獻磧西節度使。 城 **璽**書嘉慰。 將 取四鎮。 宰相臣璟、臣頲曰:「突騎 皆我之利。 葛邏祿、胡屋、鼠尼施三姓已內 會嘉惠拜安西 方王惠往撫慰,不可參以 方册 於是突騎施陰幸邊隙, 十姓部落都擔叛,獻 拜突騎施都督車鼻 副 施 大 叛, 都護,卽 葛 邏 祿

列

傳

第

百四四

+

下

突厥

下

唐

兵 (事。]乃止。 獻終以娑葛彊狠不能制,亦歸死長安。

夫人 其子忠孝亡歸,授左領軍衞員外將軍,西突厥遂亡。 突騎 施 吐火仙之敗,始以懷道子明爲十姓 可汗、開府儀同三司、濛池都護,册其 爲突騎施莫賀達干所殺,交河公主與 、妻凉 國

牙, 隸 斛瑟羅 ,乃置二十都督,督兵各七千,屯碎葉西北。 弓月城、伊麗水爲小牙,其地東鄰北突厥 突騎 施鳥質勒,西突厥別部也。 ,爲莫賀達干。 斛瑟羅政殘,衆不悅,而鳥質勒能撫下,有威信,諸胡順 自賀魯破滅,二部可汗皆先入侍,廣無的君。 西諸胡, 稍攻得 東直 |碎葉,即徙其牙居之,謂||碎葉川 西、庭州 。盡幷斛 瑟羅 附 ,帳落寖 烏質 勒

其將 册 願 唱 命 無入朝,請導吐蕃擊娑葛以報。楚客方專國,即以御史中丞馮嘉賓持節經制。嘉賓與忠節 鹿 闕啜忠節交怨,兵 州 賜宮人四。 都督娑葛 |年,遺子|遮弩來朝,武后厚加 為左驍衞大將軍,襲封爵。 景龍 相 中,遣使者入謝,中宗爲 加暴。 娑葛 訟忠節罪,請內之京師。 湯無。 是時勝兵三十萬,韶十姓可汗阿史那懷道 御前 神龍 殿, 中, 列萬騎羽林二仗, 封懷德郡王。是歲 忠節以 千金路宰相宗楚客等 引見勞賜。 烏質 、勒死, 其子 俄 持 與

敗,死之,表索楚客頭以徇。大都護郭元振表娑葛狀直,當見赦,詔許,西土遂定。 書疏反復,娑葛邏得之,遂殺嘉賓,使弟遮弩率兵盜塞。 安西都護牛師獎與戰火燒城,師獎

兵二萬擊娑葛,禽之。默廢歸語遮弩曰:「汝兄弟不相協,能盡心事我乎?」兩殺之。 旣而與遮弩分治其部,遮弩恨衆少,叛歸默啜,請爲鄉導反攻其兄。默啜留遮弩,自以

脉使者西席,乃克宴。 以阿史那懷道女爲交河公主妻之。是歲,突騎施鬻馬於安西,使者致公主敎於都護杜暹, 略大使。然詭猾,不純臣于唐,天子羈係之,進號忠順可汗。其後閱一二歲,使者納贄,帝 武衞中郎將王惠持節拜蘇祿左羽林大將軍、順國公,賜錦袍、鈿帶、魚袋七事,爲金方道經 遇方入當國,而趙頤貞代爲都護,乘城久之,出戰又敗。 |暹怒日:「阿史那女敢宣教邪?」答其使,不報。|蘇祿怒,陰結吐蕃舉兵掠四鎮,圍安西城。 相,乃引去,卽遣首領葉支阿布思來朝,玄宗召見,饗之。會東突厥使者亦來,與爭長曰: 二十萬,於是復雄西域。開元五年,始來朝,授右武衞大將軍、突騎施都督,却所獻不受。以 突騎施國小,且突厥臣,不宜居上。」蘇祿使者曰:「宴乃爲我,不可下。」遂設東西幄,而蘇 突騎施別種車鼻施啜蘇祿者,衰拾餘衆,自爲可汗。蘇祿善撫循其下,部種稍合,衆至 蘇祿略人畜,發囷貯, 徐聞暹已宰

列傳第

百四四

十 下

突

厥下

愁窶不聊,故鹵獲稍留不分,下始貳矣;叉病風,一支攣,不事事。 , 二國皆以女妻之, 遂立三國女並爲可敦, 以數子爲葉護。 蘇祿愛治其人,性勤 「約,每戰有所得,盡以予下,故諸族附悅之,爲盡力。 費日廣而無素儲 於是大首領莫賀達干、 又交通吐

都摩支二部方盛,而種人自謂娑葛後者爲「黃姓」,蘇祿部爲「黑姓」,更相猜讎

爲特進,顯醻其功。 落附安西,永爲外臣。」許之。明年,擢闕律啜爲右驍衞大將軍,册石王爲順義王,加拜史王 謝曰:「生於荒裔,國亂王薨,更相攻屠。賴天子遣嘉運將兵誅暴拯危,願得稽首聖顏,以部 而 汗那王掩怛邏斯城,斬黑姓可汗與其弟撥斯,入曳建城,收交河公主及蘇祿可敦、爾徼可敦 破之碎葉城。 突騎施、拔汗那西方諸國。莫賀達干與嘉運率石王莫賀咄吐屯、史王斯謹提共擊蘇祿子, 汗,

居碎葉城,引黑姓可汗爾微特勒保怛邏斯城,共擊達干。

帝使債西節度使蓋嘉運和撫 曰:「平蘇祿,我功也。 還,又料西國散亡數萬人,悉與拔汗那王。諸國皆降。 阿波爲右 俄 而莫賀達干、 武衞員外將軍。 吐火仙棄旗走,禽之,并其弟葉護頓阿波。疏勒鎭守使夫蒙靈詧挾銳兵與拔 嘉運俘吐火仙骨啜獻太廟,天子赦以爲左金吾衞員外大將軍、脩義王, 都摩支夜攻蘇祿,殺之。都摩支又背達干立蘇祿子吐火仙骨啜爲可 今立昕,謂何?」 以阿史那懷道子昕爲十姓 即誘諸落叛。 可汗,領突騎施所 詔嘉運招諭, 乃率妻子及纛官首領 處木昆匐延闕律啜等諸部皆上書 部,莫賀達干怒

降,遂命統其衆。 後數年,復以昕爲可汗,遣兵護送。
昕至俱闡城,爲莫賀咄所殺。 莫賀咄

自爲可汗,安西節度使夫蒙靈詧誅斬之,以大纛官都摩支闕頡斤爲三姓葉護。

天寶元年,突騎施部更以黑姓伊里底蜜施骨咄祿毗伽爲可汗,數通使貢。十二載,黑姓

部立登里伊羅蜜施爲可汗,亦賜詔册。

羅餘部附回鶻。及其破滅,有特處勒居焉耆城,稱葉護,餘部保金莎領,衆至二十萬。 阿多裴羅猶能遣使者入朝。大曆後,葛邏祿盛,徙居碎葉川,二姓微,至臣役於葛祿, 至德後,突騎施衰,黃、黑姓皆立可汗相攻,中國方多故,不暇治也。乾元中,黑姓可汗

以來,伐暴取亂,蔑如帝神且速也,秦、漢比之,陋矣。然帝數暴師不告勞,料敵無遁情, 勒兵,顯責而陰間之,戎始內阻。 可計。 邊,故賦利自以爲彊大古無有也。 四夷侵,中國微,而突厥最疆,控弦者號百萬,華人之失職不逞皆往從之,恭之謀,導之入 虜見 (日:隋季世,虚內以攻外,生者罷道路,死者暴原野,天下盜賊共攻而亡之。 當此時, 利而動,又與賊連和,殺掠吏民,於是掃國入寇,薄渭橋, 不三年,縛頡利獻北闕下,霆掃風除,其國遂墟。 高祖初即位,與和,因數出軍助討賊,故詭臣之,贈予不 騎壒蒙京師。 自詩 太宗身 [書

F

傳第

百

四十下

突

厥下

校勘記

任將,必其功,蓋黃帝之兵也。 而突厥乃以失德抗有道,寖衰當始興,雖運之盛衰屬于天,

校勘記

而其亡信有由矣

- (二)以女婆匐爲默棘連可敦 「婆匐」,金石萃編卷一〇〇王忠嗣碑、 冊府卷九八六作「娑匐」。
- 明年射匱使使來 通鑑卷一八七作「北突厥」。 「射匱」,舊書卷一九四下突厥傳及通典卷一九九作「始畢」,唐會要卷九四及 按本卷上文旣云射匱已死,此當有誤。
- 을 -射匱亦連年係貢條支巨卵 遣使買條支巨卵」。 據本卷上文,射匱已死。此處「射匱」當爲「統葉護」之訛 舊書卷一九四下突厥傳及通典卷一九九俱承統棄護事蹟書 武德
- (1) 泥孰啜之將胡祿屋舉兵襲咄陸可汗多殺士國大亂 俱云:「(咄陸)尋爲泥熟啜部將胡祿屋所襲,衆多亡逸,其國大亂。」則「多殺士,國大亂」者乃咄 按舊書卷一九四下突厥傳及通典卷一九九
- 完 舊書 胡祿啜闕 卷一九四下突厥傳及寰宇記卷一九七作「胡祿居闕啜」。 汲、局本同,殿本「啜」作「屋」。 按通典卷一九九及本卷上下文均作「胡滕屋闕啜」。

陸

而非胡祿屋。此處「咄陸可汗」下疑有省脫。

八次 封平壤縣伯 「平壤」,舊書卷一九四下突厥傳、通典卷一九九、寰宇記卷一九七均作「平襄」。

唐書卷二百一十六上

列傳第一百四十一上

吐蕃上

盤所滅。 通。 日吐蕃,而姓勃窣野。或日南凉秃髮利鹿孤之後,二子,日樊尼,日傉檀。 居析支水西。 吐蕃本西羌屬,蓋百有五十種,散處河、湟、江、岷間,有發羌、唐旄等,然未始與中國 樊尼挈殘部臣沮渠蒙遜,以爲臨松太守。蒙遜滅,樊尼率兵西濟河,逾積石,遂撫 祖曰鶻提勃悉野,健武多智,稍抖諸羌,據其地。,蕃、發聲近,故其子孫 **傉檀嗣**,爲乞佛熾

相曰論茝扈莽,各一人,亦號大論、小論;都護一人,曰悉編掣逋;又有內大相曰囊論掣 ` 亦曰論莽熱,副相曰爨論覓零逋,小相曰爨論充,各一人;又有整事大相曰喻寒波掣 其俗謂彊雄曰贊,丈夫曰普,故號君長曰贊普,贊普妻曰末蒙。其官有大相曰論茝,副

有羣羌云。

列傳

第一百四十一上

吐審

上

地爲 冰。 百里一驛,有急兵,驛人臆前加銀鶻,甚急,鶻益多。告寇舉烽。 以桑門參決。 **犛牛,使客自射,乃敢饋。其俗,重鬼右巫,事羱羝爲大神。喜浮屠法,習呪詛,國之政事,必** 爲鞭抶之,從喜怒,無常算。其獄,窟地深數丈,內囚于中,二三歲乃出。其宴大賓客,必驅 死,葬爲冢,壁塗之。其東治,無文字,結繩齒木爲約。其刑,雖小罪必抉目,或則、劓,以皮 其獸,犛牛、名馬、犬、羊、彘,天鼠之皮可爲裘,獨峯駝日馳千里。其寶,金、銀、錫、銅。 銅止,差大小,綴臂前以辨貴賤。屋皆平上,高至數丈。其稼有小麥、青魓麥、蕎麥、營豆。 酪丼食之,手捧酒漿以飲。其官之章飾,最上瑟瑟,金次之,金塗銀又次之,銀次之,最下至 帳以居,號大拂廬,容數百人。其衞侯嚴,而牙甚隘。部人處小拂廬,多老壽至百餘歲者。 逋, 衣率氈章,以赭塗面爲好。婦人辮髮而縈之。其器屈木而韋底,或氈爲槃,凝麨爲盌,實羹 西八千里,距鄯善五百里,勝兵數十萬。 副整事日喻寒覓零逋,小整事日喻寒波充:皆任國事,總號日尙論掣逋突瞿。 地有寒癘,中人輒痞促而不害。其贊普居跋布川,或邏娑川,有城郭廬舍不肯處,聯毳 犬號,再揖身止。居父母喪,斷髮、黛面、墨衣,旣葬而吉。 重兵死,以累世戰沒爲甲門,敗懦者垂狐尾於首示辱,不得列于人。 多佩弓刀。飲酒不得及亂。 國多霆、電、風、雹,積雪,盛夏如中國春時,山谷常 婦人無及政。貴壯賤弱,母拜子,子倨父,出入前 其舉兵, 以七寸 其畜牧,逐水草無常所。 金箭爲契。 拜必手据 地直京師

其鎧 毎戦 爲祠所。 其君臣自爲友,五六人曰共命。 ,前**除盡死**,後**除**乃進。 [冑精良,衣之周身,竅兩目,勁弓利刃不能甚傷。 凡牲必折足裂腸陳于前,使巫告神曰:「渝盟者有如牲。」 **贊普與其臣歲一小盟,用羊、犬、猴爲牲;三歲一大盟,夜肴諸壇,用人、馬、牛、閭** 其四時,以麥熟爲歲首。 。君死,皆自殺以殉,所服玩乘馬皆瘞,起大屋冢顚,樹衆木 '其戲,棊、六博。 其樂,吹螺、擊鼓。 其兵法嚴,而師無餽糧,以鹵獲爲資。

渃,詎素生論贊索,論贊生棄宗弄贊,亦名棄蘇農,亦號弗夜氏。 其爲人慷慨才雄,常驅野 馬、犛牛,馳刺之以爲樂,西域諸國共臣之。 其後有君長日瘕悉董摩,董摩生化土度,伦土生揭利失若,揭利生勃弄若,勃弄生証素

賊。 虚 尙公主,乃遣使齎幣求昏,帝不許。使者還,妄語曰:「天子遇我厚,幾得公主,會吐谷渾王 主,謂左右曰:「公主不至,我且深入。」都督韓威輕出覘賊,反爲所敗,屬羌大擾,皆叛以應 入朝,遂不許,殆有以間我乎?」弄贊怒,率羊同共擊吐谷渾,吐谷渾不能亢,走青海之陰, 取其貲畜。又攻党項、白蘭羌,破之。勒兵二十萬入寇松州,命使者貢金甲,且言迎公 乃詔吏部尚書侯君集爲行軍大總管,出當彌道,右領軍大將軍執失思力出白蘭道,右 太宗貞觀八年,始遣使者來朝,帝遣行人馮德遐下書臨撫。弄贊聞突厥、吐谷渾並得

列

百

四十

— 上

吐

上

武衞 大將軍牛進達出闊水道,右領軍將軍劉蘭出洮河道,並爲行軍總管,率步騎五萬進討。

進達自松州夜鏖其營,斬首千級。

者來謝罪,固請香,許之。 初 東寇也,連歲不解,其大臣請返國,不聽,自殺者八人。 至是弄贊始懼,引而去,以使 遣大論薛祿東贊獻黃金五千兩(1),它寶稱是,以爲聘。

褫 氈 罽,襲 紈 綃,爲 華 風。 者,乃爲公主築一城以夸後世,遂立宮室以居。公主惡國人赭面,弄贊下令國中禁之。 柏海親迎,見道宗,執婿禮恭甚,見中國服飾之美,縮縮媿沮。歸國,自以其先未有昏帝女 + 五 一年,妻以宗女文成公主,詔江夏王道宗持節護送,築館河源王之國。 遣諸豪子弟入國學,習詩、書。 又請儒者典書疏 弄贊率兵次 自

鈔, 禮, 爲鵝以獻。」其高七尺,中實酒三斛。 弄贊發精兵從玄策討破之,來獻俘。 天子自將度遼,隳城陷陣,指日凱旋,雖鴈飛于天,無是之速。 帝伐遼還,使祿東贊上書曰:「陛下平定四方,日月所照,並臣治之。 二十二年,右衛率府長史王玄策使西域, 夫鵝猶鴈也 高麗恃遠,弗率於 」,臣謹 爲中天竺所 冶黄 金

酒人與碾磑等諸工,韶許。 願勒兵 高宗即位 、赴國 擢駙馬都尉、 「共討之。」 「共計之。」 永徽初,死, 遣使者弔祠。 井獻金琲十 西海郡王。 五種以薦昭陵。 弄贊以書詒長孫无忌曰:「天子初卽位,下有不忠 無子,立其孫,幼不事, 進封賓王, 賜銄 蕃渥 故祿東贊相 又請蠶 種

軍蘇定方爲安集大使,爲諸將節度,以定其亂。吐蕃使論仲琮入朝,表吐谷渾罪,帝遣使者 **譙讓,乃使來請與吐谷渾平憾,求赤水地牧馬,不許。 會祿東贊死。** 而吐谷渾大臣素和貴奔吐蕃,恭以虛實,故吐蕃能破其國。慕容諾曷鉢與弘化公主引殘落 走凉州, 顯慶三年,獻金盎、金頗羅等,復請昏。未幾,吐谷渾內附,祿東鸞怨忿,率銳兵擊之, 韶凉州都督鄭仁泰爲青海道行軍大總管,率將軍獨孤卿雲等屯凉、漸,左武候大將

論。 公主,陪臣敢辭!」帝異其言,然欲懷以恩,不聽也。有子曰欽陵、曰贊婆、曰悉多于、曰勃 拜右衞大將軍,以琅邪公主外孫妻之。。禄東贊自言:「先臣爲聘婦,不敢奉詔。 且贊普未謁 職東贊死,而兄弟並當國。自是歲入邊,盡破有諸羌羈螺十二州。 東贊不知書而性明毅,用兵有節制,吐蕃倚之,遂爲彊國。始入朝,占對合旨,太宗擢

存,後且徐圖可也。」議不決,亦不克徙。 然,吐谷渾方衰,吐蕃負勝,以衰氣拒勝兵,戰必不亢,不救則滅。臣謂王師亟助之,使國幸 伏,捕討無所得,至春復侵吐谷渾。臣請勿救,使疑吾力困而驕之,一舉可滅也。」恪曰:「不 何力等議先擊吐蕃。 立本日:「民飢未可以師。」何力日:「吐蕃介在西極,臣恐師到,獸竄山 總章中,議徙吐谷渾部于涼州旁南山。帝刈吐蕃之入,召宰相姜恪閻立本、將軍契苾

僔

第一百四十一上

吐

蕃上

討吐 將軍 盡有其地。 蕃 薛仁貴爲邏娑道行軍大總管,左衞員外大將軍阿史那道眞、左衞將軍郭待封 咸 亨元 ,丼護吐谷渾還國。 年,入殘羈縻十八州,率于闐取龜茲撥換城,於是安西四鎮並廢。 韶司戎太常伯、同東西臺三品美恪爲凉州道行軍大總管出討,會恪卒,班 師凡十餘萬,至大非川,爲欽陵所拒,王師敗績,遂滅吐谷渾 韶右威衞 自 副 而 出 大

貴叛其主,吐蕃任之,奪其土地。 |琮頓首日:「臣奉命來獻,它非所聞。」帝韙其答。 然以||仲琮非用事臣,故殺其禮 海之陰,盛夏積雪,暑毼多裘。 上下一力,議事自下,因人所利而行,是能久而彊也。」帝曰:「吐谷渾與吐蕃本甥舅國,素和 勇果善斷不逮也,然勤以治國,下無敢欺,令主也。 吐蕃遣大臣仲琮入朝。 仲琮少游太學,頗知書。 隨水草以牧,寒則城處,施廬帳。 薛仁貴等往定慕容氏,又伏擊之,而寇我凉州,何邪?」仲 帝召見問曰:「贊普孰與其祖 且吐蕃居寒露之野,物產寡薄 器用不當中國萬分一。 賢?」對 但

|芳四州,殺略吏及馬牛萬計。 以相王輪爲凉州道行軍元帥,率左衞大將軍契苾何力、鴻臚卿蕭嗣業等軍討之。 上元二年,遣大臣論吐渾彌來請和,且求與吐谷渾脩好, 吐蕃進攻疊州,破密恭、丹嶺二縣,又攻扶州,敗守將。乃高選尚書左僕射劉仁軌 乃韶周王顯爲洮州道行軍元帥,率工部尚書劉審禮等十二總 帝不聽。 明年,攻鄯、廓、河、

爲洮河鎭守使,久之,無功。

鄯州 敬玄頓承風嶺,礙險不得縱,吐蕃壓王師屯,左領軍將軍黑齒常之率死士五百,夜斧其營, 督拓王奉益發劍南、山南士。 都督,代仁軌。 吐蕃 與西突厥連兵攻安西 下詔募猛士,毋限籍役痕負,帝自臨遣。 先戰龍支, 吐蕃敗。 ,復命中書令李敬玄爲洮河道行軍大總管、 敬玄率劉審禮擊吐蕃青海上,審禮戰沒。 又敕益州長史李孝逸、巂州都 西河鎮撫大使、

虜驚,自相轥藉而死者甚衆,乃引去。 敬玄僅脫。

恆即 舍人劉禕之等具對,須家給人足可擊也。或言賊險點不可與和,或言營田嚴守便。 軍 侍郎薛元超謂:「縱敵生患,不如料兵擊之。」帝顧黃門侍郎來恆日:「自李勣亡,遂無善將。」 ,往者滅高麗、百濟,比歲用師,中國騷然,朕至今悔之。今吐蕃內侵,盍爲我謀?」中書 ;言:「向|洮河兵足以制敵,但諸將不用命,故無功。」帝殊不悟,因罷 帝旣儒仁無遠略,見諸將數敗,乃博容近臣,求所以禦之之術。帝曰:「朕未始擐甲履 議。 惟中書

以 年 精騎三 贊婆、 儀鳳 千夜擣其營,贊婆懼,引去。途擢常之爲河源軍經略大使。乃嚴烽邏,開屯田,虜謀 素和貴率兵三萬攻河源,屯良非川, 四年,贊普死,子器弩悉弄立,欽陵復擅政,使大臣來告喪,帝遣使者往會葬。 敬玄與戰湟川, 敗績。 左武衞將軍 黑齒常之 明

初, 劍南度茂州之西築安戎城, 以迮其鄙。 俄爲生羌導虜取之以守, 因井西洱河諸

列傳

第

百四

+

上

吐蕃上

萬里,漢、魏諸

找所無也。

蠻,盡臣|羊同、党項諸羌。 其地東與松、茂、萬接,南極婆羅門,西取四鎮,北抵突厥,幅圓餘

永隆元年,文成公主薨,遣使者弔祠,又歸我陳行焉之喪。初,行焉使虜,論欽陵欲拜

臨以兵,不爲屈,留之十年。 及是喪還,贈睦州刺史。 **贊婆復入良非川,常之擊走之。**

閻温 |古副之,以討吐蕃,兵逗留,坐死、徙。 明年,復詔文昌右相|岑長倩爲武威道行軍大總 武后時,與蠻夷同朝賀。 永昌元年,韶文昌右相章待價爲安息道大總管, 安西大都護

管討之,兵半道罷。

部置葉州,用省插爲刺史,刻石大度山以紀功。 使,率兵二萬迎之, 次大度水, 又明年, 大首領曷蘇率貴川部與党項種三十萬降, 吐蕃禽曷蘇去。 而它曾昝插又率羌、蠻八千自來,玄遇即其 后以右玉鈴衞將軍張玄遇爲安撫

四鎮 其後 築令居,以絕南羌。於是鄣候亭燧出長城數千里,傾府庫,殫士馬,行人使者歲月不絕,至作 軍阿史那忠節擊吐蕃,大破其衆,復取四鎭,更置安西都護府於龜茲,以兵鎭守。 」武帝赫然發憤,甘心四夷,張騫始通西域,列四郡,据兩關,斷匈奴右臂,稍稍度河、湟, 勿有也,右史崔融獻議曰:「戎狄爲中國患尙矣,五帝、三王所不臣。漢以百萬衆困平城, 是歲,又詔右鷹揚衞將軍王孝傑爲武威道行軍總管,率西州都督唐休璟、左武衞大將 議者請廢

置使 張,入焉耆之西,長鼓右驅,踰高昌,歷車師,鈔常樂,絕莫賀延磧,以臨燉煌。今孝傑一舉 皮幣,算緡法,稅舟車,権酒酤。 西域震則威憺南羌,南羌連衡,河西必危。 而 | 取四鎭,還先帝舊封,若又棄之,是自毁成功而破完策也。 者領護。 剖裂府鎭,煙火相望,吐蕃不敢內侮。 光武中興,皆復內屬,至於延光,三絕三通。 夫豈不懷,爲長久計然也! 且莫賀延磧袤二千里,無水草,若北接虜,唐兵 高宗時,有司無狀,棄四鎭不能有,而吐蕃遂 太宗文皇帝踐漢舊跡,並南山抵 匈奴於是孤特遠竈,途開西域 夫四鎭無守,胡**兵必臨西**域

不可度而北,則伊西、北庭、安西諸蕃悉亡。」議乃格。

彼青海 還。 思忠 部 各 往使,道與欽陵遇。 孝乎?父事之,子叛之,忠乎?」欽陵曰:「然!然天子許和,得罷二國戍,使十姓突厥、四鎭 建 與吐蕃 君 破泥熟沒斯城。 又攻凉州(三),殺都督。 於是首領勃論贊與突厥偽可汗阿史那份子南侵,與孝傑戰冷泉,敗走。 | 湟川 長 異,久爲唐編人矣。」欽陵曰:「使者意我規削諸部爲唐 ,俾其國自守若何? 近矣,今捨不爭何哉?突厥諸部磧漠廣莽,去中國遠甚,安有爭地萬里外邪? 元振曰:「東贊事朝廷,誓好無窮,今猥自絕,歲擾邊, 證聖元年,欽陵、贊婆攻臨洮,孝傑以肅邊道大總管戰素羅汗山,虜敗 遣使者請和,約罷四鎭兵,求分十姓地。 元振 日:「唐以十姓、四鎭撫 西土,爲列國主,道非有它,且諸 邊 患 邪? 武后韶通泉尉郭元振 我若 父通之, 碎葉鎮守使韓 貪 土 ,子絕之, 地財賦

列傳

绑

百四四

+

上

吐

攀上

辯徑俟斤掠我牛羊萬計,是以求之。」使使者固請,元振固言不可許,后從之。 甘、凉距積石道二千里,其廣不數百,狹纔百里,我若出張掖、玉門,使大國春不耕,秋不穫, 河,關源阻奧,多癘毒,唐必不能入;則弱甲孱將易以爲蕃患,故我欲得之,非闚 姓五 不五六年,可斷其右。今棄不爲,亦無虞于我矣。一青海之役,黃仁素約和,邊守不戒,崔知 且 四 咄陸近安西,於吐蕃遠,俟斤距我裁一磧,騎士騰突,不易旬至,是以爲憂也。 夷唐皆臣丼之,雖海外地際,靡不磨滅,吐蕃適獨在者,徒以兄弟小心,得相保耳。 諸部也。 烏海、黄

普自討之。未戰,欽陵兵潰,乃自殺,左右殉而死者百餘人。贊婆以所部及兄子莽布支等 公, 皆賜鐵券, 禮尉良厚。 贊婆卽領部兵戍河源, 死, 贈安西大都護。 款塞,遣羽林飛騎迎勞,擢贊婆特進、輔國大將軍、歸德郡王,莽布支左羽林大將軍、安國 兵居外,贊普託言獵,即勒兵執其親黨二千餘人殺之,發使者召欽陵、贊婆,欽陵不受命,贊 才略沈雄,衆憚之。器弩悉弄旣長,欲自得國,漸不平,乃與大臣論巖等圖去之。欽陵方提 欽陵專國久,常居中制事,諸弟皆領方面兵,而贊婆專東境幾三十年,爲邊患。 兄弟皆

虜攻凉州 大慈四戰皆克。 又遣左肅政臺御史大夫魏元忠爲隴右諸軍大總管,率隴右諸軍大使唐休璟出討。方 ,休璟擊之,斬首二千級。於是論彌薩來朝請和。贊普自將萬騎攻悉州,都督陳 明年,乃獻馬、黃金求昏。而虜南屬帳皆叛,贊普自討,死于軍。

全達 求香. 輸虜 築城以居。 爲赦始平縣,罪死皆冤,賜民繇賦一年,改縣爲金城,鄕曰鳳池,里曰愴別。 主妻之,吐蕃遣倚贊咄名悉臘等逆公主。 夷狄,不許。明年,吐蕃更遣使者納貢,祖母可敦又遣宗俄請昏。帝以雍王守禮女爲金城公 表與其地。 延將兵十 帝令姚崇等報 玄宗開元 韶左衞大將軍楊矩持節送。帝爲幸始平,帳飲,引羣臣及虜使者宴,酒所,帝悲涕歔欷 中宗景龍二年,還其昏使。 諸子爭立,國人立棄隸蹜贊爲贊普,始七歲,使者來告喪,且求盟。 虜以鐵絙梁漾、濞二水,通西洱蠻,築城戍之。 九徵毀絙夷城,建鐵柱於滇池以勒功。 殺知古, 九曲 拜矩 會監察御史李知古建討姚州蠻,削吐蕃向導,詔發劍南募士擊之。 萬寇臨洮, 二年,其相全達延上書宰相, 尸以祭天,進攻蜀漢。 者 鄯州都督。 書,命琬持 ,水甘草良,宜 入攻臓、潤,掠監馬。 吐蕃外雖和而 神龍誓往。 或言彼來遊公主,且習聞華言,宜勿遣,帝以中國當以信結 |畜牧,近與||唐接。 詔靈武監軍右臺御史唐九徵爲姚巂道討擊使,率兵 帝念主幼,賜錦繒別數萬,雜伎諸工悉從,給龜茲 吐蕃亦遣尚欽藏、 陰銜怒,即厚餉矩, 請載盟文,定境於河源 楊矩懼,自殺。 自是虜益 張雄,易入寇 御史名悉臘獻 請 有韶薛訥爲隴右防禦使,與 河西 丐左散騎常侍解琬涖 九曲爲公主湯沐,矩 又使大臣悉董熱固 載辭。 公主至 一吐蕃, 未及定, 自

列傳第

百

四十

上

吐

審

上

六〇八

戰長子 罷行。 王畯等丼力擊。 ,,豐安軍使王海賓戰死。乘之,虜大敗,衆奔突不能去,相枕藉死,洮水爲不流。帝乃 詔紫微舍人倪若水臨按軍實戰功,且弔祭戰亡士,敕州縣幷瘞吐蕃露胔。 帝怒,下詔自將討之。會晙等戰武階,斬首萬七千,獲馬羊無慮二十萬。

迎送,有如不通,因以守境。 代,非集也。 使百姓久安。 湔貸前惡,歸於大和,甥旣堅定,然不重盟爲未信,要待新誓也。 甥自總國事,不牽于下,欲 使論乞力等前後七輩往,未蒙開許,且張玄表、李知古將兵侵暴甥國,故違誓而戰。 今舅許 皇帝崩,太上皇嗣位,脩睦如舊。 **瞥賜盟,是時唐宰相豆盧欽望、魏元忠、李嶠、紀處訥等凡二十二人及吐蕃君臣同誓。** 公主上書求聽脩好, 里。 到 小小入犯邊無閉歲,於是郭知運、王君奠相繼節度隴右、河西,一以扞之。吐蕃遣宗俄因子 洮 水祭戰死士,且請和。 今既負約,請毀橋,復守河如約。」詔可。 宰相建言:「吐蕃本以河爲境,以公主故,乃橋河築城,置獨山、九曲二軍, 距積石二百 往者疆場自白水皆爲閑壤,昨郭將軍屯兵而城之,故甥亦城。假令二國和,以 舅雖及和,而意不專,於言何益?」又言:「舅責乞力徐集兵,且兵以新故相 且言贊普君臣欲與天子共署誓刻。 然恃盛彊,求與天子敵國,語悖傲。 又疑與突厥骨咄祿善者,舊與通聘,卽日舅甥如初,不與交 然唐宰相在誓刻者皆殁,今宰相不及前約,故須再盟。 遣左驍衞郎將尉遲瓌使吐蕃,慰安公主。 吐蕃又遣使者上書言:「孝和皇帝 使者至臨洮、韶不內。

因奉寶瓶、杯以獻。」帝謂昔已和親,有成言,尋前盟可矣,不許復誓。 禮其使而遣,且

厚賜贊普 ,自是歲朝貢不犯邊。

軍以扞吐蕃,故歲常戰。吐蕃每曰:「我非利若國,我假道攻四鎭爾。」及是,累歲不出兵。 夾擊吐蕃,死者數萬,多取鎧仗、馬羊,復九城故地。 始勃律王來朝,父事帝。 方諸國皆墮吐蕃,都護圖之。」孝嵩聽許,遺疏勒副使張思禮以步騎四千畫夜馳,與謹忙兵 十年,攻小勃律國,其王沒謹忙詒書北庭節度使張孝嵩曰:「勃律,唐西門。 還國,置綏遠 失之,則西

率秦州 弱 軍 斗拔谷,遂攻甘州,火鄉聚。 濱海 超 西道以歸。 於是隴右節度使王君奠請深入取償。十二年,破吐蕃,獻俘。後二年,悉諾邏兵入大 都督張景順約齎窮躡,出青海西,方冰合,師乘而度。 君奠縱兵俘以旋。 君臭豫遣諜出塞,燒野草皆盡,悉諾邏頓大非川,無所牧,馬死過半。 時中書令張說以吐蕃出入數十年,勝負略相當,甘、凉、河、鄯之 王君臭勒兵避其銳,不戰。 會大雪, 于時虜已踰大非山, 吐蕃戰凍如 積, 留鯔 乃踰 積石 重波 君臭

軍 用蕭嵩爲河 圍常樂,不能拔, 未 幾 、悉諾邏恭祿、燭龍莽 西節度使,左金吾將軍張守珪瓜州刺史,復城之。嵩縱反間,殺悉諾邏恭祿。 回寇安西, 布支入陷瓜州 副都護趙頤貞擊却之。 ,毁其城,執刺史田元獻及君奠父, 會君奠爲回紇所殺, 功不遂。 遂攻玉門 帝乃 明

發困甚,願

聽其和。

帝方寵君矣,不聽

列

儜

第

百

四

+

上

吐

蕃上

振武 而走 橋; 有逗留 大將悉末朝攻瓜州 Щ 軍 隴右節度使杜賓客以彊弩四千射虜,破之祁連城下,斬副將一,上級五千首。 ,獻俘於廟。 ,舉隊如軍法。 又明年,守珪率伊、沙等州兵破虜大同軍;又信安王禕出隴西,拔石堡城,即之置 帝以書賜將軍裴旻曰:「敢有掩戰功不及賞者,士自陳 能禽其王者,授大將軍。」於是士益奮 ,守<u></u>
珪擊走之;
鄯州都督
張志亮又戰
青海西,破大
莫門城,焚橐它 將吏皆斬。 虜敗,働 戰

陛下幸韶金城公主許贊普約,以紓邊患,息民之上策也。」帝采其言,敕惟明及中人張元方 慢,朕必滅之,毋議和!」惟明曰:「昔贊普幼,是必邊將好功之人爲之,以激怒陛下。 還議盟事。 千萬歲不敢先負盟。」且獻怪寶。使者至,帝御前殿,列羽林仗內之。 國交惡必興師,師興則隱盜財利,詐功級,希陛下過賞,以甘心焉。今河西、隴右貲耗力窮, 舅甥好,昨彌不弄羌、党項交構二國,故失懽,此不聽,唐亦不應聽。」 甥以文成、金城公主, 敢失禮乎? 特以沖幼, 使名悉臘隨使者入朝,奉表言:「甥,先帝舅顯親也。 吐蕃令曩骨委書塞下,言:「論莽熱、論泣熱皆萬人將,以贊普命,謝都督刺史:二國有 以書賜公主。惟明見贊普言天子意,贊普大喜,因悉出貞觀以來書詔示惟明,厚饋 囊骨, 猶千牛官也。 於是忠王友皇甫惟明並言約和便。 枉爲邊將讒亂。 囊爲張玄表、李知古交鬭,遂成大 如蒙澄亮,死且萬足, 都督遣腹心吏與曩骨 帝曰:「贊普向上書悖 悉臘略通華文,旣 且二

宴與語,禮甚厚,賜紫服、金魚。 悉臘受服辭魚,日:「國無是, 不敢當。」帝遣御史大夫崔琳

報聘。

以幣器徧遺執政。 蕃 人對相曉敕,令昭然具知。」帝又令金吾將軍李佺監赤嶺樹碑,詔張守珪與將軍李行禕、 物萬計。 聽以赤嶺爲界,表以大碑,刻約其上。又請五經,敕祕書寫賜,幷遣工部尙書李暠往聘,賜 使者莽布支分諭劍南、河西州縣曰:「自今二國和好,無相侵暴。」乃使悉諾勃海納貢,并 吐蕃 又請交馬於赤嶺,互市於甘松嶺。 吐蕃遣使謝,且言:「唐、吐蕃皆大國,今約和爲久長計, 明年,上寶器數百具,制冶詭殊,詔置提象門示羣臣。 宰相裴光庭曰:「甘松中國阻,不如許赤嶺。」乃 恐邊吏有妄意者,請以使

使, 希逸固邀,乃許。 何?請皆罷,以便人。」乞力徐曰:「公忠誠,無不可,恐朝廷未皆信,脫掩吾不備,其可悔?」 鎭涼州 其後吐蕃西擊勃律,勃律告急,帝諭令罷兵,不聽,卒殘其國。於是崔希逸爲河西節度 故時疆畔皆樹壁守捉,希逸謂虜戍將乞力徐曰:「兩國約 即共刑白犬盟,而後悉徹障壁,虜畜牧被野 好, 而守備不廢, 云

朝。 **徼幸,至凉州,因共矯詔,詔斋逸發兵襲破吐蕃青海上,斬獲不貲,乞力徐遁走。** 二十六年,大入河西,希逸拒破之。 明年,傔史孫海奏事,妄言「虜無備,可取也」。帝采之,詔內豎趙惠琮共往按狀。小人欲 鄯州都督杜希望又拔新城,更號威戎軍。 吐蕃恚,不 希逸顧

第一

百四十一上

吐

審上

失信, 悒悒悵恨, 召拜河南 彭 旣而 與惠琮俱見犬祟,疑而死,誨亦及它

攻維 方分援。 安戎 兼瓊 軍入 破破 死 州 城 吐 凡 希望發鄯州 蕭炅代爲河西 盡殺 不, 、數萬。 ,築二少壘左右之,兵次蓬婆嶺,輸劍南栗餉 兼 瓊 虜絕臨 ·得志。 虜 昱之敗 因得 戍, **县貪妄**,非將選,故敗,貶死高要。 以監察御史許遠守之。 兵奪虜河 挑道,白水軍 入 詔 奏, 節 以 乃改安戎日 度 天子 張宥代節度劍南 留後, 橋,並河築鹽泉城,號鎭 果其議 使高柬于拒守,虜 杜希望隴右節度留後, 一平戎云 拔 兼瓊代宥節度 ,以章仇兼瓊爲 吐 蕃 圍安戎,絕水泉, 引去。 明年, 西軍 軍 ٥ 王昱劍南節度使, 益州司 吐蕃攻白草、安人軍〔三〕,韶臨洮、朔 兼瓊諜 , 吐蕃悉銳來救,昱大敗,少壘皆沒, 破吐蕃兵三萬。 馬。 會石 誘吐蕃 **凊**,文吏,不知 裂 泉涌, 安戎城主為 雲出 分道 昱以劍南兵入攻 軍上, 虜 經略, 驚 引 兵, 應, 白 碎赤嶺 1兔舞, 委事 導官 復

承 風 堡 是歲 一,抵 河源軍 金城 公主薨。 一,西入 長寧橋、 明年 爲發哀, 安仁軍 ٠, 渾崖 吐蕃使者朝, 烽 騎將臧 希液以 因請和, 銳 不許。 兵五 千 破之。 虜 乃悉 吐蕃 衆四 又襲廓 + 萬 攻

州, 敗一 縣 ,屠吏人。 攻振武 軍 石堡城, 蓋嘉運 不 能

破洪濟城 天 育 ,戰石堡,不克,副將諸葛訊死之。 元 年 ,隴右節度使 皇甫 惟明破 虜大嶺 又明年, 軍 ; 戦青海 惟明破虜,獻俘京師。 ,破莽布支, 斬首 三萬 帝以哥舒翰節 級。 明 年,

度隴右 ,翰攻拔石堡,更號神武軍。 又禽其相兀論樣郭

空虚,故吐蕃得乘隙暴掠 是歲,贊普乞黎蘇籠臘贊死,子挲悉籠臘贊嗣,遣使者脩好,詔京兆少尹崔光遠持節齎 祠。 積石西、及宛秀軍以實河曲。後二年,蘇毗子悉諾邏來降,封懷義王,賜李氏。蘇毗,疆部也。 濟、大莫門諸城,收九曲故地,列郡縣,實天實十二載。於是置神策軍於臨洮西、澆河郡於 使楊國忠方以姦罔上,自言:「破蠻衆六萬於雲南,拔故洪州等三城,獻俘口。」 哥 還而安祿山亂,哥舒翰悉河、隴兵東守潼關,而諸將各以所鎭兵討難,始號行營, **载** 安西節度使高仙芝俘大會以獻。 是時, 吐蕃與蠻閣羅鳳聯兵攻瀘南, 舒翰 劍南節 邊候 册 破 弔 洪 度

姑 事 (務紓患,乃詔宰相郭子儀、蕭華、裴瓊慶等與盟 中 南巨川報聘。 至德初,取魯州及威武等諸城, 然歲內侵,取廓、壩、岷等州及河源、莫門軍。使數來請和,帝雖審其譎 入屯石堡。 其明年, 使使來請討賊且脩好。 肅宗遺給

兵二十萬東略武功,渭北行營將呂日將戰盩厔西,破之。又戰終南, 圍 吐蕃留不遣。 [涇州,入之,降刺史]高暉。 寶應元年,陷臨洮,取秦、成、渭等州。明年,使散騎常侍李之芳、太子左庶子崔倫往聘, 破西山合水城。 又破邠州, 明年,入大震關,取蘭、河、鄯、洮等州,於是隴右地盡亡。進 入奉天,副元帥郭子儀禦之。 日將走。 吐蕃以吐谷渾、党項 代宗幸陝

列

傳

第

百四十一上

吐

番上

度產 奔荆 子儀 夜引去。 退 襄 或 趨 給虜曰:「郭令公軍且來! 或逋 商 子儀入長安,高暉東奔至潼關, 州 使 山谷,亂兵因相攘鈔,道路梗閉。 高暉導虜入長安,立廣武王承宏爲帝,改元,擅作赦令,署官吏。 」吐蕃大震。會少將王甫與惡少年伐鼓譟苑中, 守將李日越殺之。 光祿卿殷仲卿率千人壁藍田 吐蕃留京師十五日乃走, 天子 選二百騎 衣冠皆南

武破 衆八萬。 **擣其營,斬首數千級,奪馬五百,取四將,吐蕃引去。** 輝兵攻邠州 吐蕃 .';自如也 吐蕃退圍鳳翔,節度使孫志直拒守,鎭西節度使馬璘以千騎戰卻之,吐蕃屯原、廥、成、 虜 圍凉州, 南鄙兵七萬,拔當狗城。 ,白孝德、 是歲, 河西節度使楊志烈不能守,跳保甘州 郭晞嬰壘守,乃入居奉天西。 南入松、維、保等州及雲山新籠城。 會僕固懷恩反,自靈武遣其將范志誠、任敷合吐蕃、吐谷 子儀入奉天,按軍不戰。 是時嚴武拔鹽州 ,而涼州 明年 ,還使人李之芳等。 · (E), 又戰西山, 郭晞以銳 劍南

孝德 党 韶子儀以河中兵屯涇陽,李忠臣屯東渭橋,李光進屯雲陽,馬璘、郝廷玉屯便橋,駱奉先、李 ·能亢,任敷以兵略鳳翔、盩厔,於是京師 吐蕃大角尚結息、贊摩、尚悉東贊等衆二十萬至醴泉、奉天, 一戒嚴。 朔方兵馬使渾日進、孫守亮屯奉天,

永泰元年,吐蕃

語和,

韶宰相元載、杜鴻漸

與虜使者同盟。

懷恩

不得志,

導虜與回紇、

光與虜戰澄城,破之。吐蕃至邠北,復與回紇合,還攻奉天,抵馬嵬。任數以兵五千掠白 健士五十擊之,殲,士氣益奮。虜徙營九變之陰,掠醴泉居人數萬,焚室廬,田皆赤地。周智 震擾,鑿垣亡去者十八,詔中人戶都門,不能止。 賊萬人,斬首五千,獲馬、橐它、幟械甚衆。 帝欲自討賊,下詔大搜馬,京師始置團練,都人 出,舉軍望而譟,士還,無一矢著身者。明日,虜薄城,日進發機石勁弩,故兵多死。 冰,殘同州。於是城中渭橋、鄂以屯兵。 日,虜斂軍入壁,日進知虜曲折,卽夜斫其營,斬千餘級,生禽五百。又戰馬嵬,凡七日, 天,日進以單騎馳之,士二百踵進,左右擊刺,射皆應弦仆, 虜大驚辟易。 日越屯盩厔,李抱玉屯鳳翔,周智光屯同州,杜冕屯坊州,天子自率六軍屯于苑。吐蕃逼奉 吐蕃游騎四百略武功,鎭西節度使馬璘使 日進挾虜一將躍 破

元光合兵攻吐蕃於靈臺西,大破之,降僕固名臣,帝乃班師。 會懷恩死,虜謀無主,遂與回紇爭長。 回紇怒,詣子儀請擊吐蕃自效,子儀許之,使白

校勘記

列傳

第

百

四十

上

校勘

記

薛禄 東贊 張 森楷校勘 通典卷一九〇同。 記 疑 「薛」爲「蒆」之誤,但字書無「蒆」字,未知孰是。 舊書卷一九六上吐蕃傳謂「祿東,姓藝氏」, 唐會要卷九七「荽」作

- 3 孝傑以肅邊道大總管戰素羅汗山虜敗還又攻涼州 按本書卷四則天紀及舊書卷一九六上吐蕃
- 傳均謂唐軍敗績,與兩書王孝傑傳及摟師德傳相合。「虜」字疑行,或當移至「又攻」上。
- 2 吐蕃 原州蕭關縣廚布水之西,其時吐蕃兵不能至。今考本書卷四〇地理志、通典卷一七二及元和志 拒守,則「白草」當是「白水」之訛。 卷三九, 攻白草安人軍 鄯州有白水軍與安人軍,位河源軍西,觀本卷及舊書吐蕃傳下文接敍白水軍使高 「白草」,舊書卷一九六上吐蕃傅及通鑑卷二一四同。通鑑胡注: 白草軍在
- 傳、通鑑卷二二三均作「鹽川城」。通鑑胡注:「鹽川城在當 是時嚴武拔鹽州 里,豈所易及?「鹽州」當爲「鹽川」之訛。 南維州。 嚴武傳謂武「破吐蕃七萬衆于當狗城,遂收鹽川」,明鹽川與當狗密近;而鹽州相距千 「鹽州」, 本書卷一二九嚴武傅作「鹽川」, 狗城 卷六代宗紀及舊書卷一一七嚴武 西北。」按當狗城與鹽 川城 俱在劍

唐書卷二百一十六下

列傳第一百四十一下

吐蕃下

) 璘、朔方將白元光再破其衆,獲馬羊數千,劍南亦破虜萬人。 尚悉摩復來朝。 天子以虜數 入塞,韶治守障,徙當、悉、柘、靜、恭五州,皆據險以守。 先是,尙悉結自寶應後數入邊,以功高請老,而贊磨代之,爲東面節度使,專河、隴。 邠寧馬 與倫泣陵偕來,請境鳳林關,而路悉等十五人又來。三年,虜引衆十萬復攻靈州,略邠州 **遐**靈州,掠宜祿,郭子儀精甲三萬戍涇陽,入屯奉天。 永泰、大曆間,再遣使者來聘,於是戶部尚書薛景仙往報。 靈州兵破虜二萬,上級五百首。 韶宰相與吐蕃使者盟。 景仙

卒夜襲其營,

涇原馬璘以兵掩之

潘原,射豹皮將死,軍中哭,乃遁去。

璘收所俘士及男女

列

傳第一百四十一下

吐蕃下

而還。郭子儀又破其衆十萬。

羊廩鎧甚衆,獻之朝。一世蕃不得志,入掠黎、雅,於是劍南兵合南韶與戰,破之,禽大籠官論 **璘**屯原州 御史、尚書三渠以擾屯田,爲朔方留後常謙光所逐,重英殘鹽、慶而去。 追,敗之於百里。 寧破虜於西山。 萬攻茂州,略扶、文,遂侵豫、雅。時天子已發幽州兵馳拒,虜大奔破。 寧破西山三路及邛南兵,斬首八千級。十三年,虜大酋馬重英以四萬騎寇靈州,塞漢、 九年,帝遣諫議大夫吳損脩好,虜亦使使者入朝。於是子儀屯邠州,李抱玉屯高壁,馬 又侵坊州,取党項牧馬。崔寧攻望漢城,破之。 , 李忠臣屯涇州, 李忠誠屯鳳翔, 臧希讓屯渭北, 備虜之入。 明年, 西川節度使崔 虜攻臨涇、隴州,次普潤,焚掠人畜;與抱玉戰義寧,破之;道涇州,隣尾 又明年,崔寧破虜故洪節度、氐、蠻、党項等兵,斬首萬級,禽酋領千人,牛 山南西道節度使張獻恭戰岷州,吐蕃 乃南合南詔衆二十

障,無輒侵虜地。 其亡獲相償,欲以德綏懷之,遣太常少卿韋倫持節歸其俘五百,厚給衣褚,切敕邊吏護亭 初,虜使數至,留不遣,所俘虜口,悉部送江南。 吐蕃始聞未信,使者入境,乃皆感畏。 德宗即位, 先內靖方鎮, 顧歲與虜确,

不及賻,二也;不知舅即位,而發兵攻靈州,入扶、文,侵灌口,三也。」即發使者隨倫入朝。 是時,乞立贊爲贊普,姓戶盧提氏,曰:「我乃有三恨:不知天子喪,不及弔,一 也;山陵

帝又遣倫還獨俘。 虜以倫再至, 歡甚, 授館,作聲樂, 九日留, 以論欽明思等五十人從獻

賀蘭。 之,以「戲」爲「進」,「賜」爲「寄」,「領取」爲「領之」。以前宰相楊炎不通故事爲解,幷約地於 州 且引景龍詔書曰「唐使至, 西盡賀蘭山爲吐蕃境,邀漢衡奏天子。乃遣入蕃使判官常魯與論悉諾羅入朝,道贊普語, 明 年 其大相尚悉結嗜殺人,以劍南之敗未報,不助和議,次相尚結贊有謀,固請休息邊 殿中少監崔漢衡往使,贊普猥曰:「我與唐舅甥國, 甥先與盟,蕃使至,舅亦將親盟」;贊普曰「其禮本均。」帝許 韶書乃用臣禮卑我。」又請雲

人,贊普卒用結贊爲大相,乃講好。

服,結贊與論 結贊曰:「唐非牛不田,蕃非馬不戰,請用犬、豕、羊。」結贊聽諾。 原、會,西臨洮 涇州右盡 各以二千士列壝外,冗從立壇下。 結贊約; 漢衡與其使區頻贊偕來,約盟境上。 且告隴右節度使張鎰同盟。澤與結贊約盟淸水,以牛馬爲牲。 彈筝峽, 悉頰藏、論臧熱、論利陀、論力徐等對升壇,刑牲壇北,雜其血以進,約:「唐地 成州,抵劍 隴州 右極清水, 南 西磨些諸蠻、大度水之西南。 鳳州西盡同谷,劍南盡西山、大度水。 鎰與幕府齊映齊抗、鴻臚漢衡、計會使于頔 拜漢衡鴻臚卿,以都官員外郎樊澤爲計會使, 盡大河北自 將盟,乃除地爲壇,約二 新泉軍抵大磧,南 鎰欲末其禮,乃給 吐蕃守鎮蘭、渭、 及澤、魯皆朝 國 與

列

僔

第

百

70

+

下

吐

蕃

西 南南

隅

浮

屠

幄

「爲誓。

極賀蘭橐它嶺 ,其間 爲開田 於是升壇大享,獻酬 國所棄戍地毋增兵,毋創城堡,毋耕邊田。」旣盟,請鎰詣壇 乃還。

實、 還區 冰。 於是宰相 少府監李昌夔、 頰贊等 前二 帝 命 李忠 宰相 月告廟,齊,三日,關播跪讀載書口, 臣盧杞關播崔寧、工部尚書喬琳、御史大夫于頎、太府卿張獻恭、司農卿段秀 、尙書與虜使者盟長安,而淸水之約,疆場不定,復令漢衡決於贊普,乃克盟。 京兆尹王翙、 金吾衞大將軍渾瑊與區頰贊等同盟京城之右郊, 巳盟乃大享。 韶左僕射李揆爲入蕃會盟使, 禮

慰使 萬匹,於是虜以爲怨 以報之。 朱泚 會大疫 之亂, () 虜輒 渾瑊 吐蕃請助討賊,詔右散騎常侍于頎持節慰撫,太常少卿沈房爲安西、 引 用論 去。 莽羅兵破泚將韓旻於武亭川 及泚平, 責先約求地。 **灭子薄其勞**, 初,與 廣約,得長安,以**涇**、靈 第賜 詔書,償結贊、莽羅等帛 北庭 四 州 畀

閉 王佖以銳兵三千夜入汧陽,明日,薄其中軍,虜驚潰走,結贊僅自脫。 以 貞元二年, 韶倉部 左 游 騎至 監 門 一好時, 將 軍 康 左 成 金吾將 郎中趙建往使(三),而虜已犯徑、隴、邠、寧,掠 後一語。 軍 尚結贊屯上砦原 張獻甫、神策將李昇曇等屯咸陽 亦令使論 乞陀 來請 河中 《人畜, 盟 **虜衆二萬侵鳳翔**, 渾 瑊、 鳳翔 敗 華州 田 李晟 稼, 駱 內州 遣部 元光 李 將

守, 晟 擊卻之, 悉其衆南奔, 因襲破摧沙堡,燒儲廥,斬守者。 **虜遂有其地。天子以邊人殘沒,下詔避正殿,痛自咎。** 吐蕃 攻鹽、夏, 刺史杜彦光、 拓拔乾暉不能 詔駱元光經略

鹽、夏。 三年,命左庶子崔澣、李銛踵使。 結贊得鹽、夏,皆戍以兵,乃自屯鳴沙,然饋餉數困。

使。」約 壞 走,馬 以 請 敢攻也。 來,皆不 未償乃來,又候碑仆,疆場不明,故行境上。 於 二州。 《貴將|論頰熱厚賂乞和於|燧,燧以爲情,身入見天子,諸將以燧入,皆守壁不戰。 ()請悉 主 是駱元光、韓游褒濱塞而屯,馬燧次石州,跨河相掎角。結贊大懼,屢請盟,天子不許。即 盟。帝復使澣報結贊曰:「希全守靈州,有分地,不可以越境; 多死,士不能步,有飢色。 五. 天子從之。 ·能致委曲。我日望大臣而卒無至者,我故引還。 遣宰相元帥二十一人會盟。 一月盟淸水,使先效二州,以驗虜信。 若天子復許盟,虜之願也,唯所命,當以鹽、夏還唐。」又言清水盟,大臣 | 澣始至鳴沙,傳詔讓結贊破約陷鹽、夏,對日:「本以武亭 丼言 靈鹽節度使杜希全、涇原節度使李觀 涇州 結贊辭淸水非吉地,請會原州之上梨樹,乃歸 乘城自保,鳳翔李令不納吾使, 鹽、夏守將懼吾衆,以城 觀既徙官,以渾瑊爲盟會 外蕃 一少,故約易 **丐我**,非我 雖 結贊遽還 康成 所信, 等 功

| 瑊 《來受命,拜漢衡兵部尙書以副]城。 **臧率師二萬待期,詔駱元光助之。宰相議所盟地,**

列

第

結贊、拒不受。 初 本然。 文珍、馬寧、馬弇歸唐,而囚漢衡、叔矩 自 者寢其上。始結贊將劫希全、觀,急以銳兵直趣京師,旣不克,又欲禽瑊等,擣虛入寇,其諆 結贊亦殺若。」乃不死。人負一木,以繩三約之,係其髮驅之;夜則杙地繫而仆,蒙以罽,守 袁同直、列將扶餘準馬寧孟日華李至言樂演明范澄馬弇、中人劉延邕俱文珍李朝淸等六十 盟 人皆被執,士死者五百,生獲者千餘人。漢衡語處曰:「我,崔尚書也,結贊與我善。若殺我, 幄後,得馬不銜而馳,十里始得銜。 知 也。」乃定 左 漢衡 食其言。 北阜與虜戰,矢盡乃降。判官韓弇、監軍宋鳳朝死之。漢衡與判官鄭叔矩路泌、掌書記 也。 ,結贊伏精騎三萬于西,縱邏騎出入瑊軍,瑊將梁奉貞亦駷馬入虜軍營, 神策將 既引去,至故原州,坐帳中見漢衡等,慢言:「渾瑊戰武功,我力也。 客請瑊等具冠劍,皆就幄更衣,從容胖肆。 遇 盟平涼。 馬 一

制,從史呂温身蔽兵,温傷而漢衡脫,虜人嘉其義,厚給養之。

結贊屯石門,以俱 吾旣作金枷,將必得減以見贊普,乃今失之,徒致公等,無益也。 有 鄰建言:「土梨樹林薈嚴阻,兵易詭伏,不如平涼夷漫坦直,且 虜戍鹽、夏,涉春疫大興,皆思歸。 **瑊約結贊,主客均以兵三千至壇外,誕從** 虜追,矢若雨不傷也,至元光營乃脫。 河州 辛榮廓州,扶餘準鄯州 結贊以騎三千迎之,火二州廬舍,頹郛堞 虜忽三伐鼓,衆譟而興, 四百叩壇,以游 帝猶使中人齎詔 裨將辛榮兵數百 城不知所出 許裂地償我,而 陰執之, 而瑊不 軍交邏相入。將 當使人歸報。」 近涇,緩急可保 書賜

策將蘇太平屯隴州。結贊召漢衡、日華、延邕至石門,以五騎爰境上,遣使者奉表來。李觀 言(言)、澄、良賁、演明一子八品官,袁同直而下一子九品官。以決勝軍使唐良臣屯潘原,神 而 …「有詔不內吐蕃使者。」受漢衡等,放其使。 杜希全分兵保之。帝哀漢衡等陷辱,下詔賜其子七品官,叔矩、泌、弇、日華、榮、至

平不勝 矣。 廣數千騎犯長 象龕,夜半,約城中舉火燭天,虜衆驚,因襲其營,乃去。更攻連雲堡,飛石投中,井皆滿。爲 入豐義 晟嘗蹙大木塞安化隘處,虜過,悉焚之。 退,候火易通。 剽 虛梁絕塹 游陽、華亭男女萬人以畀羌、渾,將出塞,令東向辭國,衆慟哭,投塹谷死者千數。 詭漢服,號邢君牙兵,入<u>吳山、寶雞,焚聚落,略畜牧、丁壯,殺老孺,斷手剔目,乃去。</u>|李 諸將 結贊以羌、渾衆屯潘口,傍青石嶺,三分其兵趨隴、汧陽間,連營數十里,中軍距鳳翔一 引還。 圍華亭,絕汲道。 曾不 而升,守將張明遠降于虜。 (武城, 能得一 既失之,城下即 虜日千騎四掠, 隴兵不敢出。 城使韓全義拒之。 俘,但賀賊出塞而 守將王仙鶴請救於隴州,刺史蘇淸沔合太平兵赴之,虜逆戰,太 虜境, 每 虜分捕山間亡人及牛羊率萬計,徑、隴、邠之民蕩然盡 、
藏稼,必陳兵于野, 韓游瓌兵不出,於是虜安行邠、涇間, 韶神策將石季章壁武功,良臣移師百里城。 連雲堡,涇要地也,三垂峭絕,北據高,虜所進 <u>廣積薪將焚華亭</u>, 故多 少失時。 仙鶴以衆降。 是歲, 三州 諸屯西門皆 清沔潛兵大 ・吐蕃 不宿麥。 虜又 叉

初]

第

百四四

+

下

吐

粧

大〇九八

閉, 虜治故原州保之。 帝取所獲吐蕃生口不二百,徇諸市以安京師

拏,故盛夏入邊。 陳許兵戰長武,無功。 24 年五 月,虜三萬騎略涇、邠、寧、慶、鄜五州之鄙, 尚悉董星、論莽羅等又寇寧州,張獻甫拒斬裁百級,轉剽鄜、坊乃 初,吐蕃盜塞,畏春夏疾疫,常以盛秋。 焚吏舍民閻, 及是得唐俘,多厚給產,質其 係執數萬。 韓全義以

州地。 五 |年,韋皋以劍南兵戰臺登,殺虜將乞臧遮遮、悉多楊朱,西南少安。 不三年,盡得邁 久之,北庭沙陀別部叛,吐蕃因是陷北庭都護府,安西道絕。 。獨西州人尙爲唐守。

裁,閱二旬訖功,而虜兵不出,遂以兼御史大夫紀干遂與兼中丞杜彦光戍之。當是時,章皋 使經原、劍南、山南深入窮討,分其兵,毋令專向東方。韶朔方河中晉絳邠寧兵馬副元帥渾 功最多,破堡壁五十餘所,敗其南道元帥論莽熱沒籠乞悉蓖,又與南詔破之于神川,于鐵 將軍胡堅、右神策將軍張昌爲鹽州行營節度使,板築之,役者六千人,餘皆陣城下。 夏綏銀節度使韓潭、鄜坊丹延節度使王栖曜、振武麟勝節度使范希朝合兵三萬,以左神策 瑊、朔方靈鹽豐夏級銀節度都統杜希全、**邠寧節度使張獻甫、右神策軍行營節度使邢君牙、** 自虜得鹽州,塞防無以障遏,而靈武單露,鄜、坊侵迫,寇日以驕,數入爲邊患。帝復詔城之, 掠田軍千人,守捉使唐朝臣戰不利。 八年,寇靈州,陷水口,塞營田渠。 山南西道節度使嚴震破虜于芳州,取黑水壁,焚積聚。 發河東、振武兵,合神策軍擊之,虜引還。又寇涇州, 九年始

橋,皋俘馘三萬,降首領論乞髯揚沒藏悉諾建。

虜治劍山、馬嶺,進寇臺登,巂州刺史曹高仕擊卻之,禽籠官,斬級三百,獲馬、糧、械 君牙築永信城于隴州以備虜,虜使者農桑昔來請脩好,朝廷以其無信,不受。 十二年,寇慶州及華池,殺略吏人。是歲,尙結贊死。明年,贊普死,其子足之煎立。邢 章皋取新城,

求資糧 域,今三世矣。 者,語俘道人延素曰:「我乃司空英公裔孫也。」武后時,家祖以兵尊王室不克,子孫奔播絕 年,寇鹽州,陷麟州,殺刺史郭鋒,湮隍墮陴,係居人,掠党頂諸部,屯橫槽烽。 虜將徐舍人 飛鳥使至,召其軍還,遂引去。 十四年,韓全義破虜于鹽州。十六年,靈州破虜于烏蘭橋,韋皋拔末恭、顒二城。十七 「,至麟而守者無備,遂入之。 我雖握兵,心未嘗忘歸也,顧不能自拔耳。」陰使延素夜逸。 飛鳥,猶傳騎也。 知郭使君勳臣家,欲全安之,不幸死亂兵。」語方已,會 。又言:「吾按邊

昆明 用兵 節度兵馬都統、羣牧大使, 7.諸蠻。 章皋出西山與廣戰,破之雅州。 常馳驛計議,授諸將以行。 吐蕃以下屢叛,大侵靈州。 引兵十萬援維州。 比年寇黎、巂,皋常折其兵,定德畏得罪,遂來降,因定 籠官馬定德本虜之知兵有策慮者,周知山川險易,每 時皋圍維州,贊普使論莽熱沒籠乞悉蔥兼松州五道 皋率南韶兵薄險設伏以待, 纔使千人嘗敵。

列傳第

百四十

下

吐器

乞悉蔥見兵寡,悉衆追,墮伏中,兵四合急擊,遂禽之,獻京師。明年,吐蕃使者論頗熱復來,

右龍武大將軍薛伾往報。

二十年,贊普死,遣工部侍郞張薦弔祠,其弟嗣立,再使使者入朝。

順宗立,以左金吾衞將軍田景度、庫部員外郎熊執易持節往使。永貞元年,論乞縷勃藏

歸金幣、馬牛助崇陵,有詔陳太極廷中。

憲宗初,遣使者脩好,且還其俘。 又以使告順宗喪,吐蕃亦以論勃藏來。 後比年來朝,

然以五萬騎入振武拂鵜泉,萬騎至豐州大石谷,鈔回鶻還國者。

掣逋」。 詔可。 上, 泌之柩, 復以鴻臚少卿李銛、 五 年,以祠部郎中徐復往使,并賜鉢闡布書。 復至||新州擅還,其副||李逢致命贊普,復坐貶。 因言願歸秦、原、安樂州。 丹王府長史吳暈報之。 韶宰相杜佑等與議中書, 論思邪熱拜于廷, 自是朝貢歲入。又款隴州塞, 鉢闡布者,廣浮屠豫國事者也, **虜以論思邪熱入謝,且歸鄭叔矩、路** 佑答拜堂 **丐**互市, 亦曰「鉢

足立爲贊普,重

理以扶餘準、

李驂偕歸。 于虜者。 十二年,贊普死,使者論乞髯來,以右衞將軍烏重旺、殿中侍御史段鈞弔祭之。 使者知不死,求之,乃得還。韶以準爲灃王府司馬,驂嘉王友。) 準,東明人,本朔方騎將, 驂,隴西人, 貞元初戰沒 可黎可

吐蕃 使論矩立藏來朝,未出境,吐蕃寇宥州,與靈州兵戰定遠城,虜不勝,斬首二千級。

總兵十 平凉 拔 峨和、栖雞城。 鎭遏使郝玭 五萬園鹽州, 又破虜兵二萬,夏州節度使田縉破其衆三千,詔留矩立藏等不遣。 十四年,乃歸矩立藏等。吐蕃節度論二摩、宰相尙塔藏、中書令尙綺心兒 爲飛梯、鵝車攻城,刺史李文悅拒之,城壞輒補,夜襲其營,晝出戰,破 劍南兵

虜萬人,積三旬不能拔。 朔方將史敬奉以奇兵繞出虜背,大破之,解圍去。

児代守。 |鼎親吏||沙奴共射,彀弓揖讓,射沙奴卽死,執||鼎而縊殺之,自領州事。 城守者八年,出綾 而藏之。 曰:「苟毋徙佗境,請以城降。」綺心兒許諾,於是出降。 自攻城至是凡十一年。 贊普以綺心 議焚城郭,引衆東奔,皆以爲不可。鼎遣都知兵馬使閻嘲領壯士行視水草,晨入謁辭行,與 端募麥一斗,應者甚衆。 始,沙州刺史周鼎爲唐固守,贊普徙帳南山,使尚綺心兒攻之。鼎請救回鶻,踰年不至, 後疑嘲謀變,置毒鞾中而死。州人皆胡服臣虜,每歲時祀父祖,衣中國之服,號慟 |朝喜日:「民且有食,可以死守也。」又二歲,糧械皆竭,登城而謼

消許我盟,我是以來。」 ,進寇 穆宗卽位,遣祕書少監田洎往告,使者亦來。 虜引兵入屯靈武,靈州兵擊却之。又犯靑 涇州,瀕水而營,縣五 逼 涇一舍止。 十里。 韶右軍中尉梁守謙爲左右神策軍、京西北行營都監, 始洎至牙,虜欲會盟長武,洎含糊 應之。 至是顯言:

列傳

第

百

24

+

下

吐

蕃下

發卒合八鎭兵援涇州,貶洎郴州司戶參軍 **哀沓,党項怨之,導虜入鈔,郝跐與戰,多殺其衆。** ,以太府少卿邵同持節爲和好使。 李光顔又以邠兵至, 乃引去。 初, 復遣 夏州田縉 使者

南略雅州,詔方鎭與虜接者謹備

邊。

州 兆 尙 劉 讎 書 元 尹 有禽 韶許之。 柳 鼎 李絳、兵部尚書蕭倪、戶部尚書楊於陵、禮部尚書章綬、太常卿趙宗儒、司農 德宗建中之盟,將重其約, 長慶元年, 州 公綽、 爲 生問 節度使 盟會使,右司郎中劉師老副之,詔宰相與尙書右僕射韓皋、御史中丞牛僧孺、吏部 事 右金吾將軍郭鏦及吐蕃使者論訥羅盟京 崔植、杜元穎、王播輔政,議欲告廟。禮官謂:「肅宗、代宗皆嘗與吐蕃盟,不告 李進誠與戰大石山,破之。 ',給服糧 聞回鶻和親, 歸之。」詔可。 犯淸塞堡,爲李文悅所逐。 始韶告廟。 大 臣豫盟者悉載名於策。 虜遣 至會平凉,不復告,殺之也。」乃止。以大理 使者趙 師西郊。贊普以盟言約:「二 國章來, 乃遣使者尚綺力陀思來朝, 且致 方盟時, 拿相 信 吐蕃 幣 以 卿裴武、 壯 國 騎 無相寇 屯魯 且乞 京 卿

觀。 延尙念之乎? 兵何日來?」 抵 河廣 明年 至龍支城 武 請 故 定 ,耋老千人 時 疆 候 城郭未隳 元鼎 拜 與論訥 蘭州 且泣,問天子 言已皆嗚咽。 地皆秔稻 羅就 盟 安否,言:「頃從軍沒于 其國, 密問之,豐州人也。 桃李楡柳岑蔚, 敕虜 大臣 亦 列名于策。 戶 此, 皆唐人, 過石堡城, 今子孫未忍忘 元鼎踰 見使 崖壁峭豎, 者 成紀、 1 麾蓋 唐服 武川, 道回 夾道 朝

十步 植百 趙塗之,繪白虎,皆虜貴人有戰功者,生衣其皮,死以旌勇,徇死者瘞其旁。 度悉結羅嶺,鑿 獨虜所立石猶存。 自旁譯授于下。 里,臧河所流也。 石通車,逆金城公主道也。至麋谷,就館。臧河之北川,贊普之夏牙也。周以槍纍,率十步 屈,虜日鐵刀城。),高二尺。 **I長槊**, ,與華制略等,樂奏秦王破陣曲,又奏涼州、胡渭、錄要、雜曲,百伎皆中國人。 鉢掣逋立于右,宰相列臺下。唐使者始至,給事中論悉答熱來議盟,大享於牙右,飯舉 中有高臺,環以寶楯,贊普坐帳中,以黃金飾蛟螭虎豹,身被素褐,結朝霞冒首,佩金鏤 元鼎還,虜元帥尙塔藏館客大夏川,集東方節度諸將百餘,置盟策臺上,徧曉之,且戒 `中鷒大幟爲三門,相距皆百步。 甲士持門,巫祝鳥冠虎帶擊鼓,凡入者搜索乃 使者與虜大臣十餘對位,酋長百餘坐壇下,上設巨楊,鉢掣逋升,告盟,一人 已歃血,鉢掣逋不歃。 右行數十里,土石皆赤,虜日赤嶺。 河之西南,地如砥,原野秀沃,夾河多檉柳。 策署彝泰七年。 赤嶺距長安三千里而贏,蓋隴右故地也。 盟畢,以浮屠重爲誓,引鬱金水以飲,與使者交慶, 而信安王禕、張守珪所定封石皆仆, 日悶怛盧川,直邏娑川之南百 山多柏,坡皆丘墓,旁作屋, 盟壇廣

破,會國有喪乃還,非我敵也。 各保境,毋相暴犯。 唐何所畏,乃厚之?」元鼎曰:「回鶻有功,且如約,未始妄以 尚塔藏語元鼎曰:「回鶻小國,我嘗討之, 距城三日危

傳

第一百

四十一下

吐

蕃 下

世舉謂西戎地曰河湟。河源東北直莫賀延磧尾殆五百里,磧廣五十里,北自沙州,西南入 摩黎山,東距長安五千里,河源其間,流澄緩下,稍合衆流,色赤,行益遠,它水丼注則濁,故 夏乃勝舟。其南三百里三山,中高而四下,日紫山,直大羊同國,古所謂崑崙者也,虜日悶 吐谷渾寖狹,故號磧尾。隱測其地,蓋劍南之西。元鼎所經見,大略如此。 兵取尺寸地,是以厚之。」塔藏默然。 <u>湟水出蒙谷,抵龍泉與河合。河之上流,繇洪濟梁西南行二千里,水益狹,春可涉,秋</u> 元鼎踰湟水,至龍泉谷,西北望殺胡川,哥舒翰故壁多

以兵擊回鶻、党項,小相尙設塔率衆三萬牧馬木蘭梁。 虜遣論悉諾息等入謝,天子命左衞大將軍令狐通、太僕少卿杜載答之。是歲,尚綺心**兒** 比歲,使者獻金盎、銀冶犀、鹿,貢

戎。 號無憂城,爲西南要扞。 受之,收符章仗鎧,更遣將虞藏儉據之。 自是比五年虜使來,必報。 寶曆至大和,再遣使者朝。 會牛僧孺當國,議還悉怛謀,歸其城。 所貢有玉帶、金皿、獺褐、犛牛尾、霞氎、馬、羊、橐它。 五年,維州守將悉怛謀挈城以降,劍南西川節度使李德裕 州南抵江陽岷山,西北望隴山,一面崖,三涯江,虜 吐蕃夷誅無遺種,以怖諸

贊普立幾三十年,病不事,委任大臣,故不能抗中國,邊候晏然。 死,以弟達磨嗣。

熱 嗜 來朝 ,好畋獵,喜內,且凶愎少恩,政益亂。 玉器羊馬。 自是國中地震裂,水泉湧,岷山崩;洮水逆流三日,鼠食稼,人飢疫, 開成四年,遺太子詹事李景儒往使,吐蕃以論集

死者相枕藉。漸、廓間夜聞鼙鼓聲,人相驚。

乞離 胡爲贊普,始三歲,妃共治其國。 會昌二年,贊普死 ?,論贊熱等來告,天子命將作監李璟弔祠。 、大相結都那見乞離胡不肯拜,曰:「贊普支屬尙多,何 無子,以妃綝兄尚延力子

至立綝氏子邪?」哭而出,用事者共殺之。

得萬 誅不道, 蘇毗、吐渾、羊同兵八萬保洮河自守,恐熱謂蘇毗等曰:「宰相兄弟殺贊普,天神使我舉義兵 別 將尚恐熱爲落門川討擊使,姓末,名農力,「熱」猶中國號「郞」也, 爾屬乃助逆背國耶?」蘇毗等疑而不戰,恐熱塵輕騎涉河,諸部先降,并其衆至 **譎跪善幻**,約三部 思羅敗走松州,合

它聯 軍不 進。 千餘 婢婢, 三年,國人以贊普立非是,皆叛去。 里,至鎭西軍,大風雷電,部將震死者十餘人,羊、馬、橐它亦數百。 婢婢聞之,厚幣詒書約驩,恐熱大喜曰:「婢婢,書生,焉知軍事。 姓沒盧,名贊心牙,羊同國人,世爲吐蕃貴相,寬厚,略通書記,不喜仕,贊普彊官 恐熱自號宰相,以兵二十萬擊婢婢, 我爲贊普,當以 鼓鼙、牛馬、橐 恐熱惡之,按

餘萬,

禽思羅縊殺之。

列

第

百四十

下

吐蕃下

岌藏 皆降,婢婢 萬,結心據 谷 家居宰相處之。」於是退營大夏川。 皆大敗。 繚以重 大風 山 厚遇之。 栅"、断汲道 [射書極駡,恐熱怒甚,盛兵出鬭。 兵挐仍歲不解 雨 ,河溢,溺死甚衆,恐熱單騎而逃。 明年, 一,旬日 恐熱復攻鄯州,婢婢分兵五道拒守, ,恐熱走薄寒山,募散卒稍至,得數千人, 婢婢遣將厖結心、莽羅薛呂擊恐熱於河州之南,伏兵四 結心僞北,恐熱追至數十里,莽羅薛呂以伏 旣不得志, 尤猜忍殺戮, 恐熱保東谷山, 復戰鶡鷄山,再戰南 部將岌藏、 堅壁不出。

歸之。 進戦 不勝 **羆子急擊恐熱** 犛牛硤。 大中三年, 焚橋 m 還。 婢婢將燭盧鞏力欲負硤 婢婢屯兵河源,聞恐熱謀度河,急擊之,爲恐熱所敗。 恐熱間出鷄 戰而 死 婢婢糧 頂嶺關 盡 自固以困恐熱, 馮硤爲梁攻婢婢, 引衆趨 甘州 西境, 大將磨離羆子 至白土嶺 以拓拔懷光居守 不從, 敗其 婢婢統銳兵扼橋,亦 、將尙鐸羅楊藏, , 乃辭疾先歸。 恐熱麾下多

將請 倨夸自大,且求河渭節度使,帝不許。 命 涇 原 唐 恐 兵 靈 五. 武、 + 萬共定其亂,保渭州, 鳳翔、邠寧、振武等兵迎援。 求册爲贊普,奉表 還過咸陽橋,咄歎曰:「我舉大事,覬得濟此河與唐分 恐熱既至, 婦唐。 韶尚書左丞李景讓就 狼藉,麾下內怨,皆欲圖 宣宗韶太僕卿陸就持節慰勞, 問 所欲。 之。 、乃揚聲 恐熱

」於是復趨落門川收散卒,將寇邊,會久雨糧絕,恐熱還奔廓州

萬 倍其資饟,再歲一代;商賈往來於邊者,關鎭毋何留;兵欲墾田,與民同。 衍者,聽民墾藏,貸五歲賦;

温池委度支権其鹽,以贍邊;

四道兵能營田者爲給牛種,戌者 下,天子爲御延喜樓,賜冠帶,皆爭解辮易服。 南 西道節度使鄭涯得扶州。鳳翔兵與吐蕃戰隴州,斬首五百級。 靈武節度使李欽取安樂州, 於是鳳翔節度使李玭復淸水;涇原節度使康季榮復原州, 詔爲威州; 邠寧節度使張欽緒復蕭關; 鳳翔收秦州 因韶差賜四道兵,錄有勞者; 三州七關地腴 是歲,河、隴高年千餘見闕 取石門等六關, 得人畜幾

監 後世。」又韶:「朕姑息民、其山外諸州,須後經營之。」 號。」帝曰:「憲宗嘗念河湟,業未就而殂落。 言:「王者建功立業,必有以光表於世者。今不勤一卒,血一刃,而河湟自歸,請上天子尊 候署曰「西極道九千九百里」,示戍人無萬里行也。 黄河積石、宛秀等軍〔即〕,中國無斥候警者幾四十年。輪臺、伊吾屯田,禾菽彌望。開遠門揭 一牧三百所皆失之。 初,太宗平薛仁杲,得隴上地;虜李軌,得凉州;破吐谷渾、高昌,開四鎭。 憲宗常覽天下圖,見河湟舊封,赫然思經略之,未暇也。 今當述祖宗之烈, 乾元後,隴右、劍南西山三州七關軍鎮 其議上順、憲二廟諡號,夸顯 至是羣臣奏 玄宗繼收

明年 ,沙州首領張義潮奉瓜、沙、伊、肅、甘等十一州地圖以獻。 始義潮陰結豪英歸唐,

列

傳第

百四十

下

吐

番下

六一〇八

款。 擢 部 義潮 校十輩皆操挺,內 日 一,衆擐 秦州刺史高駢誘降延心及渾末部萬帳,遂收二州,拜延心武衞將軍。 沙州防禦使, 甲譟 州門,漢 表其中,東北走天德城,防禦使李丕以聞。帝嘉其忠,命使者齎 俄號歸義軍, 遂爲節度使。 人皆助之,虜守者驚走,遂攝州事。 其後河、渭州虜將尚延心以國 繕甲兵,耕且 戰, 財收鳳林關 悉復餘 破亡, 詔 州 收慰, 亦獻 以

爾與尚恐熱戰,破之,收器鎧以獻。 咸通二年,義潮奉凉州來歸。 七年, 吐番餘衆犯別、寧,節度使薛弘宗卻之。 北庭回鶻僕固俊擊取西州, 收諸部。 割州 會僕固俊與 城使張

吐蕃大戰,斬恐熱首,傳京師。

|延心爲|河、||得州都游弈使。

多没。 史曹義金領州務, 八年,義潮入朝,爲右神武統軍,賜第及田,命族子淮深守歸義。 遂授歸義節度使。 後中原多故,王命不及,甘州爲回鶻所丼, 十三年卒。 歸義諸城 沙州以長

熱亂 渾末,亦曰 温末,吐蕃奴部也。 無所歸, 共相嘯合數千人,以温末自號,居甘、潚、瓜、沙、河、渭、岷、廓、疊、宕間, **虜法**,出師必發豪室,皆以奴從,平居散處耕牧。 及認

近蕃牙者最勇,而馬尤良云。

有逸德,而拓地太大,務遠功,忽近處,逆賊一奮,中原封裂,訖二百年不得復完,而至陵夷。 雄,爲中國患最久。 然則內先自治,釋四夷爲外懼,守成之良資也。 帥,圜視共計,卒不得要領。晚節二姓自亡,而唐亦衰焉。夫外撫內寧,惟聖人不讓。玄宗 唐興,四夷有弗率者,皆利兵移之,蹙其牙,犂其廷而後已。惟吐蕃、回鶻號彊 贊普塗盡盜河湟,薄王畿爲東境,犯京師,掠近輔,殘馘華人。 謀夫虓

校勘記

(1) 前二月告廟齊三日關播跪讀載書 三日,朝服陞壇。」無險卷九八一同,惟「監官」作「盟官」。按「二日」「三日」,時序甚明。 舊書卷一九六下吐蕃傳云:「先盟二日,命有司告太廟,監官

六九賜吐蕃宰相尙結贊三書均作「趙聿」。 「趙建」,舊書卷一九六下吐蕃傳、陸宣公翰苑集卷一〇及文苑英華卷四

3

詔倉部郎中趙建往使

「二月」疑是「二日」之訛。

至言 列 第一百四十一下 各本原作「志信」,據舊書卷一九六下吐蕃傳、冊府卷一三一及本卷上文改。 校勘 12

(E) 玄宗繼收黄河積石宛秀等軍 「積石」,各本原作「磧石」。按唐無磧石軍。考本書卷四〇及舊書

卷三八地理志、通典卷一七二、元和志卷三九,隴右道有積石軍,在廓州。又據唐會要卷七八, 宛秀軍在燒河郡(廓州舊稱),本書地理志廓州有宛秀城,當即其地。「磧石」爲「積石」之訛甚

明,今改。

唐書卷二百一十七上

列傳第一百四十二上

回鶻上

日袁紇、薛延陀、契苾羽、都播、骨利幹、多覽葛、僕骨、拔野古、同羅、渾、思結、斛薛、奚結、 回紇,其先匈奴也,俗多乘高輪車,元魏時亦號高車部,或日敕勒,訛爲鐵勒。 其部落

阿跌、白霤,凡十有五種,皆散處磧北。

恐其怨,則集渠豪數百悉阬之,韋紇乃幷僕骨、同羅、拔野古叛去,自爲俟斤,稱回紇。 喜盜鈔,臣于突厥,突厥資其財力雄北荒。大業中,處羅可汗攻脅鐵勒部,夏責其財,旣又 | **袁**紇者,亦曰鳥護,曰鳥紇,至隋日章紇。 其人驍彊,初無酋長,逐水草轉徙,善騎射,

畜多大足羊。 有時健俟斤者,衆始推爲君長。 子曰菩薩,材勇有謀,嗜獵射,戰必身先,所

列

傳第

百四四

十 二 上

回動上

回紇姓樂羅葛氏,居薛延陀北娑陵水上,距京師七千里。衆十萬,勝兵半之。地磧鹵,

決平 頡利 將 向 輒 五 發 |千騎破之||馬鬣山,追北至||天山,大俘其部人,聲震北方。 部 摧破,故下皆畏附,爲時健所逐。 事 樹牙獨樂水上。 回紇繇是寖盛。 與薛延陀共攻突厥北邊,頡利遣欲谷設領騎十萬討之,菩薩 時健死,部人賢菩薩,立之。 繇是附薛延陀, 母曰烏羅渾,性嚴明,能 相唇齒,號活

宗爲 唐官官之,凡數千人。 俟 駭 息 利 散散 幸 發 貞 吐迷度 ·靈州 觀 三年,始來朝,獻方物。 知 所之。 次涇陽,受其功。 與諸部攻薛延陀,殘之,幷有其地,遂南踰 今各有分地,願 於是鐵勒 突厥已亡,惟回紇與薛延陀爲最雄彊 歸命天子,請置唐官。 + 部皆來言:「延陀不事大國, 賀蘭 」有詔張飲高會,引 Щ, 境諸河。 菩薩 以自取亡,其下麕 遣 見渠長等,以 使者獻款, 死 太

州 馬 部爲堅昆府, 同 羅 ,即故單于臺置燕然都護府統之,六都督、七州皆隸屬,以李素立爲燕然都護。其都督、 契苾 部爲 明 年 羽 龜林 復 爲楡 入朝。 北骨利 溪州 思結 乃以 、奚結爲雞鹿 幹爲玄闕 部 為盧山 回紇部爲瀚海, 州 皆號都 州 東 北俱羅 思結 皆府; 多覽葛部爲燕然,僕骨部爲 別 勃 部 以渾 爲 為聯林 燭龍 爲皋蘭州 州 州 ; 皆以婚領 白霫爲實顏州 斛薛 金微,拔野古部爲 為高 爲都督、 闕 州 刺 其 阿跌 史、 西 長 北結骨 爲 幽陵 史、 雞 刺 田

爲賦。 層它部爲居延州。 六、內宰相三,又有都督、將軍、司馬之號。帝更詔時健俟斤它部爲祁連州,隸靈州都督,自 尊道』,世爲唐臣。」乃詔磧南鵬鵜泉之陽置過郵六十八所,具羣馬、湩、肉待使客,歲內貂皮 歸身聖化,天至尊賜官爵,與爲百姓,依唐若父母然。請於回紇、突厥部治大涂,號『參天至 回紇數千人飲畢,尙不能半。又詔文武五品官以上祖飮尙書省中。渠領共言:「生荒陋地, 陳十部樂,殿前設高坫,置朱提瓶其上,潛泉浮酒,自左閣通坫趾注之瓶,轉受百斛鐐盎, 史給玄金魚符,黃金爲文,天子方招寵遠夷,作絳黃瑞錦文袍、寶刀、珍器賜之。帝坐祕殿, 乃拜吐迷度爲懷化大將軍、瀚海都督;然私自號可汗,署官吏,壹似突厥,有外宰相

紇不疑,即往謝,因斬以徇。 魯之盜北庭,婆閆以騎五萬助契苾何力等破賀魯,收北庭; 將軍,賻祭備厚,擢其子婆閆左驍衞大將軍,襲父所領。 皆車鼻婿,故烏紇領騎夜劫吐迷度殺之。燕然副都護元禮臣遣使給烏紇,許白爲都督,烏 再破賀魯金牙山,遷右衞大將軍,從討高麗有功。 吐迷度兄子烏紇烝吐迷度之妻,遂與俱陸莫賀達干俱羅勃謀亂而歸車鼻可汗,二人者 。帝恐諸部攜解,命兵部尚書崔敦禮持節臨撫,贈吐迷度左衞大 俱羅勃旣入朝,帝不遣。 ,又從伊麗道行軍總管任雅相等 阿史那賀

明年 匐 抵 司 馬護輸乘衆怨,共殺君奠,梗絕安西諸國朝貢道。 久之,奔突厥 死 北 諸 子承宗立,凉州都督王君奠誣暴其罪,流死瀼州。 思結、渾三部度磧,徙甘、凉間,然唐常取其壯騎佐赤水軍云。 助唐攻殺默啜,於是別部移健頡利發與同羅、 蕃 里 悉 死 、隸之。 比 栗 比栗死, 嗣 龍 子 朔 中,以燕然都護府 獨解支嗣。 武后 時, 領 回約 突厥 **霫等皆來,詔置其部於大武** (三),更號瀚 當 默啜方彊 此時,回紇稍不循,族子瀚海府 死 獨解支死,子 海 取鐵勒 都 護府 故 地, 以磧爲 軍北。 伏帝 故 回紇 匐立。 限, 伏帝 興

仗 訖, 日 可汗 此 為奉義王,南居突厥故地,徙牙烏德鞬山、昆河之間(11),南距西城千七百里, 野古、同羅、思結、契苾六種相等夷,不列於數,後破有拔悉蜜、葛邏祿 也 子骨力裴羅立。會突厥亂,天寶初, 阿勿嘀 、北盡磧口三百里,悉有九姓地。九姓者, ·書令內案授册使者,使者出門升輅,至皇 明年,裴羅又攻殺突厥白眉可汗,遣頓啜羅達干來上功,拜裴羅左聽衞員外大將軍, 後三年,襲破拔悉蜜,斬頡跌伊施可汗,遣使上狀, 部落。 日葛薩 自是, ,日斛温素,日藥勿葛,日奚邪勿。 戰常以二客部爲先鋒。 裴羅 與葛邏祿自稱左右葉護,助拔悉蜜擊走烏蘇 三城門, 日藥羅葛,日 有韶 降乘馬 拜爲骨咄祿毗 藥羅葛, 自稱骨咄祿毗伽闕 幡 胡咄葛, 日啒羅勿, 節 回紇姓也,與僕骨、渾、 導 伽闕懷 以行。 總十一 仁可汗, 凡 西城 可汗, 册 姓, 可 日貊歌 天子以 並置 漢高 前 殿

斥地愈廣,東極室韋,西金山 南控大漠, 盡得古匈奴地。 裴羅死, 子磨延啜立 號葛勒可

肝, 剽悍善用兵, 歲遣使者入朝。

殿, 於是 兵。 |護辭曰:「國多難,我助討逆,何敢食!」固命,乃留。旣行, 公主爲王妃, 見葉護, 慰而 一,陳兵引子儀拜狼纛而後見。 肅宗 可汗自將,與朔方節度使郭子儀合討同羅諸蕃,破之河上。 可汗喜,以可敦妹爲女,妻承案,遣渠領來請和親,帝欲固其心,卽封虜女爲毗伽公主。 遣。 即位,使者來請助討祿山 約爲昆弟, 擢承宋宗正 俄以大將軍多攬等造朝, 葉護大喜,使首領達干等先到扶風見子儀, |卿;可汗亦封承寀爲葉護,給四節,令與其]葉護共將。 帝駐彭原,使者葛羅支見,恥班下, 帝韶燉煌郡王承宋 及太子葉護身將四千騎來, 與約, 日賜牛四十角、羊八百蹄、米 而令僕固懷恩送王, 與子儀會呼延谷, 惟所命。 帝不欲使鞅鞅, 引升 子儀犒飲三日。 帝因册毗 可汗 帝命廣 因召其 伽

都而 賊背 南、壁涯東、進次陝西、戰新店。 ,與鎭西、北庭節度使李嗣業夾扅之,賊大敗,進收長安。 香積之戰,陣灃上,賊詭伏騎於王師左,將襲我,僕固懷恩麾回紇馳之,盡翦其伏,乃出 初, 回紇至曲沃,葉護使將軍鼻施吐撥裴羅旁南山東 懷恩率回紇、南蠻、大食衆

四十斛。

列

傳第

百四十二上

回爾

Ŀ

陽,訖除殘盜。」帝曰:「爲朕竭義勇,成大事,卿等力也。」詔進司空, 爵忠義王, 歲給絹 階,席酋領於下,宴且勞之,人人賜錦繡繒器。 莊挾安慶緒棄東京北度河,回紇大掠東都三日,姦人導之,府庫窮殫,廣平王欲止不可, 旗趨賊,出其後,賊反顧,遂大潰,追奔數十里,人馬相騰躁,死者不可計,收仗械如丘。 出,搜賊伏谷中,殲之,營山陰。 **耆老以繒錦萬** 匹路回紇, 止不剽。 子儀等與賊戰,傾軍逐北,亂而卻,回紇望見,即踰西嶺,曳 葉護還京師,帝遣羣臣勞之長樂,帝坐前殿,召葉護升 葉護頓首言:「留兵沙苑, 臣歸料馬,以收范

靈俊立 袍坐 諸境。 請昏 愛女結好。 靈俊 史大夫爲册命使,以宗子右司郎中異兼御史中丞爲禮會使,幷以副 匹,使至朔方軍受賜。 趨 帳 乾元元年,回紇使者多彥阿波與黑衣大食會閣之等俱朝,爭長,有司使異門並進。 ,許之。帝以幼女寧國公主下嫁,即册磨延啜爲英武威遠毗伽 踽上,又問:「立王上者爲誰?」瑀曰:「中人也。」可汗曰:「中人奴爾 中,儀衞光嚴,引瑀立帳外,問曰:「王,天可汗何屬? 帝餞公主,因幸咸陽,數尉勉,主泣曰:「國方多事,死不恨。」 瑪至虜, 比中國與夷狄婚,皆宗室子。 於是引瑀入,瑀不拜,可汗曰:「見國君 今寧國乃帝玉女,有德容,萬里來降,可汗天子 ,禮無不拜。...瑀曰:「天子顧 」瑀曰:「從昆弟也。」 可汗,韶漢中郡王瑀 瑀, 尚書右僕射裴冕送 顧 而 立 可汗有功,以 可汗 郎 時中人雷 上乎?」 胡 /帽赭 攝 叉使 御

婿 死,國人欲以公主殉,主曰:「中國人婿死,朝夕臨,喪期三年,此終禮也。 功。 **率騎三千助討賊**, 慕中國,吾不可以殉。」乃止,然剺面哭,亦從其俗云。後以無子,得還。 可汗盡與其牙下酋領。 ,當以禮見,安踞受詔邪?」可汗慚,乃起奉詔,拜受册。 明年,骨啜與九節度戰相州,王師潰,帝德等奔京師,帝厚賜尉其意,乃還。俄而 帝因命僕固懷恩總之。又遣大首領蓋將軍與三女子謝婚,丼告破堅昆 **瑀還,獻馬五百匹、貂裘、白氎等。** 乃使王子骨啜特勒、宰相帝德等 翌日,尊主爲可敦。瑀所齎賜物, 回紇萬里結香,本

少子請昏,帝以妻之,至是爲可敦。明年,使大臣俱錄莫賀達干等入朝,并問公主起居,使 人通謁於延英殿。 始葉護太子前得罪死,故次子移地健立,號牟羽可汗,其妻,僕固懷恩女也。 始可汗爲

厚, 天下,廣平王已卽天子位,其仁聖英武類先帝,故與葉護收二京、破安慶緒者, 年八月也。 |義所計,日:「唐荐有喪,國無主,且亂,請回紇入收府庫,其富 且唐歲給回紇繒絹,豈忘之邪?」是時,回紇已踰三城,見州縣榛萊,烽障無守,有輕唐 代宗卽位,以史朝義未滅,復遣中人劉淸潭往結好,且發其兵。 清潭齎韶至其帳,可汗曰:「人言唐已亡,安得有使邪? |不貲。|可汗卽引兵南,寶應元 」清潭爲言:「先帝雖棄 比使者至,回紇已爲朝 是與可汗素

列傳第

百

四十

二上

回館上

收賊財帑,乃鼓而南,上策也。」不聽。 子昂曰:「然則趨懷太行道,南據河陽,扼賊喉衿。」又 不聽。曰:「食太原倉栗,右次陝,與澤潞、河南、懷鄭兵合。」回紇從之。 敦偕來。 **震驚,遣殿中監藥子昂迎勞,且視軍,遇于太原,密識其兵裁四千,孺弱萬餘,馬四萬,** 子昂說曰:「自寇亂來,州縣殘虛,供億無所資,且賊在東京,若入井陘,以取邢、洛、衞、懷, 乃遣使北收單于府兵、倉庫,數以語凌靳清潭。 帝令懷恩與回紇會。 因遣使上書, 請助天子討賊。 清潭密白帝:「回紇兵十萬向塞。」朝廷 回紇欲入蒲關,徑沙苑而東, 與可

孫,二宮在殯,禮不可以蹈舞。」回紀廷詰曰:「可汗爲唐天子弟,於王,叔父行也,容有不蹈 能屈,即引子昂、進、少華、踞接之百,少華、踞一夕死,王還營。官軍以王見辱,將合誅回紇, 舞乎?」子昂固拒,卽言:「元帥,唐太子也,將君中國,而可舞蹈見可汗哉?」回紇君臣度不 鋒,與諸節度會陝州。時可汗壁陝州北,王往見之,可汗責王不蹈舞。子昂辭曰:「王,嫡皇 使,中書舍人章少華爲元帥判官,御史中丞李進爲行軍司馬,東會回紇。 敕元帥爲諸軍先 王以賊未滅止之。 詔以雍王爲天下兵馬元帥,進子昂兼御史中丞,與右羽林衞將軍魏琚爲左右廂兵馬

於是,懷恩與虜左殺爲先驅。朝義使反間,左殺執以獻,與諸將同擊賊,戰橫水,走之, 可汗使拔賀那賀天子,獻朝義旗物。 雍王還靈寶,可汗屯河陽,留三月,屯旁人

山 困於剽辱。 [崞口還屯,可汗出澤、潞,與懷恩會,道太原去。 僕固場率回紇兵與朝義挐戰,蹀血二千里,梟其首,河北悉平。 懷恩道相州西

東都,與魚朝恩及朔方軍驕肆,因回紇爲暴,亦掠汝、鄭間,鄉不完廬,皆蔽紙爲裳,虐于 餘人,及是益橫,詬折官吏,至以兵夜斫含光門,入鴻臚寺。方其時,陝州節度使郭英义留守 初,回紇至東京,放兵攘剽,人皆遁保聖善、白馬二祠浮屠避之,回紇怒, 火浮屠, 殺萬

胡祿 侍王翊使,即其牙命之,自可汗至宰相共賜實封二萬戶。又以左殺爲雄朔王,右殺寧朔王, 頡咄登里骨啜蜜施合俱錄英義建功毗伽可汗,可敦曰娑墨光親麗華毗伽可敦,以左散騎常 都督金河王,拔覽將軍靜漠王,十都督皆國公。 帝念少華等死,故贈少華左散騎常侍,踞揚州大都督,賜一子六品官。於是册可汗曰

至,子儀麾左右使却,且命酒與飲,遺以纏頭綵三千,召可汗弟合胡祿等持手,因讓曰:「上 「此渭北節度使某,朔方軍糧使某。」酋長下馬拜,子儀亦下見之。 虜數百環視,子儀麾下亦 子儀,請改事。子儀率麾下叩回紇營。 子儀易服。 永泰初,懷恩反,誘回紇、吐蕃入寇。俄而懷恩死,二虜爭長,回紇首領潛詣涇陽見郭 **酋長相顧曰:「眞是公矣!」時李光進、路嗣恭介馬在側,子儀示酋長曰:** 回紇曰:「願見令公。」子儀出旗門,回紇日:「請釋

列傳第

百

四十二上

回鵝上

誓。」始,虜有二巫,言「此行必不戰,當見大人而還」;及是相顧笑曰:「巫不吾給也。」 戮。」方時,虜宰相磨咄莫賀達干、頓莫賀達干等聞言皆奪氣(B),酒至其所,輒曰:「無易公 恙,吾等願還擊吐蕃以報厚恩。然懷恩子,可敦弟也,願赦死。」於是子儀持酒,胡祿請盟而 能擊汝。」酋長聾服曰:「懷恩詭我曰『唐天子南走,公見廢』、是以來。今天可汗在, 念回紇功,報爾固厚,何負而來?今卽與汝戰,何遽降也?我將獨入爾營,雖殺我,吾將士 子儀曰:「唐天子萬歲,回紇可汗亦萬歲,二國將相如之。有如負約,身死行陣, 家屠 公無

五萬 、皆來朝,賜與不可計。 .級,生禽萬人,獲馬、橐它、牛、羊, 收所俘唐戶五千。 朔方先鋒兵馬使白元光合回紇兵於靈臺,會雪雰嚴晦,吐蕃閉營撤備,乃縱擊之,斬首 子儀以名臣見。名臣,懷恩兄子,銳將也。 僕固名臣降,合胡祿都督等二百

餞中渭橋。 繼室,兵部侍郎李涵持節册拜可敦,賜繒綵二萬。 大曆三年,光親可敦卒,帝遣右散騎常侍蕭昕持節弔祠。明年,以懷恩幼女爲崇徽公主 是時,財用屈,稅公卿騾、橐它給行,宰相

萬求售,使者相躡,留舍鴻臚,駘弱不可用,帝厚賜欲以愧之,不知也。 市物,奪長安令邵說馬,有司不敢何詰。 回紇之留京師者,曹輩掠女子於市,引騎犯合光門,皇城皆闔,詔劉淸潭慰止。 自乾元後,益負功,每納一馬,取直四十縑 復以萬馬來,帝不忍 ,歲以數 復出

重 熕 民、爲償六千。十年,回紇殺人橫道,京兆尹黎幹捕之,韶貸勿劾。 又刺人東市, 縛送

萬年獄,首領劫取囚,殘獄吏去,都人厭苦。

代州都督張光晟又戰羊虎谷,破之,虜乃去。 十三年,回紇襲振武,攻東脛,入寇太原。 河東節度使鮑防與戰陽曲,防敗績,殘殺萬

舉國 千人,卽自立爲合骨咄祿毗伽可汗,使長建達干從使者入朝。 柏 .遠鬭,有如不捷,將安歸?」可汗不聽,頓莫賀怒,因擊殺之,幷屠其支黨及九姓胡幾二 爾莫賀達于曰:「唐,大國,無負於我。前日入太原,取羊馬數萬,比及國,亡耗略盡。今 德宗立,使中人告喪,且脩好。時九姓胡勸可汗入寇,可汗欲悉師向塞,見使者不爲禮。 建中元年, 韶京兆少尹源休

持節册頓莫賀爲武義成功可汗。

蜜施 素彊 歸,往往亡去,突董察視嚴亟。 盛女子以橐,光晟使驛吏刺以長錐,然後知之。 ,助之者 、大小梅錄等還國,裝橐係道,留振武三月,供擬珍豐,費不貲。 始 回 [紇至中國,常參以九姓胡,往往留京師,至千人,居貲殖產甚厚。 九胡爾。 今其國亂,兵方相加,而虜利則往,財則合,無財與利, 羣胡 《獻計於光展,請悉斬回紇,光展許之, 已而聞頓莫賀新立,多殺九姓胡 軍使張光晟陰伺之,皆 即上言:「回紇非 亂不振。 人,懼不敢

列

傳第

百四十

上

回髓上

以此時乘之,復歸人與幣,是謂借賊兵,資盜糧也。」乃使裨校陽不禮,突董果怒,鞭之。光晟 猶以血濯血,徒益汙。 吾以水濯血,不亦善乎?爲我言有司,所負馬直一百八十萬,可速償 留五旬,卒不見可汗。可汗傳謂休日:「國人皆欲爾死,我獨不然。突董等已亡,今又殺爾, 鬭死,非天子命。」爻曰:「使者皆負死罪,唐不自戮,何假手于我邪?」良久罷去,休等幾死。 至,可汗令大臣具車馬出迎,其大相頡干迦斯踞坐責休等殺突董事,休言:「彼自與張光晟 誅之。」部送女子還長安。帝召光晟還,以彭令方代之,遣中人與回紇使津達干往言其端, 因欲與虜絕。敕源休俟命太原。明年,乃行,因歸突董等四喪。突董,可汗諸父也。源休 因勒兵盡殺回紇羣胡,收橐它、馬數千,繒錦十萬,且告曰:「回紇抶大將,謀取振武,謹先

下不負少華,少華負陛下。且北廣君長身赴難,陛下在藩,春秋未壯,而輕度河入其營,所 人,然卒完歸,則爲無罪矣。」帝曰:「卿言則然,顧股不可負少華等,奈何?」||泌曰:「臣謂陛 所殺矣。今可汗初立,遣使來告,垂髮不翦,待天子命。而張光晟殺突董等。雖幽止使 和。」泌曰:「辱少華等乃牟羽可汗也,知陛下卽位必償怨,乃謀先苦邊,然兵未出,爲今可汗 股不能已。」

巡曰:「陛下豈以陝州故憾乎?」帝曰:「然。

股方天下多難,未能報,且毋議 我。」遣散支將軍康赤心等隨休來朝。帝隱忍,賜以金繒。 後三年, 使使者獻方物, 請和親。帝蓄前恚未平, 謂宰相李泌曰:「和親待子孫圖之,

帝曰:「善。」乃許降公主,回紇亦請如約。詔咸安公主下嫁,又詔使者合闕達干見公主於麟 開元故事,如突厥可汗稱臣,使來者不過二百,市馬不過千,不以唐人出塞,亦無不可者。」 德殿,使中謁者齎公主畫圖賜可汗。 使來,當使知我前後功』云。今請和,必舉部南望,陛下不之答,其怨必深。 勝,葉護欲大掠,代宗下馬拜之,回紇乃東向洛。 母捧陛下以貂裘,叱左右促命騎,躬送出營。此少華等負陛下也。假令牟羽爲有罪,則今 以陛下見可汗,閉壁五日,與陛下張飮,天下豈不寒心哉?而天助威神,使豺狼馴服,牟羽 可汗,固伸威於虜,何恨焉?然計香積、陝州事,以屈己爲是乎?伸威爲是乎?藉令少華等 拜於帳下,而可汗不敢少有失於陛下,則陛下未嘗屈矣。 先帝拜]葉護,全京城,陛下乃不拜 然先帝曰:『王仁孝,足辨朕事。』下詔慰勉。 謂曰:『主當勞客,客返勞主邪?』東收京師,約曰:『土地、人衆歸我,玉帛、子女予回紇。』戰 謂冒豺虎之場也。 可汗已殺之,立者乃牟羽從父兄,是爲有功,渠可忘之邪?且回紇可汗銘石立國門曰:『唐 軍司馬,方葉護來,先帝祗使宴於府。 爲少華等計,當先定會見禮,臣猶危之,奈何孑然赴哉?臣昔爲先帝行 及議征討,則不見也。 葉護乃<u>牟</u>羽諸父也,牟羽之來,陛下以元子不 臣猶恨以元帥拜葉護於馬前,爲左右過, 葉護邀臣至營,帝不許,使好 願聽昏而約用

明年,可汗遣宰相跌跌都督等衆千餘,丼遣其妹骨咄祿毗伽公主率大酋之妻五十人逆 第一百四十二上 回 鸖 上

傳

門見使者。 **祿長壽天親毗伽可汗,公主爲智惠端正長壽孝順可敦** 安公主官屬,視王府。 階升,乃坐。 所,又譯史傳問,乃與俱入。 傳導,拜必答,揖與進。 時,方藉其用,循以臣之,況今日乎?」於是引回鶻公主入銀臺門,長公主三人候諸內, 燉煌王爲從祖兄,回鶻妻以女,見帝於彭原,獨拜廷下,帝呼曰『婦』而不名『嫂』也。 除之。」又請易回紇曰回鶻,言捷驇猶鶻然。 主,且納聘。 是時,可汗上書恭甚,言:「昔爲兄弟,今婿,半子也。 数 跌 至 有賜則降拜,非帝賜則避席拜,妃、公主皆答拜。 |振武,爲室韋所鈔,戰死。 以嗣滕王湛然爲昏禮使, 帝御祕殿,長公主先入侍,回鶻公主入拜謁已,內司賓導至長公主 至宴所,賢妃降階俟,回鶻公主拜,賢妃答拜。 帝欲饗回鶻公主,問禮於李泌, 有韶其下七百,皆聽入朝,舍鴻臚,帝御延喜 右僕射關播護送,且將册書拜可汗爲汨咄 **訖歸,凡再饗。** 陛下若患西戎, 又拜召已,由 對日:「肅宗 帝又盡 子 當艱 請 澤史 建 以兵 咸 虞 於 西

五年,可汗死,子多邏斯立,國人號「泮官特勒」,以鴻臚卿郭鋒持節册拜愛登里邏

汨沒蜜施俱錄毗伽忠貞可汗。

郭昕數遣使奉表,皆不至。貞元二年,元忠等所遣假道回鶻,乃得至長安。 初,安西、北庭自天寶末失關、隴, 朝貢道隔。 伊西北庭節度使李元忠、 帝進元忠爲北 四鎮節度留後

部落以避之。 襲古,將還取北庭,爲吐蕃所擊,大敗,士死太半,迦斯奔還。 寇北庭,頡干迦斯與戰,不勝,北庭陷。 依,亦厭虜哀索,至三葛禄、白眼突厥素臣回鶻者尤怨苦(思),皆密附吐蕃,故吐蕃因沙陀共 曰:「弟與我俱歸,當使公還唐。」襲古至帳,殺之。 葛祿又取深圖川(K),回鶻大恐,稍南其 大都護,昕爲安西大都護。 自是, 道雖通, 而虜求取無涘。 於是都護楊襲古引兵奔西州。 襲古挈餘衆將入西州,迦斯紿 沙陀別部六千帳,與北庭相 回鶻以壯卒數萬召

奉誠 其配英義生二子,皆爲天親所殺。是歲,回鶻擊吐蕃、葛祿於北庭,勝之,且獻俘。明年,使 藥羅葛炅來朝,炅本唐人呂氏,爲可汗養子,遂從可汗姓。帝以其用事,賜賚殊優,拜檢校 國後歸,因留回鶻中爲可敦,號「少寧國」,歷配英武、英義二可汗。至天親可汗時,始居外。 將士,無所私,其國遂安。 汗拜且泣曰:「今幸得繼絕,仰食於父也。」迦斯以其柔屈,乃相持哭,遂臣事之,以器幣悉給 葉公主云。可汗之弟乃自立。迦斯方攻吐蕃,其大臣率國人共殺篡者,以可汗幼子阿啜 可汗。俄以律支達干來告少寧國公主之喪。主,榮王女也。始寧國下嫁,又以媵之。寧 迦斯還,可汗等出勞,皆俯伏言廢立狀,惟大相生死之。悉發郭鋒所賜器幣餉迦斯。可 是歲,可汗爲少可敦葉公主所毒死,可敦亦僕固懷恩之孫,懷恩子爲回鶻葉護,故女號 遣達北特勒梅錄將軍來告,且聽命。 韶鴻臚少卿庾鋋册阿啜爲

傳第一百四十二上

回鶻上

ヘニニメ

尙書右僕射。

愛滕里邏羽錄沒蜜施合胡祿毗伽懷信可汗。骨咄祿本跤跌氏,少孤,爲大首領所養,辯敏 子孫內之朝廷。 材武,當天親時數主兵,諸酋尊畏。至是,以樂羅葛氏世有功,不敢自名其族,而盡取可汗 十一年,可汗死,無子,國人立其相骨咄祿爲可汗,以使者來,詔祕書監張薦持節册拜

永貞元年,可汗死,詔鴻臚少卿孫杲臨弔,册所嗣爲滕里野合俱錄毗伽可汗。 元和初,再朝獻,始以摩尼至。其法日晏食,飮水茹葷,屛湩酪,可汗常與共國者也。摩

汗。閱三歲,使者再朝,遣伊難珠再請昏,未報。可汗以三千騎至鸊鵜泉,於是振武以兵屯 凡二十一歲。無幾,可汗亦死,憲宗使宗正少卿李孝誠册拜愛登里羅汨蜜施合毗伽保義可 尼至京師,歲往來西市,商賈頗與囊橐爲姦。三年,來告咸安公主喪。主歷四可汗,居回鶻

黑山,治天德城備虜。禮部尚書李絳奏言:

此,增甲兵,飭城壘,中夏長策,生人大幸也。臣觀今日處置,未得其要。 回鶻盛彊,北邊空虛,一爲風塵,則弱卒非抗敵之夫,孤城爲不守之地。 爣陛 下懷

夫邊憂有五,請歷言之。 北狄貪沒,唯利是視,比進馬規直,再歲不至,豈厭繒帛

列 第一百四十二上 回饋上 杈 勘 記

寧,國家坐受其安,寇掠長息,三也。 今捨三利,取五憂,甚非計。, 無北顧憂,可南事淮右,申令於垂盡之寇,二也。北虜恃我戚,則西戎怨愈深,內不得 守蕃禮,所謂三利也。和親則烽燧不驚,城堞可治,盛兵以畜力,積粟以固軍,一也。旣 纍人畜在旦夕內,比王師至則虜已歸,寇能久留,役亦轉廣。 四可憂。 **北狄西戎**,素相 禍。五可憂。又淮西吳少陽垂死,可乘其變,諸道興發,役且十倍。 臣謂宜聽其婚,使 攻討,故邊無虞。今回鶻不市馬,若與吐蕃結約解仇,則將臣閉壁憚戰,邊人拱手受 可憂。自脩好以來,山川形勝,兵戍滿虛,虜皆悉之。賊掠諸州,調發在旬朔外,其係 害,攻守險易,當謀之邊將。今乃規河塞之外,裁廟堂之上,虜猝犯塞,應接失便。 未明,戈甲未備,城池未固,飾天德則虜必疑,虛西城則磧道無倚。二可憂。夫城保要 利哉?殆欲風高馬肥,而肆侵軼。故外攘內備,必煩朝廷。一可憂。兵力未完,斥候

千不能扞且馳也。又如保十全之勝,一歲輒罷,其饋餉供儗,豈止一縣賦哉? 緡,以一縣賦爲婚貲,非損寡得大乎。

今惜婚費不與,假如王師北征,兵非三萬、騎五 或日降主費多,臣謂不然。我三分天下賦,以一事邊。今東南大縣賦歲二十萬

帝不聽。

校勘記

思結別部為蹛林州 年正月,以思結置盧山都督府,以思結別部為歸林州。與本書卷四三下地理志及舊書卷一九 各本原無「別部」二字。按唐會要卷七三及通鑑卷一九八俱云:貞觀二十

九下鐵勒傳合。本卷上文亦謂「思結部爲盧山」。此當是「思結別部」,據補

- 燕然都護府 (鑑卷二○一、寰宇記卷一九九俱載:龍朔三年、徙燕然都護府於回紇本部、改瀚海都護府。 卷四高宗紀略同。 「護」,各本原作「督」。按燕然都護府置於貞觀中。「沅和志卷四、唐會要卷七三、通 此處「護」訛爲「督」,據改。
- 3 昆河 「嗢」字。 本書卷四三下地理志作 「醞昆河」。 突厥集史卷一四新唐書四鶻傳校注謂「昆」 上脫
- 頓莫賀達干 各本原無 「莫賀達干」 四字。據舊書卷一九五迴紇傳、 珊府卷九八一及本卷下
- (至) 白眼突厥 卷一〇云:「按今上耳其有所謂黑眼族,余以爲作『白眼』者是也。 「眼」,舊書卷一九五迴紇傳、唐會要卷七三及通鑑卷二三三均作「服」。突厥集史
- **公** 深圖川 「深」,舊書卷一九五迴紇傅及通鑑卷二三三均作「浮」。

唐書卷二百一十七下

列傳第一百四十二下

回鶻下

往諭不可。穆宗立,回鶻又使合達干等來固求昏,許之。俄而可汗死,使者臨册所嗣爲登 卿李憲持節護送,太府卿李說爲昏禮使,册拜主爲仁孝端麗明智上壽可敦,告于廟,天子御 留太原。韶以太和公主下降。主,憲宗女也。帝爲主建府,以左金吾衞大將軍胡証、光祿 女,部渠二千人,納馬二萬、橐它千。四夷之使中國,其衆未嘗多此。詔許五百人至長安,餘 囉羽錄沒蜜施句主毗伽崇德可汗。可汗已立,遣伊難珠、句錄、都督思結等以葉護公主來逆 可,虜人曰:「昔咸安公主行之。」証曰:「天子詔我送公主授可汗,今未見,不可先也。」乃止。 通化門餞主,羣臣班辭于道。公主出塞,距回鶻牙百里,可汗欲先與主由間道私見,胡証不 回鶻之請昏,有司度費當五百萬,帝方內討彊節度,故遣宗正少卿李誠、太常博士殷侑

列傳

第一百

四十二下

回鍋下

升樓, 於是 可敦服,絳通裾大襦,冠金冠,前後銳,復出拜已,乃升曲輿,九相分負,右旋于廷者九,降輿 (可汗升樓坐,東向,下設毳幔以居公主,請襲胡衣,以一姆侍出,西向拜已, `與可汗聯坐,東向,羣臣以次謁。 可汗厚贈使者。 可敦亦自建牙,以二相出入帳中。 証等歸, 可敦大 退即次, 被

兵已及豐州 是時,裴度方伐幽、鎭,回鶻使渠將李義節以兵三千佐天子平河北,議者懲艾前患,不 ,使者厚賜乃去。

宴,悲啼眷慕。

爲可汗。 立,使者來告。 可汗,賜幣 敬宗卽位之年,可汗死,其弟曷薩特勒立,遣使者册爲愛登里囉汨沒蜜施合毗伽昭 可汗。 方歲飢,遂疫,又大雪,羊、馬多死,未及命。 十二車。 明年 開成 ,遣左聽衞將軍唐弘實與嗣澤王溶持節册爲愛登里囉汨沒蜜施合句 文宗初,又賜馬直絹五 四 年,其相掘羅勿作難 一十萬。 ,引沙陀共攻可汗,可汗自殺,國人立廅馺特勒 大和六年,可汗爲其下所殺,從子 胡特 勒

武宗即位,以嗣澤王溶臨告,乃知其 國

俄 而渠長句錄莫賀與黠戛斯合騎十萬攻回鶻城,殺可汗,誅掘羅勿, 焚其牙, 諸部潰

將其 勒爲 使劉 那頡啜收赤心 語開諭 主、可汗。 遣使者 相 召 部部 デ I 諸道 明年 可汗, 馺 沔 欲 赡 職 屯雲伽 奉主來歸。 兵 , 安之。」帝用兵部 與厖特勒十五部奔葛邏祿, 又詔使者持册往,潛稽其行 自歸,而公主亦遣使者來言烏介已立, 回鶻奉 帝乃詔右金吾衞大將軍王會持節慰撫其衆,輸糧 南保錯子山。 〈合討。 衆 關拒卻之。 -1 主至漠南,入雲、朔, 千帳東走振武、大同,因室韋、 鳥介怒,追擊達干殺之,劫主南度磧,邊人大恐。 **嗢没斯以赤心** 點戛斯 宰相李德裕建言:「回鶻囊 郎中李拭行邊刺狀。 已破回鶻,得太和 奸桀, ',須 殘衆入吐蕃、安西。 剽橫水,殺掠 難得要領 變。 因請命。 於是,其相赤心與王子嗢沒斯、特勒那頡 黑沙 公主; , 卽 甚衆,轉側天德、 (有功,今飢且亂,可汗無歸,不可擊,宜 角闚 密約天德戍將 又自以李陵後,與唐同宗,故遣 又大臣頡干伽思等表假 於是, 幽州 二萬斛 可汗牙部十三姓奉烏介特 節 ,不許借振武 度使張 田牟, 進攻天德城,振武節 振武間, 心仲武 誘 赤心 盜畜牧自 破之, ,令中人好 振武 斬 帳下 居公 如。 使 啜 度

俱 其衆。 遮 復國, 詔 阿敦 拜 那頡啜 **溫沒斯爲右金吾衞** 寧等凡四部,及將軍曹磨你衆三萬,因仲武降,嗢沒斯 而 山 走,烏介執而 汗已攻雲州 殺之。 大將軍 劉沔 然鳥 與戰, ,爵懷化郡王,以天德爲歸義軍 介兵尚彊 敗績。 **温没斯** 一, 號 十萬, 率三部及特勒、 駐牙大同北閭 亦附使者送款。 卽 大酋 拜歸義 門山 三千 軍 使; 騎詣 帝欲 而特 悉得 使 勒 振 助 尼

列

第

百

四

+=

下

鷭

下

寧塞郡公,爲右領 宋秦、漢以來興殊俗、

忠效卓異者凡三十人,

爲異域歸忠傳寵賜之。 支寧邊郡公, 習勿啜昌化郡公, 軍 大將軍。 加賜嗢沒斯牙旗、豹尾、刀器諸物,給其屬冠帶。 烏羅思寧朔郡公,並爲冠軍大將軍、左 **嗢沒斯請留族太原,率** |威衞大將 軍 韶宰相德裕 ; 愛邪勿

刺 史嬰壁不敢出。 可汗遣使者藉兵欲還故廷,且假天德城,帝不許。 韶益發諸鎭兵屯太原以北 可汗患,進略大同川, 轉戰攻雲州 昆弟爲天子扞邊,帝命劉沔爲列舍雲、朔間處其家

州,走馬邑,抵安衆塞逢虜,與戰破之。烏介方薄振武,雄馳入,夜穴壘出鏖兵,烏介驚,引 去,雄追北至殺胡山,烏介被創走。雄遇公主,奉主還,降特勒以下衆數萬,盡收輜帑及所 敗之。 兵益思忠,河中軍以騎五百益弘順。 史契苾通,以蕃、渾兵出振武,與沔、仲武合,稍逼回鶻。 撫使,思忠爲河西党項都將〔〕、西南面招討使,沔營鴈門。 ;愛邪勿日弘順,即拜歸義軍副使。 **嗢沒斯等旣朝,皆賜李氏,名嗢沒斯曰思忠,** 明年,又爲弘順所破。 可汗收所餘往依黑車子,詔弘順、淸朝窮躡。 **沔與天德行營副使石雄料勁騎及沙陀、契苾等雜虜,夜出雲** <u>汚進次雲州,思忠屯保大栅率河中、陳許兵與回鶻戰</u> 於是,詔劉沔爲回鶻南面招撫使,張仲武 阿歷支日思貞, 弘順厚陷黑車子以利, 思忠數深入諭降其下。 又韶銀州刺史何淸朝、蔚州 習勿啜日思義,烏羅思日 **沔分沙陀** 募殺烏介。 東面 招 刺

烏介。 初,從可汗亡者旣不能軍,往往詣幽州降,留者皆飢寒痕夷,裁數千。 其下又奉其弟遏捻特勒爲可汗。 帝韶德裕紀功銘石于幽州,以夸後世。 黑車子幸其殘,卽殺

其奉,賜第永樂坊,分其兵賜諸節度。 回鶻營功德使在二京者,悉冠帶之。 思忠等以國亡,皆願入朝,見聽,遂罷歸義軍,擢思忠左監門衞上將軍兼撫王傅, 有司收摩尼書若象燒于道,產貲入之官。 虜人憚隸食諸道,據滹沱河叛,劉沔阬殺三千人。 兩稟

所存名王貴臣五百餘,轉依室韋。 室章,悉收回鶻還磧北。 九騎夜委衆西走,部人皆慟哭。 遏捻可汗衰殘部五千,仰食於溪大角碩舍期。 遺帳伏山林間,狙盜諸蕃自給,稍歸厖特勒。 室韋七姓析回鶻隸之。 仲武諭令羈致可汗等,遏捻懼,挾妻葛祿、子特勒毒斯馳 大中初,仲武討溪,破之,回鶻蹇耗滅, 點戛斯怒,與其相阿播將兵七萬擊

長, 回鶻因遣人隨使者來京師,帝卽册拜嗢祿登里邏汨沒蜜施合俱錄毗伽懷建可汗。 是時,特勒已自稱可汗,居甘州,有磧西諸城。 宣宗務綏柔荒遠,遺使者抵靈州省其酋

餘年,一再獻方物。

懿宗時,大會僕固俊自北庭擊吐蕃,斬論尚熱盡取西州、輪臺等城,使達干米懷玉朝 列 第 百 四十二下 回 酚 下 大一三三

且獻俘,因請命,詔可。 其後王室亂,貢會不常,史亡其傳。

振,時時以玉、馬與邊州相市云。 自會昌時伺邊,羽翼未成,不得逞。 昭宗幸鳳翔, 靈州節度使韓遜表回鶻請率兵赴難,翰林學士韓偓曰:「虜爲國仇舊矣。 今乘我危以冀幸,不可開也。」遂格不報。 然其國卒不

薛延陀者,先與薛種雜居,後滅延陀部有之,號薛延陀,姓一利咥氏。 在鐵勒諸部最雄

張,風俗大抵與突厥同。

號往臣之。回紇、拔野古、阿跌、同羅、僕骨、白霤在鬱督軍山者,東附始畢可汗,乙失鉢在 汗,據貪汗山,奉薛延陀乙失鉢爲野咥可汗,保燕末山。而突厥射匱可汗復彊,二部黜可汗 西突厥處羅可汗之殺鐵勒諸酋也,其下往往相率叛去,推契苾哥楞爲易勿眞莫賀可

金山者,西役葉護可汗。

男反攻頡利,弱之,於是諸姓多叛頡利,歸之者共推爲主, 夷男不敢當。 貞觀二年,葉護死,其國亂,乙失鉢孫曰夷男,率部帳七萬附頡利可汗。 明年,太宗方圖頡 後突厥衰,

也。」旣而延陀使者來,求與突厥平。帝曰:「我約漠以北,延陀制之,漠以南,突厥專之,有 者,見利疾進,不利亟去。今虜不急擊思摩,又不速還,勢必敗,卿等勿與戰,須其歸,可擊 萬七千出雲中,凉州道行軍總管李襲譽經略之。帝敕諸將曰:「延陀度漢,馬已疲。夫用兵 請師。於是韶營州都督張儉統所部與溪、霤、契丹乘其東,朔州道行軍總管李勣衆六萬、騎 乃使大度設勒兵二十萬,南絕漠,壁白道川,率一兵得四馬,擊思摩。思摩走朔州,言狀,且 三千,營朔州,靈州道行軍總管李大亮衆四萬、騎五千,屯靈武,慶州道行軍總管張士貴衆 封泰山,夷男與其下謀曰:「天子封泰山,萬國皆助兵,悉會行在,邊鄣空單,思摩可取也。」 欲產其禍,乃下詔拜其二子皆爲小可汗。 二十萬,以二子大度設、突利失分將之,號南、北部。七年間,使者八朝。帝恐後彊大爲患, 獨邏水之陰,遠京師纔三千里而贏,東室韋,西金山,南突厥,北瀚海,蓋古匈奴地也。 勝兵 過者,以吾鞭鞭之。」夷男以爲寵。頡利可汗之滅,塞隧空荒,夷男率其部稍東,保都尉魋山 地大衆附,於是回紇等諸部莫不伏屬。其弟統特勒入朝,帝以精刀、寶鞭賜之曰:「下有大 謝,歸方物,乃樹牙鬱督軍山,直京師西北六千里,東靺鞨,西葉護突厥,南沙磧,北俱倫水 遣游擊將軍喬師望儳路齎詔書、鼓纛,册拜夷男爲眞珠毗伽可汗。 十五年,帝以李思摩爲可汗,始度河,牙於漠南。夷男惡之,未發。方帝幸洛陽,將遂 夷男已受命,遣使

列

一百四十二下

口

鶴下

輒相掠,誅不赦。延陀父事我而首違詔,得非亂邪?而曰與突厥和,乃故約也,尙何請?」

勸師,及是反自敝云。 亡去,萬徹追弗及。殘卒奔漠北,會雪甚,衆皸踣死者十八。始延陀能以術繪神致雪,冀困 罅,虜潰,部將薛萬徹率勁騎先收執馬者,故延陀不能去,斬首數千級,獲馬萬五千。大度設 勝,至是却騎不用,率五人爲伍,一執馬,四前鬭,令曰:「勝則騎而逐,負者死,沒其家以償 之不置。大度設顧不脫,度諾眞水,陣以待。先是,延陀擊沙鉢羅及阿史那社分,皆以徒戰 屬天,遽率衆走赤柯,度青山,然道回遠,勣選敢死士與突騎徑臘河,趣白道,及大度設,尾 大度設次長城,思摩已南走,大度設度不可得,乃遣人乘長城駡之。適會勣兵至,行壒

因請香。 賦發於爾邪?後有利害,當謹思,毋遽也。」延陀乃遣使謝罪,又遣其仲父沙鉢羅獻馬三千, 「歸語爾可汗,爾自負其彊,以突厥爲弱,厚誅斂之,又取首領以爲質,且我爲天下主,渠嘗 **勣還入定襄,天子遣使者齎璽書勞問,賞功卹死。延陀之使留待命者,帝悉還之,曰:** 帝曰:「延陀本一俟斤,我則立之,度其力孰與頡利比,而敢橈邊乎?」不許昏。

明年,以使來益獻馬、牛、羊、橐它,固求昏。帝與大臣計曰:「延陀屈彊, 股策顧有二,

皆一國主,奈何往朝?有如見款,倘可悔?」夷男曰:「不然。吾聞唐天子有德,四方共臣 之,藉獨留我,磧北亦須有主,然捨我而求它,非計也。」下乃不敢言。 主下嫁,召突利失大享,羣臣侍,陳寶器,奏慶善、破陣盛樂及十部伎,突利失頓首上千萬歲 公主以女我,乘興爲我幸邊,誰與我榮?」乃搜賦諸下羊馬爲貲。或說夷男曰:「可汗與唐, |玄齡日:「今大亂餘氓,痍破未完,戰雖勝,猶危道也。 不如和親。」帝曰:「善。」許以新興公 選士十萬擊之,使無遺種,百年計也,絕昏羈縻,使無邊憂,三十年計也。 韶夷男親迎,帝將幸靈州以成昏事。 夷男大喜,詫曰:「我鐵勒部人耳,上以我爲可汗, 然則孰利?」房

摩果侵掠之。延陀遣突利失寇定襄,詔李勣逐出塞。俄遣使請率師助伐高麗,以刺帝意 以服衆。彼同羅、僕骨力足制延陀而不發,懼我也。我又妻之,固中國婿,名重而援堅,諸 帝引使者謂曰:"「歸語爾可汗,我父子東征,能寇邊者可卽來。」|夷男沮縮,不敢謀,以使謝, 部將歸之,戎狄野心,能自立則叛矣。今絕昏,使諸姓聞之,將爭擊延陀,亡可待也。」李思 疆,中國不抗,故飾子女嫁單于。今北<u>狄弱,我能制之,而延陀方</u>謹事我者,顧新立,倚我 後期,帝亦止行。 畜口耗死僅半,議者謂:「夷狄嘗爲中國私,今禮不具而與昏,恐後有輕中 國心。」乃下詔絕昏,謝其使。或曰:「旣許之,信不可失。」帝曰:「公等計非也。 昔漢匈奴 時帝韶有司受所獻,延陀無府庫,調斂於下,不亟集,又度磧,水草乏,馬羊多死,納貢

百四十二下

Ð

固請 病死,帝爲祭于行。 助軍 帝嘉答。 高麗莫離支令靺鞨以厚利啗夷男,欲與連和,夷男氣素索,不發,亦會

徹與左聽衞大將軍阿史那社念屯勝州,左武侯大將軍薩孤吳仁屯靈州,執失思力與突厥掎 薛沙多彌可汗。方是時,王師猶在遼,因卽寇邊。帝遣江夏王道宗屯朔州,代州都督薛萬 之役,曳莽實爲之謀,國人多怨。及會葬,曳莽亟還部,拔灼分兵襲殺之,自立爲頡利俱利失 角塞下,虜知有備,乃去。 始延陀請以庶子曳莽爲突利失可汗,統東方;嫡子拔灼爲肆葉護可汗,統西方。 白道

那時健,俄爲回紇所殺,盡屠其宗,衆五六萬奔西域〔三〕,立眞珠毗伽可汗昆弟子咄摩支,號 伊特勿失可汗,遣使者上言:「願保鬱督軍山。」帝詔兵部尚書崔敦禮與李勣尉安之,俾定 小戰不利,還怖國人曰:「唐兵至矣!」衆大擾,諸部遂潰。多爾可汗以十餘騎遁去,依阿史 拔灼性下克,多殺父時貴臣而任所親昵,國人不安,而阿波設與唐使者遇於靺鞨東鄙,

孺三萬,遂滅其國。 咄摩支聞天子使者蕭嗣業在回紇,身詣嗣業丐降,入朝,拜右武衞將 叛則擊之。」<u></u>
遺至,<u>咄摩支大駭,陰欲拒戰,外好言乞降。</u>
遺知之,縱兵擊,斬五千餘級,係老 |鐵勒諸部素伏延陀,而咄摩支雖衰孑,尙臣畏之。 帝恐卒爲患,詔]]數等曰:「降則撫之,

軍,賜田宅。

人共追之,至鬱督軍山,見二人焉,曰:「我神也,薛延陀且滅。」追者懼,却走,遂失之。至是 初,延陀將滅,有丐食於其部者,延客帳中,妻視客人而狼首,主不覺,客已食,妻語部

果敗此山下。

將。 至尊爲可汗,世世以奴事,死不恨。」帝剖其地爲州縣,北荒遂平。 級,逐北二百里。萬徹抵北道,諭降回紇諸酋。 虜所遣使踵及帝行在,凡數千人,上言:「天 如驥尾受蒼蠅,可使日千里也。」於是告功太廟,賜民三日酺。 「爾來,若鼠得穴、魚得泉,我爲爾深廣之。」又曰:「我在,天下四夷有不安安之,不樂樂之, 於是鐵勒十一部皆歸命天子,請吏內屬。道宗等徑磧擊延陀餘衆阿波達干,斬首千餘 帝以延陀滅,欲幷契苾等降之,復遣道宗率阿史那社介等分部窮討,帝幸靈州,節度諸 諸姓有來朝者, 帝勞曰:

宗爲置嵠彈州處安之。 後三年,餘部叛,以右領軍大將軍執失思力討平之。至永徽時,延陀部亡散者悉還,高

拔野古 日拔野固,或爲拔曳固,漫散磧北,地千里,直僕骨東,鄰于靺鞨。 帳戶六萬

列傳第

百四十二下

回觸下

六一三九

然節理猶在,世謂康干石者。 兵萬人。 地有薦草,產良馬、精鐵。 俗嗜獵射,少耕穫,乘木逐鹿冰上。風俗大抵鐵勒也,言語 有川日康干河, 斷松投之,三年輒化爲石, 色蒼緻,

軍鄭仁泰擊之,斬其渠首。 都督府,拜屈利失右武衞大將軍,即爲都督。 貞觀三年,與僕骨、同羅、溪、霽同入朝。 至天寶間,能自來朝。 顯慶時,與思結、僕固、同羅叛,以左武衛大將 二十一年,大俟利發屈利失舉部內屬,置幽陵

拔延爲右武衞大將軍、州都督。開元初,爲首領僕固所殺,詣朔方降,有司誅之。子曰懷恩, 至德時以功至朔方節度使,自有傳。 厥,後附薛延陀。 僕骨亦曰僕固,在多覽葛之東。帳戶三萬,兵萬人。地最北,俗梗驚,難召率。 延陀滅,其酋娑匐俟利發歌濫拔延始內屬(三),以其地爲金微州, 始臣突 拜歌濫

同羅在薛延陀北, 多覽葛之東,距京師七千里而贏, 勝兵三萬。 貞觀二年、 遣使者入

朝。 反,劫其兵用之,號「曳落河」者也。 曳落河,猶言健兒云。 久之,請內屬,置龜林都督府,拜酋俟利發時健啜爲左領軍大將軍,即授都督。 安祿山

欣然避位。帝嘉其讓,以阿貪支爲右領軍衞大將軍、皋蘭州刺史,汪雲麾將軍兼俟利發爲 舉部內向,以其地爲皋蘭都督府,後分東、西州。太宗以阿貪支於汪屬尊,遣譯者諷汪,汪 舒翰拔石堡城,遷右武衞大將軍,封汝南郡公。 **渾在諸部最南者。突厥頡利敗時,有俟利發阿貪支款塞。**薛延陀之滅,大俟利發渾汪 阿貪支死,子回貴嗣。 回貴死,子大壽嗣。 大壽死,子釋之嗣。釋之鷙勇不凡,從哥

忠於我?」折其脛,囚死彌峩城。 懷恩之走,聲爲歸鎮。 釋之曰:「是必衆潰。」 將拒之,其甥張韶曰:「彼如悔禍還鎮,渠可不 」釋之信之,乃納懷恩。 李光弼保河陽,釋之以朔方都知兵馬使爲裨將,進寧朔郡王,知朔方節度留後。 懷恩已入,使韶殺釋之,收其軍。 釋之子城,建中功臣也,自有傳。 已而惡韶,駡曰:「若負舅,肯 僕固

莫賀咄特勒,皆有勇。 也。 間,以其地爲楡溪州。 大和中,其種帳附於振武云。 契苾亦曰契苾羽,在焉耆西北鷹娑川,多覽葛之南。其會哥楞自號易勿眞莫賀可汗 永徽 莫賀咄死,子何力尚紐,率其部來歸,時貞觀六年也。 四年,以其部爲賀蘭都督府, 隸燕然都護。 何力有戰功,忠節臣 韶處之甘、凉

發,繼爲都督。 回紇皆朝,以其地爲燕然都督府,授右衞大將軍,即爲府都督。 多覽葛亦曰多濫,在薛延陀東,濱同羅水,勝兵萬人。 延陀已滅,其酋俟斤多濫葛末與 死,以多濫葛塞匐爲大俟利

自 一突厥默啜所來降。 阿跌,亦日 河咥, 其後, 或爲欧跌。 光進、光顏皆以戰功至大官,賜李氏,附屬籍, 始與拔野古等皆朝,以其地爲雞田 州 自有傳。 開元 中,跌跌思泰

一邏祿本突厥諸族,在北庭西北、金山之西,跨僕固振水,包多怛嶺,與車鼻部接。 謀落,或爲謀刺;二熾俟,或爲婆匐;三踏實力。 永徽初, 高偘之伐車鼻可汗,

级不常也。 都督府,即用其酋長爲都督。 族皆內屬。 後稍南徙,自號「三姓葉護」,兵疆,甘於鬭,廷州以西諸突厥皆畏之。 顯慶二年, 以謀落部爲陰山都督府, 後分熾俟部置金附州。三族當東、西突厥間,常視其興衰,附 微俟部爲大漠都督府, 踏實力部爲玄池

叛酋 葛祿之處烏德犍山者臣回紇,在金山 走其可汗阿史那施於北庭,奔京師。 阿布思 開元 初,再來朝。 ,進封金山 那王。 天寶時,與回紇、拔悉蜜共攻殺烏蘇米施可汗, 天寶間,凡五朝。 [、北庭者自立葉護,歲來朝。 葛祿與九姓復立回紇葉護,所謂懷仁可汗者也。 久之,葉護頓毗伽縛突厥 又與回紇擊拔悉蜜

至德後,葛邏 禄寖盛, 與回紇爭彊, 徙十姓可汗故地,盡有碎葉、怛邏斯諸城。 然限回

l統,故朝會不能自達于朝。

史那施爲賀臘毗伽 拔悉蜜,貞觀二十三年始來朝。 可汗,遣使者入謝,玄宗賜紫文袍、金鈿帶、魚袋。 天寶初, 與回紇葉護擊殺突厥 可汗, 不三歲,爲葛邏祿、回 立拔悉蜜大酋 SH

列

僔

第

百

74

+

二 下

回翻下

舵所破,奔北庭。 後朝京師,拜左武衞將軍,地與衆歸回紇。

葬哭泣, 緝鳥羽爲服。 草爲廬。 都播,亦曰都波,其地北瀕小海,西堅昆,南回紇,分三部,皆自統制。 無畜牧,不知稼穡,土多百合草,掇其根以飯,捕魚、鳥、獸食之。 與突厥同。 其昏姻, 無刑罰, 富者納馬,貧者效鹿皮草根。 盜者倍輸其臟。 貞觀二十一年, 死以木匵斂置山中, 因骨利幹入朝,亦以使通 其俗無歲時。 衣貂鹿皮, 或系于樹, 貧者 没

其地北距海,去京師最遠,又北度海則晝長夜短,日入亨羊胛,熟,東方已明,蓋近日出 骨利幹處瀚海北,勝兵五千。草多百合。產良馬,首似橐它,筋骼壯大,日中馳數百

處也。

其異者號十驥,皆爲美名:曰「騰霜白」,曰「皎雪騘」,曰「凝露騘」,曰「縣光騘」,曰「決波 旣 入朝,韶遣雲麾將軍康蘇蜜勞答,以其地爲玄闕州。其大酋俟斤因使者獻馬,帝取

騟」,曰「飛霞驃」,曰「發電赤」,曰「流金甌」,曰「翔麟紫」,曰「奔虹赤」,厚禮其使。 以玄闕州更爲余吾州,隸瀚海都督府。 延載初,亦來朝。 龍朔中,

南契丹,北烏羅渾,東靺鞨,西拔野古,地圓袤二千里,山繚其外,勝兵萬人。業射獵,以赤皮 白霫居鮮卑故地,直京師東北五千里,與同羅、僕骨接。避薛延陀,保奧支水、冷陘山,

緣衣,婦貫銅釧,以子鈴綴襟。其部有三:日居延,日無若沒,日潢水。其君長臣突厥頡利

可汗爲俟斤。

貞觀中再來朝,後列其地爲寘顏州,以別部爲居延州,即用俟斤爲刺史。 含珠死,弟厥都繼之。後無聞焉。 顯慶五年,授

來朝,列其地州縣之。

斛薛處多濫葛北,

勝兵萬人。

奚結處同羅北,思結在延陀故牙,二部合兵凡二萬。

旣

列

太宗時,北狄能自通者,又有烏羅渾,或曰烏洛侯,曰烏羅護,直京師東北六千里而贏,

東靺鞨,西突厥,南契丹,北烏丸,大抵風俗皆靺鞨也。烏丸或曰古丸。

又有鞠,或曰臧,居拔野古東北,有木無草,地多苔。無羊馬,人豢鹿若牛馬,惟食苔,俗

以駕車。又以鹿皮爲衣,聚木作屋,奪卑共居。

又有俞折者,地差大,俗與拔野古相埒。少羊馬,多貂鼠。

勝兵三萬。地常積雪,木不彫。以馬耕田,馬色皆駮,因以名國云。北極於海,雖畜馬而不 乘,資運酪以食。好與結骨戰,人貌多似結骨,而語不相通。皆劗髮,樺皮帽。構木類井幹, 又有駁馬者、或日弊刺,日遏羅支,直突厥之北,距京師萬四千里。隨水草,然喜居山,

覆樺爲室。各有小君長,不能相臣也。

此皆古所未賓者,當貞觀遠永徽,奉貂馬入朝,或一再至。 大漢者,處內之北,饒羊馬,人物頎大,故以自名。與內俱鄰於點嘎斯劍海之瀕。

點戛斯,古堅昆國也。 地當伊吾之西,焉耆北,白山之旁。或曰居勿,曰結骨。 其種雜

于時東距單于廷七千里,南車師五千里,郅支留都之。故後世得其地者訛爲結骨,稍號說 丁零,乃匈奴西鄙也。 匈奴封漢降將李陵爲右賢王,衞律爲丁零王。 後郅支單于破堅昆,

骨,亦日紇扢斯云。

男子有勇黥其手,女已嫁黥項。雜居多淫佚。 赤髮、皙面、綠瞳,以黑髮爲不祥。 衆數十萬,勝兵八萬,直回紇西北三千里,南依貪漫山。地夏沮洳,多積雪。人皆長大, 黑瞳者,必日陵苗裔也。 男少女多,以環貫耳,俗趫伉,

幟,其騎士析木爲盾,蔽股足,又以圓盾傅肩,而捍矢刃。 骨,口出頤下。鳥,鴈、鶩、烏鵲、鷹、隼。木,松、樺、楡、柳、蒲。 有野馬、骨咄、黄羊、羱羝、鹿、黑尾,黑尾者似麞,尾大而黑。魚,有蔑者長七八尺,莫痕者無 酒,而無果蔬。 大河亦半冰。 謂歲首爲茂師哀,以三哀爲一時〔8〕,以十二物紀年,如歲在寅則日虎年。 有金、鐵、錫,每雨,俗必得鐵,號迦沙,爲兵絕犀利,常以輸突厥。其戰有弓矢、旗 稜有禾、栗、大小麥、青稞,步磑以爲麪糜。 畜、馬至壯大,以善鬭者爲頭馬,有橐它、牛、羊,牛爲多,富農至數千。 其獸 穄以三月種,九月穫,以飯,以醸 松高者仰射不能及顕,而樺 氣多寒,雖

帽貂,夏帽金釦,銳頂而卷末,諸下皆帽白氈,喜佩刀礪,賤者衣皮不帽,女衣毳毼、錦、罽、 其君曰「阿熱」,遂姓阿熱氏,建一纛,下皆尙赤,餘以部落爲之號。服貴紹、豽,阿熱冬

列

傳第一百四十二下

回瞻下

大一四七

最嚴,臨陣橈、率使不稱、妄議國若盜者皆斷首,子爲盜,以首着父頸,非死不脫。 火之,收其骨,歲而乃墓,然後哭泣有節。多處室,木皮爲覆。其文字言語,與回鶻正同。法 及馬酪,惟阿熱設餅餌。樂有笛、鼓、笙、觱篥、盤鈴。戲有弄駝、師子、馬伎、繩伎。 將軍、達干六等。宰相七,都督三、職使十,皆典兵;長史十五,將軍、達干無員。 綾,蓋安西、北庭、大食所貿售也。 阿熱駐牙青山,周栅代垣, 聯氈爲帳,號「密的支」,它首 主水草,祭無時,呼巫爲「甘」。 昏嫁納羊馬以聘,富者或百千計。 喪不剺面,三環尸哭,乃 領居小帳。 凡調兵,諸部役屬者悉行。內貂鼠、靑鼠爲賦。 其官,宰相、都督、職使、長史、 諸部食肉 祠神惟

經其國,合而北入于海。 百里得仙娥河,河東北曰雪山,地多水泉。青山之東,有水曰劍河,偶艇以度,水悉東北流, 許至鵬鵜泉,泉西北至回鶻牙千五百里許,而有東、西二道,泉之北,東道也。回鶻牙北六 阿熱牙至回鶻牙所,橐它四十日行。使者道出天德右二百里許抵西受降城,北三百里

乘木馬馳冰上,以板藉足,屈木支腋,蹴輒百步,勢迅激。 夜鈔盜,晝伏匿,堅昆之人得以役 東至木馬突厥三部落,日都播、彌列、哥餓支,其酋長皆爲頡斤。樺皮覆室,多善馬,俗

屬之。

治其國,未始與中國通。」貞觀二十二年,聞鐵勒等已入臣,卽遣使者獻方物,其酋長俟利發 督,隸燕然都護。高宗世,再來朝。景龍中,獻方物,中宗引使者勞之曰:「而國興我同宗 失鉢屈阿棧身入朝,太宗勞享之,謂羣臣曰:「往渭橋斬三突厥,自謂功多,今俟利發在席 始隸薛延陀,延陀以頡利發一人監國。其酋長三人,日訖悉輩,日居沙波輩,日阿米輩,共 更覺過之。」俟利發酒酣,奏願得持笏,帝以其地爲堅昆府,拜俟利發左屯衞大將軍,卽爲都 堅昆,本彊國也,地與突厥等,突厥以女妻其酋豪,東至骨利幹,南吐蕃,西南葛邏祿

以待點戛斯護送。大食有重錦,其載二十橐它乃勝,旣不可兼負,故裁爲二十匹,每三歲一 餉 點 戛 斯。 云,又訛爲戛戛斯。然常與大食、吐蕃、葛祿相依杖,吐蕃之往來者畏回鶻剽鈔,必住葛祿 乾元中,爲回紇所破,自是不能通中國。後狄語訛爲點戛斯,蓋回鶻謂之,若曰黃赤面 而回鶻授其君長阿熱官爲「毗伽頓頡斤」。

非它蕃比。」屬以酒,使者頓首。」玄宗世,四朝獻。

導阿熱破殺回鶻可汗,諸特勒皆潰。阿熱身自將,焚其牙及公主所廬金帳者,回鶻可汗常 帳,於爾帳前馳我馬,植我旗,爾能抗,亟來,卽不能,當疾去。」回鶻不能討,其將句錄莫賀 回鶻遣宰相伐之,不勝,挐鬭二十年不解。阿熱恃勝,乃肆詈曰:「爾運盡矣!我將收爾金 回鶻稍衰,阿熱卽自稱可汗。其母,突騎施女也,爲母可敦;妻葛祿葉護女,爲可敦。

列傳

第一百四十二下

回

鶻下

馬行 + 乃悉收其寶貲, 五 日。 阿熱以公主唐貴女, 丼得太和公主, 遣使者衞送公主還朝, 遂徙牙牢山之南。 牢山亦曰賭滿, 爲回鶻烏介可汗邀取之, 距回鶻舊牙度

今點戛 宰相德裕上言: 屬籍 遠,能脩職貢,命太僕卿趙蕃持節臨慰其國, 言猛 一,素者,左也,謂武猛善左射者。 會昌中,阿熱以使者見殺,無以通于朝,復遣注吾合素上書言狀。 斯大通中國, 「貞觀時, 宜爲王會圖以示後世。」 遠國皆來, 行三歲至京師,武宗大悅, 中書侍郞顏師古請如周史臣集四 韶宰相卽鴻臚寺見使者,使譯官考山 有韶以鴻臚所得續著之。 班渤海使者上, 注吾, 夷朝事 又韶阿熱著宗正 虜姓也; 爲王會篇。 ,以其處窮 Щ 國 風

濛爲巡 | 鶴盛時有册號,今幸衰亡,又加點戛斯,後且生患。 嗣位 衰。 節 册點戛斯為英武誠明可汗。 ,欲如先帝意,或謂<u>點</u>戛斯 乃以右散騎常侍李拭使點戛斯,册君長爲宗英雄武誠明可汗。 是時,烏介可汗餘衆託黑車子,阿熱願乘秋馬肥擊取之, 邊使,朝廷亦以河、隴四鎭十八州久淪戎狄,幸回鶻破弱, 逮咸通間,三來朝。 小種,不足與唐抗, 乃止。 韶宰相與臺省四品以上 然卒不能取回鶻。 至大中元年,卒韶鴻臚卿李業持 表天子請師。 吐蕃 未行,而武宗崩。 後之朝聘册命,史臣 亂, 一官議, 相殘齧 帝令給事 皆曰:「回 미 宣宗 中劉 乘

也。 責償也多,慊而不滿則滋怨,化以仁義則頑,示以法則忿,熟我險易則爲患也博而慘,療餒 殺近臣, 求索無倪。 · 夫用之以權,制之以謀,惟<u>太宗</u>能之。 太宗初興,嘗用突厥矣,不勝其暴,卒縛而臣之。 贊曰:夷狄資悍貪,人外而獸內,惟剽奪是視。 故陽、武之興,未嘗與共功,蓋疏而不戚 **德宗又用吐蕃矣,劫平凉,敗上將,空破西陲。所謂引外禍平內**亂者 若二主懦昏,狃而狎之,烏勝其弊哉!彼親之則 肅宗用回紇矣,至略華人,辱太子,答

校勘記

以冶葛,何時可哉?故春秋許夷狄者,不一而足,信矣。

思忠爲河西党項都將 西党項都將」。 (陳)賦索無厭,已于貞元中自石州逃奔河西。 舊書卷一九八党項羌傳、唐會要卷九八俱云: 各本原無「河」字。按通鑑卷二四六載:會昌二年九月,「以李思忠爲河 本書卷二二一上党項傳合。 六州党項因永安鎮將阿史那思昧 通鑑稱「河西党項

列

第一

六一五二

(三) 衆五六萬奔西域 「西域」,各本原作「西城」。舊書卷一九九下鐵勒傳作「西域」。 按唐人所謂

今改。

「西城」,

一般指西受降城,

是時尙未築。

突厥集史卷一四新唐書薛延陀傳校注謂當從舊書。

(三) 娑匐俟利發歌濫拔延 三姓之一。 通典卷一九九作「婆匐俟利發歌藍伏延」。 按本卷下文, 婆匐爲萬邏祿

(图) 謂歲首為茂師哀以三哀爲一時 月爲哀,每三哀爲一時。」此處文義欠明。 按寰宇記卷一九九敍黠戛斯之土俗云:「人謂歲首爲茂師,

謂

